



DEVX LIVRES
DE CHIRVRGIE.

1. De la generatiõ de l'homme,
& maniere d'extraire les enfans
hors du vêtre de la mere, ensem-
ble ce qu'il faut faire pour la faire
mieux, & plus tost accoucher, a-
uec la cure de plusieurs maladies
qui luy peuuent suruenir.

2. Des monstres tant terrestres que
marins, avec leurs portrais.

*Plus vn petit traité des plaies faites
aux parties nerveuses.*

Par Ambroise. Paré, premier Chirur-
gien du Roy, & iuré à Paris.

A PARIS,
Chez André Wechel.

Auec priuilege du Roy.

Gautier 1573

35181





1815



A M O N S E I-
G N E V R L E D V C D'V-
Z E' S, PAIR DE FRANCE
C O N T E D E C R V S S O L
E T D E T O N N A I R E,
Prince de Soyon.



M O N S E I G N E V R,
estant vn iour près de
vous (comme de vostre
grace vous m'y aués don-
né accès) & deuissans de
plusieurs propos, vous
entraistés sur la genera-
tion, conception & natiuité des enfans, &
mesme comment ils se forment au ventre de
la mere, ou tout subit vous en declarey ce que
i'en auois appris, tant par la lecture des liures
des antiens, que par les anathomies qu'en a-
uois faiët des femmes mortes, estans grosses
d'enfans, ou vous printes (se me semble) vn

fort grand plaisir (& moy voiant les dons de
 Dieu si excellens en vous, lequel vous a doüé
 d'un esprit releué, & amateur de toutes bon-
 nes lettres, chose non seulement bien seante,
 mais du tout necessaire aux grands seigneurs
 comme vous, & sans laquelle ils sont comme
 vn nauire flottant sur mer, sans aucun gou-
 uernail : mais Dieu mercy ie vous voy fort
 loing de ce danger la, veu les rares vertus qui
 sont en vous, lesquelles vous ont, à bõ droict,
 aproché de la personne du Roy, & de la Roy-
 ne sa mere, pour estre auiourd'huy assis en leur
 conseil priué) dont après auoir longuement
 discouru cõme l'enfant se forme, me priastes
 qu'e vostre faueur i eusse à rediger par escript
 tout ce que i auois mis sus le bureau, ce que i ay
 bien voulu faire, selon mon pouuoir, pour sa-
 tisfaire à vostre priere: car vous m'aués tous-
 iours (depuis que i ay vostre cognoissance, de
 vostre grace) monsté vn amour & biẽ veil-
 lance, & encores faiétes à present, & confesse
 estre de trop petite estoiffe pour auoir merité
 cela de vous : Partant ie vous supplie hum-
 blemẽt, Monseigneur, vouldoir receuoir ce miẽ
 petit æuvre, lequel ie vous presente, en reco-
 gnoissance & tesmoignage de ma bonne vo-
 lonté.

lonté . Or tout homme doit tenir pour une chose vaine & ridicule , de desirer à cognoistre les choses externes , & estre ignorant de soy : car aucuns se tormentent pour scauoir le nombre des estoilles , & le mouuement du Ciel:autres des nouuelles des Indes , & lieux loingtains , mais sur toutes choses chacun se doit plustost estudier à cognoistre soy mesme, qui sera par la contemplation de la composition de son corps , auquel Dieu a créé parties infinies , dont chacune toutefois a sa propre substance & nature à part, & n'y a partie superflue n'y defaillante, laquelle n'aye son office & utilité necessaire, tant pour viure & se mouuoir, que pour sentir & entendre: & sont en si grand nombre & varieté, concathenees & assemblees , qu'entre toutes les œuures de Dieu, & le corps humain composé d'icelles, est trouué le plus excellent, en ce qu'il est parfaitement accompli de toutes les vertus, perfections, & dignités qui se peuuent imaginer: Car il n'y a creature en ce monde plus excellente , que celle pour laquelle toutes les autres ont esté faiçtes, à scauoir le Ciel , les quatre elements, & generalement toutes choses contenues en iceux. Et partant après que les antiës

Philosophes l'eurent bien espluché par le menu, le nōmerent, Microcosme, qui signifie petit monde, voulans dire que l'homme ne contiēt en soy chose de moindre admiratiō, que faiēt le Ciel vniuersel, tant celeste qu'elemētaire: ce que non seulemēt nous confesserons avec eux, mais dirons estre en l'hōme d'auantage qu'en toute la masse de l'vniuers, scauoir est l'ame raisonnable, en laquelle sont imprimés les vestiges & caractères de l'image de Dieu. D'auantage monseigneur, ie n'ay voulu me contenter d'escrire seulement la generation de l'homme, mais ausy m'a semblé bon y adiouter plusieurs autres choses necessaires au Chirurgien de scauoir: comme la maniere d'extraire les enfans, tant mors que viuans, hors du ventre de leur mere, lors que nature de soy ne peut venir à son effect, & plusieurs autres maladies & accidens, qui aduiennent à icelles, semblablement les instrumens propres pour leur curation, desquels le Chirurgien se pourra aider. D'auantage i'ay encore recueilly plusieurs monstres, tant de ceux qui sont produits aux corps des hommes & femmes, qu'és autres animaux terrestres, maritimes, & volatiles: & ay fait tailler leurs figures &

*res & portraiçts, à fin que chacun reconnoisse
la grandeur de nature, chambriere de ce grād
Dieu. Auquel ie supplie (Monseigneur) qu'il
vous vueille longuement conseruer en vostre
prosperité, & à la fin vous donner felici-
té perpetuelle, ensemble à Madame vostre
compaigne.*

**Vostre treshumble seruiteur
à iamais. A. Pare.**

ā iij

A V L E C T E V R

B E N E V O L E.



M Y Lecteur , pour satisfaire au vouloir & priere de monseigneur le Duc d'Vzés (ce qui m'est commandement) i'ay volontiers entrepris cet œeuure, combien que ie sceusse bien auant qu'y mettre la main, que plusieurs antiens & modernes auoiēt traicté de ces matieres: parquoy si quelques vns me vouloient obiecter qu'en vain ay trauaillé , ie leur respons que si ceux qui ont escript après les premiers se fusent contentés de ce qui auoit este escript auant eux, nous aurions pour le iourdhui biē peu de liures en chacun art & profession, & vn tresgrand deffaut de plusieurs choses necessaires à la vie humaine: Encore si peu que nous en aurions seroit plain de grādes nuees, & obscurités , qui seroit cause que bien peu de gēs ne les pourroiet entendre : d'auantage nous sommes, (comme l'on dict
en pro-

en proverbe) enfans sus les espaules du geant , c'est à dire que nous voyons ce que nos ancestres ont veu , & pou- uons encore d'escouurir d'auantage : Parquoy si en cet ceuvre i'ay imité les doctes, qui ont escript deuant moy les vns après les autres, ce n'a esté avec intention de desrober leurs peines, & me parer de leurs plumes, mais plustost pour renouueler leur labour & vertus, & quasi les faire renaistre, & ne pour- roient à l'encontre de moy leuer aucun procès, qui ne leur ay non plus faict de tort en cecy, que feroit vne chandelle venant à prendre sa lumiere d'vne au- tre: & partant on ne me scauroit iuste- mēt reprédre pour cela, encore moins de ce que i'ay remarqué & cogneu de notable en plusieurs cures , qui sont passées par mes mains , comme i'ay cy deuant monstté par mes escriis, ou i'ay récité plusieurs histoires , faisant re- cuiel d'icelles , pour suruenir à la me- moire, que le temps desrobe d'heure à autre , & estime que mon labour ne se- ra du tout inutile, quand ores il ne pro-

fiteroit que pour instruire & donner
 courage aux ieunes estudians, qui desi-
 rent paruenir à la Chirurgie, auxquels
 mes escrits s'adressent, & non aux do-
 ctes, lesquels ie supplie que s'ils desi-
 rent (comme ils ne peuuent faillir de
 desirer) quelque chose, qu'ils facent
 enuers moy ce que ie ferois volontiers
 enuers eux, c'est à dire, me remonstrēt
 humainement & gracieusement les
 fautes qu'ils y trouueront: car ie leur
 promets que tant s'en faut que ie
 m'obstine contre leurs iugemens, &
 plus saine correction, que ie leur
 scauray bon gré, & leur demeureray
 grandement redevable & ateneu,
 pour le desir que i'ay tousiours eu que
 chacun s'estudie à faire valoir de
 mieux en mieux le tallant de son art
 & profession, d'autant que nous som-
 mes hommes qui pouons appren-
 dre tous les iours de nostre vie les
 vns des autres: Si ce bien la m'ad-
 uient, & que mes peines soient bien
 receües, i'emploiray (s'il plaist à Dieu,
 & si

& si ie vy) encore toutes mes forces,
pour accomplir autre chose promi-
se à mon Roy , ou l'on cognoistra que
i'ay employé du temps , de la peine, &
grands frais.

F I N.

EXTRACT DV

PRIVILEGE.

Lest permis & octroyé à Maistre Ambroise Paré, premier Chirurgien du Roy, & Iuré à Paris, faire imprimer un liure intitulé Deux liures de Chirurgie, l'un traitât de la generatiõ de l'homme, & l'autre des monstres tant terrestres que marins, avec leurs portrais, & ct. & iceluy mettre & exposer en vente par tels Imprimeurs, libraires, & marchans que bon luy semblera : sans ce qu'autres Imprimeurs, libraires, marchands, & autres de quelque qualité ou condition qu'ils soient, & pour quelque cause que ce soit, puissent imprimer, mettre & exposer en vente ledict liure, durant le temps & terme de dix ans ensuiuants & consecutifs, commençant du iour & datte des lettres du Priuilege, sur peine d'amende arbitraire, & de confiscation desdicts liures, qui ainsy se trouueront imprimez, sans charge ny commission dudit Paré : ainsy que plus à plein est contenu audittes lettres du Priuilege, sur ce donné au boix de Bouloigne les Paris, le quatriesme iour de Iuillet, l'an de grace mil cinq cents soixante & douze : & de nostre regne le douziesme.

Par le Roy en son Conseil.

DE VABRES.

T A B L E D E S

C H A P I T R E S.

Premier liure.

Pourquoy les parties generatiues sont
accompagnées de grand plaisir. Cha-
pitre. i. page vi.

De quelle qualité est la semence, dont est en-
gendré le masle & la femelle. ij. xiiij.

Pourquoy les femelles des bestes brutes, après
estre emprainctes, ne desirent plus de fac-
coupler aux masles. iiii. xviii.

La maniere d'abiter & faire generatiō. iiii. xxi.

Les signes que la femme aura conçu, & est
grosse d'enfant. v. xxii.

Comment la matrice se reserre si tost que la se-
mence y est iettée & retenue. vi. xxvi.

De la generation du nombril. vii. xxviii.

Des vaisseaux qui sont au nombril de l'enfant.
viii. xxxiii.

De l'ebulition des semences à la matrice, & des
trois empoules, qui sont les lieux des trois
membres principaux, à scauoir le foye, le cœur
& le cerueau. ix. xxxvii.

La premiere empoule ou le foye se concret.
xxxviii.

La seconde empoule ou le cœur se concret. xl.

De la troisieme empoule ou la teste se forme.
x. xli.

De l'ame.	xi. xliiii.
Des sens interieurs.	lii.
Du sens commun.	lv.
Du sens imaginatif, estimatif, ou phâtasie.	lviii.
Du sens appelé cogitation, ratiocination, ou entendement.	lx.
Du sens memoratif.	lxii.
Des excremens naturels, & de ceux que iette l'enfant en la matrice de sa mere.	xii. lxxvii.
Comme l'enfant estât à terme, sefforce de sortir hors du ventre de sa mere, & de sa natiuité.	xlii. lxxiii.
De la situation de l'enfant au vêtre de la mere.	xliii. lxxvii.
Du temps commode ou incommode de la natiuité de l'enfant.	xv. lxxxii.
Les signes à la femme de bien tost enfanter.	xvi. lxxxvii.
Ce qu'il faut faire à l'enfant subit qu'il est nay.	xvii. xcii.
De la maniere d'extraire l'arrierefais après l'enfantement.	xviii. xcvi.
Ce qu'on doit bailler à l'enfant par la bouche deuant que luy donner à teter.	xix. ciii.
De l'election d'une bonne nourrice.	xx. cv.
De quelle qualité doit estre choisie la nourrice.	xxi. cviii.
De l'aage de la nourrice.	xxii. ibidem.
De l'habitude du corps de la nourrice.	xxiii. cix.
Des meurs de la nourrice.	xxiiii. cx.
De la	Des

- Des mammelles, & de la poictrine de la nour-
riçe. xxv. cxiii.
- De la nature du laiçt de la nourriçe. xxvi. cxiiii
- De la distance du temps que la nourriçe a en-
fanté, & du sexe de son enfant. xxvii. cxvii.
- Du regime de la nourriçe. xxviii. cxviii.
- Comme l'on doit acouter la boullie du petit
enfant. xxix. cxix.
- En quel téps il faut seurer l'enfant. xxx. cxxiii.
- Les lignes pour cognoistre si l'enfant est mort
ou viuât au ventre de la mere. xxxi. cxxviii.
- De la maniere de bien situer la femme pour
luy extraire l'enfant. xxxii. cxxxiiii.
- De la maniere de tirer les enfans hors le ventre
de la mere tât mors que viuâs. xxxiii. cxxxviii
- Ce qu'il faut faire à la femme subit qu'elle est
accouchee. xxxiiii. cli.
- Ce qu'il faut faire aux tetins de la nouuelle ac-
couchee. xxxv. cliiii.
- Des causes de la difficulté d'éfanter. xxxvi. clxi
- Des causes de l'auortement des femmes.
xxxvii. clxvii.
- Des moyens de suruenir à l'enfant, la mere
morte. xxxviii. clxxiiii.
- De la superfetation, c'est à dire conception rei-
teree, ou surengendree. xxxix. clxx.
- De la molle engendree en la matrice, appelee
des femmes mauuais germe. xl. cxxxv.
- Des signes pour cognoistre vne molle d'aueç
vn enfant. xli. clxxxviii.
- Cure de la molle. xlii. cxciii.

- De la sterilité , qui est défaut d'engendrer aux hommes. xliiii. cxcv.
- De la sterilité & fecondité des femmes. xliiii. cxcix.
- Les signes de la matrice intéperee en chaleur. xlv. cciii.
- De la precipitation , ou peruersion de la matrice. xlvi. ccvi.
- Cure de la precipitation de la matrice. xlvii. ccx.
- Comme il faut situer la femme lors que la matrice est grandement tombee hors de la nature de la femme. xlviii. ccxi.
- De la membrane appelee hymen. xlix. ccxvi.
- Histoire memorable de Iean V Vier, de la membrane appelee hymen. l. ccxxiii.
- De la suffocation de la matrice , appelee des femmes , le mal de la mere, & de ses causes. li. ccxxv.
- Les signes que tost la femme aura suffocation de matrice. lii. ccxxxii.
- Les signes pour cognoistre si vne femme est morte ou non par vne suffocation de matrice. liii. ccxxxiiii.
- Des differences de suffocation de matrice. liiii. ccxxxvii.
- Les signes pour cognoistre si la suffocatio viét par la semence retenüe & corrompue, & nõ du sang menstrual. lv. ccxxxix.
- La cure de la suffocatio de la matrice. lvi. ccxl.
- Du flux menstrual des femmes. lvii. ccli.
- La cau-

- La cause des mēstrues aux femmes. lvi. cclv.
 Les causes pourquoy le flux menstrual est retenu aux femmes. lix. cclvii.
 Les signes & prognosticq que les mēstrues sōt retenues, & les maladies & accidens qui en aduiennent. lx. cclxi.
 Des moyēs pour prouoquer le flux menstrual aux femmes. lxi. cclxv.
 Les signes que les moys veulent couller. lxii. cclxix.
 Les accidens qui viennent au flux de sanc menstrual immoderé. lxiii. cclxxvi.
 Les moiens d'arrester le flux menstrual excessif. lxiiii. cclxxix.
 Les remedes particuliers qu'on doit appliquer en la matrice pour estancher le flux de sang immoderé. lxv. cclxxxii.
 Du flux muliebres. lxvi. cclxxxiiii.
 Causes des fleurs blanches. lxvii. cclxxxvi.
 Cure du flux muliebres. lxviii. cclxxxix.
 Des hemorrhoides qui naissent au col de la matrice. lxix. ccxcv.
 Curatiō des verrues faites au col de la matrice. lxx. ccxcvii.
 Des ragadies ou condilomes. lxxi. ccciii.
 Du prurit de la matrice. lxxii. cccv.
 De la relaxation du gros intestin qui se fait aux femmes. lxxiii. cccx.
 De la relaxation & enfleure du nombril, qui se fait aux enfans. lxxiiii. cccxiii.
 De la descēte des intestins en la bourse des pe-

tis enfans, appelee hargne, ou greueure.

lxxv. cccxv.

La curation de la hargne des petis enfans.

lxxvi. cccxviii.

De la relaxation du gros boyau aux petis enfans.

lxxvii. cccxxviii.

De la douleur des dents.

lxxviii. cccxxxi.

Les signes pour cognoistre si la douleur est faite de matiere chaude ou froide.

cccxxxiii.

Cure.

cccxxxiiii.

De la pourriture, erosion, & pertuisement des dets, & des verms trouués en la racine d'icelles.

cccxl.

De la stupeur, ou congelation, ou endormissement des dents.

cccxlvi.

De la maniere d'arracher & rompre les dents.

ccccli.

Les instrumens propres pour arracher & rompre les dents.

lxxix. cccli.

La maniere de remettre les dents artificielles.

ccclviii.

De la l'imosité ou roüilleure des dets, & la maniere de les conseruer.

ccclix.

De la douleur des dents des petis enfans.

ccclxi.

Second liure.

Des causes des monstres. chapit. i. page.

ccclxvi.

Exéple de la gloire de Dieu. ii. ccclxviii.

Exemple de l'ire de Dieu.

iii. ccclxix.

Exem-

Exemple de la trop grande quantité de semence. iiii. cccclxx.

Des femmes qui portent plusieurs enfans d'une ventree. v. cccxcviii.

Des hermafrodites ou androgenes, c'est à dire qu'en vn mesme corps est trouué deux sexes. vi. cccciiii.

Histoires memorables de certaines femmes qui sont degenerées en homes. vii. ccccxvii.

Exemple du defaut de la quantité de la semence. viii. ccccxxi.

Exemple des monstres qui se font par imagination. ix. ccccxxvi.

Exemple de l'angustie ou petitesse de la matrice. x. ccccxxxii.

Exemple des monstres qui se font, la mere sestant tenue trop longuement assise, aiant eu les cuisses croisées, ou pour se estre bandee trop le ventre durant qu'elle estoit grosse. xi. ccccxxxiiii.

Exemple des monstres qui sont engendrés, la mere aiant receu quelque coup, ou chëute, estant grosse d'enfant. xii. ccccxxxvi.

Exemples des monstres qui se font par les maladies hereditaires, ou accidentales. xiii. ccccxxxvii.

Exemple des monstres faits par maladies accidentales. xiiii. ccccxl.

Des pierres qui s'engendrēt au corps humain. xv. ccccxlvi.

Des verms. xvi. cccclii.

- De certaines choses estranges que nature appelle par son incomprehensible prouidence.
xvii. ccccli.iii.
- De plusieurs autres choses estranges.
xviii. cccclxii.
- Exemple des monstres qui se font par pourriture & corruption.
xix. cccclxv.
- Exemple de la commixtion & meslange de semence.
xx. cccclxxii.
- Exemple de l'artifice des meschans gueux de lostiere.
xxi. cccclxxxvi.
- L'imposture d'une belitreffe faignant auoir vn chancre en la mammelle.
xxii. cccclxxxviii.
- L'imposture d'un certain maraut qui contrefaisoit le ladre.
xxiii. cccxcxi.
- D'une cagnardiere faignant estre malade du mal S. Fiacre, & luy sortoit du cul vn lóg, & gros boyau fait par artifice.
xxiiii. cccxcv.
- D'une grosse garce de Normádie, qui faignoit auoir vn serpent dás le vêtre.
xxv. cccxcix.
- Choses monstreuses faites par les demons.
xxvi. ccccciii.
- Comme les demons habitent és carrieries.
xxvii. cccccviii.
- Comme les demons nous peuuent deceuoir.
xxviii. cccccxiii.
- Exemple de plusieurs illusions diaboliques.
xxix. cccccxvi.
- De l'art magique.
xxx. cccccxix.
- Des incubes & succubes.
xxxi. cccccxxviii.
- Des monstres marins.
xxxii. cccccxxxii.

Traité des plaies des nerfs.

Des plaies des nerfs, tendons, & des ioin-
ctures & membranes. chapitre i. fueil-
let ccccclxxxii.

Cure de la poincture des nerfs. ii. ccccclxxxv.

Des plaies des ioinctures. iii. ccccclxxxix.

De la situatiõ des ioinctures estans vulnerees.

iiii. ccccxcvii.

Du spasme ou conuulsion. v. cccccc.

De la curation du spasme. vi. cccccevi.

Cure de spasme par consentement & douleur.

vii. ccccccx.

F I N.

FAUTES LES PLUS

REMARQUABLES INTER- mises en l'impression.

EN la page 4. ligne 6. lisés semence. 5. 2. re-
plis. 16. 16. n'aduiét pas tousiours. 47. 2. m'as
tu faiète. 136. 6. bort. 159. 15. endurcir. 172.
17. ire. 309. 11. Enulatum. 430. 3. (qui est de
quarante iours aux masses & de cinquante, côme nous
auons dict aux femelles) 570. 5. principalement. 611.
19. la vene. 605. 16. sont difficiles mouuemens. 608.
21. feminis. 698. 8. ploié. Quant aux autres qui ne sont
de grande importâce, le lecteur ne s'y amusant les sup-
plera.







DE LA GENERATION
DE L'HOMME, RECUEIL-
ly des Anciens & Modernes.

PREFACE.



IEU le createur de
toutes choses , au
commencement du
monde par un con-
seil indicible & pru-
dence inestimable a

machiné non seulement en l'espece hu-
maine, mais aussi en toutes autres espe-
ces d'animaulx deux sexes , l'un masle,
l'autre femelle : lesquelz par certains
alechemens de volupté se conioindroiēt
ensemble pour la generatiō de leur sem-

Maistre Ni-
colle du hault
pas en son li-
ure de la for-
mation de l'é-
fant.

blable, à cause de la condition inéuitable de mort à tous indiuiduz animaux, que la volonté diuine leur auoit ordonné. En ceste conionction voluptueuse l'homme & la femme, principalement au sacré mariage, iettent leur semence, lesquelles ionictes l'une avec l'autre sont receües, & cōseruees en la matrice de la femme, & sont lesdictes semences la matiere de l'enfant. Or la semence est un humeur escumeux, plain d'esprit viuifiāt, faict du sang le plus pur de la masse sanguinare: estant iettee en la matrice, est principe, & cause effectiue de la generation de l'animal, & icelle semence doibt estre blanche, splendide & claire, & glutineuse, & d'odeur de sureau, ou de palme, & apeteue des mousches, descendant au fond de l'eau, & si elle nage dessus, elle sera infeconde: Or la plus grande partie d'icelle vient du cerueau,

Quest-ce que
la semence hu-
maine.

mais

mais le total procede de tout le corps uniuerſel, & de chaſcune partie tant ſolide que molle: Car c'eſt choſe manifeſte que ſi elle ne uenoit de tout le corps, les parties de l'enfant n'en pourroient eſtre faiçtes: par ce qu'il faut que toutes les parties ſoient faiçtes de leur ſemblable: Et cecy eſt prouué par la ſimilitude ou ſemblance des enfans, aux pere & mere, & par l'imbecilité de certains membres: car ſi le pere ou mere ont le cerueau ou foye, poulmon, eſtomach, ou autre partie debile, l'enfant le plus ſouuent tiët de ceſte debilité, & meſme eſt ſubieçt à certaines maladies hereditaires. Or il fault icy entendre, que lors que les anciens ont diçt la ſemence venir de toutes les parties du corps, toutefois il ne fault entendre la matiere, car elle eſt tiree de la maſſe ſanguinaire, mais avec icelle l'eſprit animal, vital, & naturel,

& les idees de la vertu formatrice d'une
 ne chacune des parties sont tirees , &
 qu'il ne soit ainsi, nous voyons ceux, aus-
 quels on a couppé un bras ou une iam-
 be ou aultre partie, toutefois font des en-
 fans bien formez . Or la sem,nce attire
 & allume le desir d'habiter & cause un
 plaisir delectable , & principalement à
 l'emissio d'icelle, de peur qu'elle ne feust
 ietee en autre lieu, qu'à la matrice , af-
 fin que la generation fut faicte, les mas-
 les ayant compaigniee de la femelle , les
 parties genitales de l'un & de l'autre
 s'estendent de toutes pars , aux masles
 la verge pour ietter droit la semence en
 la capacite de la matrice, & aux femel-
 les le col d'icelles, qui pour le recevoir
 s'ouure & eslargit , & se tient droict
 pour aussi vuider sa semence qui est en-
 uoyee par les vaisseaux spermatiques
 aux testicules , tant de l'homme que de
 la

la femme, lesquelz vaisseaulx font plusieurs retours & reuolutions, & remplis cōme capriolles de vignes, affin que dans ces entortilleures & emfractuosittez le sang & esprit enuoyez aux testicules soyēt cuictz & digerez par si lōg chemin, & partant s'i elabore & blāchit & se terminēt ces dernieres entortilleures aux testicules qui sont de substance rare, laxe & spongieuse, reçoient cest humeur qui ia a commēcé d'estre cuict aux vaisseaulx, & l'acheuent de cuire de plus grande perfection se blanchit pour la generation de l'animal. Or la semence est rendue blanche par la faculté des testicules qui sont blancs. Le masle iette la semence hors de son corps, & la femelle dedans le sien, par les vaisseaulx spermatiques qui sont implantés dans la capacité interne de la matrice.

Pourquoy les parties generati-
ues sont accompagnées de
grand plaisir.

Galien au 14.
de vsu partiū.
Chap. 9.

CHAP. I.

USAGE des parties genera-
tiues est accōpagnée d'un tres
grand plaisir, & qu'aux ani-
maux qui sont en la fleur de leur eage,
certaine rage & cupidité furieuse pro-
cede dudit usage, ce que nature a or-
donné affin que l'espece demeure à ia-
mais incorruptible & eternelle, par la
multiplication de ses indiuiduz, & par-
tant nature a voulu que les animaux
fussent esguillonés d'une ardante enuie
extrême de ce coupler ensemble, & qu'à
ce desir est conioincte vne grande &
chatoilleuse volupté, encores qu'ilz n'aient
point de raison, soient incitees de preuoir
à conseruer & maintenir leur genre &
espece. Plinie dict que tous les animaux
ont

ont certains temps limités de charger, & porter leurs petits, toutesfoys l'homme seul n'a aucun temps ni terme prefix ou defini, mais viét au monde en tout tēps. Oultre que nature a donné aux parties genitales un grand sentiment plus aigu & vif qu'à nulle aultre partie, par le moyen des nerfs qui y sont difpersez, partant nul ne se doibt esmerueiller pourquoy à leur action elles sentent plus grande delectation & plaisir. Or d'abondāt il ya vne certaine humidité ce-reuse semblable à la semence, mais plus liquide & subtile, contenue dedans les prostates, qui sont deux glandules situees au commencement du col de la vessie, qui a vne petite acrimonie pic-quante, & aiguillonnante avec un petit prurit & demāgaison, qui irrite les parties à faire leur action, en donnant volupté & plaisir, par ce qu'elle est accom-

Aux prostates
est contenue
vne humidi-
té subtile &
visqueuse.

pagnée de grande quantité d'esprits qui s'eschauffent & desirent à sortir hors: Et pour exemple comme lors qu'il ya en une partie de nostre corps quelques humeurs aigres ou acres, accumulés soubz le cuir qui chatouillēt & demangēt, inuitent à se gratter, & en se grattāt on a un grand plaisir: Pareillement lors que ladicte humidité sort avec la semēce, on sent un extreme & incomparable plaisir & volupté, & telle chose a esté faite par dame nature, de peur que la semēce ne fust iettée hors la matrice pour le desir qu'elle a à faire generatio. D'auantage cet humeur oultre qu'il donne enuie de s'assembler, & s'assemblant donne un grand plaisir, il arrouse & mouïle le canal de l'urine contre l'aerimonie d'icelle. Aultremēt qui considere-roit le canal du champ de nature humaine & les immondices qui passent par
ice-

icelui, & ses deux voisins, i'amaïs l'homme ne voudroit s'acoupler avec la femme: de l'autre costé si la femme auoit esgard au mal qu'elle doit auoir de porter l'enfant neuf mois en son ventre, & l'extrême douleur d'enfanter, i'amaïs ne desireroit d'auoir compagnee d'homme.

Or il aduient quelque fois difficulté Chose digne à noter. d'uriner pour auoir trop usé du coit, pour la consommation de cét humeur glaireux, dõt les parties dediees à l'urine, ont esté trop desechées: à tels pour les faire uriner, fault ietter de l'huile avec la seringue dedans la verge. Et pour retourner a nostre propos pour bien habiter avec les femmes, il fault que la verge de l'homme soit bien fermement tēdue, affin que la semēce par son canal soit ietee au loing dedās la matrice, et estoit necessaire qu'a l'emission d'icelle, que ledict canal demeurast fort droict & fort large,

à fin que promptement & sans inter-
mission, elle fust iettée en la matrice. Or
la verge se dresse par le moyen du sang
& esprits flatulens, & pour ceste cau-
se est composee d'une partie nerueuse,
spongieuse & caue: la matrice a une fa-
culté propre d'attirer la semence du
masle à elle par son conduict ou embou-
cheure, & deux autres conduicts qui
sont ses cornes (ou sont les vaisseaux
spermatiques) par lesquelles elle iette la
semence en la cavité de sa matrice, les-
quelles cornes ont esté faictes pour tirer
la semence de ses propres testicules, les-
quels sont forts petis & beaucoup moin-
dres que ceux des hommes: à ceste cause
ne sont si chauds ne vigoureux, & ainsi
leur semence est plus froide & humide
que celle de l'homme, & partant meslee
avec celle de l'homme se temperēt: aussi l'o-
rifice de la matrice s'ouvre à l'emission
de sa

de sa semence, pareillemēt à fin que c'el-
 le de l'homme entre en sa cavité, & ia-
 mais la cōceptiō ne se faict que les deux
 semences ne concurrent ensemble en un
 mesme instant, & que la matrice soit
 bien disposée, & que les deux semences
 aient de l'un & de l'autre bonne conco-
 ction. Et s'il y a plus grande quantité de
 semence de l'homme, il se fera un masle:
 au contraire si la semence de la femme
 surmonte celle de l'homme, tant en quā-
 tité qu'en vertu, il se fera une femelle:
 Car cōme une grande lumiere obscur-
 cist la petite, pareillemēt la vertu estant
 plus forte & plus grande, des semences
 la moindre cesse. Toutesfois & en l'hō-
 me & en la femme il y a geniture, tant
 pour engendrer masle que femelle, qu'il
 soit vray, il y a plusieurs femmes q̄ n'ont
 eu de leurs premiers maris que des filles
 seulemēt, lesquelles depuis estans rema-

Iamais la ge-
 neration ne
 ce faict que
 les deux se-
 mençes ne cō-
 curent ensa-
 ble en vng
 mesme instāt.

rieux a d'autres mariez n'ont fait que des
fils. Et aussi mesme les maris desquels
les femmes ne faisoient que des filles, &
estans remariez à d'autres femmes, ont
engendré des masles : & autres qui ne
faisoyent que des masles, ont engendré
des filles, estâs remariez à d'autres fem-
mes. Et pour le dire en un mot, tant en
la femme qu'en l'homme, est contenue
semence masculine & feminine. Tou-
tesfois il fault entendre, qu'il ne se pro-
duit pas tousiours en un mesme hom-
me, une semence pour engendrer un fils,
ny aussi pour faire une fille, mais est di-
uerse: ce qu'on voit presque ordinaire-
ment, ainsi est il de la femme, Parquoy
nul ne se doit émerueiller, de ce que
mesme homme avec mesme femme, en-
gendrent tantost un enfant masle, &
tantost une femelle.

De quelle qualité est la semence, dont est engendré le masle & la femelle.

CHAP. II.

Lest certain que la semēce plus chaude, & plus seche engendre le masle, & de la plus froide & humide la femelle, car il ia beaucoup moins de vertu au froit qu'au chault, ainsi l'humidité est de moindre efficace que la siccité: & c'est pourquoy la femelle est plus tard formee que la masle, en la semence gist la vertu creatiue & formatrice, exēple, en vne graine de melō, potentiellement la graine est, le troncq, les branches, les feuilles, les fleurs, le fruit, la forme, la couleur, l'odeur, la saveur & semence: Ainsi est il de toutes autres semences, ce qu'on congnoist aussi aux greffes entees sur sauuageons, retenant la nature du fruit de labre, d'on el-

Hip. au lib. de la nature de l'enfant.

les sont tirees, semblablement quand la semence du pere surmôte celle de la mere, lors l'enfant ressemble au pere, & quand celle de la femme surmonte celle de l'homme, l'enfant ressemble à la mere. Toutesfois on voit le plus communément, les enfans ressembler plus au pere qu'à la mere, pour la grande imagination & ardeur qu'a la mere en la conception charnelle: tellement que l'enfant attire la forme & couleur de ce que si fort elle cognoit & imagine en son entendement, comme il aduint de la Royne d'Aethiopie, laquelle en la copulation de son mary, imaginant une couleur fort bläche, elle enfanta un fils bläc: telle chose se peut encores prouuer par l'artifice de Iacob, qui mist des verges de diuerses couleurs dans l'eau, au temps de la conionction de ses brebis, ce qui sera cy apres declaré plus au long: Il aduiant

auſſi quelqueſois (mais rarement) que l'enfant ne reſemble à pere ny mere, mais à quelques vns de leurs parens, cōme à leur pere & mere grāds & ayeux, par ce que naturellement la vertu des ayeux, eſt fichée & enracinee aux cœurs de ceulx qui engendrent, ou de la diſpoſition des premieres qualitez, ou à l'influxion d'aucunes conſtelliōs celeſtes: d'auantage nature reſemble à un pain- tre, qui portraiēt vne choſe ſur le naturel, laquelle ſ'efforce de faire reſembler les enfans aux parens le plus qui luy eſt poſſible. Les enfans ne reſemblent ſeulement à leurs pere & mere de corſaige, comme eſtre grāds ou petits, gros ou deliez, camus ou boſſus, boiteus ou tortuz, & de leur parler, & de la maniere de cheminer, mais auſſi des maladies, auſquelles ſont ſubiects, qu'ō appelle hereditaires, comme lepreux, goutteux, epilep-

Aristot. au liu
de la genera-
tion des ani-
maux. Hip. au
lib. de l'air des
regions & des
eaux.

tiques lapidaires, spleneticques, asma-
ticques, & aultres semblables, parce que
la semence suit la complexion, & tempe-
rament de celuy qui engendre, en sorte
qu'un homme & une femme bien tempe-
rez produiront une semence bien com-
plexionnee: Au contraire s'ils sont in-
temperez produiront une semence mal
complexionnee & non propre pour en-
gendrer un enfant sain & de bonne ha-
bitude. Parquoy celuy qui sera gout-
teux, lepreux ou aultre disposition susdi-
te s'il engendre un enfant, à grand pei-
ne pourra il euader qu'il ne soit subiect
aux maladies du pere & de la mere: ce
que toutesfois n'aduiant pas souuent cō-
me l'experience le monstre, ainsi que i'ay
escript en mon liure des gouttes. Car
on voit plusieurs estre vexéz des gouttes
& d'autres maladies, desquelles les
peres & meres n'en auoyent esté mala-
des.

des. Et d'autres n'estre iamais affligés,
& toutesfois leur pere & mere en esto-
ient grandement tourmentez: Laquelle
chose se faict par la bonté de la semence
de la femme, & temperature de sa ma-
trice, corrigeât l'intemperature de la se-
mence virille, tout ainsi que celle de l'hô-
me peut corriger celle de la femme, com-
me on voit souvent par experience des
enfans n'estre point goutteux, ou aultres
maladies (qu'on appelle hereditaires)
encore que leurs peres ou meres fussent
subiects à telles dispositions, laquelle
correction si elle deffault au pere ou à la
mere, les enfans ne peuvent eschaper
qu'ils ne soyent subiects ausdittes mala-
dies, lesquelles ne se peuvent parfaicte-
ment guarir, quelque grande diligence
qu'on puisse faire.

Purquoy les femelles des bestes brutes, apres estre emprainctes, ne desirent plus de s'accoupler aux masles.

CHAP. III.

EST qu'elles s'adressent seulement à ce qu'il s'offre, & qui est de present en leur chaleur & reut, n'ayant aucune recordation du plaisir apres estre emprainctes, mesmes abhorrent le coït apres la conception, parce que leur imagination ne leur est donnee de nature que pour leur espeece, & non pour volonté & delectatiō. Or les masles les vōt chercher lors qu'elles sont en reut, à cause qu'il s'esleue de leur matrice vne certaine exhalatiō vaporeuse, qui s'essand en l'air, & sentant ceste odeur, entrent en amour, qui faict qu'ils desirēt s'accoupler ensemble. Le contraire est aux femmes, car elles desirent pour

Les femmes apres quelles sont enceintes quelque temps apres desirent detacher la conionction charnelle, au contraire des bestes.

la delectation, & non seulement pour l'espece, & ausſy qu'elles abondent en ſang qui les eſchauffe, quand elles ſen recordent, & que la vertu imaginative procedante du cerueau, & la concupiſcenſe ou deſireuſe du cueur (qui eſt l'une des plus principales cauſes d'abiter) ſen reſentent ayans recordation de ce plaiſir deliceux, qu'elles ont receu au coït: & fault entēdre, que la vertu cōcupiſcible ou deſireuſe commāde à la vertu expulſiue du cueur, & à lors enuoye la chaleur aux parties genitales par les arteres, & le foye par les venes, & icelle chaleur accompagnee d'eſprits vêteux font enfler & tendre les parties genitales, tant aux hommes qu'aux femmes, puis par le coït, la ſemence eſt expulſee. Les beſtes ſauuaiges ſont grandemēt furieuſes quand elles demandent les femelles, cōme nous voyons le cerf eſtant en reut

Aristot. en ſes
probleſmes.

bramer & crier apres les biches: Aussi les asnes en deuiennent à peu pres enragez, parce que leur mēbre sort alors fort eschaufé d'un desir des femelles, & tel desir de s'accoupler les dispose à telle ire & fureur, mais aussi apres l'acointance des femelles, sont rendus doulx & paisibles. Or come i'ay dict si dessus, il y a vne tresgrande delectatiō en la copulatiō du masle & de la femelle, par ce que c'est vn acte si abiect & immonde, que sil n'estoit accompagné d'un tel plaisir delicieux, tous animaulx naturellement la fuiroiēt & l'auroiēt en horreur, ce que reuiendroït en briefue consummatiō des especes, mais nature s'exerçant volōtiers en telle voluptuense titillation, faict que chacune espece est conseruee, & de plus en plus augmentee.

La maniere d'abiter & faire
generation.

CHAP. II II.

LHOMME estant couché
avec sa compagne & es-
pouse, la doibt mignarder
& esmouuoir (si elle ne
l'estoit) la baisant, & parlant du ieu
des dames Rabattues, en luy maniant
les tetins, & ses parties genitalles, affin
qu'elle prenne volonté & apestit d'abi-
ter, & que les deux semences se puissent
rencontrer ensemble, car aucunes fem-
mes ne sont pas si promptes à ce ieu que
les hommes: & pour encore aduancer la
besoigne, la femme fera vne fomentatiō
d'herbes chauldes cuittes en bon vin
ou maluoisie, à ses parties genitalles, &
mettra pareillement dedans le col de sa
matrice vng peu de muscq & ciuette,
& lors qu'elle sentira estre esguillonnee

La vertu ima-
ginatiue est
esueillee par
l'atouchemēt
par paroles
& beaulté &
bonté du fa-
bic.

Et esmeüe, le dira à son mary: adonc se iointront ensemble, & accöpliront leur ieu doucement, atendant l'un l'autre, faisant plaisir à son compaignon, & quand les deux semences seront iettees, l'homme ne doibt promptement se desioindre & descendre, à fin que l'air n'entre en la matrice, & n'altère les semences, & qu'elles se mixtionnēt mieux l'une avec l'autre: & subit que l'homme sera descendu, la femme se doibt tenir coy, & croiser & ioindre les cuisses & iambes, & qu'elle ne parle, ne touffe, n'y esterneue, & qu'elle dorme promptemēt apres si luy est possible.

Les signes que la femme aura cöceu, & est grosse d'enfant.

CHAP. V.

DES signes que la femme sera asseuree d'auoir conceu, c'est que si elle a eu aultresfois enfans

Pour accomplir lacte venerien, il est requis trois choses, chaleur, vétofité & humidité.

fans, elle prendra garde quād la semence ne luy sera point sortie de sa matrice, & si elle est retenüe, elle sera asseuree d'auoir conceu: pareillemēt elle sent, lors que les semences sont ioinctes, vng petit frisson, & retraction en tout le corps, & telle chose se faict à cause que la matrice se comprime, & son orifice se clost pour retenir les semences: aussi si elle a senty quelque petite douleur autour du nombril, & petit ventre, & si la compaignee de l'homme ne luy plaist comme au parauant, si sa face est decoulouree entre blanche & palle: aucunes y ont des tauellures, les yeux enfonsez, & le blanc de l'oil liuide: dauantage si elles ont douleur de teste avec vn vertigo, leur semblant que tout tourne sen dessus dessous, elles sont rechignees, aucunes ont mal de dens, defaillace de cueur, appetit depraué avec nausée, qui se faict

Le sang des
moys estant
ietenu aux
femmes gros-
ses, est emplo-
ié en troys
perties.

communément au second mois reietion
des fleurs, d'autant que l'enfant agran-
dit, aussi plus attire il de sang pour sa
nourriture que de coustume. Estant em-
ploié en trois parties, desquelles, du plus
pur, l'enfant s'en nourrit. La secon-
de, qui est moins pure, est enuoyee aux
mammelles de la femme à faire le laiçt
pour la nourriture de l'enfant quand il
sera né: La troiesme partie qui est la
moins pure que les deux aultres, demeu-
re en la matrice, dans laquelle l'enfant
naige, & y est supporté & puis ietté
deuant & apres l'enfantement. Item el-
le sent son urine plus chaude & plus ar-
dante que de coustume, qui se faict pour
la retention de ses fleurs, qui faict que la
bouche de la matrice en est plus chaul-
de. Item si elle a grāde douleur aux reins
& aux aines, & par interualle si elle
sent tranchees au ventre. Item si les ve-
nes

nes de la poictrine & celles qui sont sus les mammelles sont plus enflees que de contume, & lors les mammelles s'enflēt & durcissent, & par succession de tēps rendent du laiēt, qui est quand l'enfant commence à se mouuoir : & lors qu'ils sont sus les derniers mois, sentent grande pesanteur aux hanches, la face maigrit, les oeilz, le nés, la bouche agrandissent, & ses parties genitales se tumefient. Item toutes les venes de son corps sont fort plaines de sang, & principalement celles des cuisses & des iambes, & autour de leur nature, & sont trouuees souvent variqueuses & dilatees & entortillees, & quelques fois de plusieurs reuolutions circulaires, iointes ensemble pour la suppressiō du sâg de leurs fleurs, & ne peuvent cheminer qu'à bien grād peine, principalement quand elles sont proches de leur terme d'acoucher.

L'enfant commence à se mouuoir, quand le laiēt est monté aux mammelles.

Pourquoy les venes des cuisses aux fēmes grosses sont variqueuses.

Comment la matrice se referre
si tost que la semence y est iet
tee & retenue.

CHAP. VI.



LORS que les deux semen-
ces seront ainsi receües en la
matrice, l'orifice d'icelle se
referre fermemēt & estroi-
ctement, à fin qu'elle ne retōbe, & quād
la matrice a pris & reteneu les deux
semēces meslees ensemble, se coagulēt &
adherēt cōtre les parois de la matrice, et
par sa chaleur naturelle, les eschauffent
subit & si fort, qu'à l'entour se concret
vne petite peau subtile semblable à celle
qui se faiēt sus du laiēt, non escremé, ou
d'une toille d'aragnee, de façon que le
tout est faiēt cōme vn oeuf abortif: c'est
à dire, qui n'a encore sa coquille ferme
& dure, & à l'entour est veu des filla-
mens, entrelassez ensemble avec vne
sub-

Premiere pe
au ou mem-
brane.

Ceste petite
peau est le cō
mencemēt de
l'arrierefais,
engēdee prin-
cipalement
des semences
& du sang
menstrual.

substâce glutineuse, & glaireuse, de couleur rouge & aucunement meslée de gros sang noir, & au milieu se manifeste vng peu le nombril, duquel est produict ladite taie: c'est ce que hippocrates afferme auoir veu à sa chambriere: Aussi dict que l'on peut auoir congnoissance de beaucoup de choses des enfans au ventre de la mere, pour faire couuer xx. oeufz à vne ou plusieurs poulles, les cassant tous les iours l'un apres l'autre, en xx. iours: car en ce temps là le poulet est parfaict & a vn nombril: la dicte pellicule est nommee secundine ou corio, & des vulgaires arrierefais, ou le liêt de l'enfant, & icelle est faicte des les six premiers iours selon hippocrates: & ne sert point seulement à contenir les deux semences ensemble enfermées, mais aussi à tirer leur aliment par les orifices des venes & arteres, qui se terminent en la

Lib. de la mat-
ture de l'en-
fant.

matrice par ou est expurgé le sang menstruel, pour la purgation uniuerselle de la femme en tems oportun: & iceux orifices ont esté appelez des grecs Cotiledons, & des modernes Acetables, & resemblerent aux petites eminences ou appendices, qui sont aux extremités des Seches: Aux femmes sont peu apparens, ausquels Cotiledons est ladicte secôdine attachee & liee par toutes parts à la matrice, pour la conseruation & augmentation desdictes semences.

De la generation du nombril.

CHAP. VII.



En chacun de ses orifices de venes & arteres, cotiledons, la femme vyant conceu, il s'engendre un aultre vaisseau nouveau, qui est une vene, au droict de la vene, & une artce au droict de

de l'artere: ses vaisseaulx nouveaux sont
attachez par une membrane subtile &
delie, & par dehors est estendue à l'en-
viron de tous lesdicts vaisseaux, & co-
here ou adhere à iceulx: ceste secõde mē- Seconde mē-
brane.
brane est placquee & ioincte contre l'in-
terieure partie de la matrice, & sert aus-
dicts vaisseaux de rampart, de ligature
& couuerture, qui les attache ensemble,
& se redouble avec les deux aultres,
pour couvrir le boyau ou ombilic faict
de la vene & artere ombilicale, & le
porus uracos iusques au pertuis de l'om-
bilib de l'enfant. Or chacun de ses vais-
seaux nouveaux, commence vis à vis
des emboucheures des vaisseaulx de la
matrice, appelez cy dessus Cotiledons,
& sont biē petiz, & deliez, cōme sont les
dernieres racines d'un arbre planté en
terre, mais estās auancez un peu, ils sac-
couplent deux à deux, tellemēt qu'il s'en

Diuine con-
templation.

faict de deux un, puis derechef ils s'assemblent, à sauoir vene avec vene, artere avec artere, & cela va tousiours en continuant & augmentant ensemble, iusques à ce que finablement, tous les petits vaisseaux se raportent & finissent en deux grāds vaisseaux ombilicaux, qui entrent au corps de l'enfant par le pertuys du nombril: Et icy galien admire la grandeur de Dieu & de nature, qui en si grand nombre de vaisseaulx, conduicts & menés par si grande espace de chemin, iamaïs l'artere ne s'adiouste à la vene, ni la vene à l'artere, mais chacune d'icelle cognoist le vaisseau de sa propre espeece, & à celuy la s'adresse & se ioinct: subit que les venes sont passées oultre le nombril, se ioinnent ensemble, & d'icelles en est venue seule, qui entre en la partie caue du foye de l'enfant, & l'artere subit qu'elle y est

y est entree, se fourche en deux, & descē-
 dent aux costez de la vessie, & s'insērēt
 aux deux arteres illiaques, & sont cou-
 uertes, estant dedans le corps de l'enfant
 du peritoine, qui les lient aux parties ou
 elles passent: les venes & arteres nou-
 uellement engendrees, faictes des cotile-
 dons, sont comme les racines de l'enfant,
 & la vene & artere ombilicale sont cō-
 me le gros tronç d'un arbre, pour attirer
 le nourrissement, & viuifier la semence
 dont l'enfant est faict, car nous viuons
 comme les plantes, & apres comme les
 bestes brutes au ventre de la mere. La
 troiesme tunique est appelee Amnios
 ou coeſſe qui enuelope de toutes pars la
 semence. Or ces mēbranes sont fort de-
 liees, ressemblant au commencement à
 petites toillettes d'airagnees, & sont les
 vnes sus les autres, & en plusieurs lieux
 & endroictz sont vnies & attachees

Troiesme tu-
 nique ou mē-
 brane.

Hipoc. appe-
 le toutes les
 trois taies se-
 condines.

Gal. li. de vfu
partium.

ensemble, par certains filets subtils, qui vont espartz les uns entre les aultres, & aussi se fortifient, comme lors qu'on lie & entrelasse une corde ou un tissu de poil ou de laine ou de fil, acquiert grand force, par complication des choses assemblees, combien que chascune d'icelle separément soyent fort foibles : & telle chose est à resppondre à ceux qui voudroient dire, veu que la femme grosse dance & saulte, & aussi que l'enfant se remue quelquefois violentemēt au ventre de sa mere: comme est il possible que lesdictes membranes ne se rompent? c'est qu'estāt liees & entrelassees se fortifiēt, estāt ensemble cōme par l'exemple d'un tissu, cōme nous auons dict, & ne sont separees les vnes des aultres, & ne trouue on rien entre elles, à scauoir, sueur ne urine. Toutesfois le contraire de cela est tant enraciné en l'opinion de plusieurs

sieurs , qu'il est impossible leur pouuoir
 oster, mais pour ce faire, ie les renuoyeray
 au liure de nature , c'est qu'ils ouurent
 une femme morte grosse d'enfant, & a-
 lors ils pourront voir & congnoistre la
 verité, s'ils veulent ouurir les oeils, ce que
 i'ay voulu faire sans croire au credit
 d'autrui.

Experience à
 plus de lieu,
 que raison na-
 turelle.

Des vaisseaux qui sont au nom-
 bril de l'enfant.

CHAP. VIII.

AVCVNS de nos deuan-
 ciers ont escript qu'au nom-
 bril il y auoit cinq vais-
 seaux, à scauoir deux ve-
 nes & deux arteres, & le porus uracos:
 mais quant à moy i'amaïs ie n'en ay sceu
 trouuer que trois, à scauoir la vene om-
 bilicale, qui est fort ample, de façõ qu'o-
 y mettroit aisemēt le fer d'une esguillet-
 te, & deux arteres, lesquelles ne sont si

grosses à beaucoup pres, & telle chose a esté ainsi faicte, par ce qu'il failloit plus de sang à l'enfant pour sa generation & augmentatio que d'esprit vital: & quant au porus uracos, soudain apres que toutes les parties de l'enfant sont formées, iette son urine par ledict uracos (qui est au fond de sa vessie) dedans la matrice, mais aux derniers mois prochains de la natiuité de l'enfant, ledict uracos se ferme, & se desèche, alors le masle iette l'urine par la verge, & la femelle par le col de sa vessie: voila cōment le porus uracos, ne faisant plus son usage s'edurcit comme un tendon, & sa cavité se clost, qui est cause qu'elle ne peut estre cogneüe & aperceüe dans l'ombilic, au sens de la veüe, veu que la vene & les deux arteres avecques le porus uracos, (dont est constitué le nōbril, qui est faict le neufiesme iour) estans ensemble, se redou-

Le nombril
de l'enfant
est formé le
ix iour.

doublent & entortillent, & font certains neuds comme la ceinture d'un cordelier: & ses dictz neuds ainsi amfractueux n'ont esté faictz sans grande utilité, qui est à fin que le sang conduit au corps de l'enfant fut arresté, & cessast un petit à son cours, à fin qu'il fut plus parfaictement élaboré cuit & digéré, ainsi qu'il se faict aux vaisseaux spermatiques, dictz eiaculatoires ou expellens: aussi lesdictz vaisseaux ombilicaux ont esté faictz de longueur de plus de demie brassée pour la raison predicte: tellement qu'à d'aucuns enfans on trouue ledict nombril entortillé un ou deux fois autour du col, & aultres fois autour de leurs iambes. L'enfant, comme nous auons dict, reçoit son aliment & vie au ventre de la mere par l'ombilic, & ne prend aucun aliment par la bouche: ny aussi pendant qu'il est au corps de sa

L'ombilic a esté fait long & amfractueux, à fin que le sang y feust plus parfaictement élaboré.

mere, il n'a nul usage des œils, nes, ny des oreilles, ne du siege: d'auantage il n'a besoin de l'office du coeur, car le sang spirituel luy est enuoyé par les arteres ombilicales aux arteres illiaques, & d'icelles à toutes les aultres arteres, par lesquelles l'enfant respire, tellement qu'il ne traueille point en la generation du sang, ny des esprits vitaulx, par le benefice des poulmons, car ces choses estans ia elaborees, cuistes & digerees par la mere, sont portees à toutes les parties de l'enfant: lequel ne doit encores estre appelé enfant, tant que toutes ses parties soient bien formees & figurees, & que l'ame y soit introduicte: mais seulement sera appelé Fœtus, ou Embrion, ou pululant, ou naissant, ou meurissant.

M. Nicolle
du hault pas
au liure de
la generation

De

De l'ebulition des semences à la
matrice et des trois empoul-
les qui sont les lieux des trois
membres principaulx à sca-
voir le foye, cœur & le cer-
veau. CHAP. IX.



V X. six premiers iours se
font les vaisseaulx nouue
aux, qui naissent des orifi-
ces des venes & arteres,

appelez cy dessus cotiledos, & certains
fibres partoute la semence, laquelle boust
tousiours dedans les susdites membra-
nes, & le ix. iour est formé l'ombilic.
Or il fault icy entendre que ces vaisse-
aux produicts des cotiledons, font pa-
reille ouuerture à la secundine, qu'à la
matrice, par lesquelles ouuertures passe
grande quantité de sang & d'esprits, de-
dans les petites venes qui sont tissues &
entrelassees, au tour de ladite secundine,

Et dedans la semence, tant pour la nourriture que pour l'augmentation de l'Embrion, comme pour la conformation des membres principaux : Les esprits donc & le sang meslez avec la semēce, qui desia au parauāt bouilloit, boust tousiours de plus en plus, font esleuer trois petites empouilles semblables à trois petites bulles ou vessies, ressemblātes à celles qui s'esleuēt en l'eau, agitee par la pluie, et icelles empouilles sont les lieux ou serōt formez le foye, le cœur, & le cerueau. Et au parauant que icelles soyent esleuees, la semence est tousiours appelee semence, & non encore fœtus, ou pullulant.

De la premiere empouille ou le foye se concret.

LE quatriesme iour la vene ombilicale succe par les cotiledōs le sang plus gros, & de plus grand nourrissement, lequel à cause de

sa grosseſſe ſe coagule aiſement au lieu, ou ſe doit engendrer le foye, eſtāt acheuē & parſaiēt il eſt admirable: la grandeur du quel ſe voit des le commencement à comparaiſon des aultres membres, i'ay dict admirable, par ce que ſans affuſion de ſang ne peut eſtre parſaiēt ny acroiſtre: Il ſ'engendre en ſa partie gibeuſe vng gros tronq de vene, qui eſt la vene caue, laquelle inferee, eſtand ſes rameaux par toute la ſubſtance du foye, puis apres dreſſe deux rameaux, dōt l'un va aux parties ſuperieures, & l'autre aux inferieures, lesquelles ce ramifient & diſtribuent en toutes leurs parties pour leur formation & nourriture, & apres cela faiēt, la vertu formatrice aiant la matiere, dreſſe ſes delineamens pour faire le meſantere, les inteſtins, eſtomach, ratele, & tous autres membres nutritifs, & les rend parfaits,

ainsi qu'il appartient.

La seconde Empoulle ou le coeur se concret.

Les arteres
sont engen-
drees imme-
diatement de
uant le coeur.

LARTERE ombilicale succe pareillemēt le sang arterial, es arteres cotiledoines, qui est tres chaud & fort spirituel, duquel en ceste seconde empoulle se forme le cœur, qui est de substance charneuse, sollide, et espoisse, ainsi qu'il appartient au mēbre le plus chaud de toutes les aultres, en la substāce duquel nature formatrice faict deux ventricules, l'un à dextre, l'autre à senestre. Au droict ventricule se viēt inserer le troncq de la vene caue, & ycelle apporte la nourriture au cœur, & en iceluy se faict un troncq d'artere, qui pareillement se diuise en deux, l'un monte aux parties superieures, & l'autre aux inferieures, lesquelles se ramifient & se dis-

distribuent par toutes les parties, pour les viuifier.

De la troisieme empouille ou la teste se forme.

CHAP. X.

APRES la production des parties deuant dictes, la plus grande partie de la semence est poussée en la troisieme empouille, de laquelle le cerueau est faict, & n'est faict de sang comme les aultres bubes & aultres parties, mais est faict de la seule semence, come sont aussi les os, cartilages, venes, & arteres, nerfs, ligamens, pannicules, la peau exterieure, toutes ycelles parties sont faictes de la seule semence, & partant sont appelees membres spermaticques, lesquels toutefois ne sont nourris de semence, car depuis qu'ilz sont formez, prennent aliment avec les charneu-

ses, comme le foye, le cœur, les poulmōs, les muscles, qui sont nourris de sang. Et apres le cerueau formé, sont adioutees et formees, toutes les autres parties de la teste, au tour de la quelle est faict vn couuercle, lequel par successiō de tēps se desechē, et est faict osseux. Or du cerueau & de la moëlle de leschine procedēt les nerfs, qui sont distribués par toutes les parties du corps, qui ont besoin de mouuemēt & sentimēt. La teste (cōme me siege des sens, rempart de raison & de sapience, de laquelle cōme d'une fontaine sort diuerses operations) est situee sus tout le corps, à fin que l'esprit animal regisse, gouuerne & dispose de tout ce q nature a ordonné soubs icelle: & pour le dire en vn mot, en icelle sont contenues les facultés de l'ame, qui sont choses sublimes & obscures, si biē que leur excellence surmonte la capacité de nostre

stre

stre entendement. Puis, ainsi que les architectes & maçons & charpentiers ont ietté le premier fondemēt d'une maison, et dressé la charine d'une navire, edificent & batissent le reste du batiment, aussi nature par bonne raison, apres auoir baty ces trois principes, faict les os qui sont comme fondement des autres parties : & ainsi sont ils mis au dessus & au dessous, comme muraille & rampart. Les premiers formez sont les os des Illes, & entre iceulx les vertebres: Puis apres toutes les autres parties, nature fabrique avec un indicible, admirable & incôparable artifice, les bras et les iambes, & au dedans du corps les creux et canaux & en la teste faict sept trous, à scauoir deux aux oreilles, deux aux oeils, deux au nés, & un pour la bouche, & aux parties inferieures, un pour le siege, un autre pour le canal de la ves-

Utilité des os
est de soustenir le corps.

qu'il y a
deux os
de non

sie, & aux femelles un pour leur matrice, sans lequel ne pourroient estre appelees meres : puis nature couvre tout le corps de cuir, lequel elle pollit, cōme font les ouuriers leurs derniers ouurages. Or de cognoistre comme nature faict parfaictement toutes ces choses, cela excède l'intelligence humaine. Et apres ce grād ouurage appellé des anciē microcosme, ainsi parfaictement bati, Dieu lui infuse l'ame, de laquelle nous parlerōs le plus subsinctement qu'il sera possible.

de L'ame. CHAP. XI.

LAM E se ioignāt au corps, soudain qu'iceluy est formé au ventre de sa mere, qui est le quarātiesme iour au masle (d'autant que sa chaleur est plus grande, & sa matiere plus vigoureuse) & le cinquantesme à la femelle, quel-

que-

S. Augustin
en la defini-
tion de foy.

quelquefois plus tost, quelquefois plus tard, toutefois a l'instant qu'elle est infuse, ne peut faire ses fonctions ou operations, à cause qu'en l'enfance les organes ou instruments ne sont encores capables pour s'en servir, mais avec le temps & à mesure que lesdicts organes se parfont, & que le corps croit, à lors commence à agir en ses operations, lesquelles, quand ils ne sont en bonne disposition, l'ame ne peut faire ses actions: Or ils peuvent estre vitiees dès la premiere naissance, comme à ceux qui ont le sommet de la teste esleué en poincte, cōme l'auoiēt Ter sites grec, Triboulet, & Thonin, tels n'ot

iamais bonne ratiocination, & partant sont naturellement fols, à raison que les vëtricules ducerueau, & autres organes sont angustes & pressees, partant l'ame ne peut faire ses oeuvres. Pareillement iceux organes peuvent estre vitiez par

Ceux qui ont la teste esleuee en poincte sont ordinairement fols.

mauvais regime, comme par trop boire,
& fenyurer, ou par vne fievre chaude
qui aura causé vne phrenesie, ou a ceux
qui par trop grãde humidité du cerueau
tumbēt en lethargie, ou auoir receu quel
ques coups sus la teste, ou par autres cho
ses semblables, qui auront empesché les
organes & instruments de l'ame. Or
Dieu a distribué, apres la creation d'i
celle, certains dōs particuliers à vn cha
cun, ou icelle est infuse, vn don special: à
l'un de prophetie, à l'autre l'expositiō des
escriptures saintes, aux autres d'estre
constitués Roys, Princes, & grãds seig
neurs, aultres à la medecine, autres aux
loix, autres à nauiger sur la mer, autres à
labourer la terre, les autres d'aides aux
maçons, autres à autres choses, selō que
sa sapience infinie ordonne, & qu'i luy
plaist: & ne fault que nul conteste con
tre son createur: car la chose formee, di-

ra elle à celui qui la formee, pourquoy
mas in faicte ainsi? Le potier de terre n'a
il point de puissance d'une mesme masse
de terre faire vng vaisseau à honneur,
& vn à deshonneur? Or ce n'est icy de
ma vacatiõ rēdre la cause de tels hauts
secrets de Dieu, lequel a voulu que fus-
sions curieux, non de les scauoir & com-
prendre, mais seulement de les admirer
en toute humilité: & partāt ie ne veux
ny ne puis entrer plus auant au cabi-
net du conseil priuē & sacré de Dieu,
mais ie diray que la bōne ame contemne
les choses elementaires c'est à dire cor-
porrelles & sensibles, & prise les choses
hautes & celestes pour contēpler la bea-
titude eternelle, laquelle, sortie du corps,
se peult dire heureuse, estant hors de tou-
te ignorance & de tous maux, & de-
meure à iamais en repos: ientens l'ame
de ceux qui sont esleus de Dieu. Ceste

S. Paul aux
Rō. Chap. 9.

Definition de
l'ame.

Gabriel du
preau au lib-
re de la con-
gnoissance de
soymesme
dict, que telle
descriptio est
apprise par
oracles cele-
stes & nō par
disputes des
philosophes.

ame est vng esprit ou substance incorpo-
ree, inuisible, intellectuëlle & immortel-
le, que tout ainsi qu'elle est viue, aussi
donne elle aux corps vie & mouuement,
quand elle est conioincte & unie à ice-
luy: c'est le receptacle d'illumination di-
uine, attendu que par la presence d'ice-
le, le corps ne meurt poinct, créee par la
puissance de Dieu, qui n'est point corpo-
relle, ny cōposée d'aucune matiere faicte
pour viuifier le corps humain. D'auan-
tage outre qu'elle est vng esprit inuisible,
espadu par toutes les parties du corps, tou-
tesfois elle est toute entiere, en vne chas-
cune partie d'iceluy, & vne en soy, ayāt
plusieurs facultés, puissance, vertus &
operations en diuerses parties du corps,
comme imaginer, entēdre, iuger, memo-
rer, & regir les mouuements volontai-
res, elle veoit, oyt, odore, gouste, & ra-
tiocine, selon lesquelles operations elle
obtient

obtient plusieurs noms . Elle est appelee ame, pource qu'elle anime, & viuifie le corps. Elle est dicte esprit, pource qu'elle aspire au corps, & qu'elle est comme vng rayõ de la diuinité. Elle est appelee raison, pource qu'elle iuge & separe le vray daucc le faux. Elle est dicte pensee, parce qu'elle recolle les choses passees. Elle est dicte courage, pour l'operation de la volõte. Elle est dicte sens, par ce qu'elle sent les choses sensibles: & dauantage elle est inuisible, intactible, & de nature intellectuëlle. Et pour ce aussi qu'elle est incorporelle, n'occupe point de lieu par extension corporelle, & estãt de simple nature, ne croist ne diminue: car elle n'est point plus grãde en vn grand corps qu'en vn petit, ny plus petite en vn petit qu'en vn grand: & est aussi grande des le commencement de la vie d'un petit enfant, quelle sera iamais, selõ la distin-

Diuers noms
de l'ame.

Il y a trois manieres de corps, qui ont ame.

ction qui sera cy apres touchee. Or il y a trois manieres de corps qui ont ame, par laquelle ils viuent: le premier corps, & le plus imparfaict est celui des plantes: le second des bestes: & le tiers, des hommes. Les plantes viuent par l'ame vegetatiue ou croissante, les bestes par l'ame sensitive, & les hommes par l'ame raisonnable & intellectuelle. Les bestes qui ont l'ame sensitive, ont pareillement les actions de l'ame vegetatiue, qui est es plantes, mais l'ame humaine qui est intellectuelle, emporte toutes les perfectiōs & vertus des autres: & partant elle communique avec les plantes, parce que tout ainsi que l'ame vegetatiue donne vie aux plantes, & les faict croistre, aussi faict l'ame intellectuelle au corps humain: & comme les bestes ont mouuement & sentiment par l'ame sensitive, qui est en elles, aussi l'ame intellectuelle

(au moyē de la portion sensitive, par laquelle elle participe avec les bestes) donne sentiment & mouuement au corps humain: mais par dessus ces deus portions, elle a la ratiocination, qui est la vraye cognoissance des choses, laquelle procede d'une lumiere diuine, & par special priuilege, a esté faicte à l'image & semblāce de Dieu. Et pour cōclurre, l'ame humaine a toutes les trois puissances susdites nō separémēt mais vnies en vne seule, laquelle ne peult nullement estre cogneüe par l'intelligence & raison humaine, par ce qu'elle est celeste & diuine: toutefois à fin que ne fussions ignorans comme les bestes, Dieu a voulu qu'en quelque partie de nostre corps nous contemplions nature (par laquelle i'entens le Dieu viuant faicteur de l'univers) en cherchant les choses qui se peuvent grossièrement demonstrier. Et de faict

Les cinq sens
extérieurs.

pour eclarcir icelles choses hautes & obscures, les antiens ont faict cinq sens interieùrs, correspōdāts aux extérieurs, qui sont voir, odorer, gouter, ouïr, & toucher.

Des sens Interieurs.



R donc les sens interieurs sont cinq, à scauoir la faculté & puissance animale, enuoyee aux parties du corps, qui ont besoing de sentiment & mouuement volontaire, desquels les instruments sont les nerfs et les muscles: mais deuant que passer plus oultre à declarer les autres sens, nous dirons que c'est que sentir, qui n'est autre chose qu'à perceuoir quelque chose par les sens: & auparauant que le sentiment extérieur puisse estre faict, quatre choses sont requises, lesquelles concurrent ensemble, à scauoir, la faculté ou puissance de l'ame, par laquelle sont faictes quel-

Occupation.

Quatre choses
sont requises
au sentiment.

quelques œuvres ou fonctions, qui viennent à l'esprit animal conduit par les nerfs: la seconde, c'est l'organe ou instrument temperé & idoine à recevoir les fonctions, en laquelle, comme à son subiect, la puissance de l'ame fait son operation: la troisieme l'obiet, qui est la chose sensible & perceptible, ou ce qui est obieté & présenté à l'organe, & envers lequel la faculté ou puissance de l'ame exerce ses operations: la quatrieme, est le moyë qui reçoit l'obiet de la qualité sensible, & l'a porte à l'organe. Exemple, Sans la faculté animale sensitive on ne pourroit aucunement sentir, pareillement sans son organe, qui sont les nerfs dont le vray cuir est tissu, par lesquels l'esprit & faculté animale sont portez, on ne pourroit sentir: aussi sans le moyen, qui est la vole ou paulme de la main, & des doigts, principalement estās

en leur tēperature naturelle, car autrement ne peut estre idoine à recepuoir les fonctions de l'ame. Parquoy la main estant trop refroidie, ou eschauffee, ou calēse (comme peuuent auoir les charpētiers, forgerons, & autres semblables manouuriers) on ne pourroit auoir certain iugement du tact. L'obiet du tact c'est la chose sensible ou perceptible, qui est obiectee & presentee à l'organe, enuers lequel la faculté sensitive exerce son operation: & ce dict obiet est toute qualité tactile, faicte des qualitez premieres, comme chaleur, froideur, humidité, & siccité, & autres qui les accompagnēt, comme durescé, molescé, asperité, leuité, pesanteur, legerté, espesseur, rarité, friable, onctueus & encore: d'autres adiointes à icelles, comme grandeur, petitesse, figure, nombre, motion & repos.

Du

seoit: & par telle admiration d'armonie de ses sons forts & concites, ses esprits demeurans vaincus, estoient contraincts y obeier, le rendant audacieux, tranquille & ioieux, selon la mutation du son de sa harpe. Dauantaige ceste imagination donne effroy & peur, lors qu'on voit quelcun en quelque peril imminet.

Exemple, lors que le Turcq dançoit sur
 une corde en ceste ville de Paris les pieds
 dans un bassin, plusieurs le voyant en
 peril de se rompre le col, bras & iam-
 bes, trembloient de peur, ne l'osant bon-
 nement regarder. Pareilement quelque-
 fois ceste vertu imaginative faict cheoir
 la personne de dessus quelque planche,
 ou quelque lieu hault, pour la grãde ap-
 prehension & timidité qu'elle a de tom-
 ber. & partant avec les choses deuant
 dites, nous auons encore besoin d'une plus
 haute faculté, pour sçauoir discerner si

Turc qui dan-
 çoit sus la
 corde.

les choses imaginees, veües, ouïes & senties par dehors, sont bonnes ou mauuaises. Nature nous a donné autre puissance qui discerne du bien & du mal, à cause de quoy est appelee raison, ou cogitation, que declarerons bien tost. Or ceste faculté imaginative a son siege, pareillement aux ventricules anterieurs du cerueau, avec le sens commun, mais le sens commun est situé (comme nous auons dit) en la partie anterieure desdits ventricules, & l'imaginative plus derriere.

Siege de la faculté imaginative.

Du sens appelé cogitation, ratiocination ou entendement.

Raison, Ratiocination, entendement est la principale partie de l'ame.

A P R E S le sens imaginatif, est la faculté principale nommée raison, qui est la principale partie de l'ame, laquelle peut ratiociner, composer & diuiser, & iuger en dernier resort:

sort: & pour ceste cause a este nommee
des anciens intellectuelle ou pensee, qui ^{Pensee.}
est une puissance suprême, non subiecte
à aucun organe ou instrument, ne chose
corporelle, mais au contraire en toutes
ses actions est libre, & penetrante ius-
ques aux profondites des choses. En som-
me, icelle seule inuente le vray, iuge le
faux, & distingue, ce que de l'un ou de
l'autre s'ensuit. ou repugne, en rappor-
tant les circonstances des choses veües
& imaginees, les comparant les vnes
aux autres, & ainsi discerne la chose se
devoir faire ou non. Et pour conclusion,
ceste ratiocination nous est plus que ne-
cessaire, & est un grand bien à un hom-
me de n'estre trop soudain à faire ou par-
ler, sans que premierement raison n'ait
discouru le bien d'avec le mal: Car plus-
ieurs se laissent aller par leur subite ap-
prehension, n'attendants le iugement de

Siege de la
ratiocinatio
est au ventri-
cule moyen.

raison, pour penser, & discourir aux circonstances particulieres: par ce moyē tombent en plusieurs inconueniens, dōt puis apres s'en repentent. Le siege de la dictē ratiocination est au ventricule moyen, comme la plus haute & sure forteresse de toute la teste, à cause de sa principauté.

Du sens memoratif.

Sens memo-
ratif.

Memoire.



Maintenant, la ratiocination descripte, nous fault parler de la memoire, laquelle, comme fidelle tutrice, retire & garde ce qui a esté aux trois ventricules du cerueau receu & elaboré. Et pour ceste cause à bō droit elle a esté des anciens acomparee au greffe, auquel (comme après un procès debatū) ce qui est decreté, et registré, (car par mesme raison, ce qui a este longuement en doute & controuersie) par la ratiocination, en la fin le tout est conclud

clud & arresté en l'esprit, & cela s'imprime en la memoire, à fin qu'il soit reuoqué, & qu'on s'en puisse aider, quand il sera requis & nécessaire. Qu'il soit vray, que vaudroit d'auoir tant de conceptions en son esprit, & tant de diuersités, si elles n'estoient en quelques lieux gardees ? Et pour ceste cause le grand Architecteur, Facteur de toutes choses, curieux de nostre perfection, nous a donné ce singulier remede, prompt & commode contre l'ignorance, & oubliance des choses, qu'à l'aide de la memoire, nous pouuons de ce que nous auons veu (comme des choses enregistrees) rememorer) & des apprehendees ratiociner: le siege, & domicile d'icelle, est au ventricule postérieur, situé au cerebelle, moins humide & plus solide que nulle autre partie du cerueau, pour ceste cause apte, & idoine à recevoir les choses,

qui ont esté aux trois ventricules rece-
ûes & elaborees : & outre toutes ces
choses, l'ame a encores cinq autres facul-
tez, par lesquelles chasque partie de no-
stre corps est conseruee: la premiere at-
tractrice, qui attire son aliment: la secõ-
de retentrice, qui le retient: la tierce con-
coctrice, qui le cuit: la quatriesme assi-
milatrice, ou generatrice, & augmenta-
trice, c'est à dire qui le rend semblable à
la partie: la cinquiesme expultrice, qui
iette hors les excremens qui pechent en
quãtité ou qualité, ou tous les deux en-
semble, & toutes les choses qui luy sont
contraires, cõme le fer d'une fleche, une
balle, une esquille d'os, & autres choses
estranges. Dauantage l'ame a quelques
passions, comme ioye, tristesse, crainte,
Ioye. honte, verecõdie. Or la ioye procede du
cœur, lequel estant frappé de ce qui luy
semble agreable, se dilate & eslargit,
comme

comme pour embrasser l'obiet presenté, & lors les esprits s'espendent par tout le corps: Au contraire quand le cœur se reserre & retrainct, suruient la tristesse, d'autant qui ne sy peut engendrer grande quantité d'esprits, & encore si peu qu'il y en a ne peuuent estre aysemēt distribués. Semblablement crainte reuoque & attire subitement le sang & les esprits au cœur, & partant on voit que le visage pallist, & les extrémités demeurēt froides, & la voix est interrompue avec vn grand tremblemēt de tout le corps. Honte est vne affectio meslee de courroux & de crainte, & si la crainte surmonte le courroux, faict que le sang se retire au cœur: adonc le visage pallit: & si le courroux surmonte la crainte, esmeut le sang, & le faict monter au visage. Il ya vn autre honte appelee verecondia, qui faict que les

Tristesse.

Crainte.

Honte.

Verecondia.

esprits se retirent au centre , & à l'instant mesme reuiennent , laquelle chose est fort familiere aux enfans & aux vierges : & par ainsi l'on cognoist que les passions de l'ame font de grandes mutations en nostre corps. Or pour donner fin aux actions & operations de l'ame, laquelle a trois facultez principales qui regissent & gouuernent nostre corps, à sçauoir animale, naturelle, & vitale, laquelle vitale principalement tient l'excellence par dessus les autres, qui se faict par le moyen de la dilatation & constri-
ction du cœur, & des arteres, laquelle cessant, l'ame se separe du corps, qui alors est appelé cadauer, ou pourriture & corruption, qui ne merite plus de demeurer sur la terre, mais estre enseuely aux entrailles d'icelle, iusques à la resurrection vniuerselle, pour entrer en la beatitude immortelle. Maintenant nous re-

tournerons sus nos brisees, & parlerons des excremens naturels & de ceux que iette l'enfant en la matrice de sa mere, estant en icelle.

Des excremens naturels, & de ceux que iette l'enfant en la matrice de sa mere.

CHAP. XII.

DE V A N T que descrire par quels conduits, l'enfant estant au ventre de sa mere, iette ses excremens, il m'a semblé bon de proposer au ieune chirurgien ceux qui sont naturelz, dont on appelle excrement ce que nature separe d'avec le pur & net, desquels il ya plusieurs genres: le premier est de la premiere digestiõ, laquelle se faiet en l'estomach, estant poussé par les intestins, & sort par le fondement: le second procede du foye, & cõ-

prent deux especes, à sçauoir la collere,
 qui est enuoyee du foye au chistis fel-
 lis pour irriter la matiere fecale à sor-
 tir par les intestins, & une partie sen-
 va du foye par les grandes venes avec
 l'aquosité du sang, et sort avec l'urine &
 suc: L'autre espece est l'humeur me-
 lancholique, lequel est attiré par la ra-
 te, dont elle se nourrit du meilleur, &
 iette l'autre partie à la bouche de l'esto-
 mach, à fin d'irriter l'apetit par son acri-
 monie, & une autre partie va aux in-
 testins: la troisieme se congrege és venes
 & arteres, qui est semblable au megue
 & serosité du laict, lequel est vehicule
 du sang, qui ne pourroit pour sa gros-
 seur couler cà et là és venes, et nature se
 estant aidee, la grande vene caue le
 chasse au reins, & d'iceux aux pores
 vreteres, puis à la vessie, pour estre mis
 hors par le canal de le verge: là dernie-
 re se

Gal. de vfu
 partium.

re se faict à chacune partie du corps, par la derniere digestion propre à chacune d'icelle, & est pousse hors du corps, partie par transpiration insensible, & quel quefois par sueur par les pores du cuir, partie aussy par certains passages, & conduicts propres à chacune desdictes parties: comme sur toutes autres le cerueau, lequel se purge par plusieurs canaux, comme par le nés, par la bouche, qui descend par les trous du palais, par les oreilles, par les cõmissures du crane, par les yeux, & tous ses excrements se doibuent purger tous les matins, encore qu'en autre temps du iour cela se peult aussi faire: & si quelques vns sont par trop long temps retenus, il fault remedier aux causes de leur retention, tant par regime, que par medecine. Il ya biẽ d'autres excremẽts, lesquels ne sont naturels, desquels si tu veus auoir la cong-

Il ya d'autres
excremens
cõtre nature,

noissance, voy mon traicté de la peste.

L'enfant estant au ventre de sa mere, commence à vriner soudain que toutes ses parties sont formées, par le conduit de l'ombilic nommé uracos, mais aux derniers moys prochains de sa natiuité, le dict uracos se ferme comme auons dict, & alors l'enfant masle vrine par la verge, & la femelle par le col de sa vessie: ceste urine se conserue avec les autres excremens, à scauoir la sueur & les serosités, & autres superfluités du sang menstruel, qui seruent pour suporter plus facilement l'enfant ou il nage en icelles: & lors que le temps est venu d'enfanter, il ront les membranes, & adonc lesdictes aquosités sortēt, et alors les matrones predisent que bien tost la femme acouchera puis que les eaux s'escoulēt: & si l'enfant sort promptement avec l'expulsion d'icelles (ou subit après) l'en-
fan-

fantement sera hureux, car par l'humidité des dictes eaux, le col de la matrice, & autres parties en sont rendues plus lubriques, laxes, glissantes ou coulantes, qui faict que plus facilement le col de la matrice se dilate & ouure. Et si l'enfant retarde à sortir après qu'elles sont issues, la femme enfantera avec une tresgrande difficulté, par ce que l'enfant demeure à sec, & aussi que la matrice, & le col d'icelle se reserrent: les matrones rendent bons tesmoignages de cela, car quand la mere a perdu en abondance, & tout a coup ses eaux, long temps au parauant que l'enfant se presente au couronnement de la partie hôteuse, sont contrainctes (à l'exemple & imitation de nature) oindre le col de la matrice de choses onctueuses & oleagineuses. Or ledict enfant ne iette ses eiections par le fondement, estant au ventre de sa mere,


L'enfant est
au ventre de
la mere ne
prend nul ali-
ment par la
bouche, aussi
ne iette rien
par le siege.

si ce n'est lors que la femme est preste d'a
coucher, & qu'il aye rompu les taves,
à raison qu'il ne prend point d'aliment
par la bouche, & aussi que son esto-
mach ne faict encore son office, dont riē
n'est transporté aux boyaux, & luy es-
tant enuoyé un sang pur & digeré,
il ny a nulle superfluité fecalle: qui soit
vray, i'ay veu des enfans naistre à ter-
me, lesquels n'auoient nulle ouuerture
au siege, lequel estoit clos d'une petite
peau, & leur ay faict apertion, ou tout
subit en sortoit des excremens, d'où nous
conclurons que l'enfant ne iette autre
excrement au ventre de sa mere, fors la
sueur & l'urine, par ce qu'il est nourri
de sang benin & loüable, & nō de sang
menstruel, vilain & corrompu, comme
aucuns, ont pensé & escript. Or il fault
ici noter que lesdictes aquosités sont à la
capacité de la matrice, écloses dās les mē-
bra-

L'enfant est
nourri au ven-
tre de la mere
d'un sang be-
nin & loüa-
ble & non de
corrompu.

branes, esquelles l'enfant naige entiere-
ment, & ne sont separees de l'enfant
comme on voit aux cheures, brebis,
chiens, & autres bestes, ce que i'ay biẽ
observé plusieurs fois.

Comme l'enfant estant à ter-
me, s'efforce de sortir hors du
ventre de sa mere, & de sa na-
tiuité. CHAP. XIII.

 VAND l'enfant est ve-
nu à son terme prefix, alors
il a affaire de plus grand
nourrissement qu'aupara-
uant, & n'en pouuant tirer par le nom-
bril, tant qu'il en a besoin, cela est cause
que par une grãde impetuosité cherche
à sortir hors: adonc il se meut & rompt
les membranes qui le soutiennent, dont
la matrice se sentãt interessée, ne le peut
plus soutenir: adonc s'ouvre, & par icel-

le ouuerture sentât l'air entrer, le pour-
 suit, & s'efforce de sortir hors, la teste
 deuant: alors se faict la natiuité natu-
 relle de l'enfant non sans douleur de son
 corps tendre & delicat, estant pres-
 sé, dont en pleurant faict ici son entree
 des calamités de la vie humaine: sem-
 blablement la mere enfante avec vne
 extreme douleur, par ce qu'il faut que le
 col de sa matrice (qui est rōd, estroit, &
 nerueux) se dilate & eslargisse pour
 faire passaige à l'enfant, & aussi que
 les os des Illes se separēt d'encontre los
 sacrum, à fin qu'estans dilatés, toutes les
 autres parties se puissent plus facilēmēt
 ouurir. Or que lesdicts os se deioignent
 & separent, est aisé à croire & à prou-
 uer: car cōme seroit il possible q'un en-
 fant estant à terme, ou deux gemeaux
 sentretenans, ioincts ensemble, puissent
 passer par ceste petite voye estroicte
 sans

Pourquoy l'en-
 fant pleure,
 venant au
 monde.

Pourquoy les
 femmes en-
 fantent avec
 vne extreme
 douleur.


sans que lesdicts os ne fussent disioincts l'un d'auec l'autre? Or veritablement ie le scay pour auoir ouuert des femmes tout subit après auoir rendu leur fruit, ausquelles i'ay trouué entre les os des Illes & l'os sacrum distance à mettre le doigt entre deux: d'auantage i'ay remarqué, estant appelé aux acouchemens des femmes, ayant la main sous leur cropiõ auoir ouy, & senti vn bruit de crepitation, ou croquement desdicts os, pour la separation qui si faisoit: & mesmement i'ay entendu de plusieurs femmes honorables, que quelques iours vn peu deuãt que d'acoucher aperceuoient, avec douleur, certains bruiets desdicts os, qui croquetoient ensemble: d'auantage les femmes qui ont recentemẽt enfanté, se plaignẽt fort auoir douleur eẽ la regiõ de l'os coxis, qu'ils appellent les reins: & ici ie conclus (sauf meilleur iugement que le

mien) que lesdicts os commencent à s'en-
tre ouvrir quelquefois deuant l'enfan-
tement, & principalemēt à l'heure que
l'enfant sort & est mis sur terre, & n'ay
iamais aperceu qu'il se face ouuerture
par deuāt, comme aucuns disent, mais
veritablement les os des Illes s'ouurent
& separent, en sorte que plusieurs fem-
mes (faute q̃ nature ne les a puys après
bien reioincts) sont demeurees boyteu-
ses. Et quant à ce qu'on dict qu'ē Italie
on rompt l'os pubis aux ieunes filles, (à
fin que lors qu'elles auront des enfans,
acouchent plus facilement,) cest une
chose faulce & mensongere, car encore
qu'on leur eust rompu, il s'y feroit un cal-
lus, comme il se faict tousiours aux fra-
ctures des os, dont puis apres l'enfante-
ment seroit rendu plus difficile.

De

De la situation de l'enfant au ventre de la mere.

CHAP. XIII.




On ne peut bien descrire la vraye situation de l'enfant au ventre de la mere, car veritablement ie l'ay trouuee diuerse, tant aux femmes mortes qu'aux viues: aux mortes, en les dissecant promptement après qu'elles auoiēt ietté le dernier soupir: aux viues, lors que i'ay esté appelé pour les deliurer, nature ne pouuant faire son deuoir, aiant la main en leur matrice, trouuoys quelquefois la teste de l'enfant en bas: autre fois en hault, & les pieds premiers: autres les fesses: autres les mains & les pieds ensemble, comme tu vois par ceste figure.



*Autrefois les genous: autrefois un seul
pied: autrefois le d'os: autrefois le vêtre,
les*


les mains & pieds en hault comme tu
vois par ceste figure.



Les autres les pieds escartez l'ũ de l'autre: autres vn seul bras, estans hermafrodites, comme tu vois par ceste figure.



*Aucuns iumeaux, dont l'un d'iceulx
viët la teste premiere et l'autre les pieds,
comme tu peus voir par ceste figure.*



Aux femmes mortes, lors que l'enfant estoit encore fort petit, les ay trouuees en figure ronde, aians la teste sus les genouils, & les deux mains par dessus, & les talons contre les fesses: d'auantage ie proteste en auoir trouué vn, aiant ouuert la mere (promptement estant decedee) situé de son log, la face vers le ciel, et encore viuant, aiant les mains iointes: & partant nul n'en peut donner regle certaine de la situatiõ des enfans aux ventres de leur mere.

Du temps commode ou incõmode de la natiuité de l'enfant. CHAP. XV.

Plinẽ lib. 7.
Chap. 5.

TOUS animaux ont certains tẽps limités de charger & porter ses petis, mais l'homme seul n'a aucun tẽps ny terme prefix, ains vient au monde en tous temps, aussi les vns naissent à
sept

sept mois, les autres à huit, les autres à neuf, qui est le plus commun, les autres à dix, voire au commencement de l'onzième. Massurius dict, que Lucius Papirius cōdamna par arrest un substitué sur le raport de la mere de Postume, institué heritier, qu'elle disoit auoir porté treize mois après la mort du testateur, & partāt il n'y a aucū terme certain & defini à porter les enfans. L'ēfant nais-
sant a six mois ne peut viure, à cause q̃ ses mēbres & tout son corps, n'ont point encore toute leur perfection: au septiesme il peut viure, ce que l'expēriēce nous montre, & toutefois au huitiesme ne uiuent iamais, ou raremēt. Maistre Nico-
le du Hautpas, en son liure de la contēplation de la nature humaine dict, que la raison se doit rapporter à l'astrologie, qui tient que le huitiesme mois n'est critique, comme le septiesme, ou le neuief-

M. Nicolle du
Hautpas lib.
de la con-
templation,
de nature hu-
maine.

me, ou l'onzième, & que le huitième est attribué à Saturne, ennemi des vies & naissances : & ou ils vivent seront tout le cours de leur vie valetudinaires.

Arist. en ses
problemcs.

Les enfans qui naissent au huitième mois ne vivent guaires, & sont appelez genitures de la lune, pource que la lune est planette froide, & par sa grand' froideur presse le fruit, de façon qu'en bres il meurt. En la naissance de l'enfant, on peut dire estre une chose fort admirable, qui surpasse l'entendement humain, car le col de la matrice tout le temps que la femme est grosse, son orifice est tellement clos, que seulement la pointe d'une esprouvette, ou d'une esguille n'y peut entrer, si ce n'est qu'il ne se face une superfetation, ou que nature se decharge de grande quantité d'eaux qui sont en la matrice, & au temps de l'enfante-ment s'ouure & s'estend de façon que
l'en-

L'enfant estant sorti bien tost, apres se res-
 serre par vne tresgrande & admirable
 prouidence de nature. Cōmunement les
 femmes sont plus travaillees à leur pre-
 mier enfantement qu'aux autres, &
 tant plus qu'elles ont enfanté, travail-
 lent moins que la premiere fois: & par
 ce ie leur conseille d'user d'un onguent
 emollient comme cetuy. ʒ. spermat. ceti
 ʒij, olei amigdal, dulc. ʒiiij, ceræ albæ
 & medullæ ceruinæ añ. ʒiiij. axung. añ.
 seris & gall. añ. ʒj, tereb. venet. ʒij, fiat
 vng. duquel en seront frottez les cuisses
 & le ventre de la femme grosse: d'auan-
 tage pourra semblablement porter vne
 maniere de ligature faicte de peaux de
 cuir de chien deliee, laquelle sera frottee
 de l'onguēt susdict, qui luy aidera à su-
 porter l'enfant. Plus quand elle sera sus
 so neufiesme mois, faut qu'elle se baigne
 par plusieurs fois dans vn bain, auquel

Grande prou-
 dence de dieu
 & de nature
 aux acouche-
 mens des fem-
 mes.

Onguēt &
 ligature pro-
 pre à relacher
 le ventre des
 ieunes fem-
 mes grosses.

auront bouilly herbes emollientes . Or l'enfantement naturel est quand la teste vient la premiere & suit ses eaux, & celuy qui suit après, est quand il vient les pieds devant, tous les autres sont tres-difficiles. Parquoy ie veulx yci aduertir les matrones, que la ou elles congnoîtront que l'enfant ne viendra point en ces deux manieres, mais venant le dos le premier ou le vêtre, ou les mains et pieds ensemble, ou un bras, ou en autre figure cõtre nature, qu'elles ayent à les tourner & les tirer par les pieds dehors : & si elles ne se sentent assés experimentees, qu'elles appellent les chirurgiens exercés en cet affaire: car comment seroit il possible à nature les ietter hors estans ainsi situés, si ce n'estoient d'auenture petits auortons, lesquels pour leur petitesse nature les pourroit ainsi facilement mettre hors.

Les signes à la femme de bien
tost enfanter.

CHAP. XVI.

LES signes sont, qu'elle sent
douleur au dessous de l'om
bilic, & aux aines, & est
la dicte douleur communi
quee aux vertebres des lombes, & prin
cipalement lors que les os des Illes se se
parent de contre l'os sacrum, & l'os de
la queue se recule en arriere: leurs cuif
ses & parties genitales se tumesient, &
leur font grande douleur: d'auantage il
leur suruiuent un tremblement vniuer
sel de tout le corps, tel qui se faict au cõ
mencement des accès des fieures: plus leur
face rougit à cause que le sang s'eschauf
fe, par ce que nature s'aide de toutes ses
forces à mettre hors l'enfant, lequel se
meut vehementement, & le sang ainsi
eschauffé: & esmeu, sort avec portion

des aquosités premier que l'enfant: & si tels signes se demonstrent, sois assureé qu'en brief la femme enfantera: & partāt qu'on luy prepare tout ce qu'elle aura besoin pour telle affaire, & principalement à la bien situer en un liēt en figure moyenne, à scauoir nō du tout à la reuerse ny assise, mais aucunement le dos esleué, à fin qu'elle puisse mieux respirer, & auoir force à mettre l'enfant hors: dauātage faut qu'elle ait les iābes, courbees & les talōs vers les fesses, & les cuisses escartees l'une de l'autre, & qu'elle, s'appuie cōtre une busche de bois posée au trauers de son liēt, aiant un peu les fesses esleuees: Aucunes femmes accouchēt en une chaire propre à cela, les autres accouchent de bout, estant appuyees des bras sus le bort du liēt, ou sus un banc. Or il faut bien se garder de mettre la femme aux peines de trauail, de-

uant que les signes susdicts ne precedēt, car deuant iceux le trauail est faict en vain, & en sont les poures femmes plus molestees & debiles quand se vient à mettre hors l'ēfant, à cause qu'elles n'ont tant de force & vertu lors que l'expulsion de l'enfant se doibt faire. Estant la femme en trauail d'enfant, le tout venant bien, faut laisser faire à nature, & à la sage femme: toutefois commander à la femme (lors qu'elle aura des ondees & trachees) qu'elle s'espreigne le plus qu'elle pourra, luy cloant le nés & la bouche, et vne matrone luy presse les parties superieures du vētre en poussāt l'enfant en bas: car telle chose aide grādemēt à les faire accoucher, n'estant si vexees des trachees ou ondees: comme i'ay souuentefois experimēté en plusieurs femmes, ou i'ay esté appelé pour leur ayder à acoucher: & si le trauail est long &

laborieux (à cause que les videnges sont sorties long temps auant l'enfantement, & que la matrice demeure à sec) fault faire ce qui s'ensuit. ℞ butiri recentis sine sale in aqua arthemisi. lota. ʒij, Mucag. sem. lin. ficuū, & seminis alth. cū aqua sabin. extract. añ ʒ. ʒ. B, olei lilior. ʒj, fiat linimentum, ex quo obstetrix liniat frequēter colū vteri. Aussi on baillera de ceste pouldre. ℞ cinamo. corti. cass. fist. diptam. añ ʒi. B, saccar. alb. ad pond. omn. & fiat pul. subtiliss. sumat ʒiiij, cum decocto seminis lini, celeriore enim & faciliorem partū facit: cum minori molestia potest hic puluis dari cum vino albo tenui. D'auantage la sage femme (quand le travail est ainsi facheux) pourra oindre sa main de ce liniment, & en mettre dans le col & parties voisines de la matrice. ℞ olei de sem. lini ʒjss, olei de cast.

cast. ʒ ʒ, gall. moscat. ʒ iij, lapdani ʒ j,
 fiat linimentum. Plus on fera eternuer
 la femme cum puluere piperis, vel
 parum elebori albi, in nares immis-
 so: plus pour faire hater la femme d'ac-
 coucher, la semence de lin pillee avec
 eau d'armoise & de sabine sert grande-
 ment, ou celuy remede: ʒ cortic. cass. fist.
 concaß. ʒ ij, cicer. rubro. m. ʒ, buliant cū
 vino albo, & cum aqua sufficienti, ad-
 dendo sub finem sabina ʒ ij, & fiat de-
 coct. in coll. pro una dosi: adde cina. ʒ ʒ,
 croci ʒ. vj, fiat potio: après elle tachera à
 esternuer avec sternutatoires; quoy fai-
 sant la femme, avec moins de travail,
 enfantera.

Ce qu'il faut faire à l'enfant su-
 bit qu'il est nay.

CHAP. XVII.

PRemierement étant sorti du ventre de la mere, la sage femme doit subit tirer l'arriere fais, si luy est possible & si l'est besoin mettra sa main dans la matrice de la femme pour l'extraire & mettre hors, autrement sortiroit après avec grande difficulté, par ce que la matrice, & toutes les autres parties se resserrent incontinent que l'enfant en est hors. Cela faict l'enfant doit estre separé d'avec son arriere fais, en luy liant le nombril d'un fil double à distance du ventre de la largeur d'un pouce, & nō plus, & la ligature ne doit estre trop serree, de peur que la partie qui est outre la ligature, ne tombe plustot qu'il n'est besoin, ne aussi trop lâche, de peur que le sang ne flue des vaisseaux umbilicaux, aussi que l'air n'entre dedans le ventre de l'enfant: & apres estre lié il doit estre coup-
 pé

Observations
 qu'on doit
 avoir a la liga-
 ture du nom-
 bril.

pé deux doigts de sous la ligature, avec un rasoir ou ciseau bien trenchant, & puis appliquer dessus un linge en double trempé en huile rosat ou d'amandes douces, pour seder la douleur: & après cela, aubout de quelques iours, ce qui est couppé, tūbera avec la ligature. Or plusieurs matrones couppent incontinent le nombril après l'auoir lié sans attendre que l'ariere fais soit hors, mais celles qui entendent mieux ces choses, differēt iusques a ce qu'elles ayēt tiré ledict arriere fais. Cela faiēt l'ēfant doit estre nettoyé d'huile rosat ou de mirtilles, pour luy oster la crasse & excremēt qu'il apporte dessus son cuir, aussi pour clorre les pores, à fin qu'après son habitude en soit rendue plus ferme. Aucuns les baignēt en eau chaude & vin astringent, puis les huilent, & font cela par cinq ou six iours, à fin de nettoyer son corps, & re-

Pourquoy on
laue l'enfant
sy tost qu'il
est né.

foudre les meurdrissures & gourdfolement qu'il a eu en sortant hors du ventre de sa mere. Il luy faut pareillement manier les doigts les uns après les autres, & estendre & flechir ses ioinctures des bras & iambes, voire par plusieurs & diuers iours, à fin de chasser quelque humeur superflu, qui pourroit estre en ses iointures. Et si on void qu'il y ait quelque vice aux os, il les faut habiller, soit qu'ils soient hors de leur place ou fracturés, seront reduits & redressés par la main du Chirurgiẽ. D'auantage faut auoir esgart si ses conduicts sont estouppés par vne petite mēbrane (qui se faict à d'aucuns) comme aux oreilles, nés, bouche, verge, fondemēt, à & l'orifice du col de la matrice aux femelles: & si telle chose se trouue, seront destoupez par l'artifice du Chirurgien, puy on y apliquera tentes & pesseres; & quelque

Chose digne
d'estre biẽ not-
tee aux ma-
trofnes.

que linge entre deux, de peur que les parties, qui auront esté coupees, ne se reioignent derechef. Aussi quelques uns ont six doigts à chacune main, autres ont les doigts des pieds & des mains ioincts ensemble: le vulgaire appelle tel vice patte d'oye: autres ont un ligamēt sous la langue qu'on appelle le fillet, lequel les garde de teter, ou quand ils seront deuenus grāds, il les fait balbutier, à cause qu'il tient la langue liee contre la mandibule inferieure, tous lesquels vices seront aidés par la main du Chirurgien. Semblablement faut prendre garde s'il y a quelque excrement blanc semblable à de la croye, qui adhère contre les parties internes de la bouche, & sus toute la langue, qui viēt à cause de leur intemperature, qui pareillement les garde de teter, & par faute de les netoyer il s'engendre souuent des vlcères,

Patte d'oye.

Le vulgaire appelle ceste maladie, le chancre blac.

voire iusques à la gorge, qui est cause de leur mort. Or pour y remedier, faut prendre huile d'amandes douces tiree sans feu, miel commun, sucre fin, & avec un peu de linge, lié au bout d'un petit batō, lui seront frottez doucemēt les lieux ou il sera besoing, telle mixtion ne doit estre trop es̃pesse ne liquide, elle deterge & fait tomber la sordicie. Aussi luy en peut on donner quelque fois la quantité d'une petite cuilleree, pour luy lacher le vētre lors qu'il sera constipé, & ceci apaise la toux s'il en y a, cede la douleur des traucehees, pareillement nourrit, de sorte qu'on peut dire telle mixtion estre medicamenteuse, & allimenteuse, par ce que nature se delecte par grande volupté, d'attirer les choses douces, qui luy sont familiaires de leur nature. Je diray d'auantage qu'aucuns enfans nouuellement naiz, ont les paupieres prises avec le cil,

cit, & quelquefois avec la conionctive
& cornee, lesquels seront separez avec
instruments propres, se gardant de tou-
cher à la cornee qui est au droict du trou
de la pupille: & après en auoir faict se-
paration, on mettra dedans les œils &
aux parties voisines, blanc d'œuf battu
avec eau rose, & tiendra on la paupiere
ouuerte, mettant quelque petit linge
delié entre le cil des œils, trempé en la
dicté mixture, de peur qu'elle ne se rea-
glutine, & souuent on leur ouurira les
œils, puis après on luy appliquera quel-
que colire desiccatif pour produire la ci-
catrice. Que diraige plus? cest que quel-
quefois on trouue aux enfans nouvelle-
ment nais, entre le cuir & le crane, vne
assés grãde tumeur mollasse, par ce que
la sage femme aura tiré la teste par vio-
lence, ou par quelque contusion, ou par
grande abondãce d'aquosités, qui serõc

sorties du cerueau par les sutures, qui ne seront ancores ioinctes ensemble, comme on voit en hydrocephalos, qui est hydro pisie du cerueau: Pour la cure il faut faire ouuerture avec la lansette, & eniter le muscle temporal, puis traicter la plaie comme il est requis.

De la maniere d'extraire l'arrierefais après l'enfantement.

CHAP. XVIII.



Diuers noms
de l'arriere-
fais.

LArrierefais a esté ainsi appelé du vulgaire parce qu'il vient après l'enfant, & qu'il est un autre fais à la femme: des autres est appelé le liēt, parce que l'enfant y est couché & enuelopé, & y demeure: des autres la deliurance, parce qu'estant hors, la femme est entièrement deliuree, & autant qu'il y
aura

aura d'enfans, autāt y aura d'arriere-
 fais) chose aux matrones digne d'estre
 bien notee) ce qui nous est demonstřé par
 experience, en celles qui aiant enfanté
 auiourdhui, et mis hors leurs arrierefais
 aiant deux enfans, lors qu'elles viennent
 à enfanter, quelque temps après, iettēt
 un autre arrierefais. Or iceluy demeu-
 re souvent dans la matrice après l'enfan-
 tement, pour plusieurs & diuerses cau-
 ses: comme par l'imbecilité de la vertu
 de la femme, pour auoir esté trop agitée,
 & trauaillee de douleurs, pendāt le tra-
 uail de son enfantement, ou que le col de
 la matrice & autres parties voisines se
 seront si fort enflées, par le long & mau-
 uais trauail, au moyen de quoy lissue se
 ferme, en sorte qu'il ne peut estre ietté
 hors: d'auantage peut demeurer à rai-
 son qu'il est entortillé & reploié dedans
 la matrice, ou sil est demeuré à sec, à

Les causes
 pourquoy l'ar-
 rierefais de-
 meure en la
 matrice.

cause des eaux qui aurot esté euacuees
plustost qu'il n'estoit besoin, parquoy les
voyes ne sont si glissantes & coulan-
tes: ou qu'il est encore attaché à la ma-
trice, par la liaison des venes & arteres:
ce qui se faict volontiers aux femmes
qui auortent: car tout ainsi que nous vo-
ions les fruis des arbres (lesquels ne sont
encore en parfaicte maturité) plus dif-
ficilement tomber que ceux qui sont du
tout meurs (& lors qu'ils sont en parfai-
cte maturité, tombent d'eux mesmes) ainsi
est il de l'arriefais, lequel se separe de co-
tre la matrice, quand l'enfant est à son
terme prefix. & la ou il ne seroit separé
de soy-mesme, & demeurast en la ma-
trice, il suruiendroît à la mere plusieurs
accidens, comme suffocation de matri-
ce, ne pouuant auoir son alaine, au moy-
en de la putrefaction qui se faict en peu
de temps, par ce qu'ils seleuent plusieurs

vapeurs corrompues & putrides, qui montent au cœur & au cerueau. Parquoy ladicte mere tombe souuētefois en defaillance de cœur, & quelques fois est suffoquee, & rend leſprit: pour ceste cause le faut extraire ſubit que l'enfant eſt ſorty, en le tirant par le nombril (appelé petit boiau) & ou il ne pourroit eſtre ainſi extraict, faut ſituer la femme, come ſi on uouloit tirer l'enfant mort, ou viſ, lors que nature de ſoy ne le peut faire: dōt la ſage femme mettra ſa main doucement dans la matrice, oincte d'huile ou de quelque axunge, & ſuura le dict nombril, qui luy ſeruira de guide pour prendre l'arriefais, & le ſeparera, ſil eſt encore adherant contre le fond de la matrice, avec lesdoigs, le tournant de coſté & d'autre, & le tirera hors tout doucement, & non par violence, comme font les folles, & idiots ma-

Hip. Aphori.

trones, de peur de tirer quant & quant le corps de la matrice, & la deprimer de son propre lieu, dont puis après accidēs aduiennent, & souuent la mort : car le tirant rudement, on peut rompre & dilacerer quelques venes, arteres, ou fibres & ligamēts nerueux, ou ladicte matrice est liee & attachee, dont le sang sort, & estant sorti de ses propres vaisseaux, se corrompt & putresie, & cause inflammation, aposteme, gangrene, & par consequent la mort, ou pour le moins (pour auoir tiré & rompu les ligamens) aduient que la matrice tombe entre les iâbes de la femme, qui luy est une peine & douleur inestimable, de quoy nous parlerons ci après . Et si la sage femme trouue en tirant l'arrierefais quelque trûbus ou sang caillé, il faut qu'elle le tire hors, & aussi qui ne demeure aucune portio dudit arrierefais: quelquefois la
fem-

femme le iette par sa nature en pourriture, qui ne se faict sans grans accidens. Remedes propres à expeller hors l'arterefais.
 On aide à l'expulsion d'iceluy par sternutations & fomentations, faictes au col de la matrice de choses aromatiques, & par iniections de choses glaireuses & remolientes: d'auantage les senteurs, fœtides seront administrees par la bouche, & autres choses qui prouoquēt les mois, & principalement vne decoction faicte de arthemisia, & baccis lauri, avec vin miellé, ou demie dragme de poudre de sauinier donnee à aualler a la patiente: les cheueux de la femme brulés & puluerisés sont profitables, les luy faisant boire avec du vin.

Ce qu'on doit bailler à l'enfant par la bouche deuant que lui donner à teter.



N doit frotter la bouche & le palais de l'enfant , avec un peu de theriaque, & de miel, ou d'huile d'aman- des douces tiree sans feu , luy tenant la teste esleuee , à fin qu'il en auale quel- que peu: car alors sortent de sa bouche quelques humidités, et quelquefois cela esment l'estomach à vomir les superflui- tez qui y sont, lesquelles est bõ de les met- tre hors: car non seulement on pense que l'enfant aye des superfluités à la bouche, palais, & gorge, mais il est à croire qu'il en a encore plus à l'estomach, & mesme aux intestins: parquoy est bon de bailler les choses susdictes deuant que de le fai- re teter , de peur que le lait ne se mesle avecques telle ordure , & soit corrompu, & qu'il ne s'eleue quelques vapeurs mauuaises au cerueau , qui pourroient beaucoup nuire à l'enfant. Or que l'en-
fant

fant nouvellement nay n'apporte du ventre de sa mere beaucoup de superfluités, on le voit oculeremēt par les excremēts qu'il iette des intestins, au parauant qu'il ait iamais teté, ni pris aucunes choses par la bouche, qui sont de diuerses couleurs, assauoir citrines, verdes, noires comme ancre, & aultres couleurs: parquoy pour uider telles superfluités des intestins, & garder qu'ils ne causent des trāchees, estans retenues, il est besoing donner à l'enfant vn peu de sirop de roses laxatif.

De l'election d'une bōne nourrice.

CHAP. XX.

L*faut à present parler de l'election d'une bōne nourrice pour aleter & alimenter l'enfant (qui se fera de la propre mere s'il est possible) plustot que d'une estrangere: car puis qu'il est ainsi,*

Valābert au
lib. de la ma-
niere de nour-
rir les enfans

que l'enfant estant au ventre de la mere, est nourri du sang d'icelle, & que du sang est faict le lait aux mammelles, veritablement le lait de la mere sera plus propre que nul autre, parce qu'il est plus semblable à la substance, dont il estoit nourri dedans le ventre de sa mere: toutefois ne luy donnera à teter des les premiers iours après qu'elle sera acouchee, iusques à ce qu'elle soit bien purgee de ces vidanges, & ce pendant se fera teter par quelques uns à fin que son lait soit purifié, car es premiers iours elle est encore esmue & alteree, à cause de l'enfantement, aussi que son lait a demeuré long temps croupi aux mammelles, d'où il pourroit estre aucunement alteré, & corrompu, ainsi que par sa substance & couleur on peut iuger: parquoy les femmes qui veulent estre nourrices de leurs enfans se doibuent aux premiers iours faire

La mere ne doit donner à teter des les premiers iours de son acouchemēt.

faire teter par quelque pauvre fille, à fin que le lait mauvais soit euacué, & le bon soit de nouveau engendré: & par ainsi en quelque temps que la mere sera mal disposée, ne doit alleter son enfant iusques à ce qu'elle soit bien restituée en bonne disposition, & bien purgée de ses vidanges, de peur d'infecter l'enfant, & ne luy soit communiqué semblable disposition qu'auroit la mere, comme fièvre, flux de ventre, & autres, qui seroit cause de le faire mourir, ou lui imprimer quelque grande maladie, comme trenchées, epilepsie, apostemes, & autres dispositions: & si aduient que la mere ne vueille ou ne peut nourrir son enfant, al'ors on luy choisira une bonne nourrice.

La mere ne doit donner à teter à son enfant ayant la fièvre ou autre grande maladie.

De quelle qualité doit estre choisie la nourrice.

POUR bien choisir une bonne nourrice, faut qu'elle aye enfanté deux ou trois enfans, car d'autant que les mammelles, qui ont esté plaines, les venes & arteres qui sont en icelles sont plus grosses & dilatees, partant contiendront du lait dauantage: & puis faut considerer neuf choses, l'aage, l'habitude du corps, les meurs, la forme des mammelles, & mammelons, la nature du lait, la distance du temps qu'elle a enfanté, le sexe de son dernier enfant, & qu'elle ne soit point enceinte, sans aucune note de lepre.

De l'aage de la nourrice.

CHAP. XXII.

LA nourrice ne doit estre plus ieune que de vingt & cinq ans, ne plus vieille que de trente cinq, parce que l'espace de temps qui est entre deux, est l'aage de vigueur, daut

Neuf choses
à considerer
à lelection du
ne bone nour
rice.

tant qu'il est plus tempéré & plus sain
que les autres aagés, par ce quil n'abon-
de de superfluités d'humeurs, d'autant
aussi que le corps ne croist plus abondāt
en sang, mais au dessous de trente cinq
ans le corps croist encore : parquoy elle
n'a pas le nourrissemēt, ny le sang si par
faict: & depuis trente cinq ans, les mois
cessent à beaucoup, ou bien elles en ont
peu, & partāt cela montre qu'elles ont
moins de nourrissemēt & moins de bon
lait pour aleter l'enfant.

De l'habitude du Corps de la
nourrice. CHAP. XXIII.

Il fault que la nourrice soit de
bonne habitude, & bien saine,
aiāt bonne couleur, ni trop gras-
se, ni trop maigre, la chair non molasse,
mays ferme, à fin qu'elle soit plus robu-
ste à veiller & travailler à l'entour de
l'enfant, & qu'elle ne soit rousse, aussi

qu'elle aye le visage beau, non louche.

Examen de la
nourrice.

On doit regarder à sa teste si elle n'a point de teigne, ou aultre mal, si aussi elle a les dents gattees, & si elle a l'alaine forte, qu'elle n'aye point ulceres sus son corps, ou quelques aultres dispositions. D'auantage quelle soit habillee honnestement.

Des meurs de la nourrice.

CHAP. XXIII.

Elle doit estre diligente & nō fetarde à tenir l'enfant nettement, chaste, sobre, ioyeuse, chantant, & riant a l'enfant, l'aimant comme le sien mesme, & plus, sil est possible: ausi faut qu'elle parle & profere biē sa parolle d'autāt que l'enfant apprend à parler par sa mere nourrice: semblable mēt qu'elle soit sage, & bien morigeree: car l'enfant ne tire tāt du naturel à personne, apres le pere & la mere, que de sa

L'enfant re-
tient des
meurs de sa
nourrice.

nour-

nourrice, à raison du lait qui tette, ce qui est congneu par experience des petis chiens qui seront alletés d'une louue ou d'une lionne, lesquels serot plus furieux, hardis & mauuais. Au contraire on apriuoïse les petis leõeaux & leopars, les faisans nourrir de lait de cheure ou de vache: d'auantage les petis agnelets qui aletteront vne cheure, auront leur laine plus dure: au contraire les cheureaux qui alettēt vne brebis, aurōt leur poil plus mol. Parquoy ie conseille qu'on regarde biē à eslire vne nourrice, et qu'elle ne soit glontte, ne adonnee au vin, car plusieurs festans endormies aletant l'enfant les ont suffoqués de leurs mammelles, ce que iay veu trop souuent aduenir en ceste ville de paris: d'auantage ne doit aucunement coucher avec les hommes, pour plusieurs raisons, car premiere-
remēt le coit trouble son sang, par cōse-

Pour quatre raisons la nourrice doit eūter le coit.

quent le lait: secondement il diminue la quantité du lait, par ce qu'il prouoque les fleurs, en diuertissant par le moyen du coit le sang des mammelles à la matrice, qui est l'une des principales causes qui altere & corrompt le lait, car cela esmeut le sang menstruel, & le faict sortir & changer de situation: Tierrement il engendre mauuais odeur & qualité au lait: la quatriesme raison, c'est que le coit est quelquefois cause d'engrossir la nourrice, dont il aduient double inconuenient, l'un à l'enfant qu'elle nourrist, l'autre à l'enfant qu'elle a dedans le ventre, car le meilleur sang abandonne les mammelles, étant attiré à la matrice pour nourrir & augmēter l'enfant qui est conceu, & le pire se retire aux mammelles, duquel est faict le lait pour la nourriture de l'enfant nourriçon, lequel se corrompt & diminue. Parquoy
len-

L'enfant qui est au ventre de la nourrice ne prend suffisante nourriture, & l'enfant qui est au dehors en prend de mauuaise.

Des mammelles, & de la Poitrine de la nourrice.

CHAP. XXV.



L'LE doit auoir la Poitrine large, & les mammelles assés grosses, & non laches & pendâtes, moyënes, entre dures & molles: car celles qui ont vne moyëne fermeté digerēt mieux le lait de leur chaleur naturelle, laquelle est tousiours plus forte en vne chair ferme, pleine de venes & arteres, apparan-tes par dehors, qu'en vne chair lasche, et mollasse: celles qui ont vne moiëne grosseur cōprenent le lait suffisammēt pour le nourriçement de l'enfant: & celles qui sont dures & serrees, ont le lait

quasi estouffé, parquoy il flue difficilement, quand l'enfant le succe & tire: d'abondant l'enfant imprime le bout de son nés à la mammelle, la trouuant trop dure se fache, & ne veut teter, & aussi les molles & lasches n'ont point la vertu lactifiante assés forte: pareillemēt les bouts des mammelles ne doibuent estre cachés ne retirés au dedans, par ce que l'enfant ne les pourroit succer quā bien grand peine.

Les bouts des
mammelles
ne doibuent
estre trop
cours.

Cinq choses
pour cōgnoi-
stre le bon
laiç.
Quantité,
Qualité,
Couleur,
Odeur,
Goust.

De la nature du laiçt de la nour-
rice. CHAP. XXVI.



Q N faiçt iugemēt du bō laiçt, à la quātité, à la qualité, à la couleur, à l'odeur, au goust: à la quātité, le peu de laiçt oultre qui ne fuffit pas pour nourrir l'enfant, aussi ne peut il pas estre guere bon, par ce qu'il demontre le temperamēt trop chaud & trop sec, aussi la trop grande quantité n'est

n'est pas bonne, tant pour la nourrice, que pour l'enfant, de crainte qu'il ne se caillebote & corrompe aux mammelles, toutefois il vaut trop mieux, qu'il y en aye trop que trop peu, car elle en peut epancher quelque quantité deuant qu'en donner à l'enfant. De la substâce, le laiçt qui est entre subtil & gros & blanc, signifie que la vertu lactifiante a plaine domination en la digestion du laiçt, & par consequēt tresbō: or pour le congnoistre il en faut tirer une goutte dessus l'ongle, de la mammelle, & s'il coule & s'espend sans branler l'ongle, c'est signe qu'il est aqueux, nō suffisant pour nourrir: au cōtraire s'il ne coule point en baissant l'ongle, il est trop gros et gluār: mais s'il demeure ferme sans incliner l'ongle, & en l'epanchant il coule tout bellement, c'est signe qu'il est bō. Or on peut iuger le laiçt pareillemēt estre bō par sa

Pour congnoistre le bō laiçt.

Probation du bon laiçt.

Couleur du bon laiçt.

couleur, par ce que ledict lait n'est autre chose q'un sang blanchy, & celuy qui est faict d'un sang temperé, est tout blanc, & celuy qui est d'autre couleur se doit reiecter, car s'il tire sus le brun, c'est signe qu'il est procréé de sang melancolique, & s'il est verdoiant, signifie adustion, & s'il est aucunnement citrin, c'est signe quil est colerique, & s'il est rubicond c'est signe que la vertu digestive lactifiante est debile: Et quant a l'odeur, elle doit estre douce & suauë & non autre, car s'il estoit de mauuaise odeur, comme d'eschaufeson, c'est signe de chaleur superflue, & de sang aduste, comme volontiers on voit celuy des femmes rousses: s'il sent l'aigre il demontre l'humeur melācolique: & quant au goust il doit estre sucré, & ne faut pas qu'il soit amer ny salé, ny aigre, ny stiptique, c'est adire de hault goust, cōme vergent.

Odeur du bō
lait.

Goust du bō
lait.

De la distâce du téps que la nourrice a enfanté, & du sexe de son enfant. CHAP. XXVII.


LA nourrice doit estre quinze ou vinct iours après qu'elle a enfanté, deuant que donner à teter à l'enfant, pour les raisons qu'auôs dictes cy dessus, aussi d'autant qu'elle demeure long temps au liçt sans faire nul exercice : par quoy se fera teter, ou soy mesme se tetera avec un instrument de verre que nous declarerons si après, & en donnerons le portraiçt. Si la nourrice a enfanté un masle dernier, son lait est plus à louer, parce qu'elle a son sang plus élaboré, & par conséquent moins excrementeux, dont le lait qui en sera engendré sera meilleur, car l'enfant masle estant au ventre de sa mere, l'eschauffe, de sa chaleur naturelle plus qu'une femelle, ce qui se cognoit par experien-

ce, que la femme grosse d'un masle se porte mieux coutumierement, ioint aussi qu'elle est mieux colloreë: aussi faut que la nourrice aye porté son enfant à terme car l'auortement faict de cause interne, demontre qu'il y a quelque vice au corps.

La bõne nourrice doit auoir porté son enfant à terme.

Du Regime de la nourrice.

CHAP. XXVIII.

 N doit auoir soing au regime de la nourrice, soit au manger & boire, dormir & veiller, exercice, & repos, & les diuersifier selõ la dispositiõ & habitude de l'enfant: cõme si est trop chaud doit user de regime refrigerant, & ainsi des autres tẽperatures, & usera de viandes de bon nourrissement, en quantité mesurée, & doit euitier le mauuais air, & s'abstenir de coucher avec les hommes, pour les rai-

raisons susdictes: elle euitera toutes viâdes qui eschauffent le sang, cōme espisseries, patisseries, saleures, moutarde, vins forts, & sans eau, & sur tout aussi la colere, & toutes choses qui brulent le sang.

Comme l'on doit acoutrer la boullie du petit enfant.

CHAP. XXIX.

LA boullie est bonne aux petis enfans, à cause qu'ils ont besoin d'une nourriture humide, de grosseur conforme au laiçt, non de trop difficile digestion, lesquelles conditions sont trouuees en la boullie, pourueu que la farine de fourment ne soit crue, laquelle on doit mettre dedans un pot de terre neuf, & le mettre dâs un four, & qu'il y demeure tant que le pain met a cuire, à fin qu'elle ne soit tât visqueuse & grossiere, & aussi que le laiçt ne


La farine dōt on faiçt la boullie aux petis enfans doit estre cuitte.

cuisse pas si longuemēt, par ce qu'il faut
que pour donner cuisson à la farine, le
lait cuise semblablement long temps, en
quoy il pert sa bonté, par ce que le cui-
sant beaucoup, sa substāce aqueuse se cō-
somme par le feu, & engēdre gros sang,
comme il se faict par la boullie, lors que
la farine n'est cuite au parauant: car il
pert en ceste façon sa substance de mai-
gue & de beurre: il en reste tant seule-
ment la fourmageuse, grosse, visqueuse,
& de difficile digestion, & par conse-
quent pesante, & faisant obstruction és
premières venes & au foye, qui souuēt
cause qu'ils ont des trachees, & qu'il
s'engendre des vers à l'enfant, & des
pierres, & aultres mauuais accidens
pour n'estre ladicte farine cuite, & le
lait trop cuit: parquoy ceux qui ont
des enfans y prendront garde si bon
leur semble: Et ne sert riē d'alleguer que
par

par experience quotidienne on voit plusieurs enfans qui mangent boullie sans que la farine soit cuitte, & se portent bien, car ie dy que cela se faict plus tost d'auanture, ou de bonne nature, que de la bôté de ceste nourriture. Or on ne luy doibt donner boullie de dix ou douze iours après estre nay, et encore il y a des enfans qui ne la veullent prendre de deux ou trois mois & plus, & se contentent du laiçt, & ou on leur en veut bailler la reietter: autres la prennent plus tost, qui ce faict pour la diuersité de leur nature indicible à escrire: or quelquefois aduient, que l'enfant estant ia grand delet, aiant ses dents incisives, mord sa nourrice, dont puis après est en grand paine, à cause de l'ulcere qui y demeure: & pour la curatio d'icelle, doit la nourrice lauer son tetin, avec de leau aluminense, & par ce que le bout de sa mam-

melle demeure douloureux, étant pressé de ses habillements, aura un instrument de plomb, faict en la maniere d'un chapeau, lequel sera persé au bout de plusieurs petis trous, dans lequel mettra le bout de son tetin, à fin que son lait puisse s'escouler, & la sanie de son ulcere, ioinct que le plomb est propre pour la curation d'icelle.


Figure d'un instrument pour mettre le bout du tetin ulcéré d'une nourrice.



Les dens des enfans leur commencent à sortir au septiesme mois, ou peu plus tard, & quand ils commencent à sortir, ont un prurit ou demangaison aux genciues, qui cause qu'ils mordent le māmelon de leur nourrice.

En quel temps il faut seurer l'enfant.

CHAP. XXX.

 Velques vns sont seurés à dix huit mois, les autres à vint, & le commun est à deux ans, parce qu'il a ses dens, par lesquelles nature semble demāder quelque autre nourriture que le laiçt & boullie, aussi qu'il appete & desire les viandes plus grosses & solides que le laiçt, & y prent plaisir, & les mange, les luy aiant baillees en suffisante quantité, de sorte qu'il ne luy est plus besoing de laiçt, n'y de boullie, lequel s'il en mangeoit ordinairement, se corromproit avec la chair &

les autres viandes : toutefois on ne peut certainement designer ne limiter le tēps legitime du seurement, pour la diuersité du temps de la sortie des dēts, ne lenuie de leur puissance de manger les viādes, car nous voions que les dēts sortēt plus tost aux vns, qu'aux autres: Parquoy faut borner le temps de seurer l'enfant, par la sortie dicelles, & à ceux qui mettent plus long temps à sortir, doiuent metre pareillement plus long temps à estre seurés, & ceux à qui plus tost elles sortent, seront aussi plus tost seurés, pour autant que l'intention pour laquelle nature a produict les dents, c'est le brisement & mastigation des viandes, pour les preparer, & rendre plus faciles à la digestion, & aussi semble que quand elles sont sorties, nature incite le stomach de l'enfant à apeter le nourriçement, qui se doibt macher & briser par icelles: partāt elles ne sont
pro-

produites sans cause, & ne leur faut bail
ler aucune viande, que premierement
leurs dens ne soient sorties, car si plustost
on les seure, Avicenne dict que cela se-
roit cause de plusieurs maladies, pour la
mauvaise digestion & corruption qui
s'en ensuiuroit, qui pourroit estre cause
de mort. Les deux ans accõplis, ou plust-
tost si on voit que l'enfant aye affection
de prendre autre viande que le lait, &
si la mache bien & digere, & lors que
nous verrons que ordinerement il appe-
te & demande à manger de la chair, ou
autres bonnes viandes plus sollides que
le lait, & aussi qu'il s'en degoust, nous
deuons croire que cela ne luy vient pas
d'une volõte ou fantaisie, mais d'un in-
stinct de nature, qui raisonnablement
l'incite à cela, parquoy lors on le doit
asseurément seurer, & luy donner vian-
des plus solides que le lait & boullie:

Il se faut bien
donner garde
de trop tost
seurer les
enfans.


auſſi ſi on voit le contraire qu'il n'aye point enuie de viandes ſollides , & n'y prent plaisir, & les mache & aualle cõtre ſon cœur, encore qu'il eut deux ans, & ſes dents, nous le leſſerõs encore ſans le ſeurer, par ce que la viande prinſe cõtre ſon gré ne ſe digere pas biẽ, & ce corrompt non ſeulement aux enfans, mais à toutes perſonnes, dõt ſ'enſuit pluſieurs maladies comme nous auons dict : d'auantage faut auoir egart à la diſpoſitiõ de ſon corps , pour ſçauoir ſ'il eſt temps de le ſeurer: car ſ'il eſt malladif, comme tantõſt ſain, tãtoſt mallade, lors on ne le doibt ſeurer, parce qu'il ne mäge pas ſuffiſamment, à cauſe de ſa debilité, & alors qu'on le voudra ſeurer , la nourriçe ne lui donnera ſa mammelle tant ſouuẽt qu'elle auoit de couſtume, & ainſi peu à peu ſera ſeuré, & metra deſſus ſon tetin quelque choſe amere comme aloës,

ou eau, en laquelle on aura faict trêper colloquintes, ou absinte, ou autre chose semblable, ou bien un peu de moutarde, & barbouillera entierement sa mamelle de suye trempée en eau, à fin de la faire haïr à l'enfant. Que dirayie plus, cest que les enfans qui sont fort galeux à la teste & au cors, & qui rendent beaucoup de morve & baue, & aussi que ordinerement vont bien à la selle, c'est signe qu'ils se porteront bien quand ils deviendront grands, parce qu'ils se purgent de leurs superfluités : au contraire ceux qui n'ont point ces choses, ne sont hors de danger de plusieurs maladies quand ils seront en plus grand aage : & si telles superfluités tombent sus le dos, aucuns en deviennēt bossus, courbés, & contrefaicts . Or après auoir ainsi d'escript ce qu'il faut faire à l'enfant nouvellemēt nai, voire iusques à estre seuré,

maintenant nous retournerons à declarer les signes pour congnoistre quand il est mort au ventre de sa mere.

Les signes pour cognoistre si l'enfant est mort ou viuant au ventre de la mere.

CHAP. XXXI.

 *N peut scauoir si ledict enfant est viuant ou mort dedans le ventre de sa mere, par les signes qui sensuiuent. Et premieremēt faut scauoir si l'enfant ne se remue plus, ce qu'on scaura, tant par l'interrogation de la mere, qu'en posant la main sus son ventre, & aussi peut on auoir coniecture quād les eaulx auront esté escoullees: & si larrierefais est sorti, lors infailliblement on pourra iuger l'enfant estre mort: ce que iay veu encore depuis trois mois, estant appelé pour deliurer la femme de Pierre Cœurly, maistre des chapelets, demeu-*

demeurant à Paris rue galande, ou eſtât
 arriué ie vis ſon arriereſais hors, adonc
 congneu l'enfant eſtre mort, i' appellé les
 matrones & leur demandé, ſi à leur ad-
 uis l'eſant eſtoit mort, elles me firent re-
 ſponce qu'elles l'auoiēt encore n'agueres
 aperceu ſe mouuoir, ie leur demadé de-
 rechef combien de temps il y auoit, elles
 reſpondirent qu'il y auoit enuiron ſix
 heures: à lors ie congneu que ſes bonnes
 femmes ne diſoient verité, attendu que
 toutefois que larriereſais ſort deuant l'en-
 fant, que ledict enfant eſt mort, à cauſe
 qu'il ne reſpire que par lartere ombili-
 cale, prenant l'eſprit des oriſices de celles
 de la matrice, dōt en eſtât larriereſais ſe
 paré, nul eſprit n'eſt plus enuoyé à l'eſât:
 & ainſi ie fis prognosticq à toute la cō-
 pagnee l'enfant eſtre mort, neantmoins
 ne leſſé promptemēt à deliurer la mere,
 ou mon dire fut auéré, en la preſence de

Toutefois que
 l'arriereſais
 ſoit deuant
 l'enfant on
 peut preſa-
 ger eſtre
 mort.

plusieurs honorables dames. D'auantage cest signe que l'enfant est mort qu'ad la mere sent plus grande pesanteur de son enfant, quelle n'auoit de coutume, & la raison de ce, est que l'esprit n'y est plus, & qui n'est regi par ses facultés naturelles: outre plus qu'ad la mere se retourne ça & la, l'enfant tombe sus la partie plus decline, comme vne masse ou pierre: aussi ladicte mere est fort vexee & tourmentee de griefues douleurs vers son ombilic, & parties genitales, & a vouloir d'uriner, & aceler avecques grandes espraintes, à cause que nature se veut décharger de l'enfant mort, qui ne luy est plus naturel: pareillement en posant la main sus son ventre & parties genitales, on les sent aucunnemēt refroidies, ioinct aussi que ladicte mere sent froidur dedans sa matrice, & telle chose se faict par l'extinctiō de la chaleur vitale

taie dudict enfant. D'auantage il sort certaines humidités & autres excréments fort fetides hors la matrice, & l'aleine de la dictē mere est aussi fort puante, ce qui se faict volontiers au deuxiesme ou troisiēme iour, ou plus, après que l'enfant est mort, & tombe souuent ladictē mere en syncope ou euanouissement. Telles choses se font des vapeurs ou fumees putrides & corrompues, qui s'esleuent de l'enfant mort, & de son arrierefais, qui sont communiquees au cœur & au cerueau: & ici noteras que l'enfant mort estant à la matrice de sa mere se corrompt plus en vn iour qui ne feroit en quatre, ou plus, s'il estoit hors de ladictē matrice. Aussi peut on coniecturer par la couleur de la face qui est changee du naturel, c'est qu'elle tent à liuidité ou plombine: au moyen de quoy est la dictē femme hideuse à voir, & son

ventre est grandemēt enflé, & dur plus qu'il n'estoit au parauant, & les mamelles remolies, & de tous ces signes (quand plusieurs se trouuēt en vne personne, & en vn mesme temps) pourras iuger certainemēt que l'enfant est mort, au contraire non. Et note que toutes ces choses cogneües & considerees, le Chirurgien doibt faire diligence d'ayder à la mere le plustost qu'il sera possible, & qu'il soit bien instruiēt à telle œuvre, à cause qu'elle requiert vne singuliere prouidence & experience, car s'il faut à faire son deuoir, souuēt il tue la mere & l'enfant s'il estoit vif, & qu'il congnoisse s'il peut besongner sans d'äger de mort de la mere, pour euitier scandale, qui se fera en considerant les forces & vertus d'icelle, en tatant son pous scauoir s'il est debile ou grandement changé oultre le naturel. Et d'auantage, faut contēpler
la

la face comme nous auons dict, scauoir si elle est grandemēt chāgée du naturel, & si elle a le nés & les extremités & sueur froides, & qu'elle tombe souuent en syncope, aussi si elle a perdu presque toute cognoissance, & si tels signes apparoissent, on doit pronostiquer la mort estre prochaine: parquoy la faut lesser à nature, & la recommander à dieu, mais aussi au contraire si la vertu est forte, il luy faut aider en diligence à expeller l'enfant tant par potions, baings, suffumigatiōs faictes de choses fetides, prinſes par le nés, & par la bouche, & de choses aromatiques & delectables, prinſes par les parties d'enbas, sternutatoires, vomitoires, & liniments appliqués tant par dedās que par dehors la vulue: lesquelles choses n'est besoing d'escripre en particulier, ce que nous enseigne Hippocrates en sa protestation,

Hippocrates en sa protestation dict que iamais nedōnera n'y enseignera chose qui face auorter les femmes.

que iamaïs ne donnera chose pour faire auorter les femmes , mais de ce on en pourra auoir recours aux doctes Medécins & Chirurgiens pour en bien vser, ainsi que Dieu nous la commandé, à scauoir quand l'enfant est mort au ventre de sa mere.

De la maniere de bien situer la femme pour luy extraire l'enfant. CHAP. XXXII.

ET si telles choses ne profitent, faut besogner par œuvre manuelle, & instruments propres, en la maniere qui s'ensuit. Premièrement rectifieras l'air de la chambre, scauoir est, s'il est froid l'eschaufferas, & s'il est trop chaud le refroidiras: cela fait, faut situer la mere, en la posant prés le bort du liect, & la coucher à l'anuers, aiant les fesses aucunement éleuees sus quelque carreau dur,

ou autre chose semblable, & qu'elle soit renuersee, toutefois en figure moyenne, c'est à scauoir, qu'elle ne soit du tout couchee, n'y courbee, cōme no^r auōs dict cy dessus, à fin qu'elle puisse mieux auoir son inspiration & expiration plus libre, & que les ligaments de la matrice ne tendent point tant que si elle estoit couchee du tout à la renuerse. Aussi luy faut courber les iambes aiant les talons assés prés des fesses, & les lier avec une grande & large bande de toille, ou autre chose, laquelle poseras premierement par dessus le col, & au trauers des espaulles de ladicte femme, en maniere de croix S. André: puis derechef croiseras ladicte bande à chacun pied, & la tourneras au tour des iambes & cuisses, lesquelles seront escartees l'une de l'autre, en raportāt encore ladicte lisiere par dessus le col, & la faut lier & attacher si

ferme que ladicte patiente ne se puisse mouuoir ça ou là, ainsy qu'on lie ceulx ausquels on extrait la pierre de la vesse, comme tu vois par ceste figure.



Et feras en sorte qu'elle aye les talõs appuiés contre le bout du liët, & la feras

ras tenir par deffous les aisselles & cuisses, par bons ministres, tellement qu'en tirant l'enfant, son corps ne suiue, car en suiuant & obeissant, on ne pourroit faire l'extraction : cela faict faut prendre vn drap chaud en double & le poser sus les cuisses de ladicte patiente, à fin que l'air exterieur ne blesse la matrice, & que l'operation soit plus honneste, à cause des assistans : puis faut oindre toutes ses parties genitales avec choses onctueuses, à fin de les rendre plus glissantes & coullantes, pour plus facilement extraire l'enfant, ayant le Chirurgiẽ ses ongles rongnẽs, & qui n'aye aucun anneau en ses doigts, pour euitier qu'il ne face lesion aux parties ou il touchera.

Pourquoy on met vn linge sus les cuisses de la femme.

De la maniere de tirer les enfans hors le ventre de la mere tant mors que viuants.

CHAP. XXXIII.

LE Chirurgien ayant ainsi
situé la femme, mettra sa
main doucement sans au-
cunne violence dans la ma-
trice, ce faisant cognoistra en qu'elle si-
tuation & figure sera l'enfant, & sil
est seul ou accompagné: Et pose le faict
qu'il fust tourné selon nature, aiant la
teste au couronnement, pour deuëment
l'extraire par art, faut doucement le re-
pousser contremont & chercher les
pieds, & les tirer prés le couronnement,
ce faisant tourneras facilement l'enfant:
& alors qu'auras attiré ainsi les pieds,
en faut tirer vn hors, & le lier au des-
sus du talon en maniere de lacs cou-
rants, avec vn ruben semblable à ceux
dont les femmes lient leurs cheueux, ou
autre semblable, puis remettras ledict
pied ainsi lié dans la matrice: ce faict
chercheras l'autre pied, et l'aiât trouué,
le tire-

le tireras hors, & alors tireras le lien ou l'autre pied estoit attaché: & se doit on bien donner garde, s'il y auoit deux enfans, de tirer vne iambe de chacun en vne fois, car par ce moyen on besongneroit en vain, et seroit on cause de la mort de la mere, & des enfans s'ils estoient viuans. Or pour ne s'abuser & les bien discerner l'un de l'autre, c'est qu'après auoir tiré l'un des pieds hors de la matrice, sera lié au dessus du talõ, & alors le faut remettre en la matrice, comme auons dict, car il occuperoit la voye, & engarderoit que le Chirurgien ne pourroit mettre sa main pour chercher l'autre: puis suiura la ligature, laquelle le conduira au pied lié, & l'ayant trouué coulera sa main iusques aux aines, & de là cherchera l'autre cuisse, & aussi la iambe, laquelle quelquefois est trouuée derriere le dos, voire sus son col: & l'a-

iant trouué amenera hors ledict pied n^olié, puis tirera le lien, à fin d'amener les deux pieds ensemble pour extraire l'enfant: dont après qu'il les aura ainsi attirés hors la matrice, les tirera ioincts également ensemble, & peu à peu, sans violēce, tirera l'enfant iusques à ce qu'il soit dehors, & pendant ce, faut comprimer le ventre de la mere cōme auons dict si dessus, & qu'elle tienne son aleine par interualle, en fermant le nés & la bouche, & qu'elle s'espraigne tant que possible luy sera, & face autres choses qu'auons predict: & l'enfant estant sorti, faut subit pareillement tirer l'arriere-fais, & faut bien que le Chirurgien se donne de garde qu'en tirant ainsi l'enfant hors le ventre de sa mere (si par les pieds y auoit difficulté) que les parties superieures ne sortent, à lors faudroit tirer un des bras & non les deux, car

Bon aduertissement pour le Chirurgien & saiges femmes.

nature estant deliuree de ceste grosseur de l'enfant, faict que les os promptemēt se reioignēt, & estans reioincts, la teste puis après ne peult passer, et par ainsi est estranglé, & demeure dedans si on ne le tire par force, mettant les crochets sous le menton, ou dans la bouche, ou orbite des œils : mais s'il aduenoit (ce qu'il se faict plusieurs fois) que l'enfant eust les mains au couronnement, ou ia hors les parties genitales, iamais on ne doibt tēdre ny essayer à l'extraction par iceux, veu qu'il viendrait la teste ploiee, avec les espaulles, se faisant on seroit cause de faire grande lesion à la mere & à l'enfant s'il auoit vie. Iay esté appelé quelquefois à extraire hors le corps de la mere l'enfant mort, q̃ les matrones (soy disans sages femmes) s'estans efforcees le tirer par vn des bras, auoient esté causes d'auoir faict gangrener & mor-

tifier ledict bras, & par consequent de faire mourir l'enfant, en sorte qu'on ne le pouuoit remettre dans la matrice pour la grande tumeur, tant des parties genitales de la femme que du bras de l'enfant, tellement que de necessité le faillloit emputer. Or le moië de ce faire, est couper tous les muscles avec le rasoir, le plus près de l'épaule qu'il est possible, toutes fois en observant que parauant l'incision l'o tire la partie charneuse en haut, puis faut couper l'os avec tenailles incisives, lesquelles te sont icy figurees,

La methode
de couper les
bras l'enfant
estant mort
au ventre de
sa mere.


Tenail-

Tenailles incisives,

à fin que la chair cou-
urant l'extremité de
l'os, ne face lesiõ aux
parties genitales, puis
cela faict, faut cher-
cher les pieds du pe-
tit enfant, & l'ex-
traire hors, comme
auons parciueuant
declaré, sil est possi-
ble: Et la ou ledict
enfant mort seroit si
gros naturellement,
ou par accidēt tume-
fié par la putrefaction, en sorte qu'il ne
peust nullement estre extraict: premie-
rement que laisser mourir la mere fau-
droit par tous moiens diminuer la gros-
seur dudit enfant: Et sil aduenoit
qu'il eust la teste au couronnement, la



faudroit re-
pousser en
haut si es-
toit possible,
& le tirer
par les pieds
comme a-
uons dict: et
ou il ne se-
roit possible
le repousser,
& que l'en-
fant feust
mort, il sera
tiré par les
crochetz sé-
blables à
ceux cy, te
dōnant biē
garde de ne
blesser la fē-



me par iceulx, lesquelz mettras dedans les œils, ou en la bouche, ou sous le menton: Et ou la teste de l'enfant viendrait la premiere droit au couronnement, neantmoins que la femme ne peüst accoucher, à raison qu'elle est enorme en grosseur (que les Grecs appellēt macrophysocephale) à cause qu'elle est remplie de ventosités , ou acquosités , que les Grecs appellent hydrocephale. Alors si on voit la femme estre en un extrême travail, & qu'on cognoisse l'enfant estre mort, faut faire incision aux sutures du crane, pour euacuer ce qui est contre nature , aussi la tirer par pieces si est besoin: Pareillement si on cognoist l'enfant estre vif, faut repousser la teste en hault, & chercher les pieds, & le tourner en la matrice, puis tirer l'enfant hors, comme nous auons dict: Aussi si le thorax est pareillement trop gros, le

k


Couteau courbé ppres pour coup
per le ventre de l'enfant mort,
estant dans le corps de la mere.



*faut vider,
puis le tirer pie-
ce à piece: Et si
le ventre estoit
aussy trop en-
flé, qui se faict
par hydropisie,
ou ventosités, y
sera faict inci-
sion avec un pe-
tit couteau
courbé, sembla-
ble à ceste figu-
re, lequel tien-
dras entre les
doigs , en
le po-*

le posant dedans la matrice, puis videras les entrailles, & ce faisant, aussy les acquosités s'escoulleront, & ainsy sera l'enfant plus facilement tiré. Or si la teste de l'enfant demeure scule (ce que j'ay veu à mon grand regret) alors faut poser la main senestre dans la matrice, l'ayant premierement oincte d'huile de lis, ou de beurre frais, & chercheras la bouche de l'efât, en laquelle mettras les doigts, & de ta main dextre couleras un crochet au long de la senestre, & le mettras dedans la bouche, ou lœil, ou sous le menton, puis le tireras hors, sil t'est possible: & au lieu desdicts crochets tu te pourras aider de ces deux instrumens, que j'ay pris au liure de la Chirurgie Françoisse de Monsieur d'Alechans, qui sont propres à tel efect, à raison qu'ils peuvent empoigner un corps rond comme la teste de l'enfant.


Instrument dictz pieds de grif-
fôs, propres pour extraire la te-
ste d'un enfant demeuree dans
le ventre de la mere.



*J'ay dict qu'o
la tirera s'il est
possible, par ce
qu'estant de-
meuree seule,
pour sa roton-
dité, tourne en
la matrice, en
sorte qu'à bien
grand peine
elle peut estre
tirée, si on ne
presse le ven-
tre de la mere
en haut, &
aux deux co-
stés,*

*stés , affin que la teste de l'enfant ne
tourne.*

Autre pied de griffon.



Ce qu'il faut faire à la femme subit qu'elle est accouchee.

CHAP. XXXIIII.

IL faut garder que la femme recentemente accouchee ne reçoive aucun air froid par sa matrice, car estant vide & vague après l'enfantement, facilement est remplie de ventosités, lesquelles la refroidissent, distendent & tuméfient, & bouchent les orifices des cotillons, qui empesche ses vidanges, dont sensuit après suffocation de matrice, & de tres grandes tranchees & douleurs, fieures & autres griefs accidens, & souvent la mort. Et pour obuier à cela il faut qu'elle aye les cuisses croisees les vnes sus les autres, & pareillement à fin aussy que les parties distâtes se puissent mieux reioindre. Dauantage on luy liera le ventre d'une bāde assés lar-

ge, pour prohiber que l'air froid n'entre en sa matrice: ioint ausſy qu'icelle ligation aidera beaucoup à exprimer le ſang imbu en icelle: cela fait on donnera à l'accouchee un preſſis de chapon ou un chaudreau, ou il y aura du ſaffran & un peu de poudre de duc, ou vneroſtie, avec de bon hippocras, à fin de reſtaurer les vertus, & prohiber les tranchees: puis tout ſoudain (& principalemēt en tēps d'hiver) on appliquera l'arriereſais ſus le vētre de la mere, & en eſté on prēdra la peau d'un mouton noir, lequel ſera eſcorché tout viſ, ou tout ſubit luy aiāt coupé la gorge, & ſera appliquee toute chaude ſus le ventre & ſus les reins:

Pourquoy on lie le ventre d'une femme eſtant récemment accouchee.

Les fenestres & portes de ſa chambre, & cuſtodes de ſon lit ſeront cloſes & fermees, & la laiſſera on repoſer ſans bruit: Et cinq ou ſix heures après que la peau de mouton y aura eſté miſe, ſera

La peau de mouton ne doit eſtre laiſſee que cinq ou ſix heures. autrement elle ſeroit fort,

ostee , puis luy faudra oindre le ventre
de l'onguent qui s'ensuit. ℞ spermat. ce-
ti ℥ ij, olei amigdal. dulci. hiperic. an.
℥ i ℔, cepi hirc. ℥ i, olei mirt. ℥ ij, cera
noue quantum suf. fiat unguentum ad
usum , duquel en sera usé deux fois le
iour : Et sus le nombril sera appliqué
un petit emplastre de Galbanum , au
milieu duquel y aura un peu de ci-
uette, & fera on en sorte que la senteur
d'icelle ne vienne au nés de l'acouchee:
puis sur tout le ventre sera appliquee ce-
ste toille gautier . ℞ cera noue ℥ iiij,
spermat. cet. ℥ i ℔, terebint. venet. in a-
qua rosar. lota ℥ ij, olei amigdal. dulc.
& hyperic. an. ℥ i, olei mast. & mirt.
an. ℥ ℔, axung. cerui ℥ i ℔, liquefiant
simul auferendo ab igne, impone telam
ex canab. ad magnitudinem ventris,
ladiçte toille refrigerée sera appliquee
dessus le ventre : telz remedes susdicts,
gar-

gardent le ventre d'estre ridé & martelé. Or si la femme est grandement oppressée de tranchées, on luy donnera de ceste poudre. ℞ anis. cond. ʒ ij, nucis mosc. cornu cerui ʒ i ʒ, nucleor. dactill. ʒ iij, lig. aloës, cinamo. an. ʒ ij, fiat pul. subtiliss. cap. ʒ i cum vino alb. calid. Autre, ℞ Rad. consolidæ maior. ʒ i ʒ, nucleorum pers. nucis moscat. an. ʒ ij, carabe ʒ ʒ, ambr. gris. ʒ iij, fiat pul. cap. ʒ i cum vino albo, si la femme estoit febricitante, on luy donnera avec un boüillon de chapon. Aussi seront appliqués petis sachets de toille ou il y aura du mil, ou de l'auoine fricassée en vin blanc, & tous chauds on les appliquera sus le ventre, & sus les parties genitales de la femme, & mesmement aux reins.

Poudre singulière pour les tranchées.

Ce qu'il faut faire aux tetins de la nouvelle accouchee.

CHAP. XXXV.





L faut oindre les tetins de ce linimēt, à fin de faire fuir le laiēt lors qu'il vient en trop grande abondāce, & le faire euacuer par la matrice. ℞ olei rosati, mirt. an. ℥ iij, aceti rosat. ℥ i, incorpor. simul, de ce en seront frottez les mammelles trois ou quatre fois le iour, puis on aspergera dessus de la poudre de mirtilz, & quelques iours après on vsera de cet emplastre, ℞ pul. mast. nucis mosca. an. ℥ ij, nucis cupres. ℥ iij, boli arme. terre sigill. an. ℥ ℔, sang. drac. ℥ ij, mirtill. balauft. an. ℥ i ℔, ireos florent. ℥ ℔, olei mirtini ℥ iij, tereb. venet. ℥ ij, cera noue quantum suf. fiat emplast. molle. La berle & les fueilles de bouys boullus en vrine & vinaigre est un singulier remede pour faire fuir le laiēt des mammelles: Aussi le lierre terrestre

restre, peruanche, sauge, boullis ensemble en oxicrat, & de telle decoction en seront fomentees les mammelles, adioutant des roses & alun de roche. Pareillement on appliquera des ventouses au plat des cuisses & des aines, & au dessus de l'ombilic, lesquelles ont grande vertu d'attirer le lait des mammelles en la matrice, & le ietter hors, pour ce qu'en ce lieu il y a des venes de la matrice, qui communiquent avec celles desdictes mammelles (ainsy que iay escript en mon Anathomie) lesdictes ventouses seront grandes ou petites, moiennes, selon la corpulance de la femme, & auront en haut un petit trou, par lequel l'air sevacue lors qu'on les veut oster, comme tu vois par ces figures.

Il faut appliquer des ventouses au plat des cuisses.

Figures de ventouses.

*Semblable-
mēt l'accou-
chee se fera
teter par u-
ne grande
persone ou
par de pe-
tiz chiens
iusques à
tarir tout
son laiēt,
& faut sou-
uent faire
cela, à fin
qu'il soit
tiré au pa-
rauant
qu'il soit
parfaicte-
mēt cuiēt*



Et digéré: Et ou elle ne voudra, ou ne pourroit trouver aucũ pour se faire ainsy teter, elle mesme le pourra faire, par cet instrument de verre, dedans lequel mettra le bout de son tetin, & de l'autre succera de sa bouche, ainsy tirera son laiçt, tant & si peu qu'elle voudra.

Instrument propre à tirer le laiçt des mammelles des femmes nommé tetine.



Baings.

Après que l'accouchee sera bien purifiée de ses vidanges (qui est le plus communément en trois semaines après l'enfantement, & qu'elle n'aura fièvre, ny autre accident) sera baignee deux fois, ausquelz baings on fera boullir les herbes qui sensuiuent. *maiora. ment. sal. roris. arthenis. agrimo. puleg. flor. camomill. melilot. aneth. an. m̄ iiij*, l'eau sera de riuere, ou d'une claire & vine fontaine: le lendemain on fera un semblable baing, auquel on adioutera ce qui sensuit. *℥ far. fab. & auen. an. lb̄ iiij, far. orob. lup. & gland. an. lb̄ i, alumi. roch. ℥ iiij, sal. coīs lb̄ ij, gallar. nucum cupres. an. ℥ iiij, rosar. rub. m̄ vi, gariophil. nucis mosc. an. ℥ ij, bul. oīa in aqua coī, & fiāt saccul. cum panno lineo, & fiat balneum, in quo frequenter extinctum sit ferrum candens, & ladicte accouchee se tiendra en ce baing*
tant

tant qu'elle voudra, puis en sortant sera posée au liēt bien chaudement, & prendra un peu d'escorce de citron, ou une petite rostie trempee en hippocras, ou un peu de bon vin, & endurera la sueur tant qu'il luy plaira. Le lendemain on luy fera des fomentations sur ses parties genitales de choses astringentes & reserrantes. Exemple, ℥ gallar. nucum cupress. cort. granat. an. ℥ i, rosar. rub. m̄ i, maior. thimi, an. m̄ ss, alumin. roch. & sal. cois an. ℥ ij, bulliant in vino austero, & fiat decoctio pro fotu ad usum dictum. Distilation excellente pour apētisser & endurerer les tetins & autres parties trop relachees & mollasses.

Distilation
excellente, a-
stringente &
recerrante.

℥ garioph. nucis moscat. nucū cupress. an. ℥ i ss, mast. ℥ ij, alum. roch. ℥ i ss, gland. corticis quercini an. ss, rosar. rub. m̄ i, cortic. granat. ℥ ij, ter-

*ra sigill. ℥ i, cornu cer. vsti ℥ ℔, mirtil.
 sang. draco. an. ℥ i, bol. arm. ℥ ij, ireos
 florent. ℥ i, sumach, berber. hypur. an.
 m ℔, conquassent. omnia, & mace-
 rentur spatio duor. dierum in ℔ i ℔ a-
 qua rosar. & ℔ ij prunor. siluestr. me-
 spillo. pomo. querc. & ℔ ℔ aqua fa-
 bror. & ℥ iiij aceti fortiss. postea fiat
 distillat. lento igne, & seruetur vsu: de
 laquelle on fomentera les parties trop
 relaxees & les tetins deux fois le iour,
 & sera laissé sus la partie vne portion
 de feutre imbu en icelle, ou estouppe de
 lin. On peut pareillement faire vn ca-
 taplasme de farine d'orge & de feues,
 & de gland & bol armene detrempés
 & cuictz en ladicte eau distillee, en
 forme de pulte: tout cela accompli, la
 femme pourra coucher avec son mari
 pour refaire vne autre petite creature
 de Dieu.*

Des causes de la difficulté d'enfanter.

CHAP. XXXVI.

LA difficulté d'enfanter provient quelquefois de la mere, & quelquefois de l'enfant: De la mere, à cause qu'elle est trop grasse, ou trop maigre, trop ieune, ou trop vieille, ou trop debile, & foible, comme pour avoir eu un grãd flux de sang, qui luy sera sorti par la matrice, ou d'autre lieu, ou autres maladies qui auront esté cause de prosterner & debilter nature, ensorte qu'elle n'a force suffisante pour enfanter: ausy celle qui accouche devant le terme enfante difficilement, ainsy qu'un fruit (comme une pomme ou poire ou autre) n'estant en sa maturité, tient ferme & fort par sa queue, & lors qu'il est en sa parfaicte maturité tombe plustost de l'arbre, ou

que la femme est ieune, qui ne scait encore se situer, & endurer les douleurs: ou aussy par ce que l'enfant est mort, au moyen de quoy pour sortir ne s'aide aucunement: ou pour l'ignorance de la matrone, qui n'est experte à son office: ou que la femme aura quelque vice en la matrice, ou au col d'icelle, comme s'il est trop clos, qui vient quelquefois par le vice de la premiere conformation, que nature n'y a faict du tout ouuerture, y laissant vne defectuosité, qui ne permet les parties s'etendre & agrandir pour donner passage à l'enfant. Aussy il y a aucunes femmes qui ont le col de leur matrice dur & calleux, & tel vice peut venir d'une plaie, cicatrice, ou de quelque ulcere, ou d'une aposteme, dont s'en est ensuiui ulcere, ou par vne combustion, ou par un accouchement difficile, qui aura dilaceré les parties genitales:

ou par

ou par ignorance, qui vient le plus souvent des matrones, qui de leurs mains sans raison auront faict tel exés, ce que i'ay plusieurs fois veu, qu'apres l'union faicte, il se faisoit une cicatrice & callosité, & lors qu'elle reïteroit à faire enfant, & l'heure venue d'enfanter, la partie ne se pouuoit estendre suffisamment: & en tel cas si on ne donne ordre à couper ladicte cicatrice & callosité, la mere & l'enfant periront. Pareillement la difficulté d'enfanter prouient par l'air froid, qui comprime les parties, ou par une excessiue chaleur, qui prosterne les forces, ausy une grãde crainte garde la femme d'enfanter, comme voir des homes en sa presence, ou quelque femme qu'elle abhorre de voir: semblablement quand l'arrierefais se separe, & depart trop subitement de contre la matrice, il se faict une grande effusion

de sang qui l'occupe, laquelle estât trop remplie, empesche que la vertu expulsive ne peut ietter l'enfant dehors, ainsy qu'on void quand la vessie est trop pleine d'urine qu'on ne peut pisser: dauantage quand il y a quelque corps estrange avec l'arrierefais, comme une molle, ou autre mauuais germe, ou sable, ce que i'ay veu à deux femmes ou ie fus appelé pour extraire leurs enfans morts: ie proteste auoir trouué en leur arrierefais du sable, la pesanteur d'une liure et plus, semblable à celui qu'on trouue à la riuere. Plus la difficulté d'enfanter vient quelquefois pour le trop bas aage, comme auoir conceu à douze ou à treze ans, ou moins, cōme Sauonarola escript, auoir esté veu une fille de neuf ans grosse d'enfant, qui est chose monstrueuse, attendu qu'en cet aage les vesseaux sont encores petis & angustes. Le vice
vient

vient quelquefois à cause du defaut de l'enfant , parce qu'il est trop gros , ou qu'il vient de trauers , ou les fesses premieres, ou les mains & pieds ensemble, ou qu'il est mort, & grandement enflé, ou qu'avec luy a esté engendré une molle (qui est une masse de chair de laquelle parleros cy après) ou que l'enfant est monstreux, comme d'auoir deux testes: ou qu'il y en aye deux iumeaux ioincts ensemble : ou quand ilz sont plusieurs, comme trois, ou quatre, ou plus , ainsy qu'escript Albucrasis auoir veu une femme en auoir eu sept d'une ventree: ou par ce que l'enfant n'a suiuy assés tost les eaux, pour ce qu'estans vacuees il demeure à sec, & que la matrice s'est reserree, & toutes les autres parties: parquoy ledict enfant ne peut sortir hors, qu'avec une tresgrande difficulté. Et à toutes ces choses, le Chirurgien bien ex-

Albucrasis
escript qu'il a
veu vne fem-
me qui accou-
cha à vne seu-
le fois de sept
enfans.

On trouue
peu de sages
femmes.

pert remedira, au tāt qu'il luy sera possible, selon son art: & les matrones expertes pareillement (desquelles le nombre est trespetit) par ce qu'elles ne veulent apprendre des Medecins & Chirurgiens pour les conduire à mieux secourir les femmes à leur enfantement, qui est cause d'un grand mal. Or pour faire qu'un enfantemēt soit bon, il faut que l'enfant vienne à terme & suive les eaux, & qu'il sorte la teste premiere: & en cela est requis grande force à la mere, & à l'enfant: & conseille que celles qui trauaillēt beaucoup à enfanter, lors qu'elles seront sus leur terme, qu'elles se baignent en un demy baing, auquel on aura faict bouillir racines, semences, & herbes remolitiues, & qu'on leur oygne le ventre & le col de la matrice, & toutes les parties voisines de choses relaxantes, cōme huilles d'aman-

des

des douces, gresse de geline, oye, & leurs semblables. Pareillement on leur donnera un clistere aigu, pour vacuer les excrements abondans, & à fin qu'elle sefforce par les espreintes qu'elle aura du clistere, & avec celles de l'enfant: ce faisant accouchera tost, & plus facilement: ce que i'ay veu plusieurs fois. D'avantage doibt estre plustost en une grande chaire percee propre à ce faire, que dedans le lietz, à raison que les os qui se doibuent ouvrir à l'heure de l'enfantement, se dilateront plus facilement, par ce que la femme ne sera couchee dessus.

Des causes de l'auortement des femmes.

CHAP. XXXVII.

IL y a difference entre auortement & effluxion: auortement c'est quand l'enfant est ia tout

formé & a receu vie : Effluxion c'est quand les semences premierement conglutinees ensemble par quelques iours, soudainemēt s'esoulēt & en sort q̄lques membranes & callebotz de sang concret, & chair sans forme, que les matrones appellent faux germe, dont les femmes sont fort tourmentees & vexees de douleurs & trachees. Or lauortemēt des femmes vient hors le terme par nature distincte d'enfanter, & tel enfement est appelé auortif ; ou auortemēt : les causes duquel sont plusieurs, cōme grand flux de ventre, strangurie, ou ardeur d'urine, avecques grādes espreintes, grande toux, vomissemens violens, ou trop grand travail & agitation, cōme courir, dāncer, sauter, tōber de haut, ou leuer quelque pesant fordeau, ou cheuaucher vn cheual trotier, ou aller en coche, ou quelque coup orbe donné con-

tre

tre le ventre, par ce que telz mouuements desreglés rompent & relachent lesdicts ligaments de la matrice, ausſy les choses qui compriment le ventre de la mere, comme font les buſtes, & ausſy que l'enfant ne peut prendre croiſſance naturelle: parquoy il eſt contrainct ſortir deuant le terme deu, dont par telles choses les meres auortent, au moyen de la leſion qu'on faiſt à l'enfant. Et pource que les venes & arteres, ligamens de l'arriereſais ſe relachent, & rompent par telz efforts, pareillemēt par là trop grande frequentatiō des hommes, ausſy le bruit du fouldre, & tonnerre, & de l'artillerie, & le ſon des groſſes cloches font auorter, & pluſtoſt les ieunes que les vieilles; par ce que le corps des ieunes eſt plus tendre & delicat, & plus rare, & le corps des vieilles plus robuste, & plus dence. Dauantage il vient ausſy

de trop icusner, ou à cause de trop grand flux de sang, mais si l'enfant est encore petit, comme d'un mois ou deux, le danger n'est si grand, à cause qu'en tel tēps n'a affaire de grande nourriture. D'auantage si la femme est long temps malade, sera cause de la faire auorter, parce que le sang se consomme: parquoy le dict enfant est contrainct de sortir par faute d'aliment, qui ne luy est enuoyé en suffisante quantité ny qualité: aussy peut venir par trop prendre grāde quantité de viandes, car par icelles est suffoquée, & son aliment corrompu, à cause que le trop boire & manger fait que la digestion est mal faicte, & par consequent la masse du sang se corrompt, dōt l'enfant doibt estre nourri & alimenté. Aussy pour auoir mangé viandes corrompues, & de mauuais suc, car souuent les femmes grosses sont degoutées, & ont

& ont un apetit insatiable de māger vi-
 ādes estrāges & mauuaises choses, qui
 se faict le plus souuēt enuiron le troisie-
 me mois, qu'elles ont conceu, lequel apē-
 tit vient à raison de certaines humeurs
 visqueuses, aigres, & froides, & d'une
 pituite qu'elles ont à lestomach, dont l'ē-
 fant en est infecté: Ainsy aucunes de-
 sirent manger des charbōs, craye, terre,
 herbes, fruiçts non meurs, harancs, &
 autres poissons cruds, & chair, lequel
 apetit ainsy depraué augmēte lors que
 les cheueux commencent à venir à l'en-
 fant: & aucunes qui ont un tel desir
 n'en mangent, quelquefois auortent, &
 sont en danger de leur vie: Les femmes
 doibuent en cela resister & donter ceste
 mauuaise affection, toutesfois si on co-
 gnoit qu'elles aient un si grand vouloir
 & enuie d'en manger, leur faut permet-
 tre, encore que telles choses leur soient

Pourquoi les
 femmes gros-
 ses desirent
 māger choses
 estranges.

cōtraires, pourueu qu'elles ne leur apportent trop grand dommage & preiudice, car souuent digerent telles choses ordes, & les transmuēt en aliment, sans qu'elles en ressentēt aucun mal n'y d'ommage en leurs corps. Dauantage l'auortement se peut faire par l'usage des baings & estuues, par ce qu'elles molifient & lubrifient, & relachent les ligaments, & aussy que par la chaleur des baings, la chaleur interne de tout le corps est bien fort augmentee, & l'enfant sentant icelle, qui luy est estrange, ne la peut souffrir, dont faict ses efforts à sortir hors de la matrice : aussy peut venir auortement par trop grand ioye & rire, ou vne grande peur, par la mutation trop subite qui se faict au corps: or voila les causes qui font auorter les femmes. Dauantage si les mammelles de la femme grosse sont dures & plaines,


nes,

nes, puis subit diminuent, c'est signe d'avortement: ausſy ſi la femme porte deux enfans, & l'une de ſes mammelles fleſtriſſe & diminue, c'eſt ſigne que l'enfant qui eſt de ce coſté la eſt mort, ou en bien grand danger. Les femmes endurēt plus grande douleur en auortāt que lors qu'elles accouchent à terme, & ſont en plus grand peril, d'autant que ce qui ſe faiçt contre nature eſt plus grief & mauuais que ce qui ſe faiçt naturellement. Il aduient ſouuent aux femmes qui ne portent au commencement leurs enfans à terme, qu'elles font les enfans ſuiuans en ce meſme temps, parquoy cela aduenant, on aura recours au medecin à rechercher les cauſes, & euitier toutes les choſes qui font auorter. Cet emplatre eſt utile appliqué ſus les reins, ℥ lapd. ʒ ij, Galang. ʒ i, nucis moſcat. nucis cupreſſ. boli arm. terræ ſigillat.

sanguin. draco. balaustior. an. ʒ ʒ, accac. psidior. hipochist. an. ʒ i, mast. mirrhae an. ʒ ii, gummi arabici ʒ i, terebinth. veret. ʒ ii, picis naval. ʒ i ʒ, cere quāt. suff. fiat emplast. secundum artem, extendatur super alutam ad vsum: si suruenoit chaleur et prurit aux lieux ou il auroit esté appliqué, par le moyen dudit emplastre, il sera osté, & appliquera on l'onguent rosart, infrigidat. Galeni, ou de celuy qui s'ensuit. ʒ olei mirti. cidoni. & mastic. an. ʒ i, hipochist. accac. boli arme. sang. draco. an. ʒ i, sandal. citrini ʒ iiij, cere quāt. suff. fiat unguent. secundum artem.

Des moyens de suruenir à l'enfant, la mere morte.

CHAP. XXXVIII.

 R si aduenoit que la femme grosse d'enfant fust en agonie, ou aux efforts de la mort, qui se peut

se peut cognoistre par les signes si deuât
 declarés, faut que le Chirurgiẽ se trou-
 ue prest & appareillé à ouurir subit la
 femme, après le dernier sousspir de la
 mort, à fin de sauuer l'enfant, s'il est pos-
 sible, & ne faut auoir confidence à la
 baillonner & tenir sa bouche & par-
 ties genitales ouuertes, pour donner air
 & esprit à l'enfant estant dans le ven-
 tre de sa mere, & encore inuolué dedâs
 les membranes, veu que ledict enfant e-
 stant au ventre de sa mere n'a son air
 que par les mouuements de l'artere om-
 bilicale: Et la mere decedee ses poulmõs
 ne font plus leur actiõ, qui estoit attirer
 l'air exterieur par la bouche et cõduict,
 par la trachee artere aux poulmons, &
 d'iceux au cœur par l'artere venale, &
 du cœur par la grande artere, & d'icel-
 le aux arteres de la matrice par les coti-
 ledons, qui sont au corion ou arrierefais,

Beau discours
 comme l'en-
 fant attire son
 air estant au
 ventre de sa
 mere.

L'enfant ne peut prendre aucun air, encore que la bouche, & le col de la matrice de la mere soient ouuertes.

& d'iceux à l'ombilic de l'enfant, par l'artere ombilicale, & delà aux arteres illiaques, puis au coeur, & d'iceluy à toutes les parties de l'enfant: & la mere estant decedee, tous les mouuemens cessent, dont ne pourra plus recevoir n'y attirer nullement l'air par l'ouuerture & parties genitales de la mere, estât morte, & par consequent le mouuement naturel du cœur dudit enfant cesseroit en brief, après que la femme auroit rendu l'esprit: parquoy si tost qu'elle aura expiré & ietté le dernier sousspir, la faut ouurir en diligence, & ne se fier aucunement aux dictes ouuertures. Et quant à l'ouuerture de la fême grosse decedee, elle doit estre commencee près le cartilage nommé xiphoyde, ou pomū granatum, en leuant le cuir & muscles du ventre, & le peritoine en figure d'escusson, en euitant bien de faire apertion des

des intestins , puis subit on incisera la matrice la leuant en haut, de peur qu'en faisant l'incision on ne touche du rasoir à l'enfant, lequel trouueras nager aux aquosités susdictes, & souuent le nombril entortillé au col, ou au bras & iam-
bes: subit après l'ouuerture, ledict enfant ne se ment pas tousiours pour l'opressio
& debilitation & faute des espritz & vertus qu'il n'aura receües, à cause du decés de la mere. Parquoy de prime fa-
ce semblera aux assistans qu'il n'aura nulle vie, ce que cognoistras veritable-
ment en touchant & tastant son ombi-
lic, auquel sentiras pousser & battre l'artere ombilicale, s'il a vie, aussy que bien tost qu'il aura senty l'air, mouuera tout en vn coup aucuns de ses membres.
Or si tu cognois que ses vertus & forces soient debiles, faut bien euitier de lier & separer l'ombilic d'avec l'arriere fais,

à cause que ledict enfant peut attirer & recevoir chaleur, & quelque reste d'esprits contenus encore audict arriere-fais: parquoy le poseras sus le ventre de l'enfant, & le laisseras iusques à ce que la chaleur soit exhalée, car par ce moyen seras cause d'augmenter ses vertus, & par consequent d'allonger sa vie: mais la ou ledict enfant seroit fort, alors pourras lier subit ledict ombilic, comme nous auons dict cy dessus, & au reste laisser l'enfant à Dieu & aux femmes, qui lui feront ce que nous auons escript. Et si l'aduenoit, comme quelquefois se faict, que par la violēce d'auoir tiré l'enfant, on eust dilaceré les parties genitales, & que des deux trous il s'eust faict vn, alors il faudroit faire quelques points d'esguille pour reünir ce qui seroit contre nature separé, & traicter la plaie selon l'art: & lors que tel accident ad-
uient,

Ce qu'il faut
faire lors que
la sage femme
a dilaceré &
rompu le pe-
gineum.


uient, est un grand desastre à la pource femme, par ce que si elle reuiet à estre grosse après, & que son heure soit venue d'enfanter, ses parties genitales ne se peuuent assés suffisammēt dilater pour donner passage à l'enfant, à cause de la cicatrice: parquoy on est contrainct la couper, ou autremēt la femme ne pourroit iamais accoucher, ce que iay faict à deux en ceste ville de paris. Or ie mesmerueille comme d'aucuns veulent asfermer auoir veu des femmes, desquelles pour extraire leurs enfans on leur auoit incisé le ventre, non seulement une fois mais plusieurs (si cela est vray il peut estre) si estce que cela m'est du tout impossible à croire; attendu que pour donner issue à l'enfant, il faudroit faire une grande plaie aux muscles de l'epigastre, & pareillement à la matrice, laquelle estant imbue de grande quantité

Fauce opiniō
qu'aucū trou
uent que l'on
peut extraire
vn enfant par
le costé du vé
tre de la mere
estant viuante
& en re
chaper.

de sang & y faisant une diuision si grande, il y auroit une tresgrande emorrhagie, dont la mort s'ensuiuroit. D'auantage après auoir consolidé la plaie, la cicatrice ne permettroit après à la matrice de se dilater pour porter enfant. Il y a encore d'autres accidets qui en pourroient aduenir, & le pis, une mort subite à la mere: & partant ie ne conseilleray iamais de faire tel ceuvre, ou il y a si grand peril, sans nul espoir.

De la superfetation, c'est à dire conception reïteree, ou surengendree.

CHAP. XXXIX.

 VAND la femme a deux ou trois, ou plusieurs enfans, & chacun d'iceux sont distincts & separés, aians chacun leur arrierefais, il y a super-

perfetation, mais s'ils sont trouués enue-
 lopés en vn seul, seront engendrés par
 vne grande quantité de semence, &
 non par superfetation, ce qui se preuue
 par les raisons qui s'ensuiuent. Galien
 au liure des facultés naturelles, & au
 liure de semine, nous enseigne, Que tout
 ainsy qu'après que nous auons pris no-
 stre repas, le stomach vient à se retirer
 de telle sorte, que comme avec les deux
 mains, il tient de tous costés enuironnees
 les viandes qui sont au dedās, pour peu
 qu'il en ait, à fin de les cuire & alterer
 pour la generation du chile, de sorte que
 lesdicts alimens ne peuuent estre esbran-
 lés ça & la, pour la compression faicte
 par le susdict estomach (Galien entend
 de l'estomach des personnes sains, non
 malades) de mesme veut il estre faict en
 la matrice, après la reiectiō de la semē-
 ce de l'homme & de la femme, car de

Belle compa-
 raison.

tous costés la matrice vient se serrer, & comprimer le plus qu'elle peut pour retenir lesdictes semences en un, en quelle quantité qu'elles soient, de sorte qu'une partie de la semence ne peut estre retenüe en l'un costé de la matrice, n'y l'autre en l'autre pour faire deux fœtus d'un coït, et d'une mesme semence, couverts de plusieurs arrierefais, & moins trois, ou quatre, ou plus, comme il s'en trouue parfois, attendu que la matrice des femmes n'a nulles sinuosités ou receptacles, cōme ont les bestes, qui cōçoivent plusieurs fœtus à une fois, autrement faudroit dire la semence n'estre de tous costés comprimee & serree par ladicte matrice, ce qui seroit contreuenir au dire des anciens, ioinct ausy qu'e le space vuide il seroit necesserement cōtenu de l'air, par lequel la vertu generative des semences seroit muce, & al-

teree:

teree : mais comme il est aisé à voir les deux, ou trois, ou plus, ou moins fœtus seront engendrés cōme s'en suit. Suppose que pour ce iourdhuy l'homme aye cogneu la femme de telle sorte, que de ce soit ensuiui generation, laquelle comme nous monstre Arist. & Galien, se faict en un moment, ausy tost que la semence fertile de tous deux a esté receüe dedans la matrice ; aduient qu'elle n'est fermee si exactement & estroictement qu'elle ne s'ouure quelque temps après, si l'homme de rechef se ioinct avec la fême, & que tous deux reiettent semence fertile, se fera nouvelle generation. Or la semence peut estre iettee à deux ou trois fois, ou plus, par interualle de temps, c'est à dire entre la premiere & la seconde copulation: ce que recite Pline, qu'une femme fit un enfant qui auoit neuf mois, & un autre qui n'en auoit que cinq, tous deux

Lib. 7. cap. 2.

d'une ventree, & dict dauantage, qu'une femme accoucha de deux enfans, dõt l'un ressembloit à son mary, & l'autre à son paillant: ausy dict que Proquouesca esclauue conçeut en un iour deux enfans, l'ung de son seigneur, & l'autre de son procureur, chacun retirant à son pere. Or i'ay encor à dire pour prouuer qu'il se faict superfetation, c'est qu'autant qu'il y aura d'enfans autant se trouueront d'arrieresais: & est vray semblable que si la conception ne se faisoit qu'eune seule fois, n'y faudroit ausy qu'un arrieresais, mais autant qu'il y a d'enfans (s'ilz ne sont iumeaux, & ne s'entretienent) autant y a d'arrieresais: ie le sçay pour les auoir veus plusieurs foys separés l'ung de l'autre. Or c'est chose monstreuse quand la femme porte plusieurs enfans, veu que nature ne luy a donné que deux mammelles: toutefois
 il y

il y en a qui en portent plusieurs, comme nous dirons cy après.

De la molle engendree en la matrice, appelee des femmes mauuais germe.

C H A P. X L.

MOLLA a pris le nom de mollon, nom Grec, qui est une chose ronde, & ausſy par ce que la forme de molle est rōde, a eſtē ainſy appelee, c'eſt une fauſſe impraignation, qui eſt une chair ſans forme, de figure ronde & dure, cōtenue en la matrice, & a ſa racine longue de deux ou trois doigts, plus ou moins, faiçte de la membrane qui l'ēuelope, & des vaiſſeaux qui la nourriſſēt, (ainſy que nous voïōs certaines loupes faiçtes aux parties de noſtre corps) &

La molle préd ſon nourriſſement ainſy que ſont les loupes, et les fungus des arbres

la ou elle n'eust eu sa racine ainsy longuette, & separee de la matrice, lors que la femme se tourne d'un costé ou d'autre, elle n'eust bougé de la partie contre laquelle elle seroit attachee: icelle n'est enuelopee d'un arrierefais, mais seulement de sa susdicté membrane, qui l'envelope de toutes pars. Philonius dict que la molle est engendree de la semence de la femme, & du sang mēstrual cōcurrent ensemble, sans semence virille. Galien dict que les poulles font bien des œufs sans coq, mais les femmes ne cōçoient sans les hommes, n'y un amas de chair, qui est une molle, n'y autres choses semblables, qui peuuent estre dictes mauuais germe: Et dict dauantage que la semēce de l'homme est la cause & principe du mouuement, & celle de la femme sert & aide pour la generatiō de quelque chose. Fernel dict que la cause

cause efficiente d'une molle, n'est seulement le sang menstruel, n'y que la semence sculle de la femme ne la peut faire, veu qu'on ne vit iamais femme avoir conçu d'une molle sans la compagnee d'homme, car principalement la cause de la molle c'est la semence de l'homme, qui faict fermenter celle de la femme, comme la preseure le formaige, ou le leuain la paste. Autres auteurs tiennēt que molle n'est faicte sans la semence virille, mais plus de la feminine, & d'une grande quantité de sang menstrual cōtenu aux vaisseaux de la matrice, lequel avec la grande quantité de la semence feminine corrompt & suffoque la virille, qui empesche que la vertu formatrice ne peut faire son action, laquelle se faict par une bonne temperature, & au contraire est corrompue par une immoderee, & aussy quelquefois

par mauuaise quantité ou qualité des semences n'est seulemēt faicte vne molle ; mais aussy enfans imparfaicts , & monstreux , voire quelquefois des animaux , & autres choses monstreuses , dont nous parlerons cy après . Or si on tenoit qu'une molle peust estre engendree sans semēce d'homme , aucunes femmes pourroient par là couurir leur impudicité.

Des signes pour cognoistre vne molle d'auec vng enfant.

CHAP. XLI.



N. void en vne molle quasi tous les signes des femmes grosses d'enfant. Les signes du commencement de molle sont , douleur poignante au ventre , comme de colique , le ventre s'enfle plus subit

subit, & plus fort que d'un enfant, & sera plus dur. Pareillement la molle est plus difficile à porter qu'un enfant, parce qu'elle est contre nature, & comme une chose sans esprit & vie, & l'enfant est selon nature, ayant esprit & vie: aussy les mammelles ne s'enflent, mais demeurent mollasses & flaitries, & diminuent, pour ce que nature en vain y enuoiroit du lait, veu qu'il n'y a point d'enfant pour l'alecter & nourrir. Deuât le troisieme mois on y trouue manifeste mouuement, toutefois fort obscur & petit, ce qui n'est trouué à un enfât. Or combien que la molle se meue, & qu'il semble y auoir quelque vie, neantmoins elle ne tient point ceste vie de l'ame raisonnable, mais seulement de la faculté de la matrice, & de l'esprit generatif, qui git aux semences, & au sang menstrual, lesquels nourrissent & entre-

La molle a vn certain mouuement petit et obscur cōme les esponges estans attaches contre les rochers, & comme les vrties de mer.

est
Bib
oul
auu

tiennent & donnent forme à l'enfant,
 mais puis après sa formatiō, Dieu infu-
 se l'ame, qui est vne estincelle, & inspi-
 ration de l'esprit diuin, laquelle distin-
 gue l'homme des bestes & le rend immor-
 tel: Aussi l'enfant en son temps ha son
 mouuement different, parce qu'il se
 meut de costé dextre & senestre, ce qui
 n'auient en vne molle sans compression,
 & la comprimant à dextre, est pousseée à
 senestre, & du senestre, au dextre, &
 retourne en mesme lieu dou elle auoit e-
 sté pousseée, au contraire de l'enfant qui
 pour l'heure qu'on le pousse ne sort de sa
 place. Pareillement quand la femme se
 tourne en son liēt, la sent tourner de co-
 sté & d'autre avec vne pesanteur, com-
 me si s'estoit vne boulle: D'auātage tout
 le corps de la femme deuient mollastre,
 & emassié, c'est adire amaigry & sec,
 principalement les cuisses & iambes,
 lesquel-

Le mouue-
 ment d'vne
 molle est bien
 different a ce-
 luy d'vn en-
 fant.

lesquelles s'enflent vers le soir , de sorte que la femme ne se peut bien soustenir dessus : aussy le ventre est fort enflé, & semble que se soit hidropisie , excepté qu'il est plus dur , & ne rend point de son de timpane lors qu'on frappe dessus : aussy le nombril ne sort dehors comme quand il y a enfant : pareillement en la molle iamaïs les fleurs ne coulent, comme il se faict quelquefois à la femme grosse d'enfant , si ce n'est à d'aucunes à qui il aduient grandes vidanges, qui les allegent fort de la pesanteur de leur ventre: aucunesfois la molle est tant adherente & attachee contre les parois de la matrice, et aux orifices des vaisseaux (qu'auons parcideuant nommés cotiledons) que iamaïs n'en peut estre separee, partant la poure femme la porte six ou sept ans, & mesmes toute sa vie. La femme de Guillaume Roger, maistre po

tier d'estain, demeurant rue S. Victor, a une molle depuis sept ans, en laquelle on trouue tous les signes cy dessus escriptz, & a le ventre grand & dur à merueilles, comme si elle estoit grosse de plusieurs enfans, si bien que quelques medecins voiant les mois passés de sa grossesse, l'ont traictee comme hidropique, toutefois n'ont sceu riē gagner sur l'enfleure de son ventre, & demeure tousiours en un mesme estat: aussy il aduient à quelques vnes qui ne la portent qu'un mois, ou deux, ou plus, ou moins: & alors qu'elle est iettee hors, les femmes la nomment mauuais germe. Il s'en est trouué autrefois deux ou trois séparés l'un de l'autre: il me souuient auoir ouuert une femme, laquelle mourut parce qu'elle auoit une molle de la grosseur d'un œuf d'oye, que nature vouloit ietter hors, & ne peut, & demeura, & se pourrit, dont la mort sensuiuit. Or


pour conclusion, quand la femme pense estre grosse, & qu'on void passer le tēps d'enfanter, faut conclurre que ce n'est enfant, & partant faut remedier à la faire ietter hors sil est possible.

Cure de la molle. CH. XLII.

L'ON ordonnera à la femme choses qui prouoquent les fleurs, et qui font ietter l'arrierefais, & l'enfant mort, pareillement diette tēnue, saignée, baings, & le tout ordonné par le medecin docte & experimenté: & sil aduenoit que la molle fust desliee & delachee de contre la matrice, & que nature ne la peüst ietter hors, le Chirurgien situera la femme en mesme situatiō qu'à l'extractiō de l'enfant, & fera tāt qu'il la mettra hors, & la prēdra avec cet instrument nommé pied de griffon, lequel s'ouure estāt dans le corps de la matrice.

Pied de
griffon
pour ex-
traire la
molle.

Or il
faut entē-
dre que sās
instrumēts
on ne scau-
roit tirer
hors la mol-
le, si elle est
trop grosse,
à cause de
sa rōdeur,
parce qu'il
n'y a aucu-
ne prise, &
lors qu'on
la veut prē-
dre



dre de la main, tourne en la matrice cōme si c'estoit une boulle, parquoy faut comprimer le vētre d'une part & d'autre, comme nous auons dict cy dessus de la teste de l'enfant estant demeuree seule en la matrice: Après l'extraction d'icelle la femme sera traictee ainſy que si elle estoit accouchee d'un enfant.

De la sterilité, qui est defaut d'engendrer aux hommes.

CHAP. XLIII.

LE S causes de la sterilité aux hōmes sont plusieurs, à ſcauoir quand ſa ſemēce eſt trop chaude ou trop froide, trop ſeche ou trop humide, & fluide, qui faiēt qu'elle ſ'eſcoule ſubit de la matrice, comme celle des vieilles gens & des ieunes qui ſont en trop bas aage: ou

à cause du trop frequent coït, qui rend la semence debile & indigeste, & corrompue, & partant pour engendrer il faut par quelque temps s'abstenir du coït, & lors que la semence de l'homme est trop chaude ou froide; la femme en pourra bien iuger, la sentant fort chaude & acre, ou trop froide & aqueuse, & est ietee tardiement (suple celle qui est trop froide) & si telle semence n'est du tout infæconde, engēdrera plu-
stost une femelle qu'un masle.: semblablement après l'incisiō de la pierre, quelques uns demeurent sterilles: pareille-
mēt pour auoir receu quelque plaie derriere les oreilles; qui aura couppé certains rameaux des venes & arteres iugulaires, laquelle section après estre cicatrisee, faict ceste voye solide par la cicatrice, de façon que la matiere de la semence ne peut descendre, & priue les
testi-

L'incision des
venes qui sōt
derriere les o-
reilles causent
sterilité.

testicules de la communication du cer-
 ueau , de sorte qu'ilz ne peuvent rece-
 uoir d'iceluy, n'y l'esprit animal, n'y la
 matiere, dont le reste de la semence est
 debile & en trop petite quantité, &
 par consequent infœconde. Les hommes Les hommes
 chatrés ne iettent point de semence, chatrés ne iet-
 à tent point de
 cause que les testicules leur manquent,
 n'y aussy ceux à qui on les a tors & cõ-
 primés par violence, par ce que la voye
 de la semence est bouchée par un callus,
 qui faiçt qu'elle ne peut estre iettee hors.
 Pareillement par plusieurs indisposi-
 tions de la verge, comme estre trop cour-
 te, ou par trop enorme, soit en grosseur,
 ou longueur, qui blesse la femme, & luy
 prouoque quelquefois flux de sang, prin-
 cipalement aux ieunes, de sorte qu'elles
 ne peuvent ietter leur semence, car en
 lieu d'auoir plaisir & delectation, souff-
 rent douleur. Or si le vice vient de la

trop grande longueur de la verge, il leur faut bailler un bourrelet, à fin qu'elle n'entre si profondement, & sera de telle grosseur qu'il sera besoin, & que la femme ne sente douleur. D'auantage sterilité vient par ce que la verge est tortue, pour la briueté du ligament (qu'on appelle le filet) qui la tiét de sorte qu'en l'erection d'icelle ne se tient droicte, mais courbee, de façon qui ne se peut faire intromission. Semblablement il se trouue quelques vns qui n'ont point le trou au bout de la verge, mais ils l'ont deffous, à cause dequoy ils ne peuuent engendrer, par ce que ceste imperfection les empesche de iecter la semence droict en la matrice. Aussi par une paralisie particuliere de la verge peut venir sterilité, qui se cognoistra faisant trēper les parties genitales en de leau froide, & si elles ne se retirēt, c'est signe qu'il y a paralisie

lisie à la partie, car en telle maladie les parties ne se retirent point, mais demeurent tousiours laxes & molles, & y a peu quelquefois de sentimēt: ioinct que la semēce sort sans que la verge se dresse, & sans nul plaisir, & les coüillons sont froids au tact. Il y a encore d'autres defauts & malefices es parties genitales aux hommes, qui se font par incantation, qui les rend infecons, comme leur auoir noïe lesguillette, & faiēt autres chermes, que ie ne puis dire n'y escrire.

Notez bien.

De la sterilité & fecondité des femmes.

CHAP. XLIIII.

UN femme est infeconde quand la voye de la semence est bouchée, ou le col de la matrice est trop estroict de nature, par le defaut de

Les femmes
qui ne portēt
point d'efans
sont appelees
steriles ou
brahengnes.

la vertu formatrice, ou quelquefois est
clos d'une membrane appelee hymen,
dont nous parlerons cy après, ou par ac-
cidēt, comme par quelque tumeur schir-
reuse, ou par un ulcere, qui a faict cica-
trice, qui ne permet l'intromission de la
verge, aussy par quelques verrues ou
cissures, & ragadies, ou que sa matrice
est trop lubrique & dilatee, ou que ses
moys sont retenus, ou qui fluēt déregle-
ment & immoderement, qui font cou-
ler la semence avec le sang, ou par un
flux muliebres, qui vient du vice de la
matrice, ou de tout le corps. Il y a enco-
re d'autres dispositions de la matrice,
comme intemperatures chaudes, froi-
des, seches, humides: les froides & hu-
mides suffoquent la semence qui ne peut
demeurer, mais decouille incontinent,
& les chaudes & seches la corrompent
par faute de nourriture. Exemple, si on
seme

seme en vne terre palustre ou sablon-
neuse, rien n'y sera produict, aussy les
femmes trop ardantes au ieu des da-
mes rabatues peu souuent conçoient,
par ce que leur semence est trop chaude,
& partant elle s'estainct : aussy vne
molle, vne procidāce de la matrice, sont
causes de sterilité. La femme trop mai-
gre ne peut concevoir si elle n'est engres-
see : aussi le trop boire d'eau froide, &
manger fruiçts cruds & non meurs,
par ce qu'ils rendent le corps froid, &
plain de superfluités indigestes, qui font
obstruction : Pareillement pour vser de
choses narcotiques, par ce quilz empe-
schent que la semence ne peut estre iet-
tee, mais demeure concrete & glassée,
& encore qu'elle soit ietee, ne pourra
estre generatiue, par ce que l'esprit & la
chaleur sont aucunement estains, c'est
à dire, sans vie: & aussy que les orifices

des venes & arteres de la matrice, appelés cotiledons, sont bouchés, tellement que les mois ne peuvent aucunement couller. D'auantage quand l'homme est trop gras & fessu, ou la femme, ou tous les deux ensemble, cela est cause de sterilité, par ce que les parties genitales ne peuvent ioindre, & conuenir ensemble, pour la trop grãde multitude de la gresse qui enfle le ventre, voire quelquefois de demy pied, ou plus, & aussy que le sang est employé en la gresse, & partant ils engendrent moins de semence & de sang menstrual: car la generation & formation de l'enfant prend son origine de deux choses: la premiere est la semence de l'homme & de la femme: la seconde du sang menstrual, & esprits qui donnent matiere & nourriture à l'enfant estant au vêtre de sa mere: & partant ceux qui sont ainsy gras appetent moins

La generatiõ
& formation
de l'enfant
prend son o-
rigine de deux
choses.

moins venus, & bien à tard en usent: semblablement le grand travail excessif, & le trop ieusner, longues veilles, & grandes euacuations, parce qu'elles consomment le sang & les esprits. La multitude des poils, qui sont autour des parties hôteuses, tant de l'homme que de la femme, montrent souuent la fecondité ou infecondité.

Les signes de la matrice intemperee en chaleur.

CHAP. XLV.



LES signes qui demontrent la matrice trop chaude, c'est que les mois sortent en petite quantité, & le sang est gros & noir, & coulle avec acuité & douleur, & desire l'acte venerien, avec prompte expulsion de la semēce accom-

Signe que la matrice est trop chaude.

pagnee d'une cuis seur & mordacité, après estre iettée aux parties par ou elle aura passé.

Signes que la
matrice est
trop froide.

Les signes de la matrice froide, c'est que les mois sont supprimés, ou sont rares & tardifs, & de couleur blafarde, & de tardive expulsion, & pareillement de la semence avec peu de plaisir & delectation, & le linge sus lequel sera tumbee se laue legerement.

Signes que la
matrice est
trop humide.

Les signes de la matrice trop humide, est une grande humidité coulante du col d'icelle, & ne peut retenir la semence de l'homme: & s'il aduient qu'elle la retienne & engendre enfant, avorte facilement, principalement quand l'enfant commence à croistre.

Signes que la
matrice est
trop seche.

Les signes que la matrice est trop seche ce monstrent par la petite quantité de ses mois, & iette peu de semence, & desire volontiers lacte venerien pour estre

estre humectée, & lubrifiée, & le col de la matrice est subiect aux ragadies, fissures & prurit, desquels accidens parlerons cy après.

La femme engendre volontiers peu après qu'elle a ietté ses fleurs (par ce qu'elle est bien nettoïée, & partant apte à biē concepuoir) ou lors qui luy veulent venir, car ilz si arrestēt par la vertu de la semence. Aussi quelques unes engendrent pendant qui coulent encore, qui n'est que le fœtus s'en ressente de quelque marque sus son corps, & est subiect à plusieurs maladies, voire quelques fois à lepre. Aussi quand l'homme a les reins ulcérés, il decoulle quelque fois du sang avec la semence, qui peut pareillement estre cause de donner quelque tache à l'enfant, ainsy que faict le sang menstrual de la femme. Or la femme peut engendrer depuis le qua-

Le temps que la femme engendre volontiers.

L'enfant engendré pendant que les fleurs coulent ou veulent couler, est souvent subiect à estre lepreux.

torziesme an, iusques au cinquãtiesme,
& l'homme depuis le douziesme, ius-
ques à soixante & dix.

De la precipitation ou peruersiõ de la matrice.

CHAP. XLVI.



LA precipitation ou per-
uersiõ de la matrice, c'est
quand elle est hors de son
propre lieu, comme estât
son fond à l'un des costés relaché de-
dans son col, ou qu'une grande partie
d'icelle sort du tout hors d'iceluy. Les
causes, signes, & accidens de ce mal
sont, ou la relaxation, ou ruption des li-
gamens, qui lient la matrice & la tien-
nent en son lieu naturel. Or ils se rela-
chent ou rompent le plus souuent après
un enfantemẽt violent, ou par l'impru-
dence

dence des matrones, qui tirent la matrice d'auec l'arrierefois par trop grande force, ce que i'ay veu aduenir plusieurs fois: aussy par vne vehemente extentiõ, lors que la femme est grosse d'enfant, en estendant du linge, leuant les bras en haut, ou leuant de terre vn pesant fardeau, ou autres choses semblables: pareillement par vn grand effort de crier, ou par vne toux violente, par Tenesme (cest à dire grandes espreintes à s'efforcer d'aller à la selle, ou de pisser) aussy cheutttes, coups orbes donés contre le ventre, ou cheuancher vn cheual allāt trop dur, aussy grandes sternutations, dancier, sauter de haut en bas les iambes separees l'vne de l'autre. Aussy la retention de l'alaine par quelque defluxion de quelque matiere pituiteuse, accompagnee de quelques ventosités, qui relachent & humectent les ligaments de la

matrice, ou paralisie d'iceux, & toutes choses qui compriment violamment le diaphragme, & les muscles de l'epigastre : aussy pour auoir enfanté souuent, car l'enfant pesant au ventre la faict relacher & descendre en bas. Les signes que la matrice est descendue, c'est que la femme sent douleur aux parties esquelles la matrice est liee & attachee, à scauoir au fläcts, aux lombes, & à l'os sacré, & sent au col de sa matrice une tumeur avec les doigts: & si elle est davantage relachee, on la void estre sortie hors la nature de la femme, comme une chair rouge en forme d'oualle, & diuerse en quantité, selon la grandeur de la relaxation, & aura la femme difficulté d'aceller & vriner, parce que la dicte matrice cõprime l'intestin droit, & le col de la vessie: semblablement la femme sent en sa nature une pesanteur & gran-


Les signes que
la matrice est
descendue.

Et grande facherie, Et l'empesche de cheminer, Et de faire le ieu de venus.

La recente ou nouvelle relaxation de la Pronostic. matrice en une ieune femme est curable, au contraire non, si elle tombe par paralisie des ligaments, est difficile à guerir, Et si elle tombe par pourriture, est du tout incurable: si elle est fort descendue entre les cuisses, elle ne peut estre reduite, Et se corrompt par l'air ambiët, Et s'ulcere, Et putresce par le continuel attouchement de l'urine Et matiere fecalle, Et aussy par la compression Et contusion du fray de cuisses. J'ateste auoir veu Et medicamenté une ieune femme, a qui sa matrice tomboit hors sa nature, la grosseur d'un gros œuf de poulle, auoir esté guerie, Et porté depuis des enfans, Et sa matrice n'estre iamais retombée.

Cure de la precipitation de la
matrice.

CHAP. XLVII.

 I la matrice est esleuee en haut, sera aidee par les remedes que d'escrions cy après en la suffocatio de la matrice, & si elle estoit relachee du costé droict, faut appliquer ventouses au costé senestre, & si elle estoit peruertie au senestre, on les appliquera au destre, & si elle estoit tombee en bas, & peu sortie, hors le col d'icelle, il faut faire situer la femme ensorte qu'elle aye les fesses fort esleuees en haut, & les cuisses croisees l'une sus l'autre, & appliquer des ventouses sus le nombril & petit ventre, puis estât reduite en son lieu, on fera des iniections au col de la matrice de choses astringentes, & fort desiccatives,

tiues, & parfūs fetides, receus par le col de la dicte matrice, & par la bouche & lenés, d'autres fais de choses odoriferantes. Or si la matrice tombe grandement entre les cuisses de la femme, & n'a peu estre reduite par les moiens susdicts, on y remedira par autre voye, tant à la situation qu'à autre remede.

Comme il faut situer la femme lors que la matrice est grandement tombee hors la nature de la femme.

CHAP. XLVIII.

IL faut situer la femme à la renuerse, les fesses & cuisses esleuees en haut, ainsy que si on luy vouloit extraire son arrierefais ou enfant, puis oindre le col de la matrice, & tout ce qui est sorti


hors , avec huile de lis ou beurre frais, gresse de geline , ou autres semblables, puis sera reduite en son lieu, en poussant avec les doigts tout ce qui est sorty dehors, nō tout à un coup, mais peu à peu, avec un linge delié: & pendant qu'elle sera ainsy pousse'e, la femme retirera son alaine tant qu'elle pourra , & subit qu'elle sera reduite , faut essuier de linges deliés l'onctuosité qu'on y auoit appliquee, à fin que les parties ainsi oinctes ne soient laissees lubriques, car par ainsy la matrice pourroit facilement tomber derechef : Cela faict on fomentera toutes les parties genitales de la femme d'une decoction faicte de chose astringēte, comme ceste cy. ꝯ cortic. granat. nuc. cupres. gall. alum. roch. caud. equi. sumach, berber. cum aqua fabror. fiat decoct. pro fotu, & de ces choses en sera faicte pareillement poudre , laquelle
on

on aspergera dessus, & sera mis un pessaire dedās le col de la matrice de grosseur mediocre, de longueur de huit à neuf doigts, plus ou moins, selon la nature de la femme, de figure d'oualle, faict de liege, couuert de cire, au bout duquel y aura un lien pour le retirer quand on voudra.

o iij



Figure des pessaires.



A Le corps du pessaire

B Le lien, lequel doit estre attaché à la cuisse, & après cela se tiendra en repos huit ou dix iours, & aura les fesses hautes, & les iambes croisees. Pareillement on luy appliquera sus les flancs

flancs des ventouses assés grandes, à fin de faire tenir la matrice en son lieu: & sil aduenoit pour auoir esté trop long temps descédue qu'elle fust fort refroidie, il la faut fomentier d'une decoction chaude & carminative, pour resoudre les ventosités, comme ceste cy. ℞ fol. alth. salui. lauand. rorismarini, arthemis. flor. camomil. melil. an. m̄ss, seminis anisi, fœnicul. an. ℥i, coquantur omnia completè in aqua & vino, & fiat decoctio ad usum. Pareillemēt ne faut oublier à luy donner desclisteres pour ietter hors les excremens des intestins, à fin que la matrice aye meilleure place à se tenir en son lieu. Posons le cas que la matrice n'eust peu estre reduite par tous ces moiens, & fust ulcerée & putrescée, les anciens commandēt l'amputer, mais premierement veulent qu'on la lie, & qu'on coupe ce qui est neces-

saire , puis la cauteriser & paracheuer la cure selon l'art. On a veu des femmes à qui presque toute la matrice auoit esté extirpee , & neantmoins ont suruescu long temps après ; & te suffise de la precipitation de la matrice.

De la membrane appelee hymē.

CHAP. XLIX.

DAREILLEMENT il se trouue quelquefois en aucunes vierges une membrane à l'orifice du col de la matrice , appelee des anciēs hymen, qui empesche d'auoir la compagnee de l'homme , & faict la femme sterile . Or le vulgaire (voire plusieurs gens doctes) cuydent & estiment qu'il n'y a nulle vierge qui n'ayt ladicte hymē, qui est la porte virginalle , mais ilz s'abusent, pour

Les anciens se sont abusés pour auoir mal obserué l'hymen.

pour ce que bien rarement on la trouue,
& proteste (composant mon Anatho-
mie) l'auoir recherchee à plusieurs filles
mortes, à l'hostel Dieu de Paris, aagees
de troys, quatre, cinq, & iusques à dou-
ze ans, & iamays ne l'ay peu aperce-
voir, fors à vne fille aagee de dixsept
ans qui estoit acordee en mariage, &
sa mere sachant que sa fille auoit quel-
que chose qui pouuoit empescher estre
apellee mere, me pria la voir, en laquelle
trouué vne membrane nerueuse de le-
passeur d'vng parchemin fort delié, qui
estoit au dessous des nimphes, imme-
diatemēt prés le cōduit par ou les fēmes
pissent, deuant l'entree de l'orifice du col
de la matrice, aiant vñ petit trou au mi-
lieu par ou ses moys se pouuoient escoul-
ler. Et ayāt veu ladicte membrane ain-
sy peu epeffe, la coupé promptement a-
uēcques des ciseaux, & donné à la mere

Alexis reco-
gneu entre
les hommes
scauans.

conseil de ce qu'il restoit pour parfaire
la gucrison , peu après fut mariee &
eut enfant . Vn iour deuissant de ceste
matiere avecques monsieur Alexis (pre-
mier Medecin de la Royne) homme
d'honneur, & estimé entre les gens do-
ctes, ie luy dy que i'auois faict plusieurs
sections de filles tant à l'hostel Dieu de
Paris, qu'autre part, & que iamais n'a-
uois veu ceste membrane, fors vne fois,
comme i'ay dict cy dessus, lequel me dit
que veritablement elle se trouue rare-
ment, & que Realdus Columbus lib. 2.
en auoit escript ce qui s'ensuit. Il se trou-
ue au dessoubs des nimphes en aucunes
vierges, non en toutes , vne membrane
appelee des anciens hymen , laquelle
quand elle si trouue (toutefois se trouue
rarement) empesche l'entree de la verge
de l'homme, & a vng pertuis par lequel
ses moys coullent : dauantage dict qu'il
la seu-

Realdus co-
lumbus grand
& excellent
anathomiste.

Au liure 15.

La seulement trouuee à deux petites fil-
lettes, & une fois à une plus grande.

Auicenne dict que le col de la matrice est tissu de venes & arteres, & de fila-
mens nerueux tressubtils, qui proceder
de toutes les pties d'iceluy col, lesquelles
sont rompues au premier coït venerique,
dont souuēt le sang en sort. Almësor es-
crit le conduict des pucelles estre estroict
et ridé, et en ses rides il y a des venes et
arteres tressubtiles entrelassees, lesquel-
les se rompent à la defloration & exte-
tio des rides: voyla que les susdicts au-
theurs nous en ont laissé par escrit. Les
matrosnes tiennēt pour une chose vraye
qu'elles peuuēt cognoistre une fille vier-
ge d'avecques celle qui a este depucelee,
par ce qu'elles disent trouuer une ruptio
d'une taye, qui se ropt au premier coït,
& souuent à leur rapport les iusticiers
donnent iugement, & là commettent

Auicenne lib.
3. f.ueillet 21.
traicté 1. ch. 1.

grands abus par lesdictes matrones: qui soit vray, i'en ay interrogué plusieurs pour sçauoir ou ils treuuent ladicte taye, l'une disoit tout à l'entree de la partye honteuse, l'autre au milieu, & les autres tout au profond, au deuant de la bouche de la matrice: les autres disent qu'elle ne peut estre veüe qu'après le premier enfantement, & voila comme ses sages femmes accordēt leurs vielles. On trouue cette pānicule raremēt, parquoy n'en faut faire regle certaine, n'y vniuerselle, & le sang qui sort n'est à cause de la rupture de l'hymen, mais vient à raison des rugosités du col de la matrice, qui n'ont encore esté estendues & desprimees, & à ceste premiere entree se desioignent & separent, & se faiēt rupture de certains petits vaisseaux, lesquels descendent par la superficie interne du col de la matrice, se ro-

pans

pans ou soursans, ne pouuans soubste-
nir ceste extention sans douleur & flux
de sang lors que la fille n'a accompli ses
dimentions : mais si la fille pucelle est
en aage, suffisante, estant mariee avec-
ques un homme qui aura sa verge pro-
portionee au col de sa matrice, n'aura
aucune douleur n'y flux de sang estant
depucelee: & partant ne faut conclurre,
comme aucuns veulent, que la fille, au
premier coït, qui ne iette le sang par le
col de la matrice ne soit pucelle, pareil-
lement aussy celle qui en iette le soit, par
ce qu'aucunes par les mechâtes maque-
relles & impudentes, qui ont acoustu-
mé vendre filles pour pucelles, lesquelles
contrefont ceste ioye, leur faisant des in-
iections d'eaux astringentes, puy met-
tent profondement au col de leur matri-
ce une esponge imbue en sang de quel-
que beste, ou en reüssent quelque peti-

Chose digne
d'estre bien
nottee.

te vessie, comme la vessie ou est contenu
 l'humeur collerique aux moutons, ou au-
 tres bestes qu'on appelle la vessie du fiel,
 & alors que l'homme vient auoir com-
 pagnie d'elles, font les reserrees, criant
 comme si on les despuceloit, ou qu'o leur
 fist une douleur extreme, & en lacte
 ledict sang qui en est exprimé coulle de-
 hors, & le poure badelory, doux de sel,
 pēse auoir eu la cresse, ou il n'aura eu
 que le fonds du pot, voire que de ses pu-
 celles en sera quelquefois issu de petites
 creatures, qui se degenerent en hommes
 ou femmes, partant garde ce heurt qui
 pourra.

Histoire memorable de Iean
 VVier, de la membrane ap-
 pelee hymen.

CHAPITRE L.

IEAN



E A N *V*ier Medecin
du Duc de Cleues en son
liure de l'imposture & trö-
perie des Diables, des en-

Chap. 18.

chantements & sorcelleries, recite qu'il
y auoit vne fille en Chambourg, laquel
le auoit vne taye forte & dure nommee
hymen, qui prohiboit q̄ lors que ses mē-
struees luy suruindrent ne peurent estre
vacuees, à raison de l'ēpeschemēt de ce-
ste membrane, & pour la regurgitation
du sang qui remontoit en haut, auoit le
ventre fort enflé & tendu, & auoit de
grandes & extremes douleurs, comme
si elle eust deu enfanter. Alors les ma-
trosnes furent mandees, lesquelles la
virent auoir le ventre ainsy dur & ten-
du, & les douleurs si extremes, que d'un
commun accord disoient qu'elle estoit
grosse d'enfant, encore que la pource fil-
le leur contredist avecques grands ser-

Histoire me-
morable.

mens & affermaſt n'auoir iamais eu
cognoiſſance d'homme: & dict qu'il fut
appelé lors que les femmes ne luy pou-
uoient plus rien faire, & qu'elles en de-
ſeſperoient à raiſon des douleurs insu-
portables, lesquelles auoient deſia duré
trois ſemaines, ſans luy donner repos
de iour ne de nuit, avec quelque ſupreſ-
ſion d'urine, veilles perpetuelles, et per-
te d'apetit: promptemēt qu'il fut arriué
il recogneut la partye malade, ou il trou-
ua l'orifice du col de la matrice clos &
eſtoupé par vne taie, tellement qu'il n'en
pouuoit rien ou peu ſortir, & ſ'enquit de
ſon aage, qui eſtoit de xxi. an, & que
iamais n'auoit eu ſes fleurs, lors cogneut
qu'il c'eſtoit faiēt promptement vne ſu-
bite decharge de ſang: appela vng Chi-
rurgien & luy commanda faire vne
ouuerture à ladicte taie, & peu à peu
en ſortit bien huit liures de ſang coa-
gulé,

gulé, noir & ia commencé à se pourrir :
 & l'enacuation du sang faicte , trois
 iours après fut du tout guerrie . Pour
 ceste cause ie conseilleray tousiours aux
 peres & meres , qui auront la cognois-
 sance que leurs filles ayent ladicte hy-
 men , qui la fassent couper , sil n'y a-
 uoit suffisante ouuerture à expurger
 leurs fleurs , pour ce que quelques vnes
 sont mortes par faute que le sang men-
 strual n'auoit issue.

De la suffocation de la matrice,
 appelee des femmes, le mal de
 la mere, & de ses causes.

CHAPITRE LI.



SUFFOCATION de ma-
 trice est ablation de libre
 inspiration & expiration,
 qui vient de la retention

des menſtrues retenues, ou de la corruption de la ſemence, ou d'une apoſtème faiçte en la matrice, ou fleurs blanches, & autres mauuaiſes humeurs, qui ſe putreſciet en icelle, ou de vëtoſités, ce qui ſe peut cognoiſtre par ce que la femme aura grands ſoupirs, vertigines, ſcoto-mies, douleurs de teſte, nauſee, rocqs, & grãds bruits aux inteſtins. Or de la ſemence de la femme retenue aux vaiſſeaux ſpermatiques, ou ia repandus en la matrice, ou autour de ſes teſticules, ſ'eſleuënt certaines vapeurs corrompues, leſquelles ſont communiquees au foye, au cœur & au cerueau, dont ſ'engendre de treſcruels accidens, approchãſ quelquefois à ceux qui ſont mords de chiens enragés, ou picqués de quelque beſte veneneuſe. Les accidens qui viennent en la ſuffocation de la matrice ſont plus grands & cruels pour la ſemence rete-

nue,

Signes de la
ſuffocation
de la matrice.

nüe , que ceux qui viennent par la retention des menstrues, à cause que d'autant que la semence est plus parfaicte, demeurant en sa disposition naturelle, aussy de tant plus deuient elle maligne & peruerse estant allienée d'icelle, & changée de qualité contraire: aussy lors qu'elle est corrompue, la pourriture est plus maligne, plus subtile & penetratiue que le sang menstrual, dont les accidens sont plus grands & plus vénéneux: ce qu'on void aduenir au vinaigre, car d'autāt est le vin meilleur, d'autant aussy en est le vinaigre plus fort & aigu. Or les accidens susdicts aduiennēt peu souuent aux femmes mariees, estant à la compagnee de leurs maris, mais aux ieunes uesues qui sont nourries d'aliments copieux, & oisues. La matrice par les mois retenus, ou par la semence, ou quelqs autres mauuaises humeurs,

Pourquoy les accidens sont plus grands de la semence retenue que des fleurs.

ou ventosités , se peruertit & se meut de son siege , & situation naturelle, quelquefois se retire en haut , & quelquefois à costé dextre ou senestre , ou s'estend en l'argeur , pour la plenitude des vaisseaux , qui paruiennent en icelle , contenus en son corps: Car les venes & arteres , & autres vaisseaux estans fort remplis , s'estendent en profond & en l'arge , & alors ils se font plus courts, & partant se retirent vers leur origine , qui est la vene caue, & grand artere: adonc retirent la matrice semblablement à eux & fils tirent esgalement, lors elle semble monter en haut, vers l'estomach & le diaphragme: & si la tirent inegalement, alors s'encline en deuant & en derriere, à dextre & à senestre, vers les flancts, ou à la seule region de l'os pubis, & lors la

la vessie & l'intestin droict sont agraués de douleurs, & enflés : & pour le dire en un mot, le lieu ou le corps de la matrice est distendu. Or il faut icy noter que neantmoins que la matrice s'esleue en haut, il ne faut seulement attribuer les accidens prouenir par la tumeur & compression qu'elle faict aux parties superieures (à scauoir vers l'estomach & le diaphragme) ou inegalemēt d'autres parties, pource que ce n'est le corps de la matrice, neantmoins que les femmes disent qui leur semble monter iusques à la gorge, les voulant estouffer & estrāgler, mais se sont certaines vapeurs qui sont esleuees d'elle, ou de ses vaisseaux, qui montent, comme nous auons dict, aux parties superieures, veu qu'une femme aiant en son vētre un enfant ia grandelet, ou un autre qui sera hydropique, & un autre aiant l'estomach

Chose digne
d'estre bien
nottee.

fort rempli de viandes , touteſois nulles de ces choſes ne peuuent ſoudainement oſter la reſpiration , ainſy qu'il ſe faiët en la ſuffocation de matrice. Parquoy on ne peut vrayment conclurre, que la ſuffocation ſe faiët par ce que la matrice ſeſleue en tumeur , mais pour les vapeurs qui ſeſleuent vers les parties ſuperieures . Dauantage il ſe peut encore prouuer , car la matrice d'une femme, n'eſtant groſſe, eſt fort compacte, dure, & ſerree, & de groſſeur ſeulement d'une groſſe poire de certean , & y trouue on bien petite cavit   : & partant faut conclurre que ce n'eſt ladiët matrice, qui tant ſe groſſit & ſeſleue en haut, qu'elle puiſſe oſter la reſpiration , mais les vapeurs putrides, comme nous au  s diët. Autres accidens aduiennent pour la ſemence & les mois retenus, leſquels ſont diuers, ſelon la quantit   & qualit   des
des

des matieres: car si la cause est froide & venteuſe, elle refrigere tout le corps, tellement que la reſpiration & le pouls des arteres ne peuuent eſtre aperceus par le ſens: & ſi la matiere eſt groſſe, elle cauſe conuulſion: & ſi elle eſt d'humeur melancholique, elle engendre triſteſſe: par leſquelles choſes eſt euident, que la matrice premieremēt bleſſe auſſy par compaſſion l'eſtomach, le cœur par vne palpitacion, le foye, & le cerueau: Or le cerueau eſt bleſſé par douleur de teſte, qui ſouuent eſt avec rougeur de toute la face, & des œils, avec ſcotomie & vertigine, c'eſt à dire qu'il ſemble que tout tourne ſen deſſus deſſous, qui ſe faiēt par vne putredineuſe vapeur eſleuee au cerueau, perturbant entierement les facultés animales, dont aduient vne reſuerie, tantost de la vertu aprehenſiue, tantost de la raiſonnable, & ſouuent la

femme parle a par soy en reuant, declairant tant ce qu'elle doibt taire que dire, & quelquefois demeure toute stupide & estonnee : aucunes ont un treslong sommeil appelé des Grecs Caros, dont elles sont sourdes et muettes, & ne respo-
dent rien quand on les l'appelle hautement, aucunes fois elles entendent bien, mais elles ne peuuent respondre.

Les signes que tost la femme aura suffocation de matrice.

CHAPITRE LII.

LA femme au parauant que ses accidens aduiennent, sent monter de sa matrice une tresgrande douleur iusques à la bouche de l'estomach & au cœur, & luy semble qu'elle estouffe, & dict sentir monter quelque morceau, ou
autre

autre chose qui luy clost le gosier, avec grand battement de cœur : La matrice & ses vaisseaux s'enflent à quelques vnes, qui les gardent de se dresser debout, mais se couchent courbees sus le ventre, pour auoir moindre douleur, mettant la main dessus, pressant & s'efforçant, pour empescher que la matrice ne monte, cōme elles cuident qu'elle mōte, ce qu'elle ne faict, mais comme nous auons dict se sont les vapeurs putredineuses. La patiente est fort decolorée, & deuient palle & iaunatre, ne se pouuant tenir debout, pour ce que les iambes & vertus luy defaillent, partant tombe en terre, & se laisse aller comme si elle estoit morte, & plusieurs perdent tout sentiment & mouuemēt, & le pous est tant petit, qu'on ne le sent aucunement, de façon qu'on estimeroit qu'elles fussent mortes, toute fois elles ne le sont pas, cō-

bien que la respiratiō ne nous apparoiſſe, qui eſt action inſeparable de vie.

Les ſignes pour cognoiſtre ſi vne femme eſt morte ou non par vne ſuffocatiō de matrice.

C. H A P. L I I I.

Q V A N D on luy applique au nés & à la bouche un miroir bien eſſuyé & polly, pour ce que la vapeur de la reſpiration en celles qui reſpirent l'obombile, couure, & cache d'une petite vapeur, & ſe ternit, & ſi telle choſe apparoit, c'eſt un treſcertain ſigne de vie. Auſſy pourra on encore cognoiſtre en luy appliquāt une plume treſmolle, comme de duuet, ou un petit bourgeon de laine cardee, qui par le mouuement puiſſe teſtifier la reſpiration: & encore
que

que nulle respiration apparaisse, si estce
 pourtant qui ne faut conclurre la fem-
 me estre morte, car elle peut encore auoir
 une petite chaleur qui luy reste au cen-
 tre du corps, par le benefice de laquelle
 elle est conseruee, & ceste petite chaleur
 n'a pas grand besoin de la respiration de
 la poictrine, n'y de l'action des poulmons
 pour sa conseruation (c'est à dire refrige-
 ration, ventillation, & nutrition) tout
 ainsy que tous autres animaux froids,
 lesquels en hiuier se cachēt en terre si a-
 uant qu'ils ne peuuent respirer, & tou-
 tefois sont entretenus de transpiration
 du cœur & des arteres, aussy se faict il
 à la femme. Siluius escript qu'aucunes
 ont esté par trois iours euanoüies, & pen-
 soit on qu'elles fussant mortes, par ce
 qu'elles ne respiroient nullement, & a-
 uoient tous autres signes de mort, à sca-
 uoir n'ayant nul sentiment, mouuemēt,

Bon documēt
 au ieune Chi-
 rurgien.

Histoire.

n'y chaleur, partant en telle disposition ne se faut haster les enseuclir, & moins ouurir leurs corps, de peur d'encourir vne calomnie. Ainsy que de ce ciecle est arriué à vn grād anathomiste, ie dy grand & celebre, duquel ses liures reparent aujourd'hui les estudes des hommes doctes, lequel estant pour lors resident en Espagne fut mandé pour ouurir vne femme de maison, qu'on estimoit estre morte par vne suffocation de matrice: le deuxiesme coup de rasoir qui luy donna, commença à se mouuoir, & demonstrier par autres signes qu'elle viuoit encore, dont tous les asistans furent grandement estonnés: ie laisse à penser au lecteur comme ce bon seigneur faisant ceste œuvre fut en perplexité, & cōme on cria tolle, après luy, tellement que tout ce qu'il peut faire, fut de s'absenter du pais, car ceux qui le deuoient excuser, s'estoi-

festoient eux qui luy couroient sus, & estant exilé, tost après mourut de deplaisir, qui n'a esté sans une grande perte pour la republique. Or i'ay bien voulu reciter ceste histoire, à fin d'instruire tousiours le icune Chirurgien estre discret à se garder qu'il ne tombe en tels accidens.

Des differences de suffocation de matrice.

CHAP. LIII.




R il y a plusieurs differences de suffocation de la matrice, qui se font selon la grandeur & difference de la cause efficiente, par ce que les accidēs sont plus grands & plus petis, car aucunes femmes sentent, & se remuent & ratiocinent, mais elles ont une defaillā-

ce de cœur, & de respiration par inter-
ualle : Aussi aucunes se remuent d'un
mouuement inuolontaire (comme les e-
pileptiques) remuant les bras & les iam-
bes avec grincement de dens, par la cō-
uulsion des muscles des temples : les au-
tres sont surprises, comme auons dict,
d'un tresprofond sommeil (dict des
Grecs Caros) & après que les causes
de ce mal sont cessees, resolues, & va-
cuees, alors le corps commence à s'affer-
mir, & la rougeur venir au visage, &
les mandibules à s'ouvrir : & à plusieurs
d'icelles, s'escoule quelque humeur de
leur matrice, & à quelques vnes il se
uacue dehors une grosse semence, voire
en grande quantité, avec travail &
plaisir, ainsy que si elles estoient en l'acte
venerien, principalement à celles à qui
les matrones titillent le col de leur ma-
trice, & alors que les matieres sont es-
coulees,

coulees, la matrice se relache peu à peu, & tous les accidens cessent.

Les signes pour cognoistre si la suffocation vient par la semence retenuë & corrompue, & non du sang menstrual.

CHAP. LV.

'EST que tout subit leur survient une difficulté de respiration, puis tost après privation d'icelle, la femme retire les iambes en haut, & sent quelque chose estre esleuee de la matrice à la bouche de l'estomach, & au cœur, comme nous avons dict: Si la femme est adonnee à l'homme, & qu'elle s'en soit ia dés long temps retenuë, ou bien que se soit une fille vierge, succulète & sanguine, usant de viandes chaudes, &

humides & venteuses , & qu'elle soit oisive & avec irritation d'homme, appetant venus, & les mois luy sont suprimés , cela demontre que la suffocation vient de la semence retenue : Les accidens qui viennent aux hommes par la semence retenue sont plus gracieux qu'aux femmes , par ce qu'ils dissipent par le travail la plus grand part de la corruption.

La cure de la suffocation de la matrice.

CHAP. LVI.



LA suffocation procedante de la matrice , pour ce que c'est un grief & pernicieux accidēt, se vent secourir promptement , voire en negligēat pour l'heure la cause d'icelle: Donc
que


que la femme subit soit situee sus l'espi-
 ne du dos, aiant un peu le thorax esle-
 ué, à fin qu'elle expire plus librement, &
 que promptement on luy detache les las-
 sets de sa poictrine, & qu'on l'appelle à
 haute voix par son nom, criant à ses o-
 reilles, qu'on luy tire le poil des temples,
 & de derriere le col: aussy luy faut lier
 les bras & iambes de liës douloureux,
 ensemble qu'on la frotte rudement avec
 gros linges aspres & rudes, avec dou-
 leur, trempés en vinaigre & sel. Da-
 uantage on luy appliquera un pessaire Pessaire.
 à la matrice semblable à cetuy, ℞ succi
 mercur. & arthemis. an. ℥ij, in quib.
 dissol. pulu. benediēt. ℥iij, pul. rad. e-
 nul. campa. galanges minoris, an. ℥i,
 fiat pess. puis luy faut oindre la plante
 des pieds d'huile laurin, ou autre sem-
 blable, puis on luy appliquera une gran-
 de ventouse sur le petit ventre, avec

Puluis ex quo
 conficitur be-
 nediētā.

grande flambe: aussy luy en seront appliquees au plat des cuisses, c'est à dire aux parties interieures, près les aïsses, à fin de retirer la matrice en son lieu, & faire reuulsion des matieres qui causent ce mal: si il est besoin sera faict parfun en la matrice, avec choses fort odorâtes, mais premierement faut tenir le col de la matrice ouuert, à fin que le parfun puisse mieux entrer dedâs, qui se fera avec un instrument faict en façon de pessaire, pertuisé en plusieurs lieux, à la bouche duquel y aura un petit ressort qui le pourra tenir ouuert, tât et si peu que l'on voudra: & sera attaché par deux liens à la ceinture, ceinte au milieu du corps de la femme, lequel sera faict d'or ou d'argent, ou de fer blanc, le portraict duquel est icy donné.

Pessaire pour tenir le col de la matrice ouuert par le benéfice d'un ressort.

Aiant



Aiant mis le pessaire dans le col de la matrice, la femme sera assise en une chaire percee & bien couuerte tout au tour, de peur que la vapeur des choses aromatiques qui ont vertu d'attirer la matrice en bas ne monte en haut, & que la femme ne ressente cet odeur par le nés, & par la bouche: car tout au contraire luy faut faire odorier choses fetides & fort puantes, à fin de renuoyer la matrice en bas, dont nous parlerons cy après. On peut user desdicts parfuns odoriferens liquides, les faisant boullir avec maluoisie ou du bon vin, y adioustant un peu d'eau de vie, posés en un pot couuert d'un entonnoir, mettant un rechaud dessous, auquel y aura du feu, à fin que la vapeur qui s'esleuera puisse entrer dedans le col de la matrice au trauers du susdict instrument faict en maniere de pessaire.

Por-

Por-
traict
d'un pot
pour re-
cevoir
les par-
fums au
col de la
matrice.



Matiere des
parfuns odo-
riferans.

Les matieres des parfuns odorifere-
rens sont, Cinamo. calam. aromat. xi-
loaloës, lapdanum, benioin, thim. piper,
gariophil. lauend. calament. arthemif.
puleg. alypta mosc. gall. mascat. mus.
amb. ioncus odoratus, & autres sem-
blables, qui par leur grand vertu aro-
matique attirent la matrice en son lieu,
& consumēt les ventosités putredineu-
ses.

Matiere des
parfuns fœti-
des.

Les matieres des parfuns fœtides,
lesquels on fera odorier & prendre par
le nés & bouche sont tels, comme, Gal-
banum, sagapenum, ammoniacum, assa-
fœtida, bitumen, oleum gagates: aussy
des chandelles de suif recentemēt estein-
ctes, plumes de perdris, becasses, & de
tous autres oiseaux, poil d'homme, de
bouc, de vache, dras, feutre, vieilles sa-
uates de souliers, ongles, & cornes de
bestes, poudre à canō, punaises, & souf-
fre vis bruslés, & autres choses sembla-
bles,

Pourquoy on
vse de parfuns
fœtides à la
suffocation
de la matrice.

bles, à fin que c'este puante vapeur contraigne la matrice d'aller en bas. Semblablement on prouoquera le vomir en mettant vne plume doye fort profondement en la gorge, ou les cheueux mesmes de la malade : après on luy donnera quinze grains de poiure noir pilés avec hidromel, ou bon vin, qui est le secret d'Auicenne : pareillement on luy peut donner vne demie dragme de theriaque dissout en vne once d'eau d'absinte, trois heures auant le past. Autre remede bien approuué, vne goutte d'huile de gets mis sus la langue. Autre remede: prenés demie dragme de castor dissout en vin blanc, ou en boüillon de chapon, & luy en donnés à boire. Plus on la fera eternuer en luy mettant dans les narines de la pouldre d'elebore, ou de poiure, ou autre semblable, à fin de reueiller l'esprit vitat & animal, qui en tel cas

Secret d'Auicenne.


est comme endormi & assopi. D'auantage on fera des iniections carminatiues dans le siege & matrice, faictes de decoction de calamete, harmoise, lauaude, pouliot, camomille, meliot, & autres semblables : outre plus on fera suppos. & pessaires de lapdanum, gingembre, galla moscat. theriaque, mitridat, siuette, musc: aussy d'huile de girofle, anis, sauge, romarin, & autres semblables, extraictes par quinte essence. D'auantage pourra user de clisteres, comme cetuy cy. ℞ rad. enulae camp. ireos, ebul. aristoloch. an. ℥ ss, fol. absinth. arthemis. matricar. puleg. organ. an. m i, baccar. lauri & iuniper. sambus. an. ꝑ i, seminis ruta, cumini, ammeos, an. ʒ i, flor. stecad. rorismar. saluia, centaur. minor. an. ꝑ ij, fiat decoction, cape de colat. ℥ i, in qua dissolue mellis authosat. sacca. rubri, & benedict.

dict. an. ℥ i, diacath. ℥ ij, olei aneth. & nard. an. ℥ i s, fiat clist. mais d'autant qu'il y a certaines femmes qui pour nulle chose voudroient prendre un clistere de la main d'un homme, pour une vergongne qu'elles ont de ce montrer: à ceste cause j'ay faict portraire cet instrumēt, duquel elles se pourront aider à recevoir ledict clistere, mettant par deuant (aiāt les fesses esleues) la canule dans le siege, puis versera la liqueur dedans. D'auantage on leur pourra appliquer ceste emplastre sur le vētre. ℥ mass. emplast. oxicroc. & de melil. an. ℥ ij, olei nard. quant. suff. ad malaxand. fiat emplast. extendatur super alutam, & applicetur reg. vent. Et si la femme est mariee, qu'elle aye compagnee de son mari, car telle chose surpasse tous autres remedes: & si c'est une femme grosse qui souffre suffocation, de ce remede aura grand &

prompt secours, & seur, car des autres aydes n'en doibt user qu'auec grande prudence & conseil du docte Medecin, de peur d'auorter, & en lieu de la compagnee de son mari.

Instrument par lequel les femmes se peuuent bailler elles mesmes vn clistere.

La



La sage
femme
doibt oin
dre ses
doigts a-
uec huile
nardin,
ou de mu-
guette, ou
de clou
de giro-
fle, ou d'a-
spic mes-
lés ensem-
ble avec
musc &
ambre
gris, &
ciuette, et
quelques

poudres subtiles & aromatiques, &

les appliquer ou profond du col de la matrice, & en frottant qu'elle titille ledict col de l'orifice d'iceluy, & qu'elle l'eschauffe premieremēt de quelque linge, & toutes ces choses se feront à fin que la semēce corrompue, ou autres humeurs venimeux, ou vëtosités (qui sont cause de ses maux) se puissent resoudre, & s'escouler hors, à fin qu'estans eua-cuees, la matrice puisse descendre, & que soudain la femme reuienne à con-ualescence de sa suffocation, & en sa premiere santé, qui se cognoistra à cause que les ioïes commenceront à rougir, & les mandibules à s'ouurir, & les œils à s'esleuer, & le pous à se manifester, & la femme aura cognoissance des assistās, & commencera à se resiouir, & autres signes de reconualescence.

Du flux menstrual des femmes.

CHAP. LVII.

LES femmes appellent leur flux menstrual, mois, par ce que quand elles sont saines elles euacuent le sang quasi tous les mois, les autres l'appellent leur temps, par ce qu'il coule tousiours, ou le plus souuent en certain temps, autres le nommēt semaines, à cause que ce flux a acoustumé de fluer par sept iours. Autres l'appellēt leurs purgations, pour ce que par tel flux se purge tout leur corps : les autres l'appellent fleurs rouges, & celles qui sont blanches, fleurs blanches ; parce que la fleur precede le fruiēt des plantes. Pareillemēt les femmes ne conçoient point (ou rarement) que leurs mois n'ayent coullé : Car si elles sont saines elles s'euacuent tous les mois,

comme nous auons dict: toutefois il faut
entendre que cela ne se faict pas ordinaie-
rement à toutes femmes, tous les mois,
ne tousiours aussy en un mois, mais en
aucunes plus souuent, en autres plus ra-
rement: car il y a des femmes qui les ont
trois fois en un mois, qui se faict pour la
grande multitude de sang, à cause de
leur habitude & ieunesse, & desir
d'habiter avec les hommes; les autres
ne les ont que de deux en deux mois,
plus ou moins. D'auantage aucunes
les ont à la nouuelle lune, les autres au
defaut, & telle chose se faict pour la di-
uerse complexion & temperature qu'el-
les ont des vnes aux autres, à scauoir
plus chaudes, ou plus froides, & pour
plusieurs autres causes qui seroient lon-
gues à escrire.

La

La cause des menstres aux femmes.

CHAP. LVIII.

POURCE que les femmes sont de temperature froide, au respect des homes, aussy le nourrissement ne se peut tost conuertir en bon sang, de façon que la plus grande partie demeure indigeste, & se conuertit en menstres, desquelles la femme saine se purge & nettoye (ie dy saine expressément) car aucunes femmes malades en sont exētes. Or on peut affirmer qu'aucunes femmes abondent cent fois plus en sang que l'homme: qui soit vray, depuis xij. ans iusques à cinquante elles iettent tous les mois grande quantité de sang, & neantmoins que quelques vnes soient grosses d'enfant, ausquelles faut abondance de sang pour

Arist. en ses
problemes.

sa nourriture & croissance, estant au ventre de sa mere, si estce qu'elles ne de-
 laissent à auoir leurs fleurs. D'auantage
 il se trouue des femmes grosses qui a-
 uortent, si elles ne sont seigneës, & disent
 qu'elles suffoqueroient si elles nel'estoiët.
 Plus quand l'enfant vient sus terre la
 mere iette grande quantité de sang, &
 encore après l'espace de dix ou douze
 iours, & encore pendant ceste purgatio
 le sang môte aux mammelles, & se con-
 uertit en laiët, qui n'est qu'un sang blä-
 chi, lequel l'enfant succe, & tette iour
 & nuict : & iusques à ce qui soit un
 peu grandelet souuent la nourrice est cö-
 trainte d'espandre son laiët, ou se faire
 teter à vng autre: & alors que l'enfant
 est agrandi & plus fort, d'autant aussy
 succera il d'auantage du laiët des mam-
 melles, voire que iour & nuict en peut
 rirer demie liure, ou plus, neantmoins
 plus-

Le laiët est vn
 sang blanchi
 par le benefi-
 ce de la vertu
 laëtifiante qui
 est aux mam-
 melles.

Le laiët est vn
 sang blanchi
 par le benefi-
 ce de la vertu
 laëtifiante qui
 est aux mam-
 melles.

plusieurs nourriçes ne laisseront d'auoir leurs fleurs tous les mois, & pour ces causes on peut vrayement dire que la femme a cēt fois plus de sang que l'homme: mais nous tournerons le fuelliet, & dirons qu'une dragme de sang d'un homme vaut mieux que deux liures de celui d'une femme, par ce qu'il est plus cuit & digeré, & plus spirituel.

Les causes pourquoy le flux menstrual est retenu aux femmes.

CHAPITRE LIX.



LES causes de la retentiō & cessation sont plusieurs, comme par maladies aigues, ou longues, par tristesse, peur, faim, ou grans travaux, & veiller, ou pour estre grosse d'enfant, ou d'une molle, ou autre mau-

uais germe & flux de ventre , ou par
hemorrhoides , ou flux de sang par le
nés, vomissement , ou d'autres parties:
aussy pour estre trop souuent seigneés,
par sueurs , aussy apostemes suppurees,
& fluantes en grande quantité , par
multitudes de galles au cuir, par sieures
quartes, longues & autres : & pour le
dire en un mot , par toutes choses , qui
dessechent & euacuent le corps. Pareil-
lement les menstrues sont supprimees,
par ce que le sang est trop gros & glu-
tineux, lequel ne peut sortir par l'orifice
des venes: aussy pour auoir mangé grã-
de quantité des fructs cruds, & non
meurs, & auoir beu eaüe froide (comme
font volontiers les femmes) aussy sont
supprimees pour quelque vice de la ma-
trice, comme quelque intemperature, ou
aposteme, ulcere , ou pour la cloture de
son orifice , p^r une callosité ou excroissã-
ce de

ce de chair faicte par plaie ou ulcere, ou quelque membrane nee & adherante à la bouche de la matrice, ou pour y auoir trop ietté de certaines eaux astringentes, pour faire que le col de leur matrice fust plus petit & estroict: toutes lesquelles choses bouchent la matrice, qui font que les menstres ne peuvent couler, & le sang est contrainct regurgiter, en la masse sanguinaire, qui cause plusieurs maladies & accidens, voire souuent la mort. Dauantage aucunes femmes ayans perdu leurs fleurs, ou que iamais ne leur ont coulé, degenerēt en nature virille, & sont appelees hommasses, par ce qu'elles sont robustes, audacieuses & superbes, & ont la voix d'homme, & deuiennent velues & barbues, à raison que ce sang qu'elles perdēt chacun mois est retenu, par consequent plus fortes: ce qui est prouué par Hip-


6. des Epi.
sect. 8.

pocrates, disant qu'en Abdere Phaëtusa, femme de Pytheas, au commencement qu'elle fut mariee porta enfans, mais quelque temps après, son mari étant exilé pour quelque delict, perdit ses fleurs, à raison de quoy luy suruindrent des douleurs & rougeurs aux articles : Et cela luy étant suruenue son corps se changea en homme, deuenant velue, & barbue, sa voix étant rude & aspre: puis il adiouste. Le semblable aussy aduint en Thaso, à Namysius femme de Gorgippus.

Les signes & pronosticq que les menstrues sont retenuës, & les maladies & accidens qui en aduiennent.

CHAP.

CHAP. LX.

 VAND les mois sont retenus par obstructiō des venes et arteres, qui sont à la matrice & col d'icelle, dediees à expulser tel sang, alors il se faict plusieurs maladies & accidens, comme suffocation de matrice, dont nous auons parlé cy dessus, les māmelles de la femme deuiēnt enflées & dures, & les parties genitales: ausſy douleur de teste, defaillance de cœur, & ſouuent palpitiō d'iceluy, inflammation à la matrice, fièvre, aposteme, chancre, digēſtion debile, naufēe, vomiffement (comme aux femmes groſſes, dont plusieurs le cuidēt eſtre) hydropisie: dauantage aucunes ont vne strangurie, c'eſt adire, ne pouuans faire leur vrine que goutte à goutte, ausſy difficulté de reſpirer, triſteſſe ſans cauſe

raisonnable, manie, principalement quād
les mois sont retenus (ou la semence, cō-
me nous auons dict) quelques vnes de-
uiennent podagriques, la couleur du vi-
sage liuide, bouffie, & difforme, pareil-
lement tout le corps, appetit perdu, phti-
sie, epilepsie, paralisie, apoplexie : &
outre tout cela un insatiable appetit de
venus, parce que toutes les parties de la
matrice sont titilees & esmues du sang
si putresiant qui est retenu. Or ces cho-
ses aduiennent principalement à celles
qui sont oisies, & qui viuent copieu-
sément de viandes, multipliant &
eschauffant le sang, & qui ont faict ces-
sation du coït, & d'enfanter, aussy
estans coutumierement avec les hom-
mes : desquels m'aux, lors qu'il y en a
quelcun ia present, ou prest de s'engen-
drer, il leur faut aider à prouoquer leurs
menstrues, par les choses propres & de-
diees

diees à ce faire, comme nous declarerons bien tost. Or à la femme grosse, combien que ses mois luy soient longuement supprimés, toutesfos iamaïs ne luy apportēt tel accident (ou c'est bien rarement) parce que de la plus pure partie d'iceux l'enfant en est nourry en la matrice, & le reste qui est plus gros, & non guere corrompu si garde pour supporter l'enfant & aider à l'expulser hors quand l'heure est venue d'enfanter, qui se faict par une grande prouidence de Dieu, & de nature. Les femmes qui conçoient ne sont tant subiectes aux maladies de la matrice que celles qui ne conçoient, parce que la femme estant grosse, ses vaisseaux se remplissent, puis après se purgent mieux de leurs menstres. Quelquefois il s'engendre des vens en la matrice, qui l'enflent & durcissent, & les fleurs sont retenües, de façon que la

Pronostic.

Hippocr. aux lib. des maladies qui aduenient aux femmes.

Aristot en ses
problemès.

femme pense estre grosse & ne l'est pas.

La femme aiant son flux a l'apetit perdu, & mange peu, par ce qu'en ce temps là, nature pene & trauaille plus à ietter ses menstres qu'à digerer l'aliment, & si elle mangeoit comme de coustume, la viande ne pourroit estre digeree, à ceste cause nature prudente en toutes ses actions abhorre les viandes, ausy la

Nature est prudente en toutes ses actions

femme aiant ses fleurs a la couleur palle, par ce que durant tel flux, la chaleur naturelle se retire des parties exterieures aux interieures, pour aider à expeller tel flux, laquelle absente de ceste chaleur naturelle cause la couleur palle.

Des moiens pour prouoquer le
flux menstrual aux femmes.

CHAP.

CHAP. LXI.

LA supression des menstrues est une disposition procedante, premierement de repletion, parquoy pour sa cure demande euacuation de la matiere qui faict la repletion, & se fera en vacuant le sang, ouurant les venes saphenes : mais ou il y auroit fort grande plenitude en tout le corps, faudroit premierement ouurir celles des bras, à fin de n'en attirer trop à la matrice, qui seroit cause y faire plus grande obstruction: pareillement l'applicatiõ des sangsues au col de la matrice est utile, ausy pessaires, principalement au femmes & non aux filles : onguens, linimens, emplastres, huilles, cataplasmes aposés au col de la matrice, ligatures, frictions aux cuisses & aux iambes, ventouses appliquees prés les aines, & sus le plat

des cuiffes , clifteres , parfuns pris per embotum , faiçts de choses aromatiques, fomentations, sternutations, equitation, sauter, cheminer, & autre grand exercice: auſſy ſur tout la compagnee de leurs maris, ſ'ils ne ſont maleficiés. Les herbes & autres choses qui prouoquent les mois , vt folia & flores ipericonis, endiuia, cichor. radices fœniculi, asparagi, brufci, petroſel. berula, baſilic. meliſſa, bethonica, alia, cepe, criſta marina, cortex caſſia fiſtula, calament. orig. pulg. artemiſia , tymus , hiſſop. ſaluia maiorana, roſmar. marrubium, ruta, ſabina, tintimallus, crocus, agaricus, flores ſambuci, baccar. laur. hedera, ſcammo. cantarid. piret. euphor. Les aromatiques ſont ammo. cinam. ioncus odorat. calamus aromat. cyperus , gingiber, nux moſcat. gariophill. galanga, piper, cubeb. amb. moſc. ſpica nardi, & autres:

tres : & de toutes ces choses on en peut faire bouillons, bolus, potus, pillules, opiates, sirops, apozemes, desquelles choses on aura recours au docteur Medecin: toutefois ie te donneray cet exemple d'apozeme, pour ce qu'il est fort expérimenté. \mathcal{V} folior. & flor. dyptami. an. $\overline{\text{p}}\text{ij}$, pinpinel. $\overline{\text{m}}\text{ss}$, omnium capill. an. $\overline{\text{p}}\text{i}$, arthemis. maior. tymi, origa. an. $\overline{\text{m}}\text{ss}$, rad. rubeæ maior. petrors. fœnicul. an. $\overline{\text{z}}\text{iss}$, rad. pæomiæ bistort. an. $\overline{\text{z}}\text{ss}$, seminis cicer. rubeor. pæoni. fœnicul. an. $\overline{\text{z}}\text{ss}$, fiat decoct. in aq. suffi. ad $\overline{\text{t}}\text{bi}$, addend. cinamo. $\overline{\text{z}}\text{ij}$, in collat. dissol. syrup. de arthemis. & hyssop. an. $\overline{\text{z}}\text{iss}$, diarb. albat. $\overline{\text{z}}\text{i}$, passentur per manicam hippo. cum $\overline{\text{z}}\text{ij}$, nucleor. daet. cap. $\overline{\text{z}}\text{iiij}$, pro dos. mane. Aussi on en peut faire baings, parfuns, fomentatiõs, iniections, onguents, linimens, pessaires, suppositoires, noüets, & autres. Exem-

Les baings sudorifiques aident à faire couler les mois.

ple d'un pessaire, prenés galbanum, ammoniac. & autres semblables remolitifs, lesquels seront mis en paste avec un pillon dans un mortier chaud, & en formés pessaires, lesquels seront oincts d'huile de iasmin, ou d'euphorbe, ou de fiel de bœuf, ou de ius d'armoise, & d'autres herbes, qui auront vertu de prouoquer les mois, mistionecs avec scammonee mise en poudre, & serot lesdicts pessaires de longueur de six doigts, plus ou moins selon la corpulence de la femme, & de grosseur d'un gros ponce, & enuelopés en linge cler tissu, & seront attachés, (& principalement les nouets) avec fil, à fin qu'on les puisse retirer aisément lors qu'on en voudra remettre d'autres. On en pourra pareillemēt faire de miel cuit, y adioustant des poudres propres, comme scammonee & euphorbe: & icy notteras que si les mois sont
suppri-

supprimés par la closture de l'orifice de la matrice, ou par inflammation, ou autre mauuaise disposition, il faut remedier à tels vices deuant que venir aux remedes qui prouoquēt les mois, car autrement on redoubleroit l'inflammatio, y attirant d'auantage de sang: Et sil y a quelque excroissance de chair, ou callosité faicte par plaie ou vlcere, qui bouche le col de la matrice, ou quelque membrane nee à la bouche d'icelle, ou à l'orifice de son col, il faudra premierement oster les callosités, Et couper les membranes.

Les signes que les mois veulent couller.

CHAP. LXII.

LA femme aura les mammelles grosses & endurcies: ausſy est titillee & incitee à venus, par

ce que le sang est lors eschauffé & de-
 uient acré, & se putresie s'il n'est eua-
 cué à heure deüie: Ausy toutes les par-
 ties genitalles sont eschauffées & tume-
 fies: toutefois si la matiere des fleurs est
 froide, elle n'apete venus, & ne s'y dele-
 cte, & sent en sa matrice stupeur, avec
 un decoulement d'aquosités blafardes:
 & si l'humeur coleric domine, la cou-
 leur dudit flux sera iaune: & si c'est le
 sang, sera rubiconde & vermeille: aus-
 sy si c'est la melancholie sera gros, noir,
 & plombin. Les filles qui sont au qua-
 torziesme an leurs fleurs commencent
 à sortir, autres à treze, les autres à dou-
 ze: Alors leurs tetins se grossissent poi-
 gnent & demangent, & la voix se mue
 plus grosse, & sont incitees à venus, &
 ont douleur aux lombes, & aux parties
 genitales, semblablement à la teste, avec
 vomissement de cholere, ou de phlegme,

Les signes que
 les fleurs com-
 mencent à sor-
 tir aux filles.

ou tous les deux ensemble: & le sang de leurs fleurs est semblable à la laveur d'une chair sanglante, parce qu'il est encore indigeste, & non cuit, à cause de leur tendre ieunesse, et partāt est sereux, aqueux, & blaffart: & lors qu'elles sont iameres & capables d'un mari, depuis qu'on attend trop à les marier, encore qu'elles rendent leurs fleurs en leurs tēps, on void toutefois qu'elles sont tourmentees grieuement d'une defaillance de cœur, & suffocatiō de matrice, principalement quand elles deuiēnent amoureuses, & sentent une chaleur en leurs parties genitales, qui leur demangēt, tissent & chatouillent, qui leur cause de ietter leur semence elles seules, laquelle demeurāt aux vaisseaux spermatiques, ou en la matrice, se corrompt & se tourne en venin (comme auons dict) dou prouiet qu'il s'esleue des vapeurs putre-

dineuses aux parties nobles, & en la masse sanguinaire qui altere le sang, & faict qu'elles ont vn battement & de faillance de cœur, gemisent, & sousspirent, à cause que la faculté expultrice est incitée à ietter hors ceste semence superflue, & corrompue, & sont pensives & chagrineuses, & fort degoutees, ne pouuans dormir, aians la couleur palle, & iaunastre, bassanee, bouffie, & tout le corps semblablement, de sorte qu'elles ressemblent pluſtoſt mortes que viues, & ſouuent meurent hidropiques, & languissantes, ou maniaques: Dont pour obuier à tels accidēs, ie conseille aux parens & amis de la fille, estant en aage & maturité, qu'ils la marient à vn homme qui ayt de quoy paier, à fin qu'il n'abuse les marchans, & estant ainsy mariee reprendra sa couleur viue & naturelle, & le tainct clair,

Les remedes
qu'auons cy
deuāt descla-
rés luy seront
aussy fais.

clair, poli, & delicat, & son corps retournera entierement en sa bonne habitude. Les filles vilageoises n'ont poinct ces accidents, ou bien rarement, à raison qu'elles n'ont les obiects, & muguets, comme celles des villes, & ausy qu'elles ne mangent & boyuent semblables viâdes, tant en quâtité qu'en qualité: ioint pareillement qu'elles trauaillent beaucoup, qui leur faict oublier le desir des hōmes, & encor le cas aduenant qu'elles eussent retention de leur semence, le bon air & le grād trauail assidu qu'elles prennent consomme & tarit ceste matiere spermatique, corrompue & venimeuse, tant par sueur que par insensible transpiration. Que diraige plus, cest qu'il se trouue des filles si succulentes, qui abondent grandement en sang, lequel regorge aux mammelles, & se cōuertit en laict & le peuuent faire rayer

f

Apho. 32. 5.

Lib. 12. de subtilitate.

comme font les nourrices , à cause que les mammelles ont une vertu lactifian-
 te, ce qui se peut prouuer par Hippocr.
 qui dict que si la femme n'est point
 grosse, & n'a point enfanté a du laiët,
 c'est signe que ses mois sont supprimés:
 & sur le commentaire de cet apho. Gal.
 dict, pource que les glandules des mam-
 melles estans exangues & blanches cõ-
 uertissent ce sang menstruel qui y regor-
 ge, en humeur semblable à elles en cou-
 leur. Icy ne sera hors de propos dire que
 Cardan dict auoir veu à Genes vng
 nommé Anthoine Buse aagé de trente
 ans , lequel auoit du laiët en ses mam-
 melles assés suffisamment pour nourrir
 vng enfant, & ne couloit pas seulement,
 mais le faisoit rayer ainsy que faict vne
 nourrice de ses mammelles : parquoy ne
 faut pas tousiours conclurre qu'une fil-
 le ayant du laiët aux mammelles soit
 grosse,

grosse, ou qu'elle ait enfanté, veu qu'un homme ausſy en peut bien auoir. Or maintenant nous retournerons à nostre propos, & dirons que pendant que les femmes ont leur flux sentēt le corps pesant & malaisé, aucunes iettent beaucoup de sang, les autres peu, selon leur temperature, & les alimens dont elles sont nourries, & l'exercice qu'elles font, & pareillement selon leur aage. Celles qui les ont coutumierement en petite quantité, se sont les grasses, à cause qu'elles ont les venes estroictes, & par consequent peu de sang, lequel s'emploie à la gresse, (cōme auōs dict si dessus): A peu de femmes leurs purgations s'esmeuuent tous les mois sans y faillir, mais à plusieurs il se faict intermission: Celles qui ont leur flux tout à la fois, à sçauoir, six ou sept iours suiuan, sont plus heureuses, & se portent mieux que celles à

Pronostic.

qui il vient peu à peu, & à plusieurs iours.

Les accidens qui viennent au flux de sang menstrual immodéré.

CHAP. LXIII.

SONT appetit perdu, toute concoction debile, & refrigeratio de tout le corps, & les vertus prosternees, decolloration, & amaigrissement, enflures aux iambes, hidropisie, fieure ectique, defaillance de cœur, conuulsiō, spasme, quelquefois la mort biē soudaine : Si le flux est faict par humeur chaud & acre, sera fœtide & de mauuaise odeur, & couleur, estant tousiours accompagné d'une fieure, & souvent vlceres aux genciues, & autres parties de la bouche: la langue sera aride

de & seche, pour les vapeurs putrides & malignes qui montent en haut, & pour ces causes faut y prevoir par les moiens qui s'ensuiuent. Les menstrues fluent aux femmes par les venes & arteres, n'aissans des vaisseaux spermaticques, finissans leur orifice dedâs le fond & costés d'icelle, mais aux vierges & femmes grosses (si l'enfant est sain) leurs mois fluent par les venes & arteres, qui des vaisseaux des cuisses & iambes se reiettent & ramifient au col de la matrice: Aussy quand le sang peche en quantité, ou qualité, ou tous deux ensemble, ou par coït excessif, ou par ce que la verge virille est trop enorme en grandeur & grosseur, ou par l'imbecilité de la vertu retentrice des vaisseaux, & la force de l'expultrice: Quelquefois aussy ledict flux excessif vient après un enfantemēt, coulant des cotiledons,

ou orifices des vaisseaux ou estoit attaché l'arrirefais contre les parois de la matrice: Dauantage autrefois vient du col de la matrice, pour auoir esté trop violement dilaté à l'issue de l'enfantement, de façon que telles venes & arteres ont esté par tel effort dilacerees & rompues. Or tel flux ce cognoistra (s'il vient de la matrice) parce qu'il sera plus gros & plus noir, & qu'il sort par trombes, & caillons, & s'il vient du col d'icelle, il viendra autrement: Tel flux vient ausſy par une crise, lequel ne faut promptement retreindre, n'y pareillemēt quand il y en a trop grande abondance.

Les signes
pour cognoi-
stre de qu'elle
part sort le
sang.

Les moyens d'arrester le flux
menstrual excessif.

CHAP.

CHAP. LXIII.

PREMIEREMENT par la maniere de viure, à sçauoir manger & boire alimens qui ont vertu d'engrossir & espesir le sang: car tout ainsy que ledict flux est continué & augmenté par choses chaudes & de ténüe substance, ausy est il arresté par choses froides, stiptiques, grosses & astringentes, comme sont, orge mondé cuit avec ris, gigo-teaux de veau, trumeaux de beuf, pieds de mouton, de veau, chapons cuits avec ozeille, pour pied, vergeust de grain, laictue, renoïce, plâtin, bourse de pasteur, suc de prunelles, la sommité de ronces, espine vinette, sumac, & autres semblables: si on ne peut trouuer de l'un on prendra de l'autre. La corne de cerf bruslee & lauee, donnée à boire avec

A limens propres à estancher vn flux de sang excessif.

eau astringente est propre pour arrester ledict flux, ensemble le flux de ventre, sil y en auoit: ausſy sang de drago, terre selle, bol fin, pierre aimatiste, coral, subtilement puluerisès, & donnés à boire avec les eaus astringentes ou ferrees. On peut donner sallades d'oranges, citrons, limons, avec sucre & eau rose, pareillement est vne chose singuliere boullir du laict ferré avec acier, puis cuit avec farine de fourment, ou amidon, ou d'orge, ou de feues, ou de ris: Pareillement coings, cormes, neffles, & cornoilles: le boire sera eau cuitte & ferree par plusieurs fois, puis mixtionnee avec sirops, comme de roses seches, aceteux, de grenade, mirtille, de coings, ou vieille conserue de rose. Il faut euiter le vin, si les vertus le peuuent porter & la coutume, & encor faut il qu'il soit petit, gros, & astringent, & trempé en eau ferree, sur
tout

Le boire.

tout faut euitier le coït : aufsy le tranail, la defcente des degrés, les dānces, par ce que non feulement elles efmeuent le fang, mais aufsy l'atirent en bas: femblablement le courroux & l'air chaud: & partant en eſté la chambre ſera rectifiée par choſes froides , le dormir long & profond eſt ſalubre , par ce qu'au dormir la chaleur & le fang ſe retirent au centre de noſtre corps: aufsy par ſection de venes aux bras , application de ventouſes ſous les mammelles, & à coſté du nombril , ſans oublier pareillement les frictions & ligatures douloureuſes faites aux parties ſuperieures.

Le dormir eſt ſalubre pour le flux de ſāg.

Les remedes particuliers qu'on doit appliquer en la matrice pour eſtancher le flux de ſang immodéré.

CHAP. LXV.



Onguent.

On peut appliquer onguets,
iniections & pessaires: Ex-
emple d'un onguent, ℞ o-
lei mastich. & mirt. an.

℥ ij, succi rosar. rubrar. ℥ i, pul. mast.

℥ ij, nucum cupressi, olibani, mirtill. an.

℥ ij, bol. arme. terr. sigill. an. ℥ ss, cera

alb. q. suff. fiat vng. ad usum. Exem-

ple d'une iniection qu'on iettera en la

matrice, ℞ aq. plantag. & rosar. aq.

burs. past. & centinod. an. ℥ ss, cortic.

querc. nuc. cupres. gall. non maturar.

an. ℥ ij, berber. sumac, balaust. alum.

roch. an. ℥ i, fiat decoct. de laquelle en

sera faicte iniection avec une assés gros-

se seringue, tenant bone quantité d'inie-

ctio, come tu peux voir par ceste figure,

laquelle a en son extremité un bouton,

craignāt de blesser les parois du col de la

matrice.

Se-

Iniection.

Seringne propre pour
faire iniection à la
matrice.




*Les coings cuits sous
la braise incorporés avec
poudre de mirtils & bol
armene, appliqués dans
le col de la matrice profi-
tent grandemēt. Exem-
ple d'ung pessaire, ℞* Pessaire.
*pul. gall. immatur. com-
bust. et in aceto extinct.
ʒ ij, armo. ʒ ss, sang
draco. pulu. radic. sim-
phit. sumac, mast. succi
accac. cornu cerui vsti,
coloph. mirr. scorïæ ferr.
an. ʒ i, camph. ʒ ij, mi-
sce & incorpor. omnia
simul cū succo centinod.
semperui. solani, hiosqui.*

Le flux sera
cogneu par
erosion si l
coule goutte
a goutte.

nenuph. plantag. an. quantum suff. fiat pessar. l'on doit pareillement faire application de choses froides par dehors sus les reins, cuissés, et autour des parties genitales, comme oxicrat, onguët rosart, & autres semblables. Or si le flux venoit par erosion, & que la matiere d'iceluy eust ulceré le col de la matrice, on appliquera laiët d'anesse avec orge mōdé, ou mussylages astringens, comme psillij, cidonior. gommi tragagant. & arab. & autres semblables.

Du flux muliebre.

CHAPIT. LXVI.

 *UTRE le flux naturel il s'en faict un autre appelé flux muliebre, qui est à d'aucunes femmes une lōgue & continuelle distillation, & quasi sans*

si sans douleur, qui vient de la matrice, & par icelle s'expurge l'abondance des superfluités de tout le corps, ainsy que quelquefois se faict par les reins: & aux autres il se faict par intervalle, & est tel flux fort douloureux, & principalement lors que la matrice est ulceree, ausy quelquefois la matrice n'estant point ulceree. Or ce dict flux est different de la purgation menstruelle, par ce qu'en la purgation menstruale le sang en peu de iours flue, autant comme il en doibt estre vidé, mais en flux muliebrique le sang qui en sort est corrompu, & de couleur quelquefois rouge, qui est une sanie de sang mesme, & quelquefois se-reux & liuide, autrefois blanc, & espais comme un coulis d'orge mondé, causé le plus souvent de sang phlegmatique. Qui soit vray, tel flux aduient plus communément aux femmes phlegma-

La difference
du flux mu-
liebre au flux
menstrual.

Fleurs blanches.

tiques, & qui ont la chair mollassé qu'aux autres, & est nommé d'elles fleurs blanches: Or la matiere de tels flux sera cogneüe par la couleur, comme si c'est cholere, ou pituite, ou melancholie, les linges seront taincts de l'humeur qui abonde en iceluy, & si c'est sang pur, faut estimer que tel flux vient par erosion, ou par debilitatiõ des vaisseaux de la matrice, ou de ceux de son col.

Causes des fleurs blanches.

CHAP. LXVII.

DES causes des fleurs blanches viennent souuent par la debilitation de la concoction de l'estomach, ou de tout le corps, & de grande tristesse, ou pour auoir usé trop de viandes crues & phlegmatiques: L'euacuation de ces fleurs,

fleurs, combien qu'elles soient blanches, conserue le corps en santé, pourueu qu'iceluy soit moderé, à sçauoir qui ne soit trop grand n'y trop petit, & n'aye nulle acrimonie: tel flux engendre debilitatiō Pronostic. et l'assitude vniuerselle de tout le corps, couleur palle, l'apetit abatu, atrophie, ou amaigrissement, tristesse, qui ne se peut appaiser pour la vergongne du decoulement d'un tel flux, tumeurs œdémateuses aux iambes, & faict à d'aucunes descendre la matrice en bas, ce que nous auons par cideuāt appelé precipitation de la matrice. Tel flux empesche la conception, par ce qu'il corrompt la semence, ou la contraint de sortir en s'escoulant: ausy quelquefois acquiert vne acrimonie pour auoir demeuré cinq ou six mois sans estre euacué, lequel s'apostume au corps de la matrice ou au col d'icelle, & acquiert

Hippocrat. au
liure de la na-
ture de l'enfant

pourriture, laquelle est souvent ietee hors, qui cause vlcères putrides & chancres. A aucunes femmes se font apostemes aux aines & hanches, qui est souvent cause de leur mort, & le plus souvent pour ne s'estre montrees & declarees aux Medecins & Chirurgiens en temps oportun, pour honte & vergongne qu'elles ont à montrer leur mal.

Lib. des mala-
dies de la ma-
trice.

A ceste cause Montanus recite ceste histoire, que quelquefois fut appelé d'une noble damoiselle d'Italie, laquelle auoit des fleurs blanches, & ayant cogneu son mal luy ordōna qu'elle se fist seringuer, & deterger sa matrice, ce qu'ayant entendu ladicte damoiselle, tomba en syn-

Les femmes
hôteuses sont
souuēt causes
de leur mort.

*cope, & pria son mary de non iamais l'appeler, & partant les maladies de la matrice sont difficiles à cognoistre & difficiles à curer, car la matrice estant debile reçoit la plus grand part des su-
per-*

perfluités de tout le corps.

Cure du flux muliebtre.

CHAP. LXVIII.

AV flux muliebtre rouge, il faut seigner & faire les autres choses qui ont esté declarees pour arrester le flux menstrual: & au blanc, ou d'autre couleur, faut purger par remedes propres, comme s'il est causé de cholere, par medicamens propres à icelle, & ainsy des autres humeurs. Les remedes seront changés & diuersifiés selon la cause d'iceluy flux, lequel faut laisser couler quelque temps à fin que la matrice, & tout le corps se purge des humeurs superabondans. Les baings alumineux & sulphurés, ou bitumineux, ou ferrés sont propres à celuy qui est causé de pi-

Baigns artificiels.

tuite, ou en lieu d'iceux faut faire vne decoction d'herbes chaudes aromatiques, & desiccatiues, de laquelle sera faict baing, iettant dedās plusieurs pierres & caillous ardans. Il se faut bien garder d'arrester trop tost tels flux par medicamens repercussifs & astringens, de peur de faire reuoy de ceste matiere au foye, qui seroit cause d'hydropisie, ou quelque fiebure, ou aposteme, ou malladie au cerueau, ou chācre à la matrice, ou autres accidents, dont après les choses vniuerselles duement faictes on vsera de remedes qui auront puissance d'astraindre, nettoyer & secher la matrice, & le col d'icelle, avec iniections, pessaires, parfuns, & autres. Exemple d'une decoction & iniection deterſiue & desiccatiue, ℞ fol. absinth. agrimon. centinod. burs. pastor. an. m̄ ss, buliant simul, & fiat decoct. in qua dissol. mel-
lis ros.

Iniection deterſiue.

lis ros. ʒ ij, aloës, mirr. salis nitri, an. ʒ i,
 & fiat iniection. La femme sera située
 en un liçt auquel sera un matelas, &
 quelque oreiller sous ses fesses, en sorte
 que le col de la matrice soit eslevé en
 haut : & après avoir faict l'iniection,
 pour la faire demeurer quelque temps,
 on fera croiser les cuisses & iambes de
 la malade, les serrant l'une contre l'autre,
 & flechies vers les fesses, & si on
 veut plus astringre & secher, on adiou-
 tera chose propre à ce faire, comme suc-
 cus accaciæ, gall. virid. cortex granat.
 alumen. roch. vitriolum roman. boullis
 en eau de mareschal, & vin noir &
 austere : On peut semblablement faire
 des pessaires ayans semblable vertu. Or
 si les matieres qui sortent de la matrice
 sont fort fœtides & puantes, & de mau-
 vaise couleur, elles signifient qu'il y a ul-
 cere putride; alors on doit user de reme-


Situation de
 la femme à
 fin qu'elle re-
 tiene l'inie-
 ction dans sa
 matrice.

des qui ont puissance de corriger tel vice, comme *Aegiptiac* (duquel i'ay faict mention en mon traicté des harquebusades) dissout en l'essine ou vin noir, & faire toute autre chose necessaire en tel cas. Davantage aucunes bonnes dames disent qu'elles ont leurs fleurs blanches (qui est vne gonorrhée ou chaude pisse) iettans grande quantité de matiere purulante, comme au flux muliebres, auxquelles le Chirurgien, outre les autres susdicts remedes leur pourra aider: & s'il cognoit que ledict flux, ou ulceres feussent causees de la verolle, alors faudroit faire suer & bauer ladicte dame, ou autrement ne pourroit guerir: Pareillement sera posé en sa matrice cet instrument en forme de pessaire, aiant certains petis trous en son extremité, à fin que les matieres s'escoulent, & n'acquierent acrimonie, & que la matrice soit

*soit un peu euentilee , & aucunement
refroidie par le benefice d'un ressort qui
le tient ouuert , duquel tu vois ici le
portraict.*

Pessaire d'argent pour euentil-
ler la matrice.

t iij



Des hemorrhoïdes qui naissent
au col de la matrice.

CHAP. LXIX.



DAVANTAGE il y a des
hemorrhoïdes qui naissent au
col de la matrice, cōme il se
faict au siege, qui sont cōme
especes de varices, desquelles sort aucu-
nefois grande quantité de sang, avec u-
ne eau rousse & fœtide : Aucunes sont
de couleur rouge, semblable à meures,
& pour ce sont nommees morilles: d'au-
tres à un grain de raisin qu'on nomme
vualles: autres à une verrue, nommee
aussy pour ceste cause verrucalles: ainsy
selon la diuersité de forme les antiens
leur ont imposé le nom: Aucunes sont
fort grosses & apparentes, les autres
sont petites & occultes, cachees au pro-

Varices, se font
des venes gros-
ses, dilatees.

fond du col de la matrice . Semblablement il se faict des verrues quelque fois aux bors du col de la matrice: Aucunes sont larges & esleuees en petites tumeurs, & sont nommees humorales, non seulement parce qu'elles sont esleuees en tumeur comme une meure, mais ausſy qu'elles sont cōposees de plusieurs petites eminences, comme une meure de

Acrochodon
espece de verrue.

ses grains . Acrochodon est une autre espece de verrue avec eminence calleuse, qui a sa racine gresle, & la teste grosse, de façõ qu'on diroit estre un neud de corde pendante à un fillet. Monsieur

Mōsieur d'Ale-
champs en
sa Chirurgie
Françoise.

d'Alechamps en sa Chirurgie Françoise escript estre appelees des Arabes verrues botoralles: il y en a une autre espe-

Thymus, vne
espece de verrue.

ce nommee thymus, par ce qu'elle ressemble à fleur de thim, aiant eminences tuberculeuses, avec asperités, creuassées par dessus: aucunes sont grandes, autres

petites


petites, & par interualle iettent beaucoup de sang, principalement après la compagnee d'homme, ou que la femme chemine, ou faict autre grand exercice. Il y en a de toutes ces especes qui sont malignes, ausquelles ne faut que palier de peur qu'elles ne tournent en chancre, & telles sont douloureuses au toucher, parce qu'elles sont procrees d'humeur maling, aucuns les appellent ficus, & la populace le fil S. Fiacre, auquel ne faut attêter nulle cure fors la paliatine.


Curation des verrues faictes au col de la matrice. CH. LXX.



ELLES qui seront trouuees au col de la matrice, & ne seront malignes, il les conuient lier & couper, & celles qui seront profondément, on metra le speculum matricis dedans le col de la matrice, à fin qu'on les puisse voir & toucher.

Diuers portraiçts de spec. matric.






A demonstre la vis qui le clost & ouvre.

B B B les branches qui doiuent estre de longueur de huit à neuf doigts.

Ils doibuent estre de grandeur, & longueur selon l'aage de la femme: & lors que tu voudras appliquer l'un d'iceux, feras situer la femme en telle faço comme nous auons dict cy dessus à l'extraction de l'enfant mort, duquel ie t'ay baillé le portraict: or celles qui se pourront lier, se feront par cet instrument.

Figure

Figure d'un instrument propre à
lier les verrues au col de la ma-
trice.



Has excellente
pour ôter les
verrues.

A montre un anneau dont sa partie
superieure est vn peu caue. B vn fillet
double, lequel s'insere dedans la cavit 
superieure dudict anneau, & se serre
par le moien d'un neud coullant. C vn
fil de fer dedans lequel ledict fillet pas-
se pour estre serr  lors qu'on aura pris
les choses supercroissantes, et demeurera
ledict fillet dans le col de la matrice, &
sera reserr  de iour   autre tant que la
verruie sera tombee, donc pour leur cure
seront liees, coupees, & cauterisees,  
fin de leur oster leur racine, & qu'elles
ne repullulent, ce qui se fera avec huile
de vitriol, ou eau forte des Alchemi-
stes, ou de capitel dont nous faisons nos
cauterres potentiels. Aussy ceste eau a
grande puissance de les consumer &
dessecher iusques   leur racine,   a-
quar. plantag.   vi, virid. ar.   ij, alum.
roch.   iij, salis communis   iij. vitriol.
roma.

Eau excell te
pour oster les
verrues.

roma. & sublimat. an. 3 lb, omnia simul terantur & buliant, & se gardera on que telle chose caustique & brulante ne touche qu'au lieu qu'on veut emputer: s'il y auoit quelque vlcere, on y remedira comme a esté dict. Quelque personnage m'a affirmé que la bousee de bœuf chaudemēt appliquee, y adioutāt des fueilles ou poudres de sauinier, faict mourir les verrues qui sont au col de la matrice: à l'epreuue.

Des ragadies ou condilomes.

CHAPITRE LXXI.

RAGADIES sont vlceres creuassees, faictes d'un humeur acre & salé, qui faict quelquefois contraction & stricture du col de la matrice, comme l'on void qu'un parchemin se

Condilomes
sont enuies
ces ragadies.

serre & gredille lors qu'on le met trop près du feu, en sorte que souvent on n'y scauroit mettre qu'à grand difficulté le bout du doigt: ce mal ne vient seulement au col de la matrice, mais au siege & à la bouche, qui empesche le malade les ouvrir, parler, & mascher, & souvent on est contraint de faire section. Pour la curation il faut euitier les medicamēs acres, mais faut amollir & fort humecter la partie avec fomentations, liniments, cataplasmes, emplastres, & y mettre souvent le *speculum matricis*, & pessaires, à fin d'agrandir & dilater ce qui est trop dur & serré, puis faire cicatrice aux ulceres creuassees. Condilomes sont eminences ridees, qui sont mesmes les rugosités du col de la matrice, ou les muscles du siege, auxquels il y a plusieurs replis serrés les vngs contre les autres, principalement lors qu'elles sont enflam-

Condilomes
sont eminences
ridees.

enflammees & endurcies . On les cognoit à la veüe & au toucher du doigt : Les remedes froids & relaxans sont bons, comme huile d'œufs & de semence de lin, de chacun deux onces battues longuement en vn mortier de plomb, & de ce en soit appliqué dessus : s'il y auoit inflammation, on y adiousterà vng peu de camphre , & fera on autres que le Chirurgien verra estre necessaires.

Du prurit de la matrice.

CHAPIT. LXXII.

SO V V E N T il se faict vn prurit ou demange son au col de la matrice, principalement aux femmes agees, qui leur donne grand tourment , & y portent souuent la main pour se gratter & frotter, qui les garde de reposer. De

puis n'aguères, une femme étant vexee de ce mal me pria luy enseigner quelque remede, & me dict qu'elle estoit souuēt contrainte d'y mettre des cendres du foyer pour esteindre ce prurit: ie luy enseigné qu'elle fist des iniections d'AEgiptiac dissout en eaue marine, & autrefois en lessive, & ausy qu'elle apliquast pessaires ou grosses tantes, faictes d'estoupes imbues en ladicte iniection, & par ce moyen certains iours après en fut totalement guerie: Ledit prurit vient ausy souuent au scroton & autour du siege des viels hommes, qui prouient d'une pituite salee, & alors que tel humeur tombe aux œils, les malades sont en grand peine. Je proteste auoir veu une vieille femme vexee de ce mal, laquelle pour luy seder sa demangeon l'auoit & frottoit ses œils de vinaigre le plus fort qu'elle pouuoit recouurer, &

me

me dict qu'elle n'auoit peu trouuer meilleur remede à son mal que ledict vinaigre: or il ne viēt seulement particulièrement, mais ausſy en tout le corps, accompagné d'une petite gratelle: & pour ſecourir à tels accidens, faut ordonner regime au malade, tendant à froideur & humidité, pareillement il le faut baigner, ſeigner, corneter, avec ſcarifications faictes avec flammettes, deſquelles tu as icy le portraiēt.

Portraict des cornets & flamettes.



Pareillement on doibt faire frotter
 vniuersellement tout le corps de cest on-
 guët, & les faire suer au liët, ℞ axung.
 porc. recent. ℥ i ℥, saponis nigri, vel
 gallic. salis nitri, assat. tartar. staphi-
 sag. an. ʒ ii, sulph. viui ʒ i ℥, acet. ro-
 sat. ʒ iiij, incorporent. omnia simul &
 fiat liniment. secundum artem, duquel
 le corps du malade sera frotté tant de
 fois qu'il sera besoin. On a par plusieurs
 fois expérimenté vnguentum Enu-
 latum cum mercurio, lequel a gran-
 de puissance de guerir le prurit, & se-
 cher les gratelles qui viennent au corps,
 ou en quelque partie d'iceluy : Autres
 vsent de celuy, ℞ Alum. spumæ nitri,
 sulphuris viui an. ʒ vi, staphisagriæ
 ʒ vi, in aceto rosat. omnia dissol. ad-
 dendo butiri recentis q. s. fiat linimentũ
 duquel en soit faict onction.

De la relaxation du gros intestin
qui se faiet aux femmes.

CHAP. LXXIII.



QUELQUES femmes pour s'estre trop efforcees à leurs enfantemēs le gros intestin est relaché, & sort hors, & ceste disposition est fort frequēte aux enfans, qui leur prouient d'un humeur pituiteux, qui abreuve les trois muscles, à sçauoir le sphincter & les deux qui le retirent & tiennēt en hand. Pour la curation le faut premierement lauer & fomentier d'une decoction ou auront bouilli herbes chaudes & resolutiues, comme sauge, rosmarin, lauande, thim, & leur semblable, puis de choses astringentes, comme roses, mirtils, escorce de grenade, noix de cipres, de galles avec peu d'alun: puis on le sinapise, cest
à dire

à dire soupoudre d'une poudre fort subtile faicte de choses astringentes, & nō mordicantes : après sera reduict en son lieu en le poussant au dedans. Pareillement est une chose singuliere prendre une douzanie de limaçons rouges, les mettant dans un pot, & les soupoudrer de sel & alun, de chacun demie once, les remuant dans le pot, & les laisser mourir, & de la liqueur qui demeurera en sera appliqué avec cotton sus l'intestin qui sort dehors: pareillement aucunes femmes ont une grande tumeur au nombril, par ce que le peritoine est relaxé & souuent rompu, au moien de quoy l'omentum, & souuent aussy les intestins y tombent, ou des ventosités: ce qui vient & procede par la trop grande distention du ventre, pour auoir porté enfans, & s'estre grandement espreinte à les mettre hors. Les signes que les inte-

Souuerain remede.

De la relaxation du nombril.

Cause du nombril tumefié.

stins sont descendus, c'est que la tumeur est douloureuse, & lors qu'on presse dessus pour les remettre au dedäs, font bruit & grougoullent comme il se faict aux hernies intestinales: si c'est l'omentum, la tumeur sera molle avec peu de douleur, & lors qu'on le repousse au dedans, ne faict aucun bruit: & si la tumeur est faicte de ventosités & esprits flatulens, elle sera molle, & la pressant fera quelque bruit, & subit retourne: Or si la tumeur est fort grande, elle ne se peut guerir si on ne coupe le peritoine, ainsy qu'on faict aux hernies. J'ay veu de pures femmes aux portes des temples, ausquelles les intestins estoient hors de leur siege de la grosseur d'une bien grosse boulle, neantmoins alloient, beuvoiet, & mangeoint bien, & faisoient toutes autres actions.

De la relaxation & enfleure du
nombril, qui se faiet aux enfans.

CHAP. LXXIIII.



QUELQUEFOIS ad-
vient ausſy aux enfans
nouuellement nés, que leur
nōbril eſt tumefié de groſ-

ſeur d'un œuf : qui procede pour auoir
eſté mal couppé, ou lié, ou pour quelques
humeurs, & acquoſités qui y ſont a-
maſſees, ou de trop crier pour les tran-
chees : Quelquefois auſſy apportent ce-
ſte tumeur du ventre de la mere accom-
pagnée d'une apoſtème, à laquelle ie cō-
ſeille au Chirurgien n'y toucher pour y
faire ouuerture, car eſtant faiete les in-
teſtins ſortent : ce que i'ay veu aduenir
plusieurs fois, & meſmement à l'enfant
de defunct Monsieur de Martigues, le-
quel auoit eſpouſé Madame de Lanal,

qui estoit de la maison de Lotraic: dont le Chirurgien (nommé maistre Pierre de la Roque) fut en grand danger de sa personne, & n'eust esté Monsieur d'Estampes , & mondict sieur de Martigues , les seruiteurs luy eussent couppe la gorge, estimant que la mort estoit suruenue à l'enfant par la faute dudit Chirurgien: Et encore depuis n'agueres telle chose est aduenue à l'enfant de Iehan de Gourmont, tailleur d'histoires, demeurant à l'arbe sec, rue S. Iehan de Latran, en l'uniuersité de Paris, lequel menuoya querir pour faire ouuerture audict ombilic, ce que ie refusé, & luy dy qu'il mourroit bien sans moy : trois iours après l'aposteme se creua d'elle mesme, & les intestins sortirent, dont il mourut.

De la descente des intestins en la bourse des petis enfans, appelee

lee hargne , ou greueure.

C H A P. L X X V.

S O V V E N T les enfans ont des hargnes ou greueures, qui est vne enflure aux aines ou aux bourses, & lors qu'elle n'est qu'en laine, les antiens l'ont appelee boubonocle : & si le boyau dessent en la bourse, enterochele : & si il n'y a que de leau, hidrochele : & si il n'y a que du vent, phisochele : & si c'est l'omentum ou la coiffe, sera appelee epiplocele, ou zirbale. La charneuse est appelee sarcochele, & la variqueuse cirsochele : ces deux icy n'aduiennent point aux petis enfans, mesme ie diray ce mot, qu'il n'y a que deux vrays hargnes, à sçauoir l'intestinale & zirbale, d'autant que la venteuse, aqueuse, & charneuse aduient aux autres parties,

Hargne est ainsi nommée par ce que ceux qui ont tel mal sont hargneux & chagrins pour la douleur qu'ils sentent.

Vallambert au lib. de la maniere de nourrir les enfans.

& partant ne sont dictes vrayment
 hergnes. Celle du boyau vient ou de la
 naissance, ou par accident, & se faict
 par la dilatatiō, ou rompreure de la pro-
 duction du peritoine, lequel a deux
 trous aux deux aines, par lesquels les
 muscles suspensoires des testicules passēt
 avec les vaisseaux spermatiques: &
 quand ces productions du peritoine se
 dilatent ou rompent, lors les intestins
 tombent dedans ceste production, &
 est appelee hernie intestinale. Telle cho-
 se se faict de trop crier, ou tousser, ou
 vomir, & ausy par ce que le peritoine
 en cest aage est fort tendre, humide &
 delié, & partant facile à s'estendre &
 rōpre, et ceux qui l'ont rōpu peu souuent
 guerissent, mais si il est seulement relaché
 ils se peuuent guerir. Les signes pour co-
 gnoistre la hargne intestinale ou zirbale
 sont, que si c'est l'intestin, la douleur sera
 plus

Les signes
 pour cognoi-
 stre les har-
 gnes l'une de
 l'autre.

plus grande que si c'estoit l'omentum,
& plus difficile à reduire, & quand on
leur repoussè dedans on sent un bruit,
comme un gorgoulement, & quel-
quesfois ne se peut reduire, à cause qu'il
y a trop grande quantité de matiere fe-
cale contenue au boyau, qui faiçt que le
boyau ne peut estre reduit & se cognoit
par la tensio et dureté qui y est trouuee,
& alors ne se faut efforcer le repousser
par violence, mais le malade sera posé
dedans le liçt, la teste situee bas, & les
fesses & cuisses hautes, & le laissera on
reposer, mettant dessus un cataplasme
tel qui sensuit, ℞ rad. alth. & lilior.
an. ʒ ij, seminis lini ʒ ℥, fol mal. violar.
& pariet. an. m ℥, coquantur in aqua
communi, postea pistentur & passent.
per setaceum, addend. butiri recent. sine
sale, & olei lilior. an. q. suff. fiat cata-
plas. ad formam pultis satis liquid. &

Bon documēt
au ieune Chi-
rurgien.

luy sera appliqué tout chaud tant sus le petit ventre que sus les bourses : & le lendemain on trouuera l'intestin estre reduit de soymesme, à raison que la matiere fecale a faict son circuit, & est entree en un autre intestin pour estre euacuee hors.

La curation de la hargne des petits enfans.

CHAP. LXXVI.

LA cure de la hargne des petits enfans se fera euitant les baings, & toutes choses qui ramolissent, comme les potages, fruiçt cruds, le trop māger, le crier, la toux, courir, sauter : & sil tombe sans grande quantité de matiere, le Chirurgien estant appelé situera l'enfant la teste en bas, & les fesses esleuees,

nees , & peu à peu de ses deux mains
fera la reduction: après on fomentera la
partie d'une fomentation astringente,
escripte à la precipitation de la matrice:
puis on appliquera ce remede, ℞ præ-
dict. decoctionis, quant. sat. far. hord.
& fabar. an. ℥ i, pul. aloës, mast. mirt.
& sarcoll. an. ℥ ℔, bol. arm. ℥ i, incor-
porent. simul & fiat cataplas. secund.
art. Autre, ℞ emplastr. contra rupt.
desquels remedes le Chirurgien usera à
sa volonté , en bien bendant la partie
avec compresses & braies propres à tel
affaire , & fera on tenir l'enfant dedans
son berceau l'espace de trente ou quarã-
te iours, les fesses un peu esleuees: & sur-
tout on le gardera de crier , & par ces
remedes ie proteste que plusieurs ont esté
gueris, & ay gardé les chasteux de leur
emputer les coiillons, desquels sont fort
frians, pour le l'ucrer qu'ils en reçoient,

& abusent ainsy les peres & meres, leur
 faisans à croire que iamais leurs enfans
 ne peuuent guerir de puis que le boyau
 est tombé en la bourse, qui est vne cho-
 se fauce & mensongere, principalemēt
 lors que le peritoine n'est que relaché &
 non rompu, car les ayant ainsy acontrés
 & tenus le temps que nous auons dict,
 l'enfant qui n'a encore accompli ses trois
 dimentions, en trente ou quarāte iours,
 (pourueu qu'on garde la descente aux
 bourses) le trou du peritoine par lequel
 l'intestin estoit descendu s'apetisse & re-
 trecit, semblablement les intestins gros-
 sissent: & partant la voye estant rendue
 estroicte & le boyau grossi, la hargne se
 guerit. Or pour guerir la greueure vë-
 teuse, Auicenne ordonne deux remedes,
 à scauont la semence d'amœos & la
 graine de lupins: il detrempe la semen-
 ce d'amœos avec blanc d'œuf en forme
 de ca-

Souuent ce
 que le temps
 ne peut faire
 raison le faict.

de cataplasme, & l'aplique dessus, par ce qu'elle eschauffe, dessesche, subtile, ou ure, resout, & dissipe les ventosités, & retrainct avec le blanc d'œuf. L'autre remede, il faict cuire la farine de lupins avec du vin, meslé avec mirrhe, & choses qui astreignent, comme escorce de grenade, noix de galle, & autres semblables, & tels remedes dissoluent & consomment les ventosités : pour telle chose i'ay souuent appliqué l'emplastre de Vigo sine mercurio, ausy l'emplastre de diacalcitheos dissoute en gros vin astringent: encore les deux vrayes hargnes se peuuent guerir par un seul benefice de nature, voire à ceux qui ont accompli leurs troix dimentions, estans en l'aage de quarante ans, & pour le prouuer ie reciteray ceste histoire : C'est qu'un prestre de S. André des ars, nommé maistre Iehan Moret, Epistolier,

chantant l'espistre au dimanche, lequel auoit vne hargne intestinale complete, se retira vers moy me montrāt son mal, en demandant secours, disant sentir vne tresgrande douleur, principalement en chantāt son Epistre, voiāt sa greueure, ie luy dy que veritablement il deuoit mettre vn autre en sa place, ce qu'il fit, priant le curé (pour lors nommé Monsieur le Clerc, Doian de la faculté de Theologie) & les marguilliers d'en cōmettre vn autre en sa place pour chanter l'Epistre, leur declarant son impotence, ce qui luy fut accordé, puis se mit entre mes mains, ou ie luy ordonney plusieurs remedes propres à son mal, luy faisant prendre vn braier, qui porta par l'espace de cinq ou six ans : & vn iour luy demandey comment il se portoit de sa greueure, il me fit responce qu'il ne scauoit plus que c'estoit, & qu'il estoit gueri, ce que iamais ie n'eusse peu croire si ie ne l'eus-

Peusse veu : adonc l'ameney en mon logis, & me monstra ses parties genitales, lesquelles estoient sans vestige d'aucune descente de hargne, dont ie m'esmerueille bien fort comment il auoit peu estre gueri, cognoissant son aage : Et six mois après que l'auois ainsy reuisité, mourut d'une pleuresie, & aiant sceu sa mort, ie m'en allay à la maison dudit Curé, en laquelle il se tenoit, le priant qu'il me permist faire ouuerture du corps dudit Moret, à fin que i'eusse cognoissance quel batiment nature auoit faict en la voye ou les intestins descendoient, ce que volontiers m'accorda: & proteste à mon Dieu que trouuey, autour du trou de la production du peritoine, une substance adipeuse, de la grosseur d'un petit esteuf, infiltree & si fort attachee au trou dudit peritoine, qu'à bien grande difficulté la pouuois detacher sans dilacerer & rompre les parties adiacen-

tes, & voila la cause pourquoy la guérison c'estoit faicte. Et partant iamais ne seray d'avis qu'on coupe les coüillôs aux petis enfans, car leur manqués ils se degenerent en nature feminine, voire i'ose bien dire plus, par ce que les femmes ont les leur, & les hommes les aiant perdus, la voix leur mue, la force & le courage leur defaut, sont timides & honteux, & ont faute de barbe, & iamais ne peuuent plus faire generation. Aux enfans un peu grandelets, & aux femmes & hommes, on leur fera porter des braiers & espaullieres comme il est monsté par ces deux figures.

Figure d'un homme qui auroit rupture des deux costés, & cōme il doit estre bādé, & lié d'un brayer, pour garder que les intestins, ou l'omentū ne descendēt aux bourses: dauantage la figure du brayer, & ligature, appelee espaulliere.



Autre figure d'un homme qui auroit vne rupture d'un seul costé, avec vn braier, auquel faut qu'en l'escussõ y ait trois eminēces, deux en haut & l'autre en bas, & au milieu vne cauité, à fin qu'il ne presse trop sus l'os pubis, & qu'il n'y face douleur. I'ay trouué depuis n'agueres ceste inuention, laquelle me semble meilleure de toutes les autres par cy deuant inuentees, à cause qu'elle prohibe merueilleusement la descente des intestins & omentum.



De la relaxation du gros boyau aux petis enfans.

CHAP. LXXVII.



QUAND le muscle nommé sphincter (qui est autour du siege) est relasché, alors ne peut soustenir le gros boyau, ce qui se faict souuent aux petis enfans, & procede d'une grãde humidité du ventre, tombant audict muscle, laquelle le r'amolist & relache, puis se ranuerse & sort hors du siege, ou pour un grand flux de ventre disenterique. Pour la cure, il le faut garder de trop boire, & manger potages, & fruiçts cruds, & pour les remedes particuliers usera d'une decoction astringente, cōme corticis granat. gall. mirtill. centinod. bursa pastor. sumac, berber. nucis cupres. alum rochæ, sal. communis, boullis
en eau

en eau de mareschal, ou gros vin noir et austere . Puis après la fomentation on reduira l'intestin, l'ayant premierement tout autour oinct d'huile rosart , ou de mirtils, puis on le repoussera au dedans: & si l'enfant ratiocine, lui faut commander, que lors qu'on le remettra, qu'il retire son alaine, & que le Chirurgien le remette peu à peu, avec un linge blanc & delié: & estant reduict, on doit entierement essuier toute l'onctuosité, de peur que par icelle l'intestin ne retombe derechef, puis après on doit metre dedans le fondement, le plus profondement qu'on pourra, de la poudre qu'auons prescript pour la precipitation de la matrice. Puis après on luy mettra une bande au trauers du corps, au dessus des hanches, au milieu de laquelle sera atachee une autre bande, qui passera entre les fesses: & a l'endroit du siege sera mis

une compresse trampee en la decoction
 susdicte astringente, à fin de garder que
 le boyau ne sorte: Et la personne estant
 d'aage, on luy commãdera, lors qu'il ira
 à ses affaires, de mettre le siege entre
 deux ais separés l'un de l'autre (d'un
 ponce, plus ou moins) quoy faisant on
 gardera que l'intestin ne sorte lors que
 le malade va à ses affaires.

A D V E R T I S S E M E N T.

A M I Lecteur pendant que ie
 composois ce liure, ie receus
 vne letre de monf. Ioubert Medec-
 cin du Roy, Docteur regēt en la fa-
 culté de Medecine en l'vniuersité
 de Montpellier, par laquelle, entre
 autres negoces, me prioit affe-
 ctueusement, si encore ie mettois
 la main à la plume pour escrire de
 la Chi-

la Chirurgie , que ie donnasse vn coup de coude à la douleur des dents , ce que i'ay bien voulu faire tant en sa faueur qu'en celle des nouueaux aprantis en Chirurgie.

De la douleur des dents.

CHAP. LXXVIII.



LA douleur des dents est la plus grande & cruelle qui soit entre toutes les douleurs, sans mort, & pour la preuue, ie la laisse à ceux qui en ont esté vexés. I'ay memoire qu'un varlet de chambre de defunct Monseigneur le Connestable me dict , que pour vne extreme douleur de dent qu'il auoit à Chentilly, s'il n'eust eu peur d'estre damné, il se fust ietté par vne fenestre dans

les fossés, & se feust noyé, pour estre exempt de sa douleur: d'auantage me dict qu'en xxiiij. heures il se fait vne aposteme sur la gencine qui se suppura à l'endroit de sa douleur, & peu de iours après sa dent tomba en pieces, qui montre que les dents se peuuent apostumer, & pourrir comme les autres os, ce qu'on voit par ce qu'elles se pertuisent, & corrodent, & par ceste pourriture les vers s'engendrent. La cause d'icelle douleur vient de cause antecedente, ou de primitive: d'antecedente, comme reume & defluxion chaude ou froide, tombât sur icelles, qui remplit l'alueole (c'est à dire le lieu ou elles sont inserées) de façon qu'elle pousse la dent hors, qui faict qu'elles sont souuent auâces en dehors tellement que le malade n'ose, & ne peut nullement mascher dessus pour l'extreme douleur qu'il sent, & la fluxiô faict qu'elles

Cause de la
douleur des
dents.

qu'elles sont relachees, qui cause les faire bransler : & si elles sont corrodees, creuses, & pertuisees iusques à la racine, lors que le malade boit, il luy semble qu'on luy donne vn coup de poinçon dedans.

Les signes pour cognoistre si la douleur est faicte de matiere chaude ou froide.

DE S signes que la cause est chaude, cest que la douleur est aigue & poignante, comme si on met des eguilles dedans, on sent ausy vne grande pulsation à la racine de la dent, & aux temples: pareillement sera cogneue quãd on applique remedes froids qui apaisent la douleur : Les signes que la cause de la douleur est froide, c'est que le malade a grande pesanteur de teste, & iette beaucoup de salive & d'humid-

dités par la bouche, & la douleur s'apaise par remedes chauds : & en ces douleurs ne faut que les barbiers & dentateurs (cest à dire arracheurs de dents) se hastent trop subit les arracher sans le conseil de plus auisés qu'ils ne sont quelquefois.

Cure.

POUR la cure il y a trois intentions: La premiere est ordonner le regime : La seconde purger la matiere antecedēte: La troisiēme application, de remedes particuliers propres à seder ceste extreme douleur. La premiere intention est ordonner le regime sus les six choses non naturelles : La deuxiesme est vacuer la matiere antecedente, comme sil est besoing qu'il soit seigné et purgé, on appellera pour ce faire un docte Medecin: ausy pour diuertir la

tir la fluxiõ on appliquera des ventouses
 derriere le col, et sur les espaules : ausſy
 ſi la matiere eſt chaude, on appliquera
 ſur la genciue, à l'endroit de la douleur, Remedes ſeda-
tifs de dou-
leur en mati-
re chaude.
 des ſanſues pour vacuer la matiere con-
 iointe, & ouurira on les venes de deſ-
 ſous la langue, ce que i'ay faiet par
 pluſieurs fois, & ſedé des douleurs ex-
 tremes, mais au parauant que les apli-
 quer, ie faiſopetisites ſcarificatiõs avec-
 ques vn deſchauffoir de dents: La tier-
 ce intentiõ ſera accõplie en appliquant
 pluſieurs remedes contrarians à la cauſe
 de la douleur, comme ſy la matiere eſt
 chaude, il faut tenir en la bouche
 vin de grenade, avec eau de plantin, & Remede ſou-
uent approu-
ué.
 vn peu de vinaigre boullis avec ro-
 ſes & ſumach, & fleurs de grenades: il
 faut icy noter que les remedes ſedatifs
 de la douleur des dents doibuent eſtre
 de ténüe ſubſtance, à cauſe qu'elles ſont

fort dures, & partant les antiës ont toujours voulu metre du vinaigre, par ce qu'il est incisif & penetratif.

Autre.

PRENE'S roses rouges, sumach, Orge, de chacun une demie poignée, semence de iosquiame conquasée, deux dragmes, de tous les sandants de chacun une dragme, laitue, de la sommité de ronces, morelle, plantin de chacun demie poignée, le tout sera boulli en quatre liures d'eau commune, & un peu de vinaigre, iusques à ce que l'orge se creue, & d'icelle decoction en sera tenu en la bouche un peu tiede.

Autre.

Tel remede ce
de tost la dou
leur.

PRENE'S semence de iosquiame, sendaraca, coriandre, opium, de chacun demie dragme, le tout pisté & incor-

incorporé avec vinaigre, & en soient formés trociques, puis en soit aposé sur la dent douloureuse.

Autre trocique.

RÈNES semence de pourpié, de Biosquiame, coriandre, l'antilles, escorce de sandal citrin, roses rouges, piretre, camphre, de chacun demie dragme, & soient bien pillees ensemble avec fort vinaigre, & soient formés trociques : lors qu'on en vouldra user, on en prendra un ou deux avec eau rose, & en sera froté la genciue, & tenu en la bouche.

Autre remede.

SI les genciues sont relaxees (c'est à dire la chair qui enuironne les dents) faut que le malade se gargarise de choses froides & astringentes, comme oxicrat, auquel on aura faict boullir noix de cipres, mirtilles & un peu d'a-

lun: & si la douleur ne cessoit, faut v-
 ser de narcotiques pour stupefier la gen-
 cive. Exemple, ℞ seminis iosquia. alb.
 opij, camph. papau. alb. an. q. s. coquā-
 tur cum sapa, & soit apliqué sur la
 dent: pareillement sera mis dedans l'o-
 reille ce qui sensuit, ℞ oppij, & cast. an.
 ʒ ℥, distemp. cum oleo rosat. l'ouuerture
 de la vene qui est au derriere de l'o-
 reille cede la douleur, chose par moy sou-
 uent experimentee, ausy un petit em-
 plastre de poix et de mastic posé sur l'ar-
 tere de la temple, du costé de la douleur.

Pour ceder la
 douleur de
 cause froide.

Pour ceder la douleur de cause froide,
 prenés eau de vie, meslee avec une de-
 coction faicte de vin & vinaigre, ros-
 marin, sauge, piretre, & un peu de the-
 riaque, & soit posé sur la dent.

Autre.

PRENE'S armoniac dissout en
 eau

eau de vie, & un peu de sandaraca, de mirrhe, & soit appliqué sus la dent, chose loüee & approuuee de Vigo.

Autre.

Mesué dict que pour ceder la douleur faut tenir des ails pistés en la main du coste de la douleur.

Autre.

POUR une extreme douleur de dents que i'auois, une petite bonne femme me conseilla y metre dessus une gosse d'ails un peu cuite sous les cendres, & la mettre la plus chaude que ie pourrois endurer, ce que ie fy, & tost après ma douleur fut cessée, tellement que depuis ie l'ay practiqué en plusieurs, ou l'on a veu un effaict merueilleux, ausy on en mettra dedans l'oreille.

Experiencia
faicte sur l'au-
theur.

Autre.

℞ rad. piret. ʒ ʒ, mēt. & rut. an. ꝑ i, bulliant in aceto, & d'icelle en sera te-

y ij


nu chaud en la bouche.

Autre.

FAITES fumigation de graines de colloquintes, & de moutarde, & d'ails, receüe par un entonnoir à la dent, du costé de la douleur. Aussi on metra en l'oreille huile de castor, ou de girofle, ou autre tiree par quinte essence. Autre. Soit faict parfū ou sufumigatiō ainsy qui s'ensuit, ℞ rad. pīret. gingib. cinamo. alū. roch. salis communis, nuc. moscat. nuc. cupres. anis. semi. sinap. euphorb. de ces choses en sera pris & faicte decoction en oxicrat, & à la fin sera adiouté un peu d'eau de vie, & en sera receu la vapeur, ou fumee par un entonnoir, aussi en sera faict gargarismes: dauantage en sera mis une goutte ou deux dedans les oreilles avec un peu de coton.

Autre.

ON

 N fera tenir en la bouche du malade du vin, auquel on aura faict boullir semence de iosquiame ou mādra gore. D'auantage prenés racines de tintimal boullues en vin & vinaigre, & d'icelle qu'il en soit teneu en la bouche, ce remede est bien approuué. Lors que les genciuës & les iouës s'enflent au dehors, c'est bon signe, car la douleur cesse, à cause que nature a poussé l'humeur du dedans au dehors: & si on veut faire tomber la dent par pieces, faut prendre laiçt de tintimal, & poudre d'encens incorporés avec vn peu de fleur d'amidon, en faire paste, & en soit enuelopé la dent sans toucher aux autres. Il y a autres vices & accidens qui aduiennent aux dents, à sçauoir quand elles sont relaxees, & qu'elles branslent, d'auantage pourriture, corruption pertuisement, & des vers engendrés en icelles,

congelation & autres. Les dents bran-
sient pour la relaxation des gencives,
qui se faict de cause primitive, comme
cheutte, ou coup, & ausſy par cause an-
tecedente, comme fluxion qui descend
du cerueau, ou par certaines vapeurs es-
leuees de l'estomach, & quelquefois
par faulte de nourriſſemēt, ce qu'on void
aux vieilles gens, pareillement par cor-
rosion de certain humeur acre qui tom-
be aux gencines. Or le branslement qui
vient par secheresse & defect d'alimēt
iamais ne se cure, mais les autres seront
aidés par choses contraires: & premie-
rement le malade euitera de mascher
choses dures, & de trop parler: si le
branslement vient par coups ou cheut-
tes, & si elles sont aucunement hors de
leur place, le Chirurgien les reduira, &
les liera aux autres proches qui sont fer-
mes & entieres, & ne les doit on ache-
uer

uer d'arracher, car elles se peuuent r'asfermir & tenir fermement en leurs alueoles: Ce que i'ay encore depuis n'agueres faict à vn mien voisin & amy nommé Anthoine de la Rue, maistre tailleur d'habis, demeurant au bout du pont S. Michel, lequel receut vn coup de pommeau de dague sus la mandibule inferieure, qui fut cause qu'elle fut entiere-ment fracturée, & trois dents mises & renuersees en la bouche, & presque du tout hors de leurs alueoles, toutefois la fracture de la mandibule fut reduite, & les dents remises en leurs places, & liees & attachees avec vn fil en double, ciré, avec les prochaines: ie luy ordonney viandes qui ne falloit macher, comme pressis, coulis, orge modé, panade, gelee, ius d'eclanche de mouton, & autres semblables: aussi lauemens & gargarismes astringens, & autres choses neces-

Histoire.

saires à la fracture, & ainsy fut gueri, de façon qu'aujourdhuy masche autant bien dessus lesdictes dents, qu'il fit iamaïs, partant le ieune Chirurgien fera le semblable lors qu'il se trouuera à l'endroit. Or posons le faict qu'il y eust vne dent mise du tout hors de sa place par quelque coup, ou par l'imperice de l'arracheur de dents, ou du malade qui luy en auroit faict tirer vne bonne pour vne mauuaise, on la doit promptement remettre droitement en sa place, & la bien lier avecques les autres proches, & par ce moien elle peut reprendre. Vn homme digne d'estre creu, m'à affirmé qu'une Princesse aiant faict arracher vne dent s'en fit remettre subit vne autre d'une sienne damoiselle, laquelle se reprint, & quelque temps après machoit dessus come sus celle qu'elle auoit faict arracher au parauant : cela ayge
ony

ouy dire, mais ie ne l'ay pas veu, & si il est vray il peut bien estre, si le branslement vient par reume distilant du cerueau, ou par vapeurs eleuees de l'estomach, on y remedira par leurs contraires, & ausſy par gargarismes, & opiates faictes de choses astringentes, comme berberis, sumach, nuc. cupressi, alum. rochæ, centinod. ypuris, succi accacia, & leurs semblables: Dauantage le malade tiendra souuēt en sa bouche un peu d'alun de roche, le tournant tantost d'un costé tantost de l'autre.

De la pourriture, erroſiō & pertuisement des dents, & des vers trouués en la racine d'icelles.

L'ERROSION se faict par un humeur aigu & acré, qui les corrode & pertuise, voire souuent, iusques en leurs racines: pour

corriger ceste pourriture (après auoir
faict les choses vniuerselles) on aplique-
ra dedans le trou huille de vitriol , ou
eau fort, ou vn petit cautere actuel, cõ-
me tu vois par ceste figure,




Cautere actuel pour
vne dent creuse.

ou autre plus propre , selon
qu'il sera necessaire: & sil
est besoing (de peur qu'on
touche à autre partie qu'au
lieu que l'on veut cauteri-
ser) on mettra lesdicts cau-
teres avecques vne canule,
à fin de corriger la pourri-
ture & errofion , & faire
mourir les vers: or si le per-
tuis estoit entre les dents,
comme souuent aduient, de
sorte qu'on ne peut appli-
quer

quer nulle des choses susdictes, on lime-

*ra entre
la dēt sai-
ne & cel-
le qui est
pertuisee
tant qu'il
sera be-
soin,*

*Figures
delimes
à limer
les dêts.*



*& sera
faite ou-
verture te
le qui sera
nécessaire
pour ap-*

Pour faire
mourir les
vers.

pliquer les choses susdictes, & prendra on plus sus celle qui est errodee, que sus la saine : Et pour faire mourir les vers faut appliquer choses caustiques, ausy piretre detrampé en vinaigre, ou the-riacque dissout en mesme liqueur : sera ausy appliqué ails, ou ognons, ou un peu d'aloës.

De la stupeur, ou congelation,
ou endormissement des dents.

LA congelation vient pour trop v-
ser des viandes aigres, ou par au-
cunes vapeurs mauuaises, qui montent
de l'estomach en haut, ou pour quelque
defluxion froide tombante du cerueau
dessus les dents, ou pour auoir tenu en la
bouche choses trop froides & narcoti-
ques. Pour la cure, les choses uniuersel-
les faictes, il faut tenir eau de vie ou de
bon vin, auquel on aura faict boullir
sauge,

Cure.

sauge, rosmarin, & autres semblables herbes, clous de girofle, & noix muguet-
te: de laquelle decoction en sera tenu en
la bouche.

De la maniere d'arracher & rom-
pre les dents.

LES dents s'arrachēt pour l'extre-
me rage de douleur qu'on y sent,
ou pour ce qu'elles sont creuses & pour-
ries, qui faict que l'alaine est rendue de
mauvaise odeur, & ausſy qu'icelle
pourriture gaste & altere les autres
dents qui sont saines & entieres: da-
vantage on les arrache quand elles sont
forgettees hors de leur reng, qu'on ap-
pelle ſourdent: on les rompt ausſy à cau-
ſe qu'elles tiennent par trop, à fin d'inſti-
ler quelque choſe en leur racines, ou les
cauteriſer plus aiſément, à fin d'oſter le
ſentiment au nerf qui ſ'inſere en leurs
racines. Les dents ne doibuent eſtre ar-


rachees par grande violence, de peur de luxer & demettre la mandibule inferieure (& non la superieure) de son lieu, ioint que par l'extraction violente on faict grande concussion au cerueau, & aux œils : ausſy ſe faut donner garde de tirer une bonne pour la mauuiſe, car ſouuēt meſme le malade ne la ſcait diſcerner, à cauſe qu'il ſent une ſi extreme douleur en toute la mandibule, qu'il ne peut cognoiſtre celle qui eſt viciee d'entre les autres. On ne les doit arracher tout à coup, de peur de rompre & emporter une partie de la mandibule, ce que i'ay veu par pluſieurs fois, & en ſuruenir de bien grands accidens, comme fièvre, apoſtème, flux de ſang, & par conſequent la mort, & auſſi quelques vns ſont demeurés à iamais aians la bouche torce, ne la pouuant que bien peu ouurir: & partant on ſe doit garder

der de les arracher par violence, principalement lors qu'elles ne branslent aucunement : & d'avantage si elles sont creuses, on doit remplir le pertuis de liege ou de plomb biẽ accommodé, de peur qu'en les serrant elles ne soient froissees & rompuees , & que les racines demeurent.

Les instrumens propres pour arracher & rompre les dents.


CHAP. LXXIX.

PREMIEREMENT deuant qu'arracher les dents il faut que le malade soit assis bas, aiant la teste entre les iambes du detateur, puis qu'il les dechausse profondemẽt d'alentour de leurs alveoles, avec dechausssoirs que tu as icy figurés par A :




& après les auoir dechauffees , si on
 void qu'elles tiennent peu, seront pouf-
 sees & iettees hors avec un pouf-
 soir.

soir , duquel tu as icy la figure mar-
quee par B. Aussi si on cognoit que



la dent ne puisse estre arrachee par le
poussoir, on prendra vn dauiet qui t'est
cy deuant marqué p D, lequel est propre



à rompre la
dent qu'on
veut rom-
pre: Ou bien
on s'aidera
des policans
marqués cy
deuant p CC
et cetuy p E,

Figured'au
tre policā.


selon que le
dentateur se
sera exercé à
tirer des
dents: car ve
ritablement
il faut estre

bien industrieux à l'usage des policans, à cause que si on ne s'en scait bien aider, on ne peut faillir à ietter trois dēts hors la bouche, & laisser la mauuaise & gastee dedās. Qui soit vray, ie veus icy Histoire. reciter vne histoire d'un maistre barbier demeurāt à Orleans, nommé maistre François Louïs, lequel auoit par dessus tous l'honneur de bien arracher vne dent, de façon que tous les samedis plusieurs paisans aians mal aux dents venoient vers luy pour faire arracher leurs dēts, ce qui faisoit fort d'extremēt avec un polican, & lors qu'il en auoit faict le iettoit sus un ais en sa boutique: Or auoit il un seruiteur nouveau, Picart, grand & fort, qui desiroit tirer les dents à la mode de son maistre: arriva ce pendant que ledit François Louïs dinoit un villageois, requerāt qu'on luy arrachast vne dent, ce Picart print

l'instrument de son maistre, & s'essaya faire comme luy, mais en lieu d'oſter la mauuaſe dent au pouure villageois, luy en pouſſa & arracha trois bonnes, & ſentant vne douleur extreme, & voiāt trois dents hors de ſa bouche, commença à crier contre le Picart, lequel pour le faire taire luy dit, qu'il ne diſt mot, & qu'il ne criaſt ſi haut, attendu que ſi le maistre venoit, il luy feroit paier trois dēts, pour vne qu'il luy ſaloit arracher, donc le maistre oyāt tel bruit ſortit hors de table pour ſcauoir la cauſe & raiſon de leur noyſe & conteſtation, mais le poure paſſant redoutant les menaces dū Picard, & encor après auoir enduré telle douleur, qu'on ne luy fiſt paier triplēmēt la peine dudit Picard, ſe tut, n'oſant declarer audit maistre ce beau chef d'œuvre, & ainſy le poure badaut de village ſen alla quitte, & pour vne dent qu'il

qu'il pensoit faire arracher, en r'èporta
trois dās sa bourse, & celle qui luy cau-
soit tout le mal en sa bouche: & partant
ie conseille à ceux qui se voudront faire
arracher les dens, qu'ils aillēt aux vieux
dentateurs, & non aux ieunes, qui
n'auront encore recogneu leurs fautes:
& après qu'on aura arraché les dents,
il faut assés laisser seigner le malade, à
fin que par ce moyen la partie en soit
dechargée, puis le dentateur de ses doigts
comprimera l'endroit de la genciue, le
lieu auquel on aura arraché la dent, tant
d'un costé que d'autre, à fin de reduire
& r'assembler l'alueole qui aura esté
eslargi & quelquefois rompu en tirant
la dent: & après on fera laver la bou-
che au malade avec oxicrat, & si c'est
en temps froid, gardera de s'exposer au
vent de peur qu'il ne se face une nou-
velle fluxion sur les autres dents.


La maniere de remettre des dēts
artificielles.

 *N* peut remettre des dents artifi-
cielles faictes d'iuoire, ou autre
os , qui pourroient estre atachees entre
les autres , lesquelles ne peuuent seruir
que pour orner & à mieux proferer la
parole, dont la figure ne peut bien estre
donnee pour l'incercitude de la grosseur
& longueur , toutefois il faut qu'elles
soient faictes en la façon que tu vois ces
portrais.

Por-

Portrais des dés artificielles pour mettre en lieu d'autres qu'ó aura perdues, principalement au deuãt de la bouche.

De la limosité ou roüilleure des dents , & la maniere de les conseruer.



IL faut après le repas lauer la bouche d'eau & vin, ou eau avec vn peu de vinaigre, semblablement les curer à fin qu'il ne demeure quelque petit reste de viande, laquelle se corrompt en-

tre les dēts, qui faict qu'après elles s'al-
terent & pourrissent, & font que l'a-
laine est de mauuaise odeur : Ausſy il
se concret vne matiere terreſtre, comme
vne roüille ſur icelles, de couleur iauna-
ſtre, qui les corrode comme la roüille le
fer : ce qui aduient par faute de les net-
toier & de ne macher deſſus, dont la
faut oſter par petis inſtrumens propres
à ce faire, puis après ſeront frottees d'un
peu d'eau fort, & eau de vie meſlees en-
ſemble, à fin d'oſter le reſte que les inſtru-
mens n'auroient peu faire. Pour les con-
ſeruer ne faut macher choſes par trop
dures, ni rompre noiaux, ni os, & au-
tres ſemblables : ausſy qu'on ne les cure
ordinairement avec choſe qui les dechauſ-
ſe, & qu'on les frote avec dentiſrices
faicts de racines de guimaulue boullues
en vin blanc & alun de roche, en ſoiēt
ſouuent frottees les dents : ausſy poudre
faicte

faicte d'os de seche, pourcelene, pierre ponce, alun cuit, corne de cerf, & un peu de canelle y est souverainemēt bonne, aucūns ne prennēt que de la crouste de pain bruslee mise en poudre. Eau pour blanchir les dents fort excellente, ℞ sal. armo. & gemm. an. ℥ i, alum. roch. ℥ ℔, addendo parum vini, & fiat distillatio, de laquelle vserēs, & en froterēs vos dents.

Poudre propre à nettoier & blanchir les dents.

De la douleur des dents des petis enfans.

LE S petis enfans ont ausſy une grande douleur de dents, principalement quand elles percēt les genciuēs, & sortent hors, ce qui aduient cōmunément à sept mois, quelquefois pluſtoſt ou plus tart: & quand ells veulent ſortir leur font douleur avec un prurit, demāgeſon & picqueure aux genciuēs, aians

Signes.

souuent flux de ventre, fièvre, epilepsie, spasme, qui leur cause quelquefois la mort. Les signes qu'elles veulent sortir, la nourrice sent la bouche de l'enfant plus chaude que de coustume, & les gencives leur sont enflees, & les ioïes, ausy sont plus criars, & ne peuuent dormir: le prurit & demangeson se cognoist, par ce que l'enfant met souuent les doigts en la bouche pour les cuider frotter, ausy il baue: La douleur vient à raison que la pointe de la dent rompt & perce la chair de la gencive, qui est sensible & tendre. Pour remedier à la douleur faut que la nourrice soit traittee comme si elle auoit la fièvre, & ne fera teter l'enfant tant que de coutume, mais luy fera boire iulep Alexandrin, ou sirop de limons, ou de grenade, avec eau boullie, pour luy estancher son extreme soif, & le r'afreschir: Toutefois il
ne luy

Cure.

ne luy faut rien mettre en la bouche qui soit actuellement froid , de peur du retardement d'icelles , mais choses douces & lenitives, à fin de dilater la gencive, & appaiser la douleur, parquoy la nourrice frottera souuēt de ses doigts les gencives d'huile d'amādes douces, ou beurre frais, ou miel & succe, ou de mucilages , de semence de psilium, guimaue, coings, extrais en decoction de paritoire : & par dehors on appliquera vn cataplasme de farine d'orge , l'aict, huile rosart, moyeuſs d'œuſs : d'auantage on luy frottera souuent les gencives de ceruelle de lieure roſtie, ou boullie, à cause qu'elle relache & a vne proprieté occulte d'aider à faire sortir les dents , ce que l'experience montre, auſſy est propre la ceruelle de cochon. On leur baille volontiers vn hochet, auquel eſt enchaſſé vne dent de loup , dont ils en frottent

leurs gencives, & par ce moyen l'enfant prent plaisir, d'autant que lors que ses dents veulent sortir, sent un prurit & demange son aux gencives, & les frottant, les rarifient & subtilient, & pour ceste cause les dents sortent plustost. Les nourrices font adiouster au hochet de petites sonnettes, qui leur seruēt de iouet & de folastrier avec eux.

FIN DV PREMIER LIVRE.



SECOND LI- VRE, DES MONSTRES ET PRODIGES.

PREFACE.



MONSTRES sont choses qui apparoissent contre le cours de nature (& sont le plus souuēt signes de quelque malheur à aduenir) comme un enfant qui naist avec un seul bras , un autre qui aura deux testes, & autres membres. Prodiges se sont choses qui viennent du tout contre nature, comme une femme qui enfante-
ra un serpent, ou un chie, ou autre chose du tout contre nature, (comme nous

Le nom des
auteurs, du
testmoinage
desquels j'ay
recueilly ses
monstres &
prodiges.

montreròs cy après) lesquels i'ay recueillis avec les figures, de plusieurs auteurs: comme des histoires prodigieuses de Pierre Boitueau, & de Claude Desserant, de S. Paul, S. Augustin, Esdras le Prophete, & des ancies Philosophes: Assauoir d'Hippocrates, Galien, Empedocles, Aristote, Plin, Licostene, & autres qui seront cottés selon les lieux qu'ils ont escript.

Des causes des monstres.

CHAPITRE I.



LES causes des monstres sont plusieurs. La premiere est, à la gloire de DIEU. La secòde, à son ire. La troisieme, à la trop grande quantité de semence. La

qua-

quatriesme , à la trop petite quantité.

La cinquiesme, par imagination.

La sixiesme, pour l'angustie ou petitesse de la matrice . La septiesme, par ce que

la mere estant grosse , s'est tenue trop longuement assise les cuisses croisees , ou serrees contre le ventre . La huictiesme,

par cheute, ou coups donnés contre le ventre de la mere estant grosse d'enfant. La neufiesme, par maladies hereditaires, ou accidentales. La dixiesme,

par pourriture ou corruption . L'onzieme, par mixtion, ou meslange de semence. La douzieme, par l'artifice des

meschans belistres de lostiere . La trezieme, par les demons ou diables,

Il y a d'autres causes q̃ ie laisse pour le present, par ce qu'oultre toutes les raisons humaines l'ō n'ē peut dōner de suffisantes & probables: Come, pourquoy sont faiets ceux qui n'ont qu'un seul

œil au milieu du front, ou le nombril, ou une corne à la teste, ou le foye s'en dessus dessous: Autres naissent aians pieds de griffon, comme les oiseaux, & certains monstres qui s'engendrent dans la mer, bref une infinité d'autres, qui seroient trop longs à d'escripre.

- Exemple de la gloire de Dieu.

CHAPITRE II.

Capit. 9.



Il est montré en S. Iehan d'un homme qui estoit nay auengle, lequel aiât recouuert la veüe, par la grace de IESVSCHRIST, fut interrogué de ses Disciples, si le peché de luy, ou de ses parens estoit cause qu'il eust esté ainsi produit auengle dès le iour de sa natiuité. Et IESVSCHRIST leur respondit, que luy, ne son pere, ne sa mere n'a-

n'auoient peché, mais que c'estoit à fin
que les œuvres de DIEU fussent ma-
gnifiées en luy.

Exemple de l'ire de Dieu.

CHAPIT. III.

IL est certain que le plus
souuent ces creatures mon-
streuses procedent du in-
gement, & malediction de
Dieu, lequel permet que les peres &
meres produisent telles abominations,
au desordre qu'ils font en la copulatio,
comme bestes brutes, ou leurs appetits
les guide, sans respecter le temps, ou
autres loix ordonnees de Dieu, & de
nature, comme il est escript par Esdras
le Prophete, que les femmes souillees de
sang menstrual engendreront des mon-
stres.

Esdras le Pro-
phete.

Exemple de la trop grande quantité de semence.

CHAP. I I I I.



Comment &
pourquoy na-
ture produict
des monstres.

Chap. 8. de la
cité de Dieu.

HIPPOCRATES sus la generation des monstres dict, que sil y a trop grande abondance de matiere, il se fera grand nombre de portees, ou un enfant monstreux, aiant des parties superflues & inutiles, comme deux testes, quatre bras, quatre iambes, six doigts es mains, & pieds, ou autres choses: au contraire si la semence defaut en quantité, quelque membre defaudra, comme n'auoir qu'une main, point de bras ou de pieds, ou autre partie defaillāte. S. Augustin dict, que de son temps il nasquit en Orient un enfant qui auoit le ventre en haut, toutes les parties superieures doubles, & les inferieures simples, car il auoit

il auoit deux testes, & quatre œils, deux poitrines & quatre mains, & le reste comme un autre homme, lequel vesquit assés long temps. Calius Rhodiginus a Chap. 3. 24. li. escript au libure de ses antiques leçons, auoir veu en Italie deux monstres, l'un masle & l'autre femelle, leurs corps bien parfaicts & proportionnés, reste la duplication de la teste: le masle mourut peu de iours après sa natiuité, & la femelle vesquit vingt cinq ans après, qui est contre le naturel des monstres, lesquels ordinairement ne viuent gueres, pource qu'ils se deplaisent, & melancholient de se voir ainsy en opprobre de tout le monde, si bien que leur vie est briefue. Or il faut icy noter que Licostene, grãd Philosophe, escript vne chose merueilleuse de ce monstre, car reserué la duplication de la teste, nature ny auoir riẽ obmis: Ces deux testes, dict il, auoient mes-

Les monstres
ne viuent
gueres.


me desir de boire & de manger, & dormir, & la parolle semblable, comme estoient mesmes toutes leurs affections: Ceste fille alloit d'huis en huis chercher sa vie, & luy donnoit on volotiers pour la nouveauté d'un si estrange, & nouveau spectacle: toutefois elle fut dechassée à la longue de la duché de Bauiere, par ce (disoit on) qu'elle pourroit gaster le fruiet des femmes grosses, pour l'aprehension, & idees qui pourroient demeurer en la vertu imaginatiue, de la figure de ceste creature ainsy monstreuse.

Figure d'une fille ayant deux testes.



L'An de grace 1475. furent engendrees pareillement en Italie, en la ville de Veronne, deux filles conioinctes par les reins, depuis les espaules iusques aux fesses, & par ce que leurs parens estoient pures, elles furent portees par plusieurs villes d'Italie pour amasser argent du peuple, qui estoit fort ardent de voir ce nouveau spectacle de nature.

Figures de deux filles gemelles, ioinctes & vnies par les parties posterieures.





L'An 1530. on a veu vn homme en ceste ville de Paris , du vêtre duquel sortoit vn autre homme bien formé de tous ses membres, reserué la teste, & cet homme estoit aagé de quarante ans , ou enuiron , & portoit ainsy ce corps entre ses bras , avec si grande merueille, que le monde s'assembloit à grandes troupes pour le voir , la figure duquel t'est icy representee au vif.

Figure d'un homme , du ventre duquel sortoit un autre homme.






Figure d'un castor dans son ter-
restre.

L'An 1546. à Paris une femme grosse de six mois enfanta un enfant aiant deux testes, deux bras, & quatre iambes, lequel i'ouury, & n'y trouuei qu'un cœur, partāt l'on peut dire n'estre qu'un enfant. Aristote en ses problemes dict, qu'un monstre aiant deux corps ioincts ensemble, sil est trouué auoir deux cœurs, on peut veritablement dire estre deux hommes ou femmes, autrement sil est trouué n'auoir qu'un cœur avec deux corps, ce n'est qu'un : la cause de ce monstre pouuoit estre, faute de matiere en quātité, ou vice de la matrice qui estoit trop petite, par ce que nature voulant creer deux enfans, la trouuāt trop estroicte, se trouue manque, de faço que la semence est contraincte & serree, lors ce coagule en un globe, adonc se forment deux enfans ainsy ioincts & unis ensemble.


Figure d'un enfant aiant deux te-

stes, deux bras, & quatre iambes.




L'An 1569. une femme de Tours
 enfanta deux enfans gêmeaus, n'aians
 qu'une teste, lesquels s'etre-embrassoiet,
 & me furent donnés secs, & Anatho-
 misés par maistre René Ciret, maistre
 Barbier & Chirurgien, duquel le renō
 est assés celebre par tout le país de Tou-
 raine, sans que ie luy donne autre lou-
 ange.

Figure de deux Gêmeaus, n'aiās
 qu'une seule teste.



Ces deux mō-
 stres derniers
 sont en la pos-
 sessiō de l'au-
 teur.



Sebastien Munster escript auoir veu deux filles l'an 1495. au mois de Septembre, près de Wormes, au village nommé Bristant, lesquelles auoient les corps entiers & bien formés, mais leurs frons s'entretenoient ensemble, sans que par artifice humain on les peust separer, & s'entretochoiēt presque du nés, & vesquirent iusques à dix ans, & lors en mourut vne, laquelle fut ostee & separée de l'autre, & celle qui demeura viue mourut tost après, quand on separa sa seur morte d'avec elle, pour la plaie qu'elle auoit receüe de la separation, la figure desquelles t'est icy representee.

Figure de deux filles gemelles,
lesquelles s'entretenoient par
le front.




L'An 1570. le 20. iour de Iuillet, à Paris, rue des grauelliers, à l'enseigne de la cloche, n'asquirent ces deux enfans, ainsy figurés, remarqués par les Chirurgiens pour masle & femelle, & furent baptisés à S. Nicolas des Champs, & nommés Louïs & Louïse: leur pere auoit nom Pierre Germain, dict petit Dieu, de son mestier aide à maçon, & leur mere Matthee Pernelle.


**Figures de deux enfans mōstreux
n'agueres nais à Paris.**



Le lundi dixiesme iour de Iuillet, mil cinq cēs soixāte & douze, en la ville de Pont de see, près Angers, naquirēt deux enfans femelles, lesquels vesquirent demie heure, & receurent baptesme : & estoient bien formés, fors qu’une main senestre n’auoit seulement que quatre doigts, & estoient conioincts ensemble en leurs parties anterieures, à scauoir depuis le menton iusques à l’ombilic, & n’auoient qu’un seul nombril, & un seul cœur, le foye diuisé en quatre lobes, dont le portrait t’est icy despeint.

Figure de deux filles ioinctes ensemble, n’agueres naiees en la ville du Pont de see près Angers.





*Celius Rhodiginus chap. 3. liure
24. de ses antiques leçons escript, qu'il
fut produit vn monstre à Ferrare, en
Italie, l'an de grace 1540. le 19. iour de
Mars, lequel lors qu'il fut enfanté e-
stoit ausſy grand & bien formé, que
ſil euſt eu quatre mois accomplis, aiant
le ſexe feminin & masculin, & deux
teſtes, l'une de maſle, & l'autre de fe-
melle.*

Portrait d'un monstre aiant deux
teſtes, l'une de maſle, & l'autre
de femelle.





*Iouianus Pontanus escript que l'an
1529. le 9. de Ianuier, il fut veu en
Allemagne vn enfant masle aiant qua-
tre bras & quatre iambes, duquel tu
vois icy le portrait.*

Figure d'vn enfant masle aiant
quatre bras & quatre iambes.





François Roy
de France.


*La mesme annce que le grand Roy
François fit la paix avec les Souisses,
nasquit en Allemagne vn monstre aiāt
vne teste au milieu du ventre: Iceluy
vesquit iusques en l'aage d'homme: icel-
le teste prenoit aliment comme l'au-
tre.*

Figure d'un homme aiant vne
teste au milieu du ventre.



Le dernier iour de Feurier 1572. en la paroisse de Viaban, sur le chemin de Paris à Chartres, au lieu des petites Bordes, vne femme nommée Cipriane Girande, femme de Iacques Marchât laboureur, accoucha de ce monstre, lequel vesquit iusques au dimanche ensuiuant.

Portraiçt de deux enfans bien mōstreux, auxquels vn seul sexe feminin se manifeste.





L'An 1572. le landemain de pasques, à Mets en Lorraine, dans l'hostellerie du S. Esprit, une truie cochonna un cochon ayant huiet iambes, quatre oreilles, la teste d'un vray chien, les derrieres des corps separés iusques à l'estomach, & depuis ioincts en un, ayant deux l'angues situees au trauers de la genulle, & auoit quatre grâdes dêts, scauoir est autât dessus que dessous, de chacun costé: leurs sexes estoient mal distingués, de façõ qu'õ ne pouuoit cognoistre s'il estoiet males ou femelles, il n'auoient chacun qu'un conduict sous la cœüe, la figure duquel t'est demõstree par ce portrait, lequel puis n'agueres m'a esté enuoyé par Monsieur Bourgeois, docteur en Medecine, homme de bon scauoir, & bien experimenté en icelle, demeurant en ladicte ville de Mets.

Figure d'un cochon monstreux,
nay

may à Mets en Lorraine.



Cant de la
p. 116
d. 116.

En la manie
de la femme
n'est moué
que de l'âme
cand.

A cet endroict me semble n'estre hors de propos d'escrire des femmes qui portent plusieurs enfans d'une ventree.

CHAPITRE V.

LE commun accouchement des femmes est un enfant, toutefois on void (comme le nombre des femmes est grand) qu'elles accouchent de deux, que l'on appelle gemeaux, ou bessons : il y en a qui en accouchent de trois, quatre, cinq, six, & plus. Empedocles dict que lors qu'il y a grande quantité de semence il se faict pluralité d'enfans. Autres comme les stoiques disent, qu'ils s'engendrēt pour ce qu'en la matrice il y a plusieurs cellules, separations, & cauités, & quand la semence est esbandue en icelles, il se fait plusieurs enfans, toutefois cela est faux, car en la matrice de la fem-

Cause de la pluralité d'enfans.

En la matrice de la femme n'est trouué qu'une seule cauité.

la femme il ne se trouue qu'une seule cavité: mais aux bestes, comme chienes, pourceaux, & autres, il y a plusieurs cellules, qui est cause qu'elles portēt plusieurs petits. Aristote escript que la femme ne pouvoit enfanter d'une portee plus de cinq enfans, toutefois, dict il, cela est advenu en la servante d'Auguste Cæsar, que d'une portee elle accoucha de cinq enfans, lesquels (nō plus que la mere) ne vesquirent que bien peu de temps.

L'An 1554. à Berne en Souisse, la femme de Jehan Gelinger Docteur en-fanta pareillemēt d'une portee cinq enfans, trois masles, & deux femelles. Albucasis dict estre certain d'une dame qui en auoit fait sept, & d'une autre laquelle s'estant blessée auorta de quinze bien formés. Pline Chapitre 11. lib. 7. fait mention d'une qui en auorta de douze: le mesme authœur dit que l'on a

Vne femme à
chasque por-
tee accou-
cha de cinq
enfans.

Dalechamps
en sa Chirur-
gie Françoisse.

veu à Peloponense vne femme, qui ac-
coucha quatrefois, & à chasque portee
de cinq enfans, desquels la plusspart ves-
quirent. Dalechamps en sa Chirurgie
Françoisse, chap. 74. fueill. 448. dict,
qu'un gentilhomme, nommé Bonna-
uenture Sauelli, Siennois, luy a affermé
qu'une sienne esclauue, qu'il entretenoit,
fit sept enfans d'une portee, desquels
quatre furent baptizés. Et de nostre
tēps, entre Chartre & Maine, Paroif-
se de Seaux, près Chābellay, il y a vne
maison de gentillhōme appelee, la Mal-
demere, duquel sa femme eut la premie-
re annee qu'elle fut mariee deux enfas,
la seconde annee trois, la troisiēme qua-
tre, la quatriēme cinq, la cinquiesme
six, dont elle mourut: il y a un desdicts
six enfans viuant, qui est aujourd'hui
sieur dudict lieu de la Maldemere. A
beaufort en vallee, país d'Aniou, vne ieu-
ne fem-

ne femme, fille de feu Macé Chaunier accoucha d'un enfant, & huit ou dix iours après d'un autre, qui luy fallut tirer hors le vêtre, dont elle en mourut. *Martinus Cromerus* au lib. xi. de l'histoire de Polongne escript, qu'en la prouince de Crauonie, Marguerite dame fort vertueuse & de grande & ancienne maison, femme d'un Comte dict *Virboslaüs*, accoucha le xxvi. iour de Ianuier 1269. d'une ventree de trêtesix enfans vifs.

Vne femme peut accoucher aujourdhui d'vng enfant, & dix iours après d'vng autre.

Chose admirable d'vne femme porter 36. enfans vifs.

Franciscus Picus Mirandula escript, qu'une femme en Italie nommée *Dorothea*, accoucha en deux fois de vingt enfans, à scauoir de neuf en vne fois, & d'onze à l'autre, laquelle portant vn si grand fardeau estoit si grosse, qu'elle sustentoit son ventre, qui luy descendoit iusques aux genoils, avecques vne grande bande, qui luy prenoit au col, & aux espauls, comme tu vois par ce portrait.

Figure d'une femme grosse de
plusieurs enfans.



A Paris au cimetiere S. Innocent, au neuſiesme pillier de la grand galerie, près le S. Eſprit, eſt attaché vn epitaphe en pierre, tel qui ſenſuit. Cy giſt honorable femme Yollande Bailli, iadis femme de honorable homme Denys Capel, procureur en Chatelet à Paris, qui trepaſſa le xvij. Avril, l'an mil vc. & xiiij. le. 88. de ſon aage, le xliij. de ſon veuſuage, laquelle a veu, ou a peu voir deuant ſon treſpas 295. enfans iſſus d'elle.

Il m'a ſemblé bon qu'à cet endroit ie deſcriue des hermafrodites, à cauſe qu'ils viennent auſſy de ſuperabondance de matiere.

Des hermafrodites ou androgenes, c'eſt à dire qu'en vn meſme corps eſt trouué deux ſexes.

CHAPIT. XI.

Description
de Hermafro-
dites.

Androgenes
en Grce signi-
fie homme
& femme, &
femme & hō-
me.



LE S hermafrodites ou an-
drogenes , sont des en-
fans qui naissent avec
double membre genital,
l'un masculin, l'autre féminin, & par-
tāt sont appelés en nostre langue Fran-
çoise, hommes & femmes. Or quant à
la cause, c'est que la femme fournit au-
tant de semence que l'homme proportio-
nément, & pour ce la vertu formatrice
qui tousiours tache à faire son sembla-
ble , à scauoir de la matiere masculine
un masle, & de la feminine une femel-
le , faict qu'en un mesme corps est trou-
ué quelquefois les deux sexes, nommés
hermafrodites, desquels il y en a quatre
differēces, à scauoir hermafrodite masle,
c'est celuy qui a le sexe de l'homme par-
faict, & qui peut engendrer , & a au
peri-

perineum (qui est le lieu entre le *scrotum* , & le siege) un trou en forme de vulue, toute fois non penetrant au dedãs du corps , & d'iceluy ne sort urine ne semence . La femme hermafrodite, outre sa vulue qui est bien composee , par laquelle iette la semence & ses mois , a un membre viril , situẽ au dessus de la dicte vulue, prẽs le penil, sans prepuce, mais une peau deliee , laquelle ne se peult renuerfer, ne retourner , & sans aucune erection, & d'iceluy n'en sort urine n'y semence, & ne s'y trouue vestige de *scrotum*, ne testicules. Les hermafrodites qui ne sont ne l'un ne l'autre, sont ceux qui sont du tout forclos , & exens de generation , & leurs sexes du tout imparfaicts , & sont situẽs à costẽ l'un de l'autre, & quelque fois l'un dessus, & l'autre dessous , & ne s'en peuuent servir que pour ietter l'urine. Her-

Perineũ c'est
à dire l'entre-
fession.

*mafrodites masles & femelles, se sont
 ceux qui ont les deux sexes biẽ formés,
 & s'en peuuent aider & seruir à la ge-
 neration: & à ceux cy les loix antiennes
 & modernes leur ont fait, & font en-
 core eslire duquel sexe ils veulent user,
 avec deffence, sur peine de perdre la vie,
 de ne se seruir que de celuy duquel ils
 auront faict election, pour les inconue-
 niens qui en pourroiet aduenir: Car au-
 cuns en ont abusé de telle sorte, que par
 un usage mutuel & reciproque, pail-
 lardoient de l'un & de l'autre sexe, tã-
 tost d'homme, tantost de femme, à cause
 qu'ils auoient nature d'homme & fem-
 me proportionne à tel acte, voire comme
 d'escrip^t Aristote, leur tetin droict est
 ainsy comme celuy d'un homme, & le
 gauche comme celuy d'une femme. Les
 Medecins & Chirurgiens bien experts
 & aduisés, peuuent cognoistre si les her-
 mafro-*

Les loix pour
 les hermafro-
 dites ont esté
 obseruees des
 antiés & mo-
 dernes.

Les Medecins
 & Chirurgiẽs
 peuuent discer-
 ner des herma-
 frodites.

*mafrodites sont plus aptes à tenir & u-
ser de l'un que de l'autre sexe , ou des
deux, ou du tout rien : Et telle chose se
cognoistra aux parties genitales , à sca-
voir si le sexe féminin est propre en ses
dimentions , pour recevoir la verge vi-
rille, & si par iceluy fluët les menstrues:
pareillement par le visage, & si les che-
veux sont deliés ou gros, si la parolle est
virille, ou gresle , si les tetins sont sem-
blables à ceux des hommes ou des fem-
mes, semblablement si toute l'abitude du
corps est robuste , ou efeminee , s'ils sont
hardis ou craintifs , & autres actions
semblables aux masles, ou aux femelles.*

*Et quant aux parties genitales qui ap-
partienent à l'homme , faut examiner
& voir s'il y a grãde quãtité de poil au
penil & autour du siege, car cõmunémẽt
& quasi tousiours , les femmes n'en ont
point au siege: Semblablement faut bien*

*Les femmes
n'õt point de
poil au siege*


examiner si la verge virille est bien proportionnée en grosseur & longueur, & si elle se dresse, & d'icelle sort semence, & par cet examen on pourra véritablement discerner, & cognoistre l'hermafrodite masle, ou femelle, ou qu'ils seront l'un & l'autre, ou qu'ils ne seront n'y l'un n'y l'autre: Et si le sexe de l'hermafrodite tient plus de l'homme que de la femme, doibt estre appelé homme, & ainssy sera il de la femme: Et si l'hermafrodite tient autant de l'un que de l'autre, il sera appelé hermafrodite homme, & femme, comme tu peus voir par ce portrait.


Portrait d'un hermafrodite homme & femme.



L'An 1486. on vit naistre au Palatinat, assés près de Heidelberg, en un bourg nommé Rorbarchie, deux enfans gemeaux s'entretenans, & ioints ensemble dos à dos, qui estoient hermafrodites, comme on les peut voir par ce portrait.


Figure de deux enfans gemeaux hermafrodites, estās ioints dos à dos les vns avec les autres.





*Le iour que les Venitiens & Gene-
uois furent reconciliés, nasquit en Italie
(comme raconte Boistueau) un monstre
qui auoit quatre bras & quatre iam-
bes, & n'auoit qu'une teste, avec la pro-
portion gardee en tout le reste du corps,
& fut baptisé, & vesquit quelque tēps
après. Iacques Ruef, Chirurgien de Su-
rich, escript en auoir veu un semblable;
lequel auoit deux natures de femme, cō-
me tu peus voir par ce portrait.*


Figure d'un monstre aiant qua-
tre bras & quatre pieds, & deux
natures de femme.





L'An de grace 1512. fut nay vn monstre à Rauenne, aiāt vne corne posée sus le chef, et en lieu de ses bras, deux aisles, avec vn seul pied de griffon : à la ioincture du genoil y auoit vn œil, aiant les deux sexes à costé l'un de l'autre, comme tu vois par ceste figure.

Figure d'un monstre aiant face humaine, & vn pied de griffon, estant hermafrodite, aiant des aisles d'oiseau, & vne corne à la teste.





D'abondant au commencement du col de la matrice est l'entree & fente de la nature de la femme, que les Latins appellent *Pecten*: Et les bords qui sont reuetus de poil, en Grec se nommēt *Pterigomata*, comme si nous disions aïsles, ou lebres du couronnement de la femme, & entre icelles sont deux excroissances de chair musculeuse une de chacun costé, qui couurent l'issue du conduict de l'urine, & se serrent après que la femme a pissé: Les Grecs les appellent nimphes, qui pendent & sortent à aucunes femmes hors le col de leur matrice, & salongent & acourcissent, comme faict la creste d'un cocq d'inde, principalemēt lors qu'elles desirent le coït, & que leurs maris les veulent aprocher, se dressent comme la verge virille, tellement qu'elles s'en ioient avec les autres femmes: Aussi les rendent fort honteuses & diffor-

Chose fort
monstreuse
qui se faict
aux nimphes
d'aucunes
femmes.

difformes estans veües nues, & à telles femmes on leur doit lier, & couper ce qui est superflu, par ce qu'elles en peuvent abuser, se donnant le Chirurgien garde de n'inciser trop profondément, de peur d'un grand flux de sang, ou de couper le col de la vessie, car puis après ne pourroient tenir leur urine, mais decouleroit goutte à goutte.

Histoires memorables de certaines femmes qui sont degene-
rees en hommes.

CHAPIT. VII.



AMATVS Lusitanus recite, qu'il y eut en un bourg nommé Esgucina, une fille appelee, Marie Pateca, laquelle estant sus le temps que les filles cōmencent à auoir leurs fleurs,

D

au lieu desdictes fleurs , luy sortit un membre viril , lequel estoit caché dedās auparauant, & ainsy de femelle deuint masle, parquoy elle fut vestue de robes d'homme , & son nom de Marie fut changé en Emanuel : iceluy trafiqua long temps és indes , ou aiant acquis grand bruit, & grandes richesses, à son retour se maria , toutefois cet autheur ne scait s'il eut enfans, vray est dict il, qu'il demeura tousiours sans barbe.

Autre histoire semblable.

ANTHOINE Loqueneux receueur des tailles pour le Roy a S. Quentin, n'agueres m'a asirmé auoir veu un homme au logis du Cigne, à Reins, l'an soixante, lequel semblablement on auoit estimé estre fille , iusques en l'aage de quatorze ans , mais se ioüant & folatrant, estât couché avec une chambriere, ses

re, ses parties genitales d'homme se vindrent à deueloper: le pere & la mere cognoisans estre tel, luy firent par authorité de l'eglise chāger le nom de Iehenne à Iehan, & luy furēt baillés habillemēs d'homme. Ausſy dernièrement eſtant à la ſuite du Roy, à Vitri le François, en Champagne, ie y vy vn certain Paſtre nommé Germain Garnier, aucuns le nōmoient Germain Marie, par ce qu'eſtant fille eſtoit appellé Marie, ieune hōme, de taille moienne, trappe, & bien amasſé, portant barbe rouſſe, aſſés eſpoiffe, lequel iuſques au quinziēſme an de ſon aage auoit eſté tenu pour fille, attendu qu'en luy ne ſe monſtroit aucune marque de virilité, & meſmes qu'il ſe tenoit avec les filles en habit de femme. Or aiant attainſt l'aage ſuſdict, comme il eſtoit aux champs, & pourſuiuoit aſſés viuemēt ſes pourceaux, qui alloient

Le Roy à preſent regnant.

dedans un blé, trouuât un fossé le voulut affranchir & sauter, & l'ayant sauté, à l'instant se viennent à luy deueloper les genitoires, & la verge virille, s'estans rompus les ligaments, par lesquels auparauant estoient tenus clos & enserrés (ce qui ne luy aduint sans douleur) & s'en retourna l'armoiant en la maison de sa mere disant, que ses tripes luy estoient sorties hors du ventre, laquelle fut fort estonnee de ce spectacle, & ayant assemblé des Medecins & Chirurgiens, pour là dessus auoir aduis, on trouua qu'elle estoit homme, & non plus fille: & tantost après auoir raporté à l'Euesque, qui estoit le defunt Cardinal de Lenoncourt, par son auctorité, & assemblée du peuple, il receut le nom d'homme: & au lieu de Marie (car il estoit ainsy nommé auparauant) il fut appelé Germain, & luy fut baillé

baillé habis d'homme , & croy que luy
 & sa mere sont encor viuants : Pline Pline lib. 7.
chap. 4.
 libure 7. chap. 4. dict semblablement,
 qu'une fille deuint garçon , & fut con-
 finee pour ceste cause en vne isle deserte,
 & inhabitee par arrest des Aruspices: il Aruspices ou
demon.
 me semble que ces deuineurs n'auoient
 occasion de ce faire , pour les raisons sy
 dessus aleguees , toutesfois ils estimoient
 que telle chose monstrueuse leur estoit mau-
 uais augure , & presage , qui estoit la
 cause de les chasser & exiler.

Exemple du defaut de la quanti-
 té de la semence..

CHAPITRE VIII.

SI la quantité de la semen-
 ce (comme nous auons par-
 cideuant dict) manque ,
 pareillemēt quelque mem-

bre defaudra auffy, plus ou moins, comme l'enfant d'auoir deux testes & un bras, l'autre n'auoir point de bras, un autre n'aura n'y bras n'y iambes, ou autres parties defaillantes, (comme nous auons dict cy dessus) l'autre aura deux testes & un seul bras, & le reste du corps bien acomply, comme tu vois par ceste figure.

Figure d'un enfant monstreux
du defaut de la semence en
deüe quantité.



On a veu n'aguères à Paris vn homme sans bras, aagé de quarante ans, ou enuiron, fort & robuste, lequel faisoit presque toutes les actions qu'un autre pouuoit faire de ses mains, à scauoir avec son moignon d'espaule, & la teste, ruoit vne coignée contre vne piece de bois ausy ferme qu'un autre homme eust sceu faire avec ses bras : Pareillement faisoit cliqueter vn foïet de chartier, & faisoit plusieurs autres actions, & avec ses pieds, mengeoit & buuoit, & ioïet aux cartes & aux dets, ce qui t'est démontré par ce portraiët, à la fin fut larron, voleur, & meurtrier, & executé en Gueldre, à scauoir pendu, puis mis sus la rouë.

Figure d'un homme sans bras.



Semblablement de recente memoire, on a veu à Paris une femme sans bras, qui tailloit & cousoit ; & faisoit plusieurs autres actions . Hippocrates au lib.2.des Epidemies escript, que la femme d'Antigenes accoucha d'un enfant tout de chair, n'ayant aucuns os, neantmoins auoit toutes les parties bien formees.

Exemple des môstres qui se font par imagination.

CHAPITRE IX.



LES anciens qui ont recherché les segrets de nature, ont enseigné d'autres causes des enfans monstreux, & les ont referés à une ardente & obstinee imagination , que peut auoir la femme ce pendant qu'elle conçoit, par quel-

Aristote, Hippocr. & Empedocl.


La vertu imaginative faict receuoir aux enfans plusieurs formes.

quelque obiect, ou songe fantastique, de quelques visions nocturnes, que l'homme, ou la femme ont sus l'heure de la conception. Cecy mesme est verifié par l'autorité de Moysse, ou il monstre cõ- Moysse 30. ch.
me Jacob deçeut son beau pere Laban, & s'enrichit de son bestial, aiant faict peler des verges, les mettât à l'abruvoir, à fin que les cheures & brebis regardâs ces verges de couleurs diuerses, formassent leurs petits marquetés de diuerses taches, par ce que l'imagination a tant de puissance sus la semence & geniture, que le rayon, & caractere en demeure sus la chose enfantee. Qui soit vray, Heliodore escript que Persina, Royne d'Ethiopie, conçeut du Roy Hydustes, tous deux Aethiopiens, une fille qui estoit blanche, & ce par l'imagination qu'elle attira de la semblance de la belle Endromeda, dont elle auoit la peinture

Heliodore li.
10. de son hi-
stoire Aethio-
pique.

deuant ses œils, pendãt les embrassemẽts
 desquels elle deuint grosse. Damasse-
 ne, autheur graue, ateste auoir veu vne
 fille velue comme vn ours, laquelle la
 mere auoit enfantee ainsy difforme &
 hideuse pour auoir trop ententiue-
 ment regardé la figure d'un S. Iehan, vestu
 de peau avec son poil, laquelle estoit at-
 tachee au pieds de son liẽt, pendant
 qu'elle conçeuoit. Par semblable raison
 Hippocrates. Hippocrates sauua vne Princesse accu-
 see d'adultere, par ce qu'elle auoit en-
 fanté vn enfant noir comme vn more,
 son mari & elle aians la chair blanche,
 laquelle, à la suasion d'Hippocrates fut
 absoute, pour le portrait d'un more sem-
 blable à l'enfant, lequel contumieremẽt
 estoit attaché à son liẽt:

Figures d'une fille velue, & d'un
 enfant noir, faicts par la vertu
 Imaginatiue.




Et partant faut que les femmes, à l'heure de la conceptiō, & lors que l'enfant n'est encore formé (qui est de cinquante iours aux masles, & de quarante, comme nous auōs dict, aux femelles) n'ayent à regarder n'y imaginer choses monstrueuses: mais la formation de l'enfant estant faicte, iasoit que la femme regarde ou imagine attentiuement choses monstrueuses, toutefois alors l'imagination n'aura aucun lieu, pour ce qu'il ne se faict point de transsformation depuis que l'enfant est du tout formé.

En Saxe en vn village nommé Stecquer, fut nay vn monstre ayant quatre pieds de beuf, les œils, la bouche, & les nés semblables à vn veau, aiant dessus la teste vne chair rouge, en façon ronde: vne autre par derriere, semblable à vn capluchon de moine, aiāt les cuisses deschiquetees, cōme tu vois p ceste figure.

Figure

Figure d'un monstre hideux aiant
les pieds de veau.



Exemple de l'angustie ou petitesse de la matrice.

CHAPITRE X.

IL se fait ausy des monstres pour la detresse du corps de la matrice, cōme l'on voit, que lors qu'une poire attachee a l'arbre, posée en un vaisseau estroit deuant qu'elle soit accrue, ne peut prendre croissance complete: ce qui est cogneu ausy aux dames qui nourriſſēt des ieunes chiēs en petits paniers, ou autres vaisseaux estroicts pour garder de croistre. Pareillement la plante naisſant de terre, trouuant une pierre ou autre chose solide à l'endroit ou elle vient, faiēt que la plante sera tortue, & engrossie en une partie, et gresle en l'autre: semblablement les enfans sortans du ventre de leurs meres, mōstreux & difformes:

Hippocrates
lib. de la geniture.

formes : Car il dict qu'il est necessaire qu'un corps qui se meut en lieu estroict, deuient inutile & manque. Empedocle & Dyphile ont attribué semblablement cela à la superabondance, ou defect & corruption de la semence, ou à l'indisposition de la matrice: ce qui peut estre veritable, par la similitude des choses fusibles, esquelles si la matiere qu'on veut fondre n'est bien cuite, purifiée & preparee, ou que le moule soit raboteux, ou autrement mal ordonné, la medalle, ou effigie qui en sort est defectueuse, hideuse & difforme.

Exemple des môstres qui se font, la mere s'estant tenue trop longuement assise, aiant eu les cuisses croisees, ou pour s'estre bandee trop le ventre durant qu'elle estoit grosse.

E

CHAPITRE XI.



*O*u quelquefois ausſy il ad-
 uient par accident que la
 matrice eſt aſſés ample na-
 turellement , touteſois la
 feme eſtât groſſe, pour ſ'eſtre tenue qua-
 ſi tōſiours aſſiſe pendant ſa groſſeſſe,
 & les cuiſſes croiſées , comme volon-
 tiers font les conturieres , ou celles qui
 beſognēt en tapisseries ſus leurs genoils,
 ou ſ'eſtre bandee, & trop ſerré le ven-
 tre, les enfans naiſſent courbés , boſſus,
 & contrefaits , aucuns aians les mains
 & les pieds tortus , comme tu vois par
 ceſte figure.

Ces enfans
 ſont appelés
 piebors ; &
 mainsbotes.

Figure d'un enfant qui à eſté preſ-
 ſé au ventre de ſa mere, aiant les
 mains & pieds tortus.

*E ij*

Exemple des monstres qui sont engendrés, la mere aiant receu quelque coup, ou cheute, estât grosse d'enfant.

CHAPITRE XII.



Hipp. au lib.
des fract. &
luxat.

DA V A N T A G E quad la mere reçoit quelque coup sus le vêtre, ou qu'elle tombe de haut en bas, les enfans en peuuent auoir les os rompus, desboités & torturés, ou recepuoir autre vice, comme estre boiteux, bossus & contrefaicts, ou pour cause que l'enfant deuiant malade au ventre de sa mere, ou que le nourrissemēt dont il debuoit croistre soit esoulé hors la matrice. Pareillemēt aucuns ont attribué les monstres, estre procreés de la corruption des viandes ordés & sales que les femmes mangent, ou desirent de manger, ou qu'elles abhor-

abhorrent de voir tost après qu'elles ont conçu , ou que l'on aura ietté quelque chose entre leurs tetins, comme une grenoille, une souris , ou autres choses , qui peuuent rendre les enfans monstueux.

Exemples des monstres qui se font par les maladies hereditaires, ou accidentales.

CHAPIT. XIII.



Aussy pour les indispositions, ou compositiōs hereditares des peres & meres, les enfans sont faicts monstueux & difformes ; qui est assés manifeste, qu'un bossu faict naistre son enfant bossu, voire à cause que les deux bosses deuant & derriere , à quelques uns sont si fort esleuees , que la teste est amoitié cachee entre les espaules , ainsy

que la teste d'une tortue dans sa coquille: Vne femme boiteuse d'un costé faict ses enfans boiteux semblables à elle: Autres estans boiteuses des deux hanches, les enfans l'estre semblablement, & cheminent cannetant: Les Camus font leurs enfans camus: Autres balbutient: Autres parlent en bredouïllât, semblablement leurs enfans bredouïllent: Et ou les meres & peres sont petis, les enfans en naissent le plus souuent nains, sans nulle autre deformité, à scauoir quand le corps du pere & de la mere n'ont nul vice en leur conformatiō: Autres font leurs enfans bien maigres, à cause que le pere & la mere le sont: Autres sont ventrus & fort fessus, quasi plus gros q̃ lōgs, parce qu'ils ont esté engēdrés du pere, ou de la mere, ou de tous les deux qui seront gros, & grands, ventrus & fessus. Les gouteux engendrent leurs

Balbutier,
c'est à dire be-
gaier, ne pou-
uāt biē profe-
rer sa parolle.

Bredouïllier
c'est dire deux
ou trois fois
vne parole sās
estre biē pro-
ferce.

leurs enfans gouteux, & les lapidaires, suiets à la pierre : ausſy ſi le pere & la mere ſont fols, le plus ſouuent les enfans ne ſont gueres ſages. Or toutes ces manieres de gens ſe trouuent ordinairement, qui eſt choſe qu'un chaſcun peut veoir & cognoiſtre à l'œil, partāt ie n'ay que faire d'en parler d'auantage. Ausſy ie ne veux eſcrire que les ladres engendrēt des enfans ladres, car tout le monde le ſcait . Il y a vne infinité d'autres diſpoſitions des peres & meres, auſquelles les enfans ſont ſuiets , voire des meurs, de la parole, iuſques au marcher & cracher, non pas touſiours, mais le plus ſouuent.

Exemple des monſtres faiçts par maladies accidentales.

E. iiij

CHAPIT. XIII.



EVANT S. Iehan d'Angelique, un soldat nommé Francisque, de la compaignee du Capitaine Muret, fut blessé d'un coup d'harquebuse au ventre, entre l'ombilic & les isles, la balle ne luy fut tiree, par ce que l'on ne la pouuoit trouuer, au moyen dequoy il eut de grandes & extremes douleurs: neuf iours après sa blesseure, iecta la balle par le siege, & trois semaines après fut gueri: il fut traitté par maistre Simon Crinay, Chirurgien des bandes Françoises. Iacques Pape, seigneur de S. Aubam aux Baronniars en Dauphiné, fut blessé à l'escarmouche de chasenay, de trois coups d'harquebuse, penetrans en son corps, dont il y en auoit un au dessous du neud de la gorge, tout proche la caue du polmon,

mon , passant près la nucque du col,
& la balle y est encor à present , au
moyen dequoy luy suruindrent plus-
ieurs grands & cruels accidens , com-
me fievre , grande tumeur alentour
du col : de sorte qu'il fut dix iours
sans rien pouuoir aualer , fors quelque
boüillons liquides, & neantmoins tou-
tes ces choses, a recouuert santé, & est
à present encor viuant , & fut pensé
par maistre Iacques Dalam , Chirur-
gien fort expert , demeurant en la ville
de Montelimar en Dauphiné. Alexā-
dre Benedict escript d'un vilageois, qui
fut blessé d'un coup de traict au dos, &
fut tiré , mais le fer demeura dedans le
corps , lequel estoit long de deux doids
en trauers, & estoit barbelé aux costés:
le Chirurgien l'ayant long temps cher-
ché sans le pouuoir trouuer , ferma la
plaie , & deux mois après ce fer sortit

Lib. 3. de son
anatho. ch. 9.

semblablement par le siege: D'auantage
 audict chapitre dict, qu'à Venise une
 fille aualla une esguille, laquelle deux
 ans après la tetta en urinant, couuerte
 d'une matiere pierreuse, amassée à l'en-
 tour de quelques humeurs gluants. La
 femme de Guillaume Guerrier (mar-
 chant drapier, homme d'honneur, de-
 meurant rue de la Iuiuerie, à Paris) nō-
 mee Catherine Parlan, allant aux
 champs en trouffe sus un cheual, une
 esguille de son tabouret entra dedans sa
 fesse dextre, de sorte que l'on ne la peut
 tirer hors, quatre mois après m'enuoya
 querir, se plaignāt que lors que son ma-
 ry l'embrassoit, sentoit en l'aine dextre
 une grande douleur piquante, lors qu'il
 pressoit dessus: aiant mis la main sus la
 douleur, trouuey une asperité & du-
 reté, & fis ensorte que luy tirey ladicte
 esguille toute enrouillee. Cecy doit bien
 estre

Autre histoire

Ladicte Parla
 fut deux mois
 qu'elle ne pou
 uoit se tenir
 assise, à cause
 qu'elle sentoit
 l'esguille la
 picquer.

estre mis au reng des choses monstrueuses, veu que l'acier, qui est pesant, monta contre mont, & passa au trauers des muscles de la cuiſſe, ſans faire apoſtème.

Des pierres qui ſ'engendrent au corps humain.

CHAPIT. XV.

L'AN 1566. les enfans de maistre Laurens Collo, hommes bien experimentés pour extraire les pierres, en tirerent vne de groſſeur d'vne noix, au milieu de laquelle fut trouuee vne eſguille, de quoy contumieremēt les couſturiers couſent. Le malade ſe nommoit Pierre Cocquin, demeurant en la rue Gallade, près la place maubert, à Paris, & eſt encore à preſent viuant: La pier-

*Des 2 feuillets qui manquent en
le trouuent à la fin*


re fut presentee au Rôy en ma presence, avec ladicte esguille (& est en ma possession) que lesdicts Collos m'ont donnee pour mettre en mon Cabinet , pour memoire de telle chose monstrueuse.

Ladicte dame
courumiere,
d'aider aux po
tires, fit to⁹ les
frais pour la
cure dudit
patissier.

L'An 1570. Madame la Duchesse de Ferrare, enuoya querir en ceste ville Iehan Collo pour extraire une pierre de la vessie d'un poure patissier, demeurât à Montargis, laquelle poise neuf onces, de grosseur d'un poin, & de figure comme tu vois icy le portraict, & fut tiree en la presence de monsieur maistre François Rouffet, & maistre Ioseph Iauelle, hommes scauans & bien experimentés en la Medecine, Medecins ordinaires de ladicte dame, & fut si heureusement tiree, que ledict patissier guerit, toutefois peu de temps après luy vint une supréssion d'urine, au moyen de deux petites pierres, qui descendirent des reins,

*reins, qui boucherent les pores vreteres,
& furent cause de sa mort.*

Figure d'une pierre extraicte d'un
patissier de montargis.



Les dictz Col-
los Chirurgi-
cs ordinaires du
Roy sont tres
expers à l'ex-
traction des
pierres, & en
plusieurs au-
tres operatiōs
de la Chirur-
gie.


L'An 1566. le frere dudict Iehan
Collo nommé Laurens, fit pareillement
en ceste ville de Paris extractiō de trois
pierres, de grosseur chacune d'un bien
gros œuf de poule, de figure triāgulair,
de couleur blāche, pesant les trois douse
onces, & plus, à un surnommé Tireuit,
demeurāt à Marly, lequel pour ce qu'il
auoit des l'aage de dix ans quelque cō-
mencemēt desdictes pierres en la vessie,
tiroit ordinairement sa verge, dont fut
nommé tireuit : car la vertu expultri-
ce de la vessie, voire de tout le corps s'es-
forçoit à ietter hors ce qui luy nuisoit,
& pour ce luy causoient un certain es-
guillonemēt à l'extremité d'icelle ver-
ge (comme tousiours se faict à ceux qui
ont quelque sable, ou pierre aux parties
dediees à l'urine) ce que i'ay escript plus
amplemēt en mon liure des pierres: icel-
les furēt presentees au Roy, estant pour
lors

Ceux qui ont
vne pierre à la
vessie, ont tou-
sours vn pru-
rit & punciō
à l'extremité
de la verge.

*lors à 'S. Mor des fossés, & en quassa
 une avec un marteau de tapisier, au
 milieu de laquelle fut trouué une autre,
 ressemblante à un noyau de pesche, &
 de couleur tannee, lesdicts Collos m'ont
 doné les susdictes pierres pour mettre à
 mon Cabinet, comme choses monstru-
 ses, & les ay faict portraire au plus prés
 du vif, ainsy que tu peus voir par ces fi-
 gures.*

*Lediçt, subit
 que sa playe
 fut cõ solidée
 sen retourna
 en sa maison,
 ou à present
 est encor vi-
 uant.*

Figures de trois pierres extrai-
 ctes à vne fois sans interualle
 de temps, de la vessie d'un ap-
 pelé tireuit, l'une desquel le se-
 brisee.



D'avantage ie puis icy atester que i'en ay trouué dedans les reins des corps mors de plusieurs figures, comme de cochons, de chiens, & autres diuerses figures, ce qui nous à esté laissé par escript des antiens.

Monsieur d'Alechamps recite en sa Chirurgie, qu'il a veu un homme auoir une aposteme sus les lombes, dont après la suppuration, icelle degenera en fistule, par laquelle ietta en diuerses fois plusieurs pierres, venant du Rhein, & enduroit le traual du cheual & des chariots.

D'alechamps
en sa Chirurgie
François.

Monsieur le Grand, Docteur regent en la faculté de Medecine, & Medecin ordinaire du Roy, homme scauant, & grandement experimenté, lequel fait autant bien la Medecine qu'homme que i'aye iamais cogneu, fus appelé avec luy pour appliquer un speculum a-

ni à une dame d'honneur, qui estoit tourmentée d'extremes douleurs au ventre, & au siege, toutefois sans nulle apparence à la veüe d'aucun mal, il luy ordonna certaines potions, & clisteres, avec l'un desquels ietta une pierre de grosseur d'un estœuf, & subit ses douleurs furent cessées, & guerit. Hippocrates escript de la Chambriere de Dyssere, aagée de soixāte ans, qui auoit des douleurs comme si elle eust deu accoucher, dõt une fēme luy tira de la matrice une pierre aspre & dure, de la grandeur, grosseur, & figure d'un peson de fuséau. Iacques hollier Docteur regent en la faculté de Medecine, à Paris, escript, qu'une femme après auoir esté tourmentée d'une difficulté d'urine, par l'espace de quatre mois, en fin mourut, laquelle aiant esté ouuerte, furent trouuees en la substance du cœur deux

1. Epidem. 1.
sect.

Les pierres se
peuuent engē
drer en la ma-
trice.

Lib. 1. chap. de
la palpitat. du
cœur.

Pierre tirée...
hors du cœur.

deux assés grosses pierres, avec plusieurs petites apostemes, estans les reins & les pores vreteres , & la vessie , sains & entiers.

L'An 1558. fus appelé de Iehã Bourlier, maistre tailleur d'habis, demeurant rue S. Honoré pour luy ouurir vne aposteme aqueuse, qu'il auoit au genoil, en laquelle trouuey vne pierre de la grosseur d'une amande , fort blanche, dure, & polie, & guerit, & encore est à present viuant. Or pour le dire en un mot, les pierres se peuuent engendrer en toutes les parties de nostre corps , tant interieures qu'exterieures : qui soit vray , on en voit estre engendrees aux iointures des goutteux.

Des verms.

F ij

CHAPIT. XVI.

MAISTRE Pierre Bar-
que Chirurgien des ben-
des Françoises, & Clau-
de le Grand Chirurgien,
demeurant à Verdun, n'aguere m'ont
affirmé, auoir pensé la femme d'un nô-
mé Gras bonnet, demeurant audict
Verdun; laquelle auoit vne aposteme
au ventre, & la luy aiant ouuerte, sor-
tit avecques le pus bien grand nombre
de vers, gros comme les doigts, aians la
teste aigue, lesquels luy auoient rongé
les intestins, en sorte qu'elle fut long
temps qu'elle iettoit ses excrements fe-
caux par l'ulcere, & à present est du
tout guerie. Monsieur Fernel escript
d'un soldat, lequel estoit fort Camus,
tellement qui ne se pouuoit moucher au-
cunement, dont l'excrement estant rete-
nu,

nu , se pourrit & s'engendrerent deux vers velus , de la grosseur d'un doigt, lesquels le rendirent furieux, par l'espace de vint iours , & furent causes de sa mort. Iacques Hollier escript en sa pratique des maladies internes, qu'il s'engendra au cerueau d'un Italiẽ un scorpiõ pour auoir cõtinuelemẽt senti du Basilic, lequel scorpiõ lui causa si grãde douleur de teste, qu'il en mourut: Ce qui est fort vray semblable , veu que Crispus, & Diosanes, & Pline ont escript, si le basilic est broiẽ entre deux pierres, & exposẽ au soleil, d'iceluy naistra un scorpion. I'ay escript en mon traictẽ de la peste auoir veu une femme qui auoit iettẽ un ver par le siege , de longueur plus d'une toise, de figure d'un serpent, qui vouldra scauoir la generation , les especes, & d'fferences , leurs diuersitẽs de couleurs , figures diceux , les trou-

Chapitre 53.
traictẽ de la
peste.

uera audict chapitre.

De certaines choses estranges
que nature expelle par son in-
comprehensible prouidence.

CHAPIT. XVII.



MONSIEUR Sarret, Se-
cretaire du Roy , & de
monseigneur d'Aniou,
frere du Roy , fut blessé
d'un coup de pistole au bras dextre, au-
quel suruint plusieurs accidens, comme
fieure , aposteme , ulceres , desquelles
sortoit grande quantité de saine , &
par certains iours en sortoit peu , & a-
lors la iettoit tantost par le siege, tantost
par ses urines , & quand ces ulceres
iettoient beaucoup , on n'en ueoit aucu-
ne apparence par en bas, neantmoins est
encore viuant: Ce que i'ay veu sembla-
blement

blement aduenir à monsieur le Conte de Mansfelt, de sa blessure de pistole, qu'il eut au bras senestre, le iour de la bataille de Montcontour. D'auantage Germain Cheual, & François Race (hommes accomplis & excellents en leur art, Chirurgiens iurés à Paris) & moy, auôs pensé un gentilhomme nommé monsieur de la Croix (comme i'ay d'escript en mon traicté de la supression d'vrine, lequel fut blessé d'un coup d'espee au bras senestre, à la ioincture du coude, auquel aduint pareille chose, toutesfois mourut: & par ce qu'aucuns tenoient, qu'il estoit impossible que la sannie fist si long circuit, de r'etrer de la vene axillaire, à la vene caue ascendante, passant prés le cœur, qui ne feust infecté, & de là par dedans le foye, & d'iceluy à la vene porte, puis aux venes mesaraiques, & aux emulgentes, &

d'icelles au trauers des reins, puis au pores vreteres, & d'iceux à la vessie, & dessusdictes venes mesaraiques aux intestins, & d'iceux au siege: toutefois puis que nous voions aux choses inanimées ces choses aduenir, comme il nous est montré par experience és deux vaisseaux de verre, appelés monteuius, dont le superieur étant rempli d'eau, & l'inférieur de vin, posés l'un sus l'autre, on void manifestement le vin monter en haud au trauers de leau, & leau descēdre au trauers du vin, sans se mesler ensemble, iasoit que se soit par un mesme, & estroit conduit: à plus forte raison deuons nous croire cecy aduenir en nature, laquelle est fort prouide à expeller ce qui luy est cōtraire: ce qui nous est manifestement montré par les femmes nouuellement accouchees, lesquelles iettēt le laiēt sans estre aucunemēt meslé avec

lé avec le sang, par leur matrice, & faut qu'il passe par dedans les venes & arteres mamillaires, iasoit qu'elles soient assés petites, par la cõmunication qu'elles ont ensemble au milieu des muscles longitudinaux de l'epigastre, avec celles de la matrice. D'avantage nul n'ignore, que le foye n'atire de l'estomach, & des intestins le Chilus blanc par les venes mesaraïques pour estre en iceluy sanguifié, & par icelles mesmes enuoyé du sang audicts intestins & estomach pour leur nourrissement, & toutefois sont deux mouvemens contraires. D'abondant la semence qui est faicte de sang pur, & le meilleur qui soit au corps enuoyé de toutes les parties pour estre ietté par la verge pour la generation, passe par dedans les vaisseaux spermaticques eiaculatoires, lesquels semblablement sont tousiours plains de sang, neât-

Galien.

moins la semence coule au trauers sans se mesler aucunement . Parquoy faut conclurre avec Galien, que la boüe faite aux parties internes & superieures, & loing des reins, & de la vessie, peut estre euacuee par la voye des vrines.

Vn Escolier nommé Chambellant, natif de Bourges, estudiant à Paris, au Collège de Prælle, aualla vn espi d'herbe nommee gramen, lequel sortit quelque temps après, entre les costés tout entier, dont il en cuida mourir, & fut pensé par defunct monsieur Fernel, & monsieur Huguet, docteurs en la faculté de Medecine . Il me semble que c'estoit fort faict à nature, d'auoir expulsé ledict espi de la substance des poulmons, auoir faict ouuerture à la membrane pleuretique, & aux muscles qui sont entre les costes, & neantmoins reçut guerison, & croy qu'il soit encor

Monsieur Huguet est encore à present vivant.

viuant . Monsieur Cabrolle Chirur-
 giẽ de monseigneur le Mareschal Dan-
 uille , n'agueres m'a certifiẽ que Fran-
 çois Guillemet, Chirurgiẽ de Sommie-
 res, petite ville, à quatre lieues près de
 Montpellier, auoir pensẽ & gueri un
 berger, auquel des voleurs auoient fait
 aualler un couteau de l'ogueur d'un de-
 my pied, & le manche estoit de corne,
 de grosseur d'un pouce, qui fut l'espace
 de six mois en son corps, se plaignant
 grandement, & deuint etique, sec &
 emaciẽ, en fin luy suruint une aposteme
 au dessous de laine, iettant grande quã-
 titẽ de pus fort puant & infect: par la-
 quelle en presẽce de la iustice fut tirẽ
 ledict couteau, lequel monsieur Ioubert
 Medecin celebre à Montpellier garde
 en son cabinet, comme une chose admi-
 rable, & digne de grande memoire, &
 monstreuse. Monsieur de Rohan auoit

Grande admi-
 tation de l'in-
 dustrie de na-
 ture.

Autre histoire
 memorable.

vn fol nommé Guion, qui aualla la pointe d'une espee tranchante, de longueur de trois doigts, ou enuiron, & douse iours après la ietta par le siege, & ne fut sans luy aduenir de grands accidens, toutefois rechappa: il y a des gentilshommes de Bretaigne encor viuans, qui la luy virent aualler. On a veu aussy à certaines femmes, l'enfant estât mort dans leur matrice, les os sortir par l'ombilic, & la chair par pourriture estre ietee par le col de leur matrice, & par le siege, s'estant fait absés: ce que deux Chirurgiẽs celebres & dignes de foy m'ont certifié auoir veu à deux diuerses femmes. Pareillement monsieur Dalechamps en sa Chirurgie Françoisẽ recite, qu'Albucrasis auoit traicté vne dame de mesme chose, dont l'issue fut bonne, aiant recouuert sa santé, toutefois sans porter enfant depuis: semblablement est vne chose

chose bien monstreuse de voir une femme, d'une suffocation de matrice estre trois iours sans se mouuoir, ni manifeste apparence de resspirer, ni aucune pulsation d'artere : dont quelques unes ont esté enterrees viues, pensant qu'elles fussent mortes. Monsieur Fernel escript d'un Autre histoire. certain adolescēt, lequel après auoir pris grand exercice, commença à toussir iusques à tant qu'il eust ietté une aposteme entiere, de la grosseur d'un œuf, laquelle estāt ouuerte fut trouuee plaine de boüe blanche : Iceluy aiant craché le sang par deux iours, avec une grande fieure, toutefois rechappa.

De plusieurs autres choses estranges.

CHAPIT. XVIII.

Lib. 61. cha. 1.



ALEXANDRE Benedi-
dict recite en sa pratique
auoir veu vne femme no-
mee Victoire, laquelle auoit

perdu toutes ses dents, & estant deue-
nue chaulue, autres dents luy reuindrēt
toutes en laage de quatre vingt ans.

Autre histo-
re.

Le fils de Bermon, Baille demeurant en
la ville de S. Didier, au païs de Vellay,
auoit vne louppe sus la sourci de l'œil
dextre, laquelle commençoit desia à l'of-
fusquer & courrir, & partant voulut
que i'en fisse emputation (ce que ie fy il
n'y a pas long tēps) & trouuey la loup-
pe plaine de poil, avec vne matiere mu-
silagineuse, & en huit iours sa plaie

Toutes ces
choses se font
par alteration
& corruption
d'vne chaleur
& humidité
eōtre nature.

fut totalement consolidee. Or on trou-
ue dans des loupes plusieurs corps
estranges, & aux apostemes, comme
char-

charbons, coquilles de limaçons, espis, cheueux, pierres, croye, os, boullie, suif, miel, sablon, petites bestioles viuant, & plusieurs autres choses estranges, lesquelles se font par alteration, & corruption, ce que nous a laissé par escript Galien en sa methode. Estiene Tessier maistre Barbier, Chirurgien demeurant à Orléans, homme de bien, expérimenté en son art, m'a recité que depuis peu de tēps auoit pensé & medicamēté Charles Verignel sergent demeurant à Orléans, d'une plaie qu'il auoit receüe au iarret, partie dextre, avec incision totale des deux tendōs qui flechissent le iarret, & pour l'abiller luy fit flechir la iābe, en sorte qu'il cousit les deux tendons, bout à bout l'un de l'autre, & la situa & traicta si bien, que la plaie fut consolidée sans estre demeuré boiteux chose digne d'estre biē nottee au ieune Chi-

Galien 14. de
sa methode.

Autre histoire

Conclusion.

rurgien , à fin que lors qui luy viendra entre ses mains telle chose , il en face le semblable.

Que diraige plus dauantage? C'est que i'ay veu plusieurs gueris, aiàs des coups d'espee, de fleches, d'harquebuse au tra- uers du corps, d'autres des plaies à la te- ste , avec deperdition de la substance du cerueau, autres auoir les bras & les ia- bes emportees de coups de canon, neant- moins receuoir guerison: & d'autres qui n'auoient que de petites plaies superfi- cielles, que l'on estimoit n'estre rien, tou- tefois mouroient avec grands, & cruels accidents : Et pour conclusion ie diray avec Hippocrates (pere & autheur de la Medicine.) qu'aux maladies il y a quelque chose de diuin , dont l'homme n'en scauroit donner raison. Je ferois icy mention de plusieurs autres choses mon- streuses qui se font aux maladies , n'e- stoit

*stoit que ie crains d'estre trop proluxe
& repeter vne chose trop de fois.*

Exemple des môstres qui se font
par pourriture & corruption.

CHAPIT. XIX.

IL c'est veu des femmes a-
voir ietté par leurs matrices
des serpens , & autres be-
stes, ce qui peut aduenir par
la corruption de certains excrements e-
stans retenus en leur matrice , comme
l'on voit se faire és intestins, & autres
parties de nostre corps, de gros & longs
vers, voire pelus & cornus, (côme nous
demontrerons cy après : Quelques vns
ont voulu fredonner que telle chose peut
venir quand vne femme se baigne , si
par cas fortuit quelque beste venimeuse
comme serpens & autres ont frayé, &

rendu semence en leau, à l'endroit de laquelle il soit aduenü qu'on aye espuisé avec leau une telle ordure, & que puis après la femme se soit baignee en icelle, veu principalement, qu'à cause de la sueur & chaleur, tous ses pores sont d'auantage ouuers: Mais telle raison ne peut auoir lieu, attendu que la vertu generatrice de ceste semēce est suffoquee & estainte par la grande quantité deau chaude, ioinct pareillement que la bouche de la matrice ne s'ouure point, si se n'est à l'heure du coit, ou que les mois coulent. Leuinus raconte une merueilleuse histoire, en ceste façon. Ces années passees une femme vint vers moy pour me demander conseil, laquelle aiāt conceu d'un marinier, le ventre luy cōmença tellement à enfler, qu'on pensoit qu'elle ne deüst iamais porter à terme: le neufiesme mois passé, on enuoye querir la sa-

Lib. 1. de oc-
cultis natura,
capite 8.

la sage femme, & avec grands efforts, premierement accoucha d'une masse de chair, sans forme, aiant de chasque costé deux ances longues d'un bras, laquelle remuoit & auoit vie comme les esponges: Après chut de la matrice un monstre aiant le nés crocheu, le col long, & les œils estincelans, la queue aigue, & les pieds forts agilles, & aussy tost qu'il fut aperçeu, commença de bruire & remplir toute la chambre de chiflemets, courant ça & la pour se cacher, sur lequel les femmes se ietterent, & le suffoquerent avec des oreillers, à la fin la poure femme estant toute lasse & rompue, accoucha d'un enfant masle tant bourrelé et tourmēté par ce mōstre, qu'il mourut subit qu'il eut receu baptesme: Ladicte patiente, après auoir esté longue espace de temps à se r'auoir, luy raconta le tout fidelemēt. Licostene escript

Vne mollc se
meut comme
les esponges.

Licoftene en
fes prodiges.

*en fes prodiges que l'an 1494. une fem-
me à Craconie , en une place que l'on
nomme S. Eſprit , enfanta un enfant
mort , qui auoit un ſerpent viſ attaché
à ſon dos , qui rongeoit ceſte petite crea-
ture morte , comme tu vois par ce por-
traict.*

Figure d'un enfant qui auoit vn
ſerpēt viſ à ſon dos, qui le ron-
geoit.



Boistuan en
ses prodiges
histoires.

Par pourritu-
re s'engendrēt
plusieurs ani-
maux.

Baptiste Leō.

Boistuan en ses histoires prodigieuses escript, que luy estant en Auignon, un artisan ouurant un cercueil de plōb d'un mort, bien couuert & soudé, de façon qu'il n'y auoit aucun air, fut mor-
du d'un serpēt qui estoit enclos dedans, la morsure duquel estoit si veneneuse, qu'il en cuida mourir: l'on peut bien dō-
ner raison de la naissance & de la vie de cet animal, c'est qu'il fut engendré de la pourriture du corps mort. Baptiste Leon escript pareillemēt, que du temps du Pape Martin cinquiesme fut trou-
ué en vne grande pierre solide un serpent vif enclos, n'y aiant aucune appa-
rence de vestige, par lequel il deust respi-
rer: en cet endroict ie veux reciter vne semblable histoire. Ceste presente annee estant en vne mienne vigne, près le vil-
lage de Meudon, ou ie faisois rompre de bien grandes & grosses pierres soli-
des,

des, on trouua au milieu de l'une d'icelles un gros crapaut vif, & n'y auoit aucune apparence d'ouuerture, & m'esmerueilley comme cet animal auoit peunastre, croistre, & auoir vie : Lors le carrier me dict qui ne s'en faloit esmerveiller, parce que plusieurs fois il auoit trouué de tels, & autres animaux aux profond des pierres, sans apparẽce d'aucune ouuerture. On peut aussi donner raison de la naissance & vie de ces animaux, c'est qu'ils sont engẽdrés de quelque substãce humide des pierres, laquelle humidité putrescee produict telles bestes.

Crapaut trouué au milieu d'une grosse pierre, sans apparence d'ouuerture.

Exemple de la commixtion & meflange de semence.

CHAPITRE XX.



Ly a des mōstres qui nais-
sent moitié de figures de
bestes, & l'autre humai-
ne, ou du tout retenans des
animaux, qui sont produicts des Sodo-
mistes, & Atheistes, qui se ioignent &
debordent contre nature avec les bestes,
& de là s'engendrent plusieurs monstres
hideux, & grandemēt honteux à voir,
& à en parler: toute fois la deshonne-
té git en effaiēt, & non en paroles, &
est lors que cela se faict une chose fort
malheureuse & abominable, & grand
horreur à l'homme, ou à la femme se
mesler, & accoupler avec les bestes bru-
tes: & partāt aucuns naissent demi hō-
mes & demi bestes.

Le semblable se faict, si bestes de di-
uerses espèces cohabitent les unes avec
les au-

les autres, à cause que nature tasche tousiours à faire le semblable de son semblable, comme il c'est veu un agneau aiant la teste d'un porc, parce qu'un verrat auoit couuert la brebis : ce que nous voyons mesme aux choses inanimees, la nature de son essence, comme d'un grain de fourment venir, non l'orge, mais le fourment : & du noyau d'abricot venir un abricotier, & non le pommier, par ce que nature garde tousiours son genre & espesce.

L'An 1493. un enfant fut conceu & engendré d'une femme & d'un chiē, aiant depuis le nombril les parties superieures semblables à la forme & figure de la mere, & estoit bien accompli, sans que nature y eust rien obmis : & depuis le nombril auoit toutes les parties inferieures semblables ausy à la forme & figure de l'animal, qui estoit

le pere , lequel (ainsy que Volater-
ranus escript) fut enuoyé au Pape qui
regnoit en ce temps la . Cardan lib.
14. chapitre 64. de la varieté des cho-
ses en faict mention.

Figure d'un enfant demi chien.



Lib. 25. ch. 32.


Cælius Rhodiginus en ses antiques leçons dict, qu'un pasteur nommé Cratain en Cybare, ayant exercé avec l'une de ses cheures son desir brutat, la cheure cheureta quelque temps après un cheureau, qui auoit la teste de figure humaine, & semblable au pasteur, mais le reste du corps sembloit à la cheure. L'an onze cents & dix, une truie en un bourg du Liege cochonna un cochon aiant la teste & le visage d'homme, semblablement les mains & les pieds, & le reste comme un cochon.

Figure d'un cochon aiant la teste, pieds, & mains d'homme, & le reste de cochon.



L'An 1564. à Bruxelles au logis d'un nommé Ioeft Dickpeert, demeurant rue Warmoesbroeck, une truie couchonna six cochons, desquels le premier estoit un monstre aiant face d'homme, ensemble bras & mains, representant l'humanité, generalement depuis les espaulles, & les deux iambes & train de derriere de pourceau, aiant la nature de truie: il tetoit comme les autres, & vesquit deux iours, puis fut tué avec la truie, pour l'horreur qu'en auoit le peuple, dont tu as icy le portrait qui test representé le plus naturellement qu'il est possible.


Portrait d'un monstre demy homme & demy pourceau.



L'An 1571. à Anuers, la femme d'un compaignon imprimeur nommé Michel, demeurât au logis de Jean Mollin, tailleur d'histoires, à l'enseigne du pied d'or, à la Cammerstrate, le propre iour S. Thomas, sur les dix heures du matin, accoucha d'un monstre representant la figure d'un vray chien, excepté qu'il auoit le col fort court, & la teste ne plus ne moins qu'une volaille, toutefois sans poil, & n'eut point de vie, parce que la ditte femme accoucha auât terme: & à l'heure mesme de son enfantement, iettant un horrible cry (chose emerueillable) à l'instant la cheminee du logis chut par terre, sans aucunemēt offenser quatre petis enfans qui estoient à l'entour du foïier: & parce que c'est une chose recēte, il m'a semblé bon pour la posterité, d'en dōner icy le portrait tel qui s'en suit.


*Portrait d'un monstre chien aiāt
la tē-*

la teste semblable à vne volaille.



L'An 1254. près de Veronne, une iument poulena vn poulain, qui auoit une teste d'homme bien formee, & le reste d'un cheual. Ce monstre auoit la voix d'homme, au cry duquel un vilageois du pais accourut, & s'estonnant de voir un monstre si horrible, le tua: à raison de quoy, estant mis en iustice, & interrogué tât sur la naissance de ce monstre, que de la raison qui le luy auoit faict tuer, dict, que l'horreur, & espouuentement qu'il en auoit eu le luy auoit faict faire, & partant fut absout.

Figure d'un poulain qui auoit la teste & la vois d'un homme.



Il y a des choses diuines cachees & admirables aux mōstres, principalement à ceux qui aduiennent du tout contre nature, car à iceux les principes de Philosophie faillēt, partāt on n'y peut assoir certain iugement. Aristote en ses problemes dict, qui se faict des monstres en nature, à cause de la mauuaise disposition de la matrice, & cours de certaines constellations, ce qui aduint du temps d'Albert en vne metairie, qu'une vache fit vn veau demy homme, dequoy les villageois se doutans du pasteur, l'accuserent en iugement, pretendans le faire brusler avec ladicte vache, mais Albert pour auoir faict plusieurs experiences en Astronomie, cognoissoit (disoit il) la verité du faict: dict cela estre aduenū par vne speciale constellatio, de sorte que le pasteur fut deliuré & purgé de l'imposition de tel execreable crime.

Le iugement
des Astrolo-
gues est fort
douteus, que
ie leur lesse à
disputer & à
Prouer.

me. Je doute fort si le iugement du seigneur Albert estoit bõ, parce que Dieu n'est point lié, n'y subiect de suiure l'ordre qu'il a establi en nature, n'y au mouuement des astres & planettes. Or ie delaisse icy à escrire plusieurs autres monstres engendrés de ceste farine, ensemble leurs portrais, lesquels sont si hideux & abominables, non seulement à voir, mais ausy d'en ouir parler, que pour leur grande detestation, ne les ay voulu reciter, ne faire peindre : Car comme dict Boistuan (après auoir recité plusieurs histoires sacrees et profanes, qui sont toutes remplies de griefues peines sus les paillars) que doibuent esperer les Atheistes & Sodomistes, qui se ioignent, en l'ignominie de Dieu, & de nature (comme i'ay dict cy dessus) avec les bestes brutes? A ce propos S. Augustin dict, la peine des paillars estre de

Jeremie 10.
Dieu n'est point subiect aux astres, car il est autheur de toutes choses.

Lib. des Ephes.
ses.

tomber en aueuglement, & deuenir enragés après qu'ils s'ot delaiſſés de Dieu, & ne ueoiēt point leur aueuglement, ne pouuans eſcouter bon conſeil, prouoquans l'ire de Dieu contre eux.

Exemple de l'artifice des meſchâs gueux de loſtiere.

CHAPITRE XXI.

IA Y ſouuenance eſtant à Angers, mil cinq cēs xxv. qu'un meſchant coquin auoit coupé le bras d'un pendu, encore puant & infect, lequel l'auoit attaché à ſon pourpoint, eſtant appuié d'une fourchette cōtre ſon coſté, & cachoit ſon bras naturel derriere ſon dos, couuert de ſon manteau, à ſin qu'on eſtimaſt que le bras du pendu eſtoit le ſien propre, & crioit à la porte d'un tēple

ple qu'on luy donnaſt l'aumosne en l'honneur de S. Antoine : vn iour du Vendredi ſainct , le monde voiant ainſy le bras pourry , luy faiſoit aumosne, pensant qu'il fuſt vray , le coquin aiant par longue eſpace de tēps remué ce bras, en fin ſe detacha, & tumba en terre, ou tout ſubit le releuāt fut aperceu de quelques vns auoir deux bons bras, ſans ce-luy du pēdu: alors fut mené priſonnier, puis condamné à auoir le foüet, par l'ordonnance du magiſtrat , aiant le bras pourri pendu à ſon col , deuant ſon eſtomach, & bāny à iamais hors du païs.

L'impoſture d'une belitreſſe fai-
gnant auoir vn chancre en la
mammelle.

H iij

CHAPIT. XXII.

VN mien frere , nommé Iehan Paré , Chirugien demurant à Vitré , ville de Bretagne , vit vne grosse & potelee cagnardiere , demandât laumosne en la porte d'un temple à un dimanche , laquelle faignoit auoir un chancre à la mammelle , qui estoit vne chose fort hideuse à voir à cause d'une grande quantité de boüe qui sembloit en decouler sus un linge qu'elle auoit deuant soy: mondict frere contēpla sa face , qui estoit d'une viue couleur , montrant estre bien saine , & les parties d'autour son chancre ulceré blāches , & de bonne couleur , & le reste de son corps biē habitué , iugea en soy mesme que ceste garce , ne pouuoit auoir ce chancre étant ainsy grasse & potelee , s'asseurant que c'estoit vne imposture , ce qu'il denonça

nonça au magistrat, (dict en ce pais là
Laloüe) lequel permit à modict frere la
faire mener en son logis pour cognoistre
plus certainemēt l'imposture, laquelle y
estāt arriuee luy decouvrit toute sa poi-
trine, & trouua qu'elle auoit soubs son
aisselle vne esponge trampee & imbue
de sang de beste, & de laiēt, meslés en-
semble, & un petit tuiau de sureau, par
lequel ceste mixtion estoit conduite par
des faux trous de son chancre ulceré,
decoulant sus le linge qu'elle auoit de-
uant soy, & par cela cogneut pour cer-
tain, que le chācre estoit artificiel : alors
prit de leau chaude & fomēta la mam-
melle, & l'aiāt humectee leua plusieurs
peaux de gregnoilles noires, verdes, &
iaunāstres, mises les vnes sus les au-
tres, collees avec bol armene & blanc
d'œuf & farine, ce que l'on scent par sa
confession: & les aiant toutes leuees on

trouua le tetin sain & entier , & en
aussy bonne disposition que l'autre: ceste
imposture decouuerte, ledict Aloüé la
fit constituer prisonniere , & estant in-
terrogee, confessa l'imposture , & dict
que s'auoit esté son gueux qui l'auoit
ainsy accoustree, lequel semblablement
faignoit auoir vne ulcere grande, & e-
norme à la iambe: ce qui sembloit estre
vray par le moyen d'une rate de beuf
qu'il posoit le long & autour de sa iam-
be, attachee & fenestree biē propremēt,
avec vieux drapeaux aux deux extre-
mités: de façō qu'elle sembloit estre plus
grosse deux fois que la naturelle: &
pour faire la chose plus monstrueuse &
hideude à voir, faisoit plusieurs cauités
en ladicte rate, & par dessus iettoit de
ceste mixtion faicte de sang & de lait,
& sus tous ses drapeaux . Ledit Aloüé
fit chercher ce maistre gueux, larrō
impo-

*imposteur , lequel ne put estre trouué,
 & condamna la putte à auoir le foïet,
 & banie hors du païs , qui ne fut sans
 estre au parauant bien estrillee à coups
 de foïet de cordes noüees , ainsy qu'on
 faisoit en ce temps la.*

*L'imposture d'un certain maraut
 qui contrefaisoit le ladre.*

CHAPIT. XXIII.

V*N an après vint un gros
 maraut, qui contrefaisoit
 le ladre , se mit à la porte
 du temple , deploiant son
 Oriflan , qui estoit un couurechef , sus
 lequel posa son baril, & plusieurs especes
 de petite monnoyes , tenant en sa main
 dextre des cliquettes, les faisant clique-
 ter assés haut, sa face couuerte de gros
 boutons , faits de certaine cole forte, &*

painte d'une façon rougeatre & livide, aprochant à la couleur des ladres, & estoit fort hideux à voir, ainsy par compassion chascun luy faisoit aumosne, mondict frere s'aprocha de luy, & luy demanda depuis qu'el temps il estoit ainsy malade, luy respondit d'une voix cassée & rocque, qu'il estoit ladre dès le ventre de sa mere, & que son pere & mere en estoient mors, & que leurs membres leurs en estoient tombés par pieces. Ce ladre avoit certaine lisiere de drap, entortillee autour de son col, & par dessous son manteau, de sa main senestre se ferroit la gorge à fin de se faire monter le sang à la face, pour la rendre encore plus hideuse, & defiguree, & aussy pour faire sa voix enrouée, qui se faisoit pour l'angustie & stricture de la trachee arteree, serree par la lisiere : Mondict frere estant ainsy à deuiser avec luy, le
ladre

ladre ne put si l'ong temps demeurer qui ne deserrast sa lisiere pour reprendre un peu son aleine, ce que modict frere apercent, & par ainsy eut soupçon, que ce fust quelque fausseté et imposture: Parquoy s'en alla vers le magistrat, le priât luy vouloir tenir la main, pour en scauoir la verité, ce que volontiers luy accorda, lequel commanda qu'il fust mené en sa maison pour esprouuer s'il estoit ladre: La premiere chose qu'il fit se fut de luy oster la ligature d'autour du col, puis luy lauer la face avec de leau chaude, & par icelle tous ses boutons se detacherent, & tomberent, & la face demeura viue, & naturelle sans nul vice: Cela faict le fit depouïller nud, & ne trouua sus son corps aucun signe de lepre tât vniuoque que cequiuoque: Le magistrat estant aduerty de ce, le fit constituer prisonnier, & trois iours après fut

interrogué, ou il cōfessa la verité (qui ne pouuoit nier) après une longue remontrance que luy fit le Magistrat, luy mettant deuant les œils, qu'il estoit vn larron du peuple; étant sain & entier pour traualler, ce ladre luy dict qu'il ne scauoit mestier autre que de contrefaire ceux qui sont traouillés du mal S. Iehā, S. Fiacre, S. Main; bref qu'il scauoit contrefaire plusieurs maladies, & qui n'en auoit iamais trouué de plus grand reuenue que contrefaire le ladre, alors fut condamné d'auoir le foïet par trois diuers samedis, aiant son baril pendu au col deuant sa poitrine, & ses cliquettes derrière son dos, & banny à iamais hors du pais, sur peine de la hart: Quand se vint au dernier samedy, le peuple crioit à haute voix au borreau, boute boute mōsieur l'officier, il n'en sent riē, c'est vn ladre: dont à la voix du peuple,

mon-

monsieur le bourreau s'acherna tellement à le foïeter, que peu de temps après il mourut, tant pour le foïet dernier, que pour luy auoir renouvelé ses plaies par trois diuerses fois, chose qui ne fut grandement dommageable pour le país.

D'une cagnardiere faignât estre malade du mal S. Fiacre, & luy sortoit du cul vn long, & gros boyau fait par artifice.

CHAPIT. XXIIII.

MONSIEUR Flecelle,
Docteur en la faculté de
Medecine, homme sca-
uant, & bien experimen-
té, me pria vn iour de l'accompagner au
village de Champigni, deux lieues prés
de Paris, où il auoit vne petite maison,
ou bien tost estant arriué, se promenant

en sa court vint une grosse garce, en bon point, luy demandât l'aufmosne en l'honneur de monsieur S. Fiacre, leuant sa cotte & chemise, montrant un gros boiau de longueur d'un demy pied & plus, qui luy sortoit du cul, duquel decouloit une liqueur semblable à de la boüe d'aposteme, qui luy auoit tainct & barboüillé toutes ses cuisses, ensemble sa chemise deuant & derriere, de façon que cela estoit fort vilain, & deshonneste à voir, l'ayant interroguee combien il y auoit de temps qu'elle auoit ce mal, luy fit responce qu'il y auoit enuiro quatre ans: alors ledict Flecelle contemplant le visage & l'abitude de tout son corps, cogneut qu'il estoit impossible (estant ainsy grasse & fessue) qu'il peust sortir telle quantité d'excremens, qu'elle ne deuint emacice, sèche, & ethique: & alors d'un plain saut se ietta de
grande

grande cholere sus ceste garce, luy donnant plusieurs coups de pied sus le ventre, tellemēt qu'il l'aterra, & luy fit sortir le boyau hors de son siege avec son, & bruit, & autre chose: & la contraindit luy declarer l'imposture (ce qu'elle fit) disant que c'estoit vn boyau de bœuf nouë en deux lieux, dont l'un des neuds estoit dans le cul, rempli de sang & de laict meslés ensemble, auquel auoit faict plusieurs trous, à fin que ceste mixtion decoulast: & derechef cognoissant ceste imposture, luy donna plusieurs autres coups de pied dessus le ventre, de sorte qu'elle faignoit estre morte: lors estant entré en sa maison pour appeler quelcun de ses gens, faignant enuoier querir des sergeāns pour la constituer prisonniere, elle voiant la porte de la court ouuerte, se leua subit en soursaut, ainsy que si elle n'eust point esté battue, & se

print à courir , & iamaïs plus ne fut
veüe audiect Champigni . Et encore de
fresche memoire vint vne vilaine ca-
gnardiere, priant messieurs du Bureau
des poures de Paris q̃lle fust mise à l'au-
mosne , disant que par vn mauuais en-
fantement sa matrice luy estoit tombee,
qui estoit cause qu'elle ne pouuoit gai-
gner sa vie, alors messieurs la firent vi-
siter par les Chirurgiens commis à ceste
charge , & trouuerent que c'estoit vne
vessie de beuf, qui estoit demie plaine de
vent, & barboüillee de sang, aiant atta-
ché le col d'icelle vessie profondément
au conduit de sa matrice biē propremēt,
par le moyen d'une esponge qu'elle auoit
mise à l'extremité d'icelle vessie, laquel-
le estant imbue s'enfle & grossit , qui
estoit la cause la fere tenir, de façon qu'o
ne luy pouuoit tirer que par force , &
ainsy marchoit sans que ladicte vessie
peust

peust tomber: Aiant decouuert l'imposture, messieurs la firent constituer prisonniere, & ne sortit des prisons que premieremēt le bourreau n'eust bien carillonné sus son dos, & bannie à iamais hors de la ville de Paris.

D'une grosse garce de Normandie, qui faignoit auoir vn serpent dans le ventre.

CHAPIT. XXV.

L'AN 1561. vint en ceste ville vne grosse garce, & en bon point, agee de trente ans, ou enuiro, laquelle disoit estre de Normãdie, qui s'e alloit par les bones maisons des dames, & damoisselles, leur demandant l'aumosne, disant qu'elle auoit vn serpent dās le vètre, qui luy estoit entré estant endormie en vne

cheneuiere , & leur faisoit mettre la main sus son ventre, pour leur faire sentir le mouuement du serpent qui la rongeoit, & tormentoit iour & nuict, comme elle disoit : ainsy tout le monde luy faisoit aumosne par vne grande compassiõ qu'il auoit de la voir, ioinct qu'elle faisoit bonne pipee . Or il y eut vne damoiselle honorable , & grande aumosniere, qui la print en son logis, & me fit appeler (ensemble monsieur Hollier Docteur regent en la faculté de Medecine, & Germain Cheual Chirurgien iuré à Paris) pour scauoir s'il y auroit moyen de chasser ce dragon hors le corps de cestepoure femme : & l'ayant veüe, monsieur Hollier luy ordonna vne medecine, qui estoit assés gaillarde (laquelle luy fit faire plusieurs selles) tendant à fin de faire sortir ceste beste , neantmoins ne sortit point : Estans derechef
r'asem-

r'assemblés, cōclumes que ie luy mettrois
un speculum au col de la matrice, &
partant fut posée sus une table, ou son
enseigne fut desployée, pour luy appli-
quer le speculum, par lequel ie fis assés
bonne & ample dilatation, pour scauoir
si on pourroit apperceuoir, cœüe ou teste
de ceste beste: ce que n'en fut aucunemēt
aperceue, excepté un mouuement volon-
taire que faisoit ladicte garce, par le
moyen des muscles de l'epigastre: &
aiant cogneu son imposture, nous reti-
rasmes à part, ou il fut resolu que ce
mouuement ne venoit d'aucune beste,
mais qu'elle faisoit par l'action desdicts
muscles: & pour l'epouuenter, & co-
gnoistre plus amplement la verité, on
luy dict qu'on reïtereroit à luy donner
encore une autre medecine beaucoup
plus forte, à fin de luy faire confesser la
verité du faict: & craignant reprendre

une si forte medecine , estant asseuree qu'elle n'auoit point de serpent , le soir mesme s'en alla sans dire adieu à sa damoiselle , n'oubliant à serrer ses hardes, & quelques vnes de ladicte damoiselle, & voila commel'imposture fut decouuerte : six iours après ie la trouuey hors la porte de mōtmartre, sus un cheual de bas, iambe de sa iambe de la, qui rioit à gorge desployee , & s'en alloit avec les chassemarees pour avec eux (comme ie croy) faire voler son dragon, & retourner en son païs. Ceux qui contrefont les muets , replient & retirent leur langue en la bouche, ausy ceux qui contrefont le mal S. Iehan , se font mettre des menotes aux mains, se veautrent & plongent en la fange, & mettent du sang de quelques bestes sus leur teste , disans qu'en leur debatant se sont ainsy blessés, & meurtris: estans tombés par terre,

remuent les bras & iambes, & deba-
tent tout le corps, & mettent du sa-
uon en leur bouche pour se faire escumer,
ainsy que font les epileptiques en leur
accès. Autres font vne certaine colle a-
uec farine delayee, & la posent sus tout
leur corps, crians qu'ils sont malades du
mal S. Main. Or long temps y a que
ces larrons imposteurs ont commencé le
train d'abuser le peuple, car ils estoient
des le temps d'Hippocrates en l'Asie,
comme il escript au liure de l'air &
des eaux.

Choses monstreuses faictes par
les Demons.

CHAPIT. XXVI.



NOUS sommes enseignés
par l'Escripture sainte,
qu'il y a des esprits bons
& mauuais: Les bons sont

5. Paul aux
Hebr. 1. 14.

Gal. 3. 19.

1. Theff. 4. 16.

Iob. 1. 6.

1. Rois 22.

Iehan 13.

Marc 1. 26. 34

appelés *Anges*: & les mauuais, demons, ou diables. Qui soit vray la loy est baillee par le ministre des *Anges*: d'auantage il est escript, nos corps ressusciteront au son de la trompette, & à la voix de l'*Archange* : *Christ* dict que Dieu enuoiras *Anges* qui recueilliront les eslus des bouts du ciel: il se peut pareillemēt prouuer qu'il y a des esprits malins appelés diables : qui soit ainsy, en l'histoire de *Iob* le diable fit descendre le feu du ciel, tua le bestial, suscita les vens, qui esbranlerent les quatre coings de la maison, & accablerent les enfans de *Iob*. En l'histoire d'*Achab* il y auoit un esprit de mēsonge en la bouche des faux Prophetes. Le diable mit au cœur de *Iudas* de trahir *Iesus Christ*. Les diables qui estoient en grand nombre dedans le corps d'un seul homme, s'appelloient legion, & obtindrent permission de

de Dieu d'entrer és pourceaux, lesquels ils precipiterēt en la mer: Il y a plusieurs autres tesmoignages de la s. Escripture, qu'il y a des Anges & des diables. Dés le commencement Dieu crea vne grande multitude d'Anges, pour citoiens du ciel, qui sont appelés esprits diuins, & sans corps demeurent, & sont messagers à executer la volōté de Dieu leur createur, soit en iustice, ou misericorde, toutesfois ils s'estudiēt au salut des hommes, au contraire des malins Anges appelés demons, ou diables, qui de leur nature taschent tousiours à nuire au genre humain, par machinations, fausses illusions, trōperies & mēsonges: & sil leur estoit permis d'exercer leur cruanté à leur volōté & plaisir, veritablement en bref le genre humain seroit perdu & ruiné, mais ils ne peuuent faire que ce qu'il plaist à Dieu leur lascher la main,

lesquels pour leur grand orgueil, furent
chassés & deiettés hors de Paradis, &
de la presence de Dieu, dont les vns sont
en l'air, les autres en l'eau, qui apparois-
sent dessus, & aux riués, les autres sus
la terre, les autres au profond d'icelle,
& demeureront iusques à ce que Dieu
viennne iuger le monde: Aucuns habitēt
aux maisons ruinees, & se transformēt
en tout ce qui leur plaist, ainsy qu'on
voit aux nues se former plusieurs & di-
uers animaux, & autres choses diuer-
ses, à scauoir sentaures, serpens, rochers,
chateaux, hommes & femmes, oiseaux,
poissons, & autres choses: ainsy les de-
mons se forment tout subit en ce qu'il
leur plaist, & souuent on les void trans-
former en bestes, cōme serpens, crapaux,
chahuans, huppés, corbeaux, boucs,
asnes, chiens, chats, loups, toreaux, &
autres: voire ils prennent des corps hu-
mains

mains vifs, ou morts, les manient tourmentent, & empeschent leurs œuvres naturelles: non seulement ils se trāsmuent en hommes, mais ausſy en Anges de lumiere: ils font ſemblant d'eſtre contraincts, & qu'on les tient attachés à des ancans, mais vne telle contrainte eſt volontaire & plaine de trahiſon: iceux Nomb. 22.28
 demons deſirent & craignent, aiment & deſdaignent: ils ont charge & office de Dieu pour exiger les peines & malesices, & pechés des meſchans, comme il ſe peut prouuer que Dieu enuoya en Pſalme 78.
 Egipte exploit par mauuais Anges: ils hurlent la nuit, & font bruit comme ſils eſtoiēt encheſnés: ils remuēt banqs, tables, treſteaux, bercent les enfans, ioüent au tablier, fueillettēt liures, content argēt, & les oit on promener par la chambre, ouurēt portes & ſeneſtres, iet-
 tent vaiſſelle par terre, caſſent pots & Pierre de ronsard en ſes hymnes.

verres, & font autre tintamarre, neãtmoins on ne voit rien au matin hors de sa place, n'y rien cassé, n'y portes ou fenestres ouuertes: ils ont plusieurs noms, comme demons, cacodemons, incubes, succubes, coquemares, Gobelins, lutins, mauvais Anges, satan, lucifer, pere de mensonge, Prince des tenebres, legion, & vn infinité d'autres noms, qui sont escripts au liure de l'imposture des diables, selon les differēces des maus qu'ils font, & és lieux ou ils sont le plus souvent.

Comme les demons habitent és carrieres.

CHAPIT. XXVII.

LOYS Lauater escript, que les metalliers affirmēt que l'on voit en certaines mines des esprits vestus comme

me ceux qui besongnent aux mines, courent ça & delà, & semblent qu'ils travaillent, encore qu'ils ne bougēt: aussy disent qu'ils ne font mal à personne si on ne se mocque d'eux, ce qu'auenāt ils ietteront quelque chose cōtre le mocqueur, ou l'endommageront de quelque autre chose. Aussy n'aguères que i'estois en la maison du Duc D'ascot, un sien gentilhomme, homme d'honneur, & qui a la plus grand part de la charge de sa maison, m'assura qu'en certaines mines d'Allemagne (ioint aussy que d'autres l'ont escrit) on oyoit des cris piteux, fors estranges, & espouuentables, comme une personne qui parleroit dedans un pot, trainant chesnes aux pieds, toussant & soupirant, tantost l'amentant comme un homme, que l'on gehenne: autres jōis un bruit d'un grand feu qui claquette, autres fois coups d'artilleries

laschees de bien loing, tabourins, clers, & trompettes, bruit de chariots & cheuaux, clacquets de foïets, cliquetis de harnois, picques, espees, hallebardes, & autres bruits, comme il se fait aux grands combas: ausſy vn bruit, comme lors qu'on veut bastir vne maison, oiant esbrâcher le bois, bruire le cordeau, tailler la pierre, faire les murailles, & autres maneuures, & ce pendant l'on ne voit rien de tout cela. Ledit lauater escript, qu'en Dauans, païs des grisons, il y a vne mine d'argent, en laquelle Pierre Briot, homme notable, & consul de ce lieu là, a faict trauailler ses annees passees, & en a tiré de grâdes richesses: il y auoit en icelle vn esprit, lequel principalement le iour du vendredi, & souuent lors que les metailliers versôient ce qu'ils auoient tiré dedans des cuues, faisoit fort de l'empesché, changeant à sa fan-

Le diable no^r
peut charmer
les ieux, et l'en-
tendement, et
les oreilles.

sa fantasie les metaux des cuues en autres, ce consul ne s'en soucioit pas autrement, quand il vouloit descendre à sa mine, se fiant que cet esprit ne luy pouuoit faire aucun mal, si ce n'estoit par la volonté de Dieu . Or aduint un iour que cet esprit fit beaucoup plus de bruit que de coutume, tellement qu'un metaillier commença à l'iniurier, & luy commander d'aller au gibet, & en son enfer avec maudissons, lors cet esprit print ce metaillier par la teste, laquelle il luy tordit en telle sorte, que le deuant estoit droitemēt derriere, & n'en mourut pas toutefois, mais vesquit longuement depuis, aiant le col tors, cogneu familièrement de plusieurs qui viuent encore, & quelques annees après mourut. Il escript beaucoup d'autres choses des esprits, que chascū peut lire en son liure. Ledit Loys Lauater au liure susdict, Chap. 12.

dict auoir ouy dire à un homme prudēt
& honorable, baillif d'une seigneurie,
dependante de Surich, qui affirmoit
qu'un iour d'esté, de grand matin, al-
lant se promener par les prés, accompa-
gné de son seruiteur, il vit un homme
qu'il cognoissoit bien, se meslāt meschä-
ment avec une iument, dequoy il fut
grandemēt estonné, retourna soudaine-
ment, & vint frapper à la porte de ce-
luy qu'il pensoit auoir veu : or il trou-
ua pour certain que l'autre n'auoit bou-
gé de son liēt, & si ce baillif n'eust dili-
gemment sceu la verité, un bon & hō-
nesté personnage eust esté emprisonné &
gesné : il recite ceste histoire à fin que
les iuges soient bien aduisés en tel cas.

Vision diabo-
lique.

Comme les demons nous peu-
uent deceuoir.

CHAP.

CHAPIT. XXVIII.



O Riceux demons peuuent en beaucoup de manieres & façons tromper nostre terrienne lourdesse , à raison de la subtilité de leur essence , & malice de leur volonté , car ils obscurcissent les œils des hommes ; avec espesses nuees qui broüillent nostre esprit fantastiquement, & nous trompent par impostures sataniques ; corrompans nostre imagination par leurs bouffonneries & impietés ; ils sont docteurs de mensonges, racines de malice, & de toutes meschâcetés à nous seduire & tromper , & preuaricateurs de la verité : & pour le dire en un mot, ils ont un incomparable artifice de tromperies ; car ils se transmuēt en mille façons, & entassent aux corps des personnes viuantés mille choses estranges , comme vieux panneaux,

des os, des ferrements, des clous, des espi-
nes, du fil, des cheueux entortillés, des
morceaux de bois, des serpens, & au-
tres choses monstrueuses, lesquelles les font
souuentefois sortir par le conduit de la
matrice des femmes, ce qui se faict a-
près auoir esbloüi la veüe, & alteré no-
stre imagination, cōme nous auons dict,
d'aucuns sont nommés incubes & suc-
cubes, comme nous auons dict: iceux
sont nommés incubes, qui par fausse ima-
gination decoiuent les femmes en dor-
mant, & succubes ceux qui decoiuent
les hommes. S. Augustin n'a pas du
tout nié que les diables transformés en
forme d'homme, ou de femme puissent
exercer les œuures de nature, & auoir
à faire avec les homes & femmes, pour
les alecher à luxyre, tromper & decep-
uoir: ce que les anciens n'ont point seule-
ment experimenté, mesme de nostre tēps
cecy

En la cité de
Dieu, au 22.
23. Chapit.
25. lib.

cecy est arriué en plusieurs prouinces, à diuerses personnes, avec lesquelles les diables ont eu à faire, transfigurés en homme & en femme. Iacobus Ruepff en ses liures de conceptu & generatione hominis, tesmoigne que de son temps vne femme perdue eut affaire avec vn esprit malin la nuict, ayant face d'homme, & que subit le ventre luy enfla, & pensant estre grosse, tōba en vne si estrāge maladie, que toutes ses entrailles tōberent, sans que par aucun artifice de Medecin, n'y de Chirurgien, peust estre secourue. Il est escript le sēblable, qu'un seruiteur boucher, lequel estant profondément plongé en vaines cogitations de luxure, fut estonné qu'il appercent subit deuant luy vn diable en figure de belle femme, avec lequel ayant eu affaire, ses parties genitales commencerent à semflamber, de façō qu'il luy sembloit auoir

Chap. dernier
lib. 15.

le feu ardent dedans le corps, & meurent miserablement.

Exemple de plusieurs illusions diaboliques.

CHAPIT. XXIX.



ET à fin qu'on ne pense que l'artifice du diable soit ancien, il a encore practiqué de nostre temps, en semblables sortes, comme plusieurs ont veu, & beaucoup d'hommes doctes ont escript, d'une fort belle ieune fille, à Constance, laquelle auoit nom Magdalaine, seruante d'un fort riche citoien de ladicte ville, laquelle publioit par tout que le diable une nuict l'auoit engrossie, & pour ce regart les potestas de la ville la firent mettre en prison, pour entēdre l'issue de cet enfantemēt, l'heure venue de
ses

ses couches, elle sentit des tranches & douleurs accoustumées des femmes, qui veulent accoucher, & quand les matrones furent prestes de recevoir le fruit, & qu'elles pensoient que la matrice se deust ouvrir, il commença à sortir du corps d'icelle fille des clous des fer, des petis tronçons de bois, de voirre, des os, pierres, & cheueux, des estoupes, & plusieurs autres choses fantastiques & estranges, lesquelles le diable par son artifice y auoit appliquees pour decenir & enbabouiner le vulgaire populace, qui adioute legerement foy en prestiges & tromperies. Boistuan affirme, qu'il produiroit plusieurs autres histoires semblables, recitees non seulement des Philosophes, mais aussi des Ecclesiastiques, lesquels confessent que les diables, par la permission de Dieu, ou pour punition de nos pechés, peuuent ainsi abuser des

Choses estranges que le diable fait croire sortir du corps humain

hommes & des femmes , mais que de telle conionction il se puisse engendrer quelque creature humaine, cela n'est pas seulement faux, mais contraire à nostre religion , laquelle croit qu'il n'y eut onques homme engendré sans semence humaine , reserué le fils de Dieu : mesme comme disoit Cassianus, qu'elle absurdité, repugnāce, & confusion seroit-ce en nature, s'il estoit licite au diable de concevoir d'hommes , & les femmes d'eux : combien depuis la creation du monde iusques à present, les diables eussent produict de monstres par tout le genre humain , iettās leur semence dans les matrices des bestes, creans ainsy par les perturbations de semence une infinité de monstres & prodiges?

De l'art magicque.

CHAP.

CHAPIT. XXX.



D'AVANTAGE l'art magique se faict par le mechant artifice des diables : or il y a de plusieurs sortes de magiciens : aucuns font venir à eux les diables, & interroguent les mors, lesquels sont nommés Necromantiens : autres Cheromantiens, parce qu'ils deuinent par certains lineamens, qui sont es mains : autres Hidromantiens, parce qu'ils deuinent par l'eau : autres Germanciens, parce qu'ils deuinent par la terre : autres Pyromantiens, qui deuinent par le feu : autres Aeromantiens, parce qu'ils deuinent par l'air, sçauoir est par le vol des oiseaux, ou par tourmens, orages, tempestes & vents : Tous lesquels ne font que tromper & abuser les incredules, qui vont au recours à ces deuins, Prophetes, malefiques, enchan-

Necromantiens.

Cheromantiens.

Hidromâciés.

Germanciens.

Pyromâciés.

Aeromâtiés.

teurs , lesquels sus tous autres sont coutumierement opprimés de perpetuelle poureté & disette, parce que les diables les engouffrent en vn abisme d'obscurité, leurs faisans à croire mensonge estre verité, par illusions & fausses promesses interturbees & insensees, qui est vne folie & insupportable boubier d'erreur, & faceßie. Iehã de Marconuille en son liure du recueil memorable d'aucũs cas merueilleux auenus de nos ans , escript d'vne diuineresse, sorsiere de Boulogne la grace, en Italie , laquelle après auoir long temps exercé son art diabolique, elle tomba en vne griefue maladie , dont elle fina ses iours , quoy voiant vn magicien qui ne l'auoit iamais voulue desaccompagner pour le profit qu'il tiroit du viuant d'elle de son art, au moyẽ de quoy il luy mit vn certain poison venefique sous les aicelles , tellement que
par

par la vertu de ce poison , elle sembloit estre viuante, & se trouuoit aux compaignees comme elle auoit acoustumé, ne semblant en rien differer d'une personne en vie, fors la couleur qui estoit excessiuement palle, & blesme : Quelque temps après il se trouua un autre magicien à Boulogne, auquel il prit fantasie d'aler voir ceste femme, pource qu'elle auoit grand bruit, à raison de son art, lequel estant arriué à ce spectacle, comme les autres pour la voir iouïr, tout subit s'escria disant, que faictes vous icy messieurs, ceste femme que vous estimés qui face ces beaux soubresaus , & ieux de passe passe deuant vous, c'est une puëte & orde charongne morte, & tout soudain elle tomba en terre morte , comme elle estoit en terre, de sorte que le prestige de satan, & l'abus de l'enchâteur fut manifesté à tous les assistans . *Langius*

Epistre 41.

en ses epistres Medicinales raconte d'une femme possedee d'un mauvais esprit, laquelle après auoir esté affligee d'une cruelle douleur d'estomach, estât delaissee par les Medecins, subitement vomit des clous fort longs & courbés, & des esguilles d'arain empaçtees avec de la cire, & des cheueux : & à la mesme espitre escript, que l'an 1539. au village nommé Tuguestag, un certain laboureur nommé Wlrich Nenzesser, après auoir enduré une cruelle douleur au flanc, luy ayant esté faicte ouuerture d'un rasoir, sortit un clou d'arain, toutes fois les douleurs s'augmenterent de plus en plus, & d'impatience se couppa la gorge : & ayant esté ouuert, on luy trouua dans l'estomach un morceau de bois, long & rond, quatre couteaux d'acier, d'esquels acuns estoient agus, les autres d'entelés en maniere de sie, & ensemble

Choses estranges trouuees dedās le corps d'un homme mort p l'astuce du Diable.

semble deux ferremens aspres, lesquels surmontoient la longueur d'une demie coudee, avec une grosse pelotte de cheveux. Il est vray semblable que toutes ces choses se sont faictes par l'astuce du diable, qui decenoit les assistans par leur veüe: Encor depuis n'agueres i'ay veu faire à un imposteur, & enchâteur, en la presence du Roy, & de messeigneurs le Marechal de Montmorenci, le Conte de Retz, & de Lansac, & le premier Medecin du Roy, & de monsieur de S. Pris, varlet de chambre ordinaire du Roy, & plusieurs autres: choses qui sont impossibles aux hommes de faire sans l'astuce du diable, qui deçoit nostre veüe, & nous fait apparoiître chose fausse & fantastique, ce quelibrement ledict imposteur confessa au Roy, que ce qu'il faisoit estoit par l'astuce d'un esprit, lequel auoit encor tēps

Histoire veüe
en la presence
du Roy & de
plusieurs.

Exod. 10. cha.

Leuit. 190.

1. des Rois 28.

Deuterono.

de trois ans, à estre en ses liës, & qu'il le tourmentoit fort: & promit au Roy son temps venu & accompli, qu'il seroit hõme de bien (Dieu luy en veille donner la grace) car il est escript, tu n'endureras point viure la sorciere. Le Roy Saul fut cruellement puni pour s'estre adressé à la femme enchâteresse. Moïse pareillement a commandé à ses Hebreux, qu'ils missent toute peine d'exterminer autour d'eux les enchanteurs. En la ville Charanti, les hommes aians appelé les femmes à coucher avec eux, auoient coustume de s'atacher avec elles, en la maniere des chiens, & ne s'en pouuoient de long temps detacher, & les aiãs quelques fois trouués, ont esté condamnés par iustice d'estre perdus en vne perche au rebours, & attachés par un lien inacoutumé, & seruoiet au peuple d'un spectacle ridicule: & telle chose se fai-

se faisoit par l'astuce du diable satanique, qui estoit une detestable risée. Or c'est une chose absurde à Pierre de la Pallude, & Martin d'Arles, soutenir, qu'au giro de la femme les diables l'aissent couler de la semence d'un homme mort, dont un enfant peut estre engendré, ce qui est manifestement faux, & pour reprouuer ceste vaine opiniõ, ie diray seulement que la semẽce qui est faicte de sang & esprit, laquelle est apte pour la generation, estant peu ou rien trãsportee, est incontinent corrompue & alteree, & par consequent sa vertu du tout esteinte, par ce que la chaleur, & esprit du cœur, & de tout le corps en est absenté, si bien qu'elle n'est plus temperree nullemẽt, n'y en qualité, n'y en quantité: pour ceste raison les Medecins ont iugé l'homme qui auroit la verge virile trop longue, estre sterile, à cause que la

Pierre de la
Pallude &
Martin d'Ar-
les soutenoient
choses impos-
sibles d'estre
faictes.

Grand
ch. 11
101

Cause de sterilité à la semence.

Grande menterie de la voisine d'Auerrois.

semence estant escoulee par un si long chemin est ia refroidie auant qu'elle soit receüe en la matrice: Aussi quand l'homme se disioinct de sa compagne trop subit, aiant ietté sa semence, elle peut estre alteree de l'air qui entre en la matrice, qui cause qu'elle ne produict aucun fruit: Ainsy donc l'on peut cognoistre combien Albert le scoliastre a lourdement failli, lequel a escript, que si la semence tombee en terre estoit remise en la matrice, il seroit possible qu'elle conceuroit: Autant en peut on dire de la voisine d'Auerrois, laquelle (comme il dict) l'auoit asseuré par serment qu'elle auoit conceu un enfant de la semence d'un homme qu'il auoit iettée dans un baing, & s'estant baignee en iceluy, elle en deuint grosse: aussy il ne nous faut nullement croire que les demons, ou diables qui sont de nature spirituelle, puissent cognoistre charnellement

lement les femmes, car à l'exécution de cet acte, la chair & le sang sont requis, ce que les esprits n'ont pas. D'avantage comme seroit-il possible que les esprits qui n'ont point de corps puissent estre esprits de l'amour des femes, et qu'ils puissent engendrer en icelles, & ausy ou il Luc 24. n'y a point de parties generantes, il n'y a ausy point de conionction, & ou il n'y a viande ne bruage, il n'y a point de semence: ausy la ou il n'a esté necessaire auoir succession, & repeuplement, la nature n'a point baillé le desir d'engendrer. D'avantage les demons sont immortels & eternels, qu'ot ils dōc necessité de ceste generatiō, puis qu'ils n'ont affaire de successeurs, d'autāt qu'ils seront tousiours? Encore n'est il en la puissance de satan, n'y à ses Anges d'en creer de nouvelles, & si ainsy estoit, de puis que les demons sont creés, qu'ils eussent peu

Il n'est possible à satan de creer nouvelles creatures.

en engendrer d'autres , il y auroit bien de la diablerie sus les champs.

De incubes , & succubes.

CHAPIT. XXXI.

LES Medecins tiennent que incubus, est un mal ou la personne pense estre opprimee & suffoquee, de quelque pesante charge sur son corps, & vient principalemēt la nuict, le vulgaire dict, que c'est une vieille qui charge, & comprime le corps: La cause est le plus souuent pour auoir beu & mangé viandes par trop vaporeuses, qui ont causé une crudité, desquelles se sont esleuees au cerueau grosses vapeurs, qui remplissent les ventricules du cerueau, à raison de quoy la faculté animale, qui faict sentir & mouuoir, est empeschee de reluire

reluire par les nerfs, dont sensuit une suffocation imaginaire, par la lesion qui se faict tāt au diaphragme, qu'aux polmons, & autres parties qui seruent à la respiration. Et alors la voyx est empeschee, tellemēt que si peu qui leur en demeure, c'est en mugeāt, & balbutiant, & requerant aide & secours, s'ils pouuoient parler. Pour la curation faut euitter les viandes vaporeuses, & vins fors, & generalement toutes choses qui sont causes de faire esleuer les fumees au cerueau.

Autres histoires non hors de propos.

Aucuns estiment que se soit une chose monstreuse de se lauer les mains de plomb fondu, mesme Boituan en ses histoires prodigieuses, chapitre 8. recite, que Hierosme Cardan lib. 6. de subtilitate, en escript c'este histoire cōme prodigieuse : lors dict il que i' escri-

uois mon liure des subtiles inuentions, ie
vy un quidam à Milan, lequel lauoit
ses mains de plomb fondu, et prenoit un
escu de chacun spectateur : Cardan
tachant à rechercher ce secret en natu-
re dit, que par necessité il falloit que
l'eau de laquelle il se lauoit premiere-
ment les mains fust extremement froi-
de, & qu'elle vst une vertu obscure, &
crasse, toutefois ne la d'escript point. Or
depuis n'agueres i'ay sceu quelle elle
estoit, d'un gentilhomme qui la tenoit
pour un grand secret, & l'aua ses mains
de plomb fondu en ma presence, & de
plusieurs autres, dont ie fus fort emer-
ueillé, & luy priey affectueusement de
me dire le secret, ce que volontiers m'ac-
corda pour quelque seruice que luy a-
uois faict, ladicte eau n'estoit autre
chose que son urine, de laquelle se lauoit
premierement les mains, ce que i'ay trou-
ue

Il faut du tout
lauer, ou oin-
dre ses mains,
autrement on
se brulleroit,

ué estre veritable pour en auoir fait l'ex-
perience depuis : ledict gentilhomme en
lieu de son urine se frottoit les mains
premieremēt d'unguentum aureum, ou
d'un autre semblable: ce que i'ay pareil-
lement experimenté, & en peut on don-
ner raison, par ce que leur substāce cras-
se empesche que le plomb n'adhère aux
mains, & le chasse de costé & d'autre
en petites papillottes. Et pour l'amour
de moy fit d'auantage, il prit vne pelle
toute rouge, & ietta dessus des tran-
ches de l'ard, & le fit fondre, & tout
flambant, du degoust s'en lāua les
mains, ce qu'il me dict faire au moyen
de ius d'ognon, duquel au parauant se-
stoit lauē les mains. I'ay biē voulu reci-
ter ces deux histoires (encor qu'elles ne
soient du tout à propos) à fin que quel-
que bon compagnon par ce moyen puis-
se gaigner la passade entre ceux qui

ne scauroient ce secret.

Des monstres marins.

CHAPIT. XXXII.

IL ne faut douter qu'ainsy qu'on voit plusieurs monstres d'animaux de diuerses façon sur la terre, ausy s'en faict il en la mer d'estrange sorte, d'esquels les uns sont hommes depuis la ceinture en haut, nommés tritons, les autres femes, nommées serenes, qui sont couuers d'escailles, ainsy que d'escript Pline, sans toutefois que les raisons lesquelles auons aleguees par cy deuant, de la commixtion & meslange de semence, puissent servir à la naissance de tels monstres. Dauantage on voit dans des pierres & plantes effigies d'hommes, & autres animaux, & de raison il n'y en a

Pline 9. lib. de
son histoire
naturelle.

*en a aucune, fors de dire que nature se
ioüe en ses œuvres.*

*Nature se
ioüe en ses
œuvres.*

*Du temps que Mena estoit gou-
verneur d'Egipte, se proumenant du
matin sus la riue du Nil, vit sortir un
homme hors de l'eau iusques à la cein-
ture, la face graue, la cheueleure iaune,
entremeslee de quelques cheueux gris,
l'estomach d'os, & les bras bien for-
més, & le reste de poisson. Le tiers iour
d'après, vers le point du iour, un autre
monstre apparut ausy hors de l'eau a-
uec un visage de femme, car la dou-
ceur de la face, les longs cheueux, & les
mammelles le monstroient assés, & de-
meurerent si long temps dessus l'eau, que
tous ceux de la ville les virent l'un &
l'autre à leur aise.*

*Portrait d'un Triton & d'une Se-
rene veüe sus le Nil.*



Rondelet en son liure des poissons
escript , qu'on a veu vn monstre marin
en la mer de Nortwege , lequel tost
qu'il fut pris, chascun luy donna le nom
de moine , & estoit tel comme tu peux
voir par ce portrait.

Monstre marin aiāt la teste d'vu
moine armé, & couuert descail
le de poisson.

L iij



*Vn autre monstre d'escript par ledict
Rondelet, en faço d'un Euesque, vestu
d'escaille, aiant sa mitre & ses orne-
mens pontificaux, comme tu vois par
ceste figure, lequel a esté veu en Po-
longne 1531. comme d'escript Gesnerus.*


Figure d'un monstre marin, re-
semblant à un Euesque, vestu
de ses habis pontificaux.






Hieronimus Cardanus enuoya ce monstre icy à Gesnerus, lequel auoit la teste semblable à vn ours, les bras & mains quasi comme vn singe, & le reste d'un poisson, & fut trouué en Macerie.


Figure d'un monstre marin aiant
la teste d'ours, & les bras d'un
singe.



En la mer Tyrrene , près la ville de Castre, fut pris ce monstre, aiant la forme d'un lion, couuert descailles , lequel fut présenté à Martinus pour lors Euesque , lequel après la mort du Pape Paul troisiésme , succeda au Papal: iceluy lion iettoit vne vois semblable à celle d'un homme , & avec grande admiration fut amené en la ville , & tost après mourut, aiant perdu son lieu naturel, comme nous tesmoigne Philippe Forestus, au liure 3. de ses Chroniques, duquel la figure est telle.


Figure d'un lion marin couuert descailles.





*L'An 1523. le 3. iour de Nouembre,
fut veu ce monstre marin à Romme, de
la grandeur d'un enfant de cinq ou six
ans, aiant la partie superieure humai-
ne iusques au nombril, hors mis les oreil-
les, & l'inferieure semblable à un pois-
son.*

*Image d'un monstre marin aiant
figure humaine.*



-9872



Gesnerus faict mention de ce monstre marin , dont en auoit recouuert le portraict d'un peintre, qui l'auoit veu en Anuers au naturel, aiant la teste fort furieuse , avec deux cornes, & longues oreilles , & tout le reste du corps d'un poisson , hors les bras qui approchoient du naturel, lequel fut pris en la mer Illirique, se iettant hors du riuage, tachant à prẽdre un petit enfant qui estoit prẽs d'iceluy, & estant poursuiui de prẽs des mariniers, qui l'auoiẽt aperceu, fut blessẽ de coups de pierres , & peu aprẽs vint mourir au bort de l'eau.

Figure hideuse d'un diable de mer.

M



Ce monstre marin aiant la teste & les creins, & le deuant d'un cheual, fut veu en la mer Occeane, la figure duquel fut aportee à Rome au Pape pour lors regnant. Gesnerus.

Figure d'un cheual de mer.

M ij






Olaus Magnus dict auoir eu ce mō-
stre marin d'un gentilhomme Anglois,
& auoir esté pris prés le riuage de Ber-
gue ; lequel ordinairement habitoit.
Encore de n'agueres on en fit present
d'un semblable au Roy à present re-
gnant, qui fit nourrir assés long temps à
Fontaine Belleau, lequel sortoit souuēt
hors de l'eau, puis si remettoit.

Charles 9.
Roy de France.

Figure d'un veau marin.


M iij



Ce monstre c'est veu en la mer Occ-
 ceane, aiant la teste d'un porc sanglier, Gefnerus
 lequel est de merueilleuse grandeur,
 aiant les dents canines, longues, tran-
 chantes, & aigues, semblables à celles Nature mai-
 d'un grand sanglier, estât couuert d'es- stresse curie-
 cailles, mises par un grand ordre de na- re de toutes
 ture, comme tu vois par ce portraict. choses.


Figure d'un sanglier marin.

M iij



Ce monstre Marin, comme dict Olaus, fut veu en la mer, près l'isle de Thylen, situee vers le septentrion, l'an de grace 1538. de grandeur presque incroyable, à scauoir de soixante & douze pieds de longueur, & quatorze pieds de hauteur, aiant distance entre les deux œils de sept pieds, ou enuiron : son foye estoit si grand qu'on en remplit cinq tonneaux, la teste semblable à vne truie, aiāt un croissant situé sus le dos, au milieu de chasque costé du corps trois œils, & le reste tout couuert d'escaille, comme tu peus voir par ceste figure.

Figure d'une truie marine.




Ce monstre, dict elephant de mer, cōme dict Hect. Boet. au liure qu'il a escript de la description d'Escoffe, est plus grand & gros qu'un elephant, habitant en l'eau & en terre, aiāt deux dets semblables à un elephāt, par lesquelles (lors qu'il veut prēdre son sommeil) s'atache & pēd aux rochers, & dort si profondément, que les mariniers l'aperceuant ont loisir de prendre terre, & le lier. avec de grosses cordes, en plusieurs endroicts, puis menent un grād bruit, & luy iettēt des pierres pour le reueiller, & lors tache à se ietter, cōme de coutume, avec grande impetuosité en la mer, mais se voiant pris, se rend tellement paisible, qu'on en peut ioüir facilement, & ainsy l'assoment, & en tirent la gresse, puis l'escorchēt pour en faire des courroyes, lesquelles, par ce qu'elles sont fortes, & ne se pourrissent, sont bien estimees.


Figure d'un Elephant de mer.




Il se trouue en la mer de plusieurs, estranges, & diuerses sortes de coquilles, que l'on peut dire que nature, chambriere du grand Dieu, se iouë en la fabrication d'icelles, dont ie t'ay faict por- traire ces trois, qui sont dignes de gran- de contemplation, & admiration, dans lesquelles il y a des poissons, comme ly- maçons en leur coquilles.









Pline Chap. 30. liure 9. de son histoire naturelle nōme ce poisson, Nautilus ou Nauticus, auquel est grandement à considerer, que pour venir au dessus de l'eau, se met à l'enuers, remon- tant peu à peu, pour escouler l'eau qui seroit en sa coquille, à fin de se rēdre plus leger à nauiger, comme s'il auoit espuisé la sentine de son nauire. Et estant au dessus de l'eau, il recourbe en amont deux de ses pieds, qui sont ioincts ensemble avec vne pellicule fort mince pour luy seruir de voile, se seruant de ses bras cōme d'auirōs, tenāt tousiours sa queue au milieu, en lieu de Timon: & va ainsy sur la mer, contrefaisant les fustes & Galeres: Que s'il se sent auoir peur, il remplit sa coquille d'eau, en la plongeāt, & ainsy s'en va au fons.

Portrait du poissõ dict Nauticus.





Figure d'un chancre de mer, que les Medecins & Chirurgiens ont comparé à la tumeur chancreuse, à cause qu'elle est ronde, & aspre, & les venes d'autour aux pieds tortus de c'est animal: Aussi lors qu'il est acroché cōtre les rochers, difficilement en est destaché: d'avantage il est de couleur fusque & noirastre, comme sont les tumeurs chancruses: & voyla pourquoy les antiens ont donné ce nom de chancre à telle tumeur, à cause de la similitude qu'ils ont l'un à l'autre. Les chancres sont trouués dedans les tests durs des moules & des huystres, & autres poissons, qui ont tests pour y estre nourris & conserués, comme dedans des cauernes & maisons fortes, par ce qu'il n'y a beste qui n'ait ce d'on de nature de pourchasser ce qui luy est necessaire, tant pour se nourrir, que pour se retirer et heberger. Les pescheurs

(se dict Aristote) disent qu'ils naissent avec ceux, dans les tests desquels ils sont trouués. Les chancres ont dix pieds, cōprenāt leurs deux bras fourchus, & au dedans dentelés pour s'en seruir cōme de mains. Ils ont la queue replee par dessus : ils sont couuers de coques aspres, faictes de demys cercles : ils ont six cornes à la teste, & les œils sortans fort au dehors, & fort separés l'un de l'autre : au printemps ils se despoüillent de leur coque, comme vn serpent de sa peau, & se sentans afoiblis & desarmés, ils se tiennent cachés aux creux des rochers, iusques à ce que leur coquille soit reuenue, & dure.

La figure du chancre de mer reuel semblant aux tumeurs chancreuses.



Description de la baleine.

La baleine est le plus grand monstre poisson qui se trouue en la mer , de longueur le plus souuent de trente six coudées, de huiët de l'argeur, l'ouuerture de la bouche de dixhuit pieds , sans auoir aucunes dêts, mais au lieu d'icelles, aux costés des machoires, a des lames comme de corne noire , qui finissent en poils, semblables à soye de pourceau , qui sortent hors de sa bouche, & luy seruent de guide pour monstrier le chemin , à fin qu'elle ne se heurte contre les rochers: ces œils sont distans l'un de l'autre de quatre aunes, & plus gros que la teste d'un homme, le museau court , & au milieu du front un conduit par lequel attire l'air, & iette une grãde quantité d'eau, comme une nuee , de laquelle elle peut remplir les esquifs & autres petis vaisseaux, & les renuerfer en la mer. Quand elle

elle est saoule , brame & crie qu'on la peut ouyr d'une lieüe Françoisse : elle a deux grandes aisles aux costés, desquelles elle nage , & cache ses petis quand ils ont peur , & au dos n'en a point : la queue est semblable à celle du dauphin, & la remuāt esmeut si fort l'eau, qu'elle peut renuerfer un esquif: elle est couuerte de cuir noir , & dur. Il est certain par l'anathomie qu'elle engēdre ses petis vifs, & qu'elle les allete : car le masle a des testicules & membre genital, & la femelle une matrice & mammelle. Elle se prent en certain temps d'hiver en plusieurs lieux, mesmement à la coste de Bayonne, près un petit village distant de trois lieües, ou environ, de ladicte ville, nommé Biarris , auquel fus enuoyé par le commandemēt du Roy (qui estoit pour lors à Bayonne) pour traicter monseigneur le Prince de la Rochesurion,

qui y demeura malade, ou i' appris, & confirmey le moyen qu'ils usent pour ce faire, qu'auois leu au liure que monsieur Rondelet a escript des poissōs, qui est tel. Contre ledict village il y a une montagnete, sus laquelle dēs long temps a esté edifiee vne tour tout exprés pour y faire le guet, tant le iour que la nuict, pour decouurir les balenes qui passent en ce lieu, & les apercoiuent venir tant pour le grand bruit qu'elles font, que pour l'eau qu'elles iettent par vn conduit qu'elles ont au milieu du front, & l'aperceuant venir sonnent vne cloche, au son de laquelle promptement tous ceux du village accourent avec leur equipage de ce qui leur est necessaire pour l'attraper. Ils ont plusieurs vaisseaux & nasselles, dont en d'aucuns il y a des hommes seulement constitués pour pescher ceux qui pourroient tomber en la mer,

la mer, les autres dediés pour combattre, & en chascun il y a dix hommes forts & puissans pour bien ramer, & plusieurs autres dedans, avec dars barbelés, qui sont marqués de leur marque pour les recognoistre, attachés à des cordes, & de toutes leurs forces les iettent sus la balene, & lors qu'ils aperçoient qu'elle est blessée, qui se cognoit pour le sang qui en sort, laschent les cordes de leurs dars, & la suivent, à fin de la laisser, & prendre plus facilement: & l'attirent au bort, se reioüissent & font godechere, & partissent chascun, aiant sa portio selon le deuoir qu'ils auront faict, qui se cognoit pour la quantité des dars qu'ils auront ietté, & se seront trouués, lesquels demeurent dedans, & les recognoissent à leur marque. Or les femelles sont plus faciles à prédre que les masles, pour ce qu'elles sont soigneuses de sauuer

La chair de la
baleine n'est
rien estimee.


leurs petis, & s'amusent seulement à les
cacher, & non à s'eschaper : La chair
n'est rien estimee, mais la langue, pour ce
qu'elle est molle & delicieuse la sallent:
premieremēt le lart, lequel ils distribuēt
en beaucoup de prouinces, qu'on mange
en caresme au pois : ils gardent la gresse
pour brusler, et frotter leurs batteaus, la-
quelle estāt fondue ne se congele iamais:
des lames qui sortent de la bouche, on en
faict des vertugales, busques pour les
femmes, & manches de cousteaux, &
plusieurs autres choses: & quant aux os,
ceux du païs en font des clostures aux
iardins : & des vertebres, des marches
& selles à se soir en leurs maisons: i'en fis
apporter vne que ie garde en ma mai-
son, comme vne chose monstrieuse.

Figure d'une baleine prinse, &
le depart d'icelle.



Cet oiseau est dict *Autruche*, & est le plus grand de tous, tenant quasi du naturel des bestes à quatre pieds, fort commun en *Afrique*, & en *Aethiopie*: il ne bouge de terre pour prendre l'air, neantmoins passe un cheval de vitesse: c'est un miracle de nature que cet animal digere indifferemment toutes choses: ses œufs sont de merueilleuse grandeur, iusques à en faire des vases: son pannage est fort beau, comme chacun peut cognoistre & voir par ce portraict.

Figure d'une Autruche.





Hierome Cardan en ses liures de la subtilité dict , qu'aux isles des Moluques on trouue sur la terre, ou sus la mer un oiseau mort, appelé Manu-codiata, qui signifie en langue Iudaïque, oiseau de Dieu, lequel on ne voit point vif. Il habite en l'air haud, son bec & corps semble à l'arondelle, mais aorné de diuerses plumes: celles qui sont sus la teste sont semblables à l'or pur, & celles de sa gorge à celles d'un canard, sa queue & aisles semblables à celles d'une panesse: Il n'a aucun pied, & si quelque lassitude le prend, ou bien qu'il vueille dormir, il se pent par ses plumes, lesquelles il entortille au rameau de quelque arbre: iceluy vole d'une merueilleuse vitesse, & n'est nourry que de l'air & rosée. Le masle a une cavitè sus son dos, ou la femelle couue ses petis. Linterieur de
cet

cet oiseau , comme d'escript Melchior
Guillaudin Beruce, est farcy & replet
de gresse , & dict en auoir veu deux:
Quant à moy i'en ay veu un en ceste
ville, qu'un homme notable auoit, dont
en faisoit grand estime, duquel oiseau
tu as icy le portraict.

Arestation de
l'auteur.

Portraict de l'oiseau de Paradis.






Il y a une chose digne d'estre nottee en ceste beste dicte Rhinoceros, c'est qu'il a une perpetuelle inimitié contre l'Elephant, & lors qu'il veut se preparer au combat, il esguise sa corne contre un roc, et tasche tousiours de prendre l'Elephant par le ventre, lequel a beaucoup plus tendre que le dos : il est aussy long que l'Elefant, mais toutefois il est plus bas de iambes, & a son pelage de couleur de Bouys, piccoté en plusieurs endroits. Pompee, comme escript Pline chapit. 20. lib. 8. fit voir le premier à Rome.


Portraiçt du Rhinoceros.





On trouue cet animal nommé Cameleõ en Afrique, & est faict cõme vn le-sard: dauantage il a les flancs & le ventre ensemble cõme les poissons: ausſy a il des arestes sur le dos, cõme on voit aux poissons: il a le musle cõme vn petit cochõ, la queue fort lõgue, qui va tousiours en appointant, ses ongles fort aigus, & marche ainsy pesamment qu'une Tortue, & a le corps rude & escaillé comme vn Crocodile: il ne ferme iamais l'œil, et ne bouge point la prunelle: au reste cest vne chose admirable de parler de sa couleur, car à toutes heures il la change, qui se faict à cause qu'il a le cuir fort delié & mince, & le corps transparant, & outre ce a vne proprieté indicible pour ce faire, estãt mort il est pasle: i'ay obserué ceste description en celuy que i'ay en mon logis.

Portraict d'un Cameleon.



A V L E C T E V R.



E s iours passés, deuisant
 de la Chirurgie, & princi-
 palemēt des plaies faictes
 aux parties nerueuses, a-
 uec mōsieur Belāger (Me-
 decin ordinaire du Roy, hōme scauāt,
 & bien experimēté en la Medecine, &
 Chirurgie, pour auoir suiui long temps
 les guerres, & s'estre trouué aux batail-
 les) tōbasmes en propos des plaies qui
 se font aux parties nerueuses, ou nostre
 deuis s'accorda fort l'vn à l'autre, & aiās
 discours de ceste matiere assés long
 temps, & cōme n'estant satisfaiēt à son
 gré, de ce qui en a esté escript par le
 passé, me pria en faueur de la republic-
 que, & de l'amitié qui est entre nous
 deux, de mettre par discours, à la fin de
 ce present liure, ce que i'en ay cogneu
 à l'œil, & effaiēt, qui a esté cause que me
 submettant à sa requeste, ay mis quant
 & quant la main à la plume, combien
 que se ne soit icy le propre lieu d'en
 traiter.

DES PLAIES

DES NERFS, TENDONS, ET DES IOINCTURES ET MEMBRANES.

CHAPITRE I.



A cause de la solution de continuité de ces parties nerveuses peut estre faicte en diuerses manieres : à scauoir par choses qui contondent, meurtrissent, & escachêt, comme coups de pierre, de baston, de marteau, de masse, d'une balle d'arquebuse, d'un garrot d'arbaleste, ou d'une morsure, & choses semblables: pareillement de choses aigues & piquantes, comme d'une esguille, d'un poinçon, d'une lancette, d'un dart, fleische, espine, ou d'une beste veneneuse,
ou non

ou non veneneuse, ou autres choses qui picquent: ausſy de choses trenchantes, comme d'espee, d'un couteau, & autres, ou estendēt si fort qu'ils rompent & dilacerent: *Aucunes* sont faictes selon la longueur des nerfs, tendons, & membranes, autres selon la largeur, avec totale incision, ou d'une portion seulemēt: *Aucunes* sont superficielles & petites, autres grandes & profondes.

Differences.

Les accidens qui aduiennent en ses blessures sont, douleur vehemēte, fluxiō, inflammation, fièvre, delire, syncope, aposteme, gāgrene, & totale mortificatiō de la partie, spasme, & souuent la mort, pour la communication & colligance qu'ils ont au cerueau, & autres parties nobles. Or quand les nerfs ou tendons ne sont couppés qu'à demy, & superficiellement, la plaie en est beaucoup plus dangereuse, que lors qu'ils sont couppés.

Pronostic.

du tout: ainsy est il du perioſte , pericrane, & membranes, par ce que la partie, ou portion qui n'est couppee ſe retire vers ſon principe, qui cauſe ſpaſme, & lors qu'ils ſont du tout couppés , il ne ſuruiuent aucunement , d'autant qu'ils ne trouuēt nulle contrariété quād ils ſe retirent , ce qui eſt manifeſte aux plaies de la teſte, lors que le pericrane n'eſt qu'à demy couppé, les accidēs ſont plus grāds que lors qu'il eſt du tout couppé: ce que nous voions lors qu'on l'incife pour appliquer le trepan: & en toutes les bleſſures des parties nerueuſes , la picqueure emporte l'excellence de produire pernietieux accidents , par ce que la plaie eſt petite & eſtroicte , au moyen dequoy nulumeur n'en peut ſortir: parquoy de ſa demeure y acquiert vne virulence, qui ſimbibe en la ſubſtāce des nerfs, tendons & membranes, qui eſt la cauſe qu'ils

se qu'ils se grossissent, & estants grossis, s'accourcissent, & lors par repletion & douleur est causé spasme, & autres accidens si dessus mentionnés.

Cure de la poincture des nerfs.

CHAPIT. II.

POUR la curation, deux choses sont à considerer, à scauoir, ceder la douleur, & garder qu'il ne se face nouvelle fluxion & aposteme: & pour ce faire on applicquera à la plaie, au commencement, un medicamēt dessiccatif, & de subtile & ténüe substance, à fin qu'il penetre au profond de la pointure, & qu'il consomme les humidités qui y acquierent (comme nous auons dict) promptement acrimonie, qui est cause d'induire grādes & extremes douleurs;

Et autres accidēs: Parquoy on y appliquera huile de terebentine, avec un peu d'eau de vie bien rectifiée, Et poudre d'euphorbe, ou de souphre incorporés ensemble, Et y seront appliqués assés chauds, ou en lieu d'iceux huile de vitriol, avec eau de vie: Et autour de la partie, un cataplasme tel que cestui, ℞ farine hord. Et orob. an. ℥ ij, sirup. acetos. ℥ iij, flor. camomil. p ij, lixiij q. suff. fiat cataplas. Et ou tels remedes n'auroient peu apaiser la douleur, Et qu'il y eust ia quelque contraction de nerf, on doit promptement y appliquer de l'huile toute feruente, avec un peu de linge attaché au bout d'une espatule, Et en toucher le fond, Et les parois de la plaie deux ou trois fois, Et tout à un instant ceste cauterisation fera ceder la douleur, par ce qu'elle brusle le nerf, le tendon, ou membrane, d'autant que la
com-

combustion en oste le sentiment, & n'en aiant plus, ne fait pareillement aucune douleur : ce qu'on voit aux grandes & extremes douleurs des dents pertuisees, lors qu'on peut toucher au profond de leurs racines d'un fer ardent, ou d'eau forte, ou d'huile de vitriol, la douleur cesse promptement : & semblablement nous voions aux ulceres corrosiues, & ambulatiues, lesquelles sont tousiours accompagnees d'une extreme douleur, & lors qu'on y applique un medecament escaroticque, comme Aegiptiac fortifié, ou autre semblable, tost après la douleur est appaisée.

Il y a plusieurs Medecins & Chirurgiens qui defendēt d'appliquer aux plaies des nerfs, tendons, & membranes, medecaments aglutinatifs, de peur qui ne se face une trop subite union: mais quant à moy ie suis d'avis contrai-

Histoire.

re , pour ce que i'ay plusieurs fois traité telles plaies, lesquelles i'ay promptement aglutinees, sans qu'il y soit suruenue nul accident: & entre les autres de recente memoire , un mien voisin voulant embrocher un aloyau de bœuf qui estoit gelé, se perça de la broche le milieu de la main, de part en part : un autre nommé monsieur le Cocq , procureur en court d'esglisse , demeurant rue nostre dame, lequel en serrant certains papiers qui estoient sus son contoir , trouua entre iceux un tranche plume , qui luy passa tout au trauers de la main , auxquels ie mis de mon baulme , asses chaud , sans nulle tente, & autour de leurs mains un defensif, & furent bien tost gueris, sans leur aduenir nuls accidens.

Des

Des plaies des ioinctures.

CHAPIT. III.

LES plaies des ioinctures sont le plus souuent mortelles, à cause des aponeuroses, ou tendons membraneux qui les lient, ausquels s'inscrēt des nerfs, dont elles sont tissues, & partant ont grand sentiment, qui cause les susdicts accidents, & encore plustost si elles sont faictes en la partie interieure desdictes ioinctures, comme sous les aisselles, au ply du bras, au dedans du carpe de la main, & sous le iarret, & aux aines, pour les grandes venes, artères, & nerfs qui sont en ses parties là, & par le moien de la solution de continuité se fait grāde douleur, hemorrhagie, & autres accidens predicts: Parquoy pour y obuier, on doibt preuoir selon la nature

desdicts accidens , comme flux de sang,
& ceder la douleur tant qu'il sera pos-
sible, & si la plaie est grande, on la re-
coudra pour reünir les parties separees,
delaisant un orifice en la partie decli-
ue, pour donner issue à la sanie : & lors
que la plaie sera cousue , on y applique-
ra de ceste poudre ordōnee par de Vigo,
par l'espace de deux ou trois iours , pour
cōseruer ladicte cousture, ℞ thur. sang.
draco. bol. arme. terræ sigill. an. ʒ ii, a-
loës, mast. an. ʒ i, fiat pul. subtilis, puis a-
près auoir aspergé ladicte poudre sur la
cousture, on appliquera un defensif tout
au tour de la ioincture , faict de blancs
d'œufs, peu d'huile rosart, bol, mastic &
farine d'orge : & si on y met vne tente,
elle sera courte, & de grosseur qu'il sera
besoing , à fin qu'elle n'induisse douleur,
& sera oincte d'un digestif , faict de
iaulne d'œuf, huile rosart, terebentine,
& un

Et un peu de saffran. Aussi si ladicte plaie estoit petite & estroite, pour obuier aux accidens, on l'agrandira, à fin que les humeurs, qui par le moien de la douleur seroient flués à la partie, puissent auoir libre issue: d'auantage faut tenir la partie en repos, & se garder du froit, & d'aplication de medicaments relaxans, emollients & humectans, mais au contraire qui astringent & sechent: exemple d'un cataplasme, ℞ furfuris macr. farinae hordei & fabar. an. ℥ iij. flor. camomill. meliloti an. m ℞, terebint. ℥ ij, mellis communis ℥ ij, olei mirth. ℥ i, oximell. simpl. vel oxicrat. vel lixiu. q. suff. fiat cataplas. ad formā pulvis. Autre. Prenés lie de vin, son de forment, du tan, noix de cypres, de galle, terebenth. & de ce soit faict cataplas. on en peut faire plusieurs autres semblables, qui ont vertu d'aestreindre,

secher, & roborer les ioinctures, ce faisant cedent la douleur, & gardent que les humeurs ne courent à la partie. Au dedans de la plaie, n'y autour d'icelle, on se gardera d'y appliquer medicaments huilleux, d'autant qui relachent la substance des muscles & membranes, & les nerfs, & par ce moien reçoivent plus facilement fluxiõ, ioint que lesdictes huilles en relachant humectent la plaie, qui est rēdue plus difficile à estre consolidee: parquoy vserés de medicaments dessiccatifs & astringents. Exemple d'un remede astringent & aglutinatif, ℞ terrebint. venet. ℥ ij, aquæ vitæ parū, pul. aloës, mast. mirrh. bol. arme. an. ℥ ij, ou nostre baume, auquel on adioutera poudre dessiccatieue, sans acrimonie, selõ qu'on verra estre besoing: Et s'il surviēt quelques accidents, on y remedira par remedes contrariats à iceux, selon qu'il sera

sera besoin: & principalement on doit-euiter le froit, lequel est totalement contraire aux plaies & ulceres: qui soit vray, il meurt un infinité d'hommes estans blessés l'hyuer de petites plaies, qui ne feroient de bien grandes l'esté: ce qui est prouué par Hippocrates, qui dict: Aux parties ulcerees le froit est mordicant, il endureist le cuir, il faict douleur, & rend les plaies insuppurables (d'autant qu'il refroidit la chaleur naturelle qui faict la suppuration) il engendre liuidité, comme meurtrisseure, frissons, fieures, cōuulsions, & tensions. Et faut icy noter que de telles plaies sortent diuers excrements, & principalement une humeur glaireuse & muscilagineuse, & autrefois fort liquide, qui est leur propre humeur dōt elles sont entretenues & alimentees, ainsy que les autres parties sont nourries, & entrete-

Hipp. lib. 5.
des aphor.
aphor. 20.

En sa grand
Chirurgie.

nues d'aliments propres a icelles, comme l'os estant frastruré par son aliment pro-
cree un callus : Et c'est ce que Paracelse dict que chasque partie a son baume propre à sa nutrition & entretien, lequel lors que la partie est vulneree, se decoule, ainsy que l'on voit l'ors qu'on taille la vigne decouler une humidité qu'on appelle sève. Or telle humidité issant des parties nerveuses est tousiours accompagnée d'une grande froideur, qui cause une extreme douleur, qui repugne à tous remedes potentielement chauds : Et pour appaiser ceste douleur, & corriger l'intemperature froide, & pour prouver que le plus souuent icelle est froide, c'est que l'on voit decouler une humidité sereuse, accompagnée d'une certaine glaire muſſilagineuse, & quasi comme cōgelee : & pour ceste cause on doit appliquer choses calefacti-
ues,

ues , non seulement potentielement, mais ausy actuellement, comme vessies de bœuf, ou de porc, demies plaines d'une decoction resolutiue , ou des briques fort eschauffees, puis esteintes en vin, & posees tout au tour de la ioincture , & les rechauffer lors qu'il en sera besoin. Or ceste chaleur ainsy actuelle aide à nature à cuire, digerer & resoudre l'humour contenu en la partie , & la fortifie, d'autant que la chaleur des ioinctures est petite, & partant ne peut reduire les medicaments de puissance en esfaict, si elle n'est aidee par le benefice des remedes actuellement chauds : qui soit

pour prouuer cela, estant en hyuer en mon estude, il y auoit un vent coulis qui me donna contre une hanche , & me voulant leuer, il me fut du tout impossible , pour le froit qui auoit refroidi les parties nerveuses , or ie sentoie une

Histoire de
l'auteur.

Nota que la
douleur estoit
faicte d'in-
temperature,
sans matiere.

extreme douleur, laquelle ne peut estre
apaisee que par application de bricques
fort chaudes, sur la partie douloureuse,
aussy des vessies de bœuf à demy plai-
nes d'une decoction d'herbes chaudes,
Et autrefois de bouteilles remplies d'eau
boüillante, autrefois de mil & auoine,
fricassés en une poille, avec un peu de
vin blanc: ceste chaleur actuelle me fit
perdre la douleur, ce que n'ussēt peu ia-
mais faire les emplastres, cataplasmes,
Et autres remedes potētiellēmēt chauds:
parquoy ie veux conclurre que la dou-
leur des ioinctures est faicte plustost de
matiere froide, que de matiere chaude.

Bon docu-
ment au ieu-
ne Chirurgiē.

Or pour retourner à nostre propos, le
Chirurgien methodique, pouruoirā à
la cure de telles plaies, prenant indica-
tion de choses naturelles, non naturel-
les, & contre nature: & d'auantage
faut qu'il sache comme il faut situer la
partie

partie dont la ioincture est vlceree.

De la situation des ioinctures
estans vulnerees.

CHAPIT. II II I.

SI la plaie est en la partie
anterieure de l'espaule, on
doibt mettre sous l'aisselle
une assés grosse compresse,
& mettre le bras en escharpe, suppor-
tant le coude, à fin d'esleuer & tenir la
teste de l'os du haut du bras contremot,
& que par ce moyen la glutination &
consolidatiō soit mieux, & plustost fai-
cte : Et si la plaie est en la partie infe-
rieure, lors que nature commandera à
produire chair; & conioindre les labies
de la plaie, on doit auoir esgart à faire
leuer & hausser le bras du malade par
interualle, car si on manque de ce faire,

après que la cicatrice sera faicte, le malade ne pourra iamaïs bien leuer le bras en haut.

De la situation du coude.

Si la plaie est en la ioincture du coude, on doit situer le bras en figure moiëne, c'est à dire non droit, n'y du tout polié, car estant la plaie consolidee, le bras demeurant en figure moyenne, le malade pourra s'aider trop mieux du bras, que s'il demeuroid droit ou trop courbé.

De la situation du carpe.

Lors qu'il y a plaie au carpe, ou aux ioinctures des doigts, exterieure, ou interieure, on doit situer la main et les doigts demy flechis, en mettāt dedans la main une pelotte, ou compresse, parce que si on tient la main & les doigts en figure droite, & non courbés, le malade aura la main & les doigts quasi comme impuis-

puissans en leur actiō, parce que l'actiō de la main est de prendre, partant on observera la figure à demy flechie, car demeurans ainsy, le malade se pourra encore aider de sa main, prenant diuers instruments, comme une espee, picque, halebarde, la bride d'un cheual, & autres choses qui se font par l'action de la main.

De la situation de la ioincture de la hanche.

S'il y a plaie en la ioincture de la hanche, on doibt faire de sorte que la teste de l'os Femoris ne sorte hors de sa place, qui se fera par compresses & ligatures, faisant tenir le malade sus le dos, & lors que la plaie commencera à se consolider, on doibt faire mouvoir l'os Femoris en sa boiste, à fin qu'il ne se face une conionction de la teste dudit os contre la cavité de l'os Ischion.

De la situation de la ioincture
du genoil.

*Si la plaie est faite en la ioincture
du genoil, on fera tenir la iambe du ma-
lade non droite , mais un peu courbee,
car si elle demeuroid droite , il ne pour-
roit bien cheminer , ausſy si elle eſtoit
trop ploiee , le malade ſeroit fort boi-
teux, partant ſera tenue un peu flechie.*

De la situation de la ioincture du
pied, & des orteils.

*Si la plaie est en la ioincture du pied,
ou des orteils, ils ſeront tenus droits, &
non courbés , car ſils demeuroident fle-
ſchis , comme en la main, le mallade ne
pourroit bien marcher.*

*Entre tous les accidens qui aduien-
nent en telles plaies, la conuulſion obtiēt
le premier lieu , & pource m'a ſemblé
bon icy traicter de ſes cauſes , & de ſa
curation.*

Du spasme ou conuulsion.

CHAPIT. V.



PASME ou conuulsion, est retraction & mouuement inuolotaire des nerfs, & par consequēt des muscles vers

leur origine, qui est le cerueau, ou la nuque, de sorte qu'il n'est en la puissance du malade estendre selon sa volonté (pendant l'accès) la partie malade, ou tout le corps, si la conuulsion estoit uniuerselle, toutefois l'action n'est pas perdue, comme en paralisie, mais est changée, d'autant que les muscles font mesme action, comme la faculté animale les meut, lors qu'ils se portent naturellement: icelle conuulsion souuentefois occupe tout le corps, & quelquefois une seule partie. Or il y en a de trois sortes & differences: la premiere est dictée

en Grec Tetanos , qui se faict lors que tout le corps se tient droit, & qui ne peut tourner, flechir, ne hausser: La seconde est dicte Opisthotanos, qui se faict lors que tout le corps, teste & col se retirent en la partie posterieure: La troisieme est dicte Emprosthotanos, qui se faict lors que tout le corps, col & teste se retirent à la partie anterieure. Il se faict ausy conuulsion à quelque partie seulement, comme à l'œil, à la langue, au bras, ou à la iambe, lors que le nerf qui sert à telle partie est offensé.

Les causes de conuulsion.

Conuulsion se faict ou par repletion, ou par inanition, ou par compassiō, c'est à dire de quelque douleur: Les causes de repletion sont, quantité d'humeurs, dont le corps est tout plain, par trop boire & manger, ou par intermission d'exercice, ou suppression de quelque va-

cuatiō, cōme flux de s'ag, hemorrhoides, & moys aux femmes, lesquels humeurs rēplissent & imbibēt les nerfs, se faisant s'eslargissent, & sont contrains de s'accourcir, ce qui est manifeste à voir à une esguillette de cheurotin lors qu'o l'elargit, & estant eslargie s'accourcit, ou aux cordes des instruments musicaux, lesquelles, en temps pluvieux pour l'humidité dont elles sont imbues, se rompent, pour la trop grande repletion. Les causes d'inanition sont, grands vomissements, flux de ventre, effusion de sang, laquelle maniere de conuulsiō, si elle aduient à cause d'une grāde plaie, est mortelle, pour les esprits qui seront euacués: icelle suruiuent aussy pour une fieure ardante, laquelle pour sa grande chaleur estrange, auroit consommé & desseché leur humidité substantifique, qui faict que les nerfs se retirent, comme on voit

Hipp. aphor.
3 lib. 5.

un parchemin se retirer & gregiller lors que l'on l'approche près du feu, ou comme l'on voit les cordes de lucht se rompre en esté par trop grande siccité, & icelle conuulsion est incurable, car il est meilleur, comme nous enseigne Hippocrates, que la fièvre suruienne en conuulsion, que la conuulsion en fièvre, ce qui se doit entendre si la conuulsion est causée par repletion, d'autant que la fièvre consomme cet humeur gros & gras, qui est cause de telle maladie. Les causes de conuulsion par compassiō & douleur sont, comme poincture de nerf, soit de corps animé ou inanimé : inanimé, comme d'une esguille, d'une espine, ou lancette, ou semblable chose aigue; l'animé, comme morsure & picqueure de quelque beste veneneuse, ou non veneneuse, comme nous auons dict, ou pour auoir enduré un extreme froit, lequel est
du tout

Hipp. aphor.
57 lib. 4.

du tout contraire aux plaies nerveuses, lesquelles choses excitent extremes douleurs : adonc les nerfs se retirent vers leurs origines, qui est le cerueau, comme vn enfant faict à son pere, luy demandât aide & secours lors qu'il sent quelque douleur : d'abondant spasme vient pour quelque putrefaction d'une vapeur putredineuse, qui s'esleue au cerueau, & est cause que ressentant ceste pourriture, se comprime et retire en soy, & par consequēt tous les nerfs & muscles du corps, comme l'on voit aduenir aux epilepticques.

Les signes de conuulsion, sont difficiles mouuémens d'une partie, ou de tout le corps, contraction des leures, comme sil vouloit rire, astriction des mandibules, avec une sueur uniuerselle, tournement des œils, & peruersion de toute la face.

De la curation.

C H A P I T. V I.

LA curation de spasme se doit diuersifier selon la diuersité de la cause, car celuy qui est faict par repletion est autrement curé, que celuy qui est causé d'inanition, aussy celuy qui est faict par compassion ou douleur. La curation de spasme faict par repletion sera faicte par inanition, ordonnant le bon regime de viure, purgeant, & seignant, & par application des remedes forts resolutifs, aussy par grand exercice, frictions, baings sulphurés, & autres remedes ordonnés selon l'aduis du docte Medecin, à fin de consommer les humeurs superabondans, qui sont en la substance des nerfs, & de toute l'habitude du corps. Les medicaments topicques

ques sont, huilles, onguents, linimens, desquels seront frotés le col & espine du dos, & principalement les parties retraictes: les huilles sont, comme oleum vulpinū, laurinum, camomelinū, lumbricorum, de terebintina, de costo, de castoreo: les onguents, comme Aragon, Agrippæ, de Althea, Martiatum: ou d'un tel liniment. ℞ olei camomil. & laurin. an. ℥ ij, olei vulpini ℥ i, unguent. de alth. & mart. an. ℥ ℞, axungia vulpis ℥ i, aqua vitæ ℥ i ℞, cera quantum suff. fiat. liniment. ad vsum.

Autre. ℞ olei lumb. de spica, & de castor. an. ℥ iij, axungia huma. ℥ i, sulphuris vini ℥ ℞, cera quant. suff. fiat liniment. Autre. ℞ vng. martiat. & agripp. an. ℥ iij, olei de terebint. ℥ ij, olei salviae ℥ ℞, aqua vitæ ℥ i, cera ℥ i ℞, fiat liniment. Il faut ausſy que le patiēt face vne diete & ſue en ſon lit: ſembla-

blemēt qu'il use de la decoctiō de gaiac, car par tels moiens se consommeront vne grande quantité d'excrements, gros, gras, & visqueux, qui sont cause de tel mal. Le spasme & conuulsion faicte par inanitiō sera guerie par son contraire, qui est repletion, nourrissant le malade de viandes succulentes, tendantes à humidité, comme de boüillons & coullis humectans, faicts de chappons, pigeonneaux, veau, & mouton gras, adiontant fueilles de violliers, & mauues: bref usera de toutes viandes engendrāt bon suc. Il usera de conserues, lesquelles ont vertu de conforter les vertus, & humecter toute l'habitude du corps, cōme conserues de buglosse, violles, fleurs de bourroche, & de nenuphar. ce boüillō luy est grandement profitable, ℥ lact. bugloss. portulac. an. m̄i, quatuor seminũ frigid. maior. an. ʒ ss, seminis berberis

beris ʒ i, decoquantur omnia simul cum pullo gallinaceo, capiat ius singulis matutinis. S'il est alteré luy sera ordonné vn tel iulep, ʒ aquæ rosar. ʒ iij, aquæ violar. ℥ ss, saccar. albiss. ʒ vi, fiat iulep, vtatur in siti. S'il est constipé il vsera de clisteres emollients, & humectans, faictz de bouillons de testes & pieds de mouton, auxquels auront cuit mauues, guimaues, paritoire, violles de mars, et autres herbes semblables, ou bien vn de laiçt & d'huile. Pour les choses externes, vsera de liniments & baings, comme d'vn tel liniment. ʒ olei violar. & amigdal. dulc. an. ʒ ij, olei lilior. & lombric. an. ʒ i, axung. porc. recentis ʒ iij, cere nouæ quantum suff. fiat linimentũ, ex quo vnguatur tota spina, & pars affecta.

Exemple d'vn baing remoliçt, humectant & relachant.

℥ fol. mal bismal. violar. pariet.
 an. in vi, seminis lini & fœnug. an. ℥b
 ℥, coquant. in aqua communi, addendo
 olei lilior. lib. 8. fiat balneum, auquel le
 malade entrera estant tiede, & en sortant
 sera essuié avec linges chauds en son lit,
 & reposera, s'il est possible, sans prouo-
 quer la sueur : Et si le malade pouuoit
 porter la despence, on pourroit vser d'un
 baing de laict pur, ou du tout d'huile,
 ou bien egallement proportionnés en-
 semble.

Cure de spasme par consente-
 ment & douleur.

CHAPIT. VII.

LE spasme qui vient par co-
 sentement & douleur est
 curé par remedes cōtrariās
 a icelle, comme si elle proce-
 de d'u-

de d'une picqueure , ou morsure d'une beste veneneuse ; il faut dilater l'ouuer-
ture, & tenir la plaie ouuerte, & inciser
la peau, à fin que l'humidité, & matie-
re veneneuse aye plus libre issue : sem-
blablement on y appliquera des medi-
caments de subtile essence , lesquels se-
ront dessiccatifs & liquides, aians ver-
tu d'attirer ceste venenosité, comme the-
riaque , ou mitridat dissout en eau de
vie , avec un peu de pouldre de mercu-
re, lesquels sont alexipharmques , aus-
sy cornets & ventouses: & si le spasme
est faict par douleur, il faudra user de
medicaments contrariants à icelle cau-
se : si est faict par ponction , ou d'un
nerf, ou d'un tendon , seront appliqués
medicaments propres , comme huile de
terebentine, d'euphorbe, meslees avec eau
de vie, & autres semblables, propres à
la picqueure des nerfs: Et ou tels medi-

ciments ne profiteroient , seroit le plus expedient de couper le nerf , ou tendon tout au trauers, car par ce moië chasque partie se retirera vers son costé, & ainsi n'y aura plus de contractiõ, n'y spasme . Et pour instruire le ieune Chirurgien, i'ay bien voulu mettre icy vne histoire notable , aduenue depuis peu de temps , à fin qu'il cognoisse plus facilement le moyen de traiter le spasme prouenant de telles picqueures.

Histoire d'une
picqueure
faite au bras
du Roy.

Le Roy aiāt la fieure, monsieur Chap-
pelain son premier Medecin, & mon-
sieur Castelan , aussy Medecin de sa
maiesté, & premier de la Roine sa me-
re, luy ordonnerent la seignee, & pour
la faire on appela vn qui auoit le bruit
de bien seigner, & cuidant faire ouuer-
ture à la veue, picqua le nerf, qui fut
cause que promptement s'escria, disant
auoir senti vne tresgrande douleur: &
assés

assés hautement ie dy qu'on desserrast la ligature, ou autrement que le bras s'enfleroit bien fort, ce que subit fut cogneu, avec une contraction du bras, à cause du nerf qui auoit esté picqué, de maniere que le Roy ne le pouuoit flechir, n'y estendre, & disoit sentir une extreme douleur à l'endroit de la picqueure, & en tout le bras: & pour le premier remede i'appliquey vn petit emplastre de basilicon, de peur que la plaie ne se r'aglutinast, & par dessus tout le bras, des cōpreses imbues en oxicrat, avec une ligature expulsive, commençant au carpe, finissant prés l'espaule, à fin de faire renuoy du sang & espris au centre du corps, de peur que les muscles estās charneux & spongieux ne reçeuissent trop grande fluxion, & par consequent inflammation, & autres accidens: & aiāt faiēt cela nous retirasmes à part pour

conclurre , qu'els remedes on y deuoit
appliquer pour ceder la douleur, & ob-
uier aux accidens , qui viennent ordi-
nairement aux picqueures des nerfs
principalemēt, qui sont spasme, gangre-
ne, & mortification, & quelquefois se-
paratiō de l'ame d'avec le corps: & par-
tant ie mis sus le bureau qu'on deuoit
applicquer sus la picqueure de l'huile
de terebentine assés chaude, avec vn peu
d'eau de vie rectifiee, & sur tout le bras
vn emplastre de diacalcitheos , dissout
avec portion de vinaigre , & huile ro-
sart, & qu'on continueroit la susdicte li-
gature expulsine , ce que les Medecins
accorderent, & conclurent tels remedes
utiles & necessaires y estre appliqués,
par ce que ladicte huile, & eau de vie,
aiāts puissance de penetrer au profond
de la picqueure , & secher l'humidité
qui sortoit de la substance du nerf , &
aussy

aussy par la chaleur aétuelle & potentielle, ceder & appaiser la douleur : ce que i'auois faict en cas semblable plusieurs fois, avec bonne & heureuse issue, & ledict emplastre de diacalcitheos auoit pareillement puissance de resoudre l'humeur ia couru au bras, & prohiber la dessente d'autreumeur, semblablement la ligature seruoit de roborer, aétreindre les muscles, & d'exprimer & renuoier aux parties superieures l'humeur qui ia auoit flué, & d'empescher la nouvelle fluxion, & par ce moien la douleur fut cessée: & pour d'auantage resoudre & tarir l'humeur cōioint à la partie, on usa puis après de remedes resolutifs & dessiccatifs, neâtmoins toutes ces choses faictes, le Roy demeura trois mois, & plus, sans pouoir bien flechir, n'y estendre son bras, toutefois graces à Dieu depuis fut par-


faitemēt gueri sans que l'action du bras soit demeuree aucunement vitiee : & auions conclud ou les susdicts medecaments n'eussent esté suffisans pour obtenir la curation, d'user d'huile feruente, à fin de cauteriser le nerf, ou de totalement le coupper, par ce qu'il estoit plus expedient qu'il perdist l'action du bras, que de le laisser mourir miserablement par faute de secours, comme il estoit aduenue de recente memoire à mademoiselle la Bailliue Courtin (demeurant rue S. Croix près la bretonnerie à Paris) pour auoir esté mal seignee, le bras luy tomba en gangrene & totale mortification, dont elle mourut par faute d'auoir esté bien secourue au commencement.

Hipp. aphor.
lib. 5.

Le spasme ausy suruiuent par trop grand froid, d'autant qu'il est ennemy du cerueau, spinalle medulle, & nerfs:
le ma-

le malade sera mis en lieu chaud comme en estuues, se donnant de garde de le poser incontinent au grand feu, ou en baing tiede, & luy seront appliqués les liniments chauds cy dessus mentionnés le long de l'espine du dos, & à la partie malade. Or le Chirurgien doit auoir esgart, lors que le malade commence à venir en spasme, qu'il luy face tenir un baston entre ses dents, à fin que les mandibules & dents ne se serrent du tout, car par ce moyen quelques uns se sont couppés la langue, qui n'est sans grand preiudice du patient : & si les dents estoient fort serrees, la bouche sera ouuerte par un instrument, qui se dilate & ouure par le benefice d'une vis, tant & si peu qu'on veut, dont tu as icy le portrait d'un qui est ouuert, & d'un autre fermé.

Figure d'un dilatatoire pour ouvrir la bouche, les dents estans ferrees.



Or i'ay proposé en bref amasser tous mes liures en un volume avec autres traités, desquels n'ay faict encore mention, ensemble les figures & portraicts, tant de l'anathomie que des instrumens Chirurgicaux, la ou ie donneray leur nom, & le moyẽ d'en user, ainsy que i'ay promis à m^o Roy (dont luy en ay donné n'aguere un b^o eschantillon) si il plaist à Dieu & si ie vy: lequel ie supplie de tout le pouuoir qu'il a mis en moy par sa bonté infinie, qu'il luy plaise nous faire entendre la cause & fin pour laquelle nous a donné estre, à fin que ne soyons frustrés d'icelle.

FIN EST LA MORT ET
PRINCIPE DE VIE.



ESTABLISHED 1847
BY THE ALBANY